



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>


RARY





+


KPC 1233












CLAUDIANI
OPERA.



CLAUDII CLAUDIANI
=
OPERA,

EX EDITIONE

PETRI BURMANNI SECUNDI,

SEDULÂ RECENSIONE ACCURATA.



LONDINI:

SUNTIBUS RODWELL ET MARTIN;
J. BOOKER; BALDWIN, CRADOCK, ET JOY;
S. ET W. B. WHITTAKER; J. WALKER; EDWARDS ET
KNIBB; J. ROBINSON; ET B. REYNOLDS:

EXCUDIT T. DAVISON.

1819.

KPC 1233

~~LC 46.37~~

1457-22

A

Harvard College Library

Bowie Collection

C'9 of

Mrs. E.

Quæ, in nostrâ editione, uncinis [hunc in morem] inclusa leguntur, ea vel plane adulterina sunt, vel, propter scripturæ varietatem, pro incertis habenda, vel, licet reipsâ fortasse germana, criticorum tamen dissensione in dubium vocata.

BOUND JUL 19 1913

CL. CLAUDIANI

IN

PROBINI ET OLYBRII FRATRUM

CONSULATUM

PANEGYRIS.



SOL, qui, flammigeris mundum complexus habenis,
Volvis inexhausto redeuntia sæcula motu,
Sparge diem meliore comâ; crinemque reperi,
Blandius elato surgant temone jugales,
Efflantes roseum frenis spumantibus ignem. 5
Jam nova germanis vestigia torqueat annus
Consulibus; lætique petant exordia menses.
Scis genus Auchenium; nec te latuère potentes
Anniadæ: nam sæpe soles ductoribus illis
Instaurare vias, et cursibus addere nomen. 10
His neque per dubium pendet Fortuna favorem,
Nec novit mutare vices: sed fixus in omnes
Cognatos procedit honos: quemcumque requires
Hac de stirpe virum, certum est de consule nasci.
Per fasces numerantur avi; semperque renatâ 15
Nobilitate virent, et prolem fata sequuntur,
Continuum simili servantia lege tenorem:
Nec quisquam procerum tentat, licet ære vetusto

Floreat, et claro cingatur Roma senatu,
 Se jactare parem: sed, primâ sede relictâ 20
 Aucheniis, de jure licet certare secundo.
 Haud secus ac, tacitam Lunâ regnante per Arcton,
 Sidereæ cedunt acies, eum, fratre retuso,
 Æmulus adversis flagraverit ignibus orbis.
 Tunc jubar Arcturi languet: tunc fulva Leonis 25
 Ira perit: Plaustro jam rara intermicat Arctos,
 Indignata tegi; jam, caligantibus armis,
 Debilis Orion dextram miratur inermem.
 Quem prius aggrediar? veteris quis facta Probini
 Nesciat? aut nimias laudes ignoret Olybrî? 30
 Vivit adhuc, completque vagis sermonibus aures,
 Gloria fusa Probi, quam nec ventura silebunt
 Lustra, nec ignotâ rapiet sub nube vetustas.
 Illum fama vehit trans æquora, transque remotas
 Tethyos ambages, Atlanteosque recessus. 35
 Audiit et, gelido si quem Mæotia pascit
 Sub Jove, vel calido si quis [conjunctus] in axe
 Nascentem te, Nile, bibit. Virtutibus ille
 Fortunam domuit; nunquamque levantibus alte
 Intumuit rebus; sed mens, circumflua luxu, 40
 Noverat intactum vitio servare rigorem.
 Hic non divitias nigrantibus abdidit antris;
 Nec tenebris damnavit opes: sed, largior imbre,
 Sueverat innumeras hominum ditare catervas.
 Quippe, velut densos, currentia muncra, nimbos, 45
 Cernere semper erat: populis undare penates;
 Assiduos intrare inopes, remeare beatos.
 Præceps illa manus fluvios superabat Iberos,
 Aurea dona vomens. Sic quis, tellure revulsâ,
 Sollicitis fodiens rimatur collibus aurum: 50
 Quantum stagna Tagi, rudibus stillantia venis,
 Effluxêre decus: quanto pretiosa metallo
 Hermi ripa micat: quantas per Lydia culta
 Despumât rutilas dives Pactolus arenas.
 Non, mihi centenis resonent si vocibus ora, 55
 Multifidusque ruat centum per pectora Phœbus,

Acta Probi narrare queam, quot in ordine gentes
Rexerit, ad summi quoties fastigia juris
Venerit, Italiæ late cum frena teneret,
Illyricosque sinus, et quos arat Africa campos. 60
Sed nati vicêre patrem; solique merentur
Victores audire Probi: non contigit illi
Talis honor, primâ cum parte viresceret ævi:
Non consul cum fratre fuit. Vos nulla fatigat
Cura, diu majora petens: non atrox mentem 65
Spes agit, et longo tendit præcordia voto.
Cœpistis, quâ finis erat: primordia vestra
Vix pauci meruêre senes: metasque tenetis
Ante, genas dulces quam flos juvenilis inumbret,
Oraque ridenti lanugine vestiât ætas. 70

Tu, precor, ignarum doceas, Parnassia, vatem,
Quis Deus ambobus tanti sit muneris auctor.

Postquam, fulmineis impellens viribus hostem,
Belliger Augustus trepidas laxaverat Alpes,
Roma, Probo cupiens dignas persolvere grates, 75
Sedula pro natis dominum flexura rogando,
Ire parat. Famuli currum junxêre volentem,
Impetus, horribilisque Metus, qui, semper agentes
Prœlia, cum fremitu Romam comitantur anhelos,
Sive petat Parthos, seu cuspide turbet Hydaspen. 80
Hic ligat axe rotas: hic sub juga ferrea mittit
Cornipedes, rigidisque docet servire lupatis.
Ipsa, triumphatis quâ possidet æthera regnis,
Assilit, innuptæ ritus imitata Minervæ.
Nam neque cæsariem crinali stringere cultu, 85
Colla nec ornatu patitur mollire retorto:
Dextrum nuda latus, niveos exserta lacertos,
Audacem reteggit mammam; laxumque coërcens
Mordet gemma sinum: nodus, qui subleuat ense,
Album puniceo pectus discriminat ostro. 90
Miscetur decori virtus; pulcherque severo
Armatur terrore pudor; galeæque minaci
Flava cruentarum prætenditur umbra jubarum;
Et formidato clypeus Titana lacessit

Lupine, quem totâ variârat Mulciber arte. 95
 Hîc patrius Mavortis amor, fetusque notantur
 Romulei: pius amnis inest, et bellua nutrix.
 Electro Tiberis, pueri formantur in auro:
 Fingunt æra lupam: Mavors adamante coruscat.
 Jam, simul emissis, rapido velocior Euro, 100
 Fertur equis, stridunt Zephyri; cursuque rotarum
 Saucia dividuis clarescunt nubila sulcis:
 Nec traxêre moras, sed lapsu protinus uno,
 Quem poscunt, tetigêre locum; quâ fine sub imo
 Angustant aditum curvis anfractibus Alpes, 105
 Claustraque congestis scopulis durissima tendunt,
 Non aliâ reseranda manu, sed pervia tantum
 Augusto, geminisque fidem mentita tyrannis.
 Semirutæ turres, avulsaque mœnia, fumant.
 Crescunt in cumulum strages, vallemque profundam
 Æquavêre jugis: stagnant immersa cruore 111
 Corpora: turbantur permixto funere Manes.
 : Hapd procul, exacto lætus certamine, victor
 Cæspite gramineo consederat, arbore fultus
 Acclines humeros: dominum gavisa coronat 115
 Terra suum, surguntque toris majoribus herbæ.
 Sudor adhuc per membra calet; creberque recurrit
 Halitus, et placidi radiant in casside vultus.
 Qualis, letiferâ populatus cæde Gelonos,
 Procubat horrendus Getico Gradivus in Hæmo. 120
 Exuvias Bellona levat; Bellona tepentes
 Pulvere solvit equos; immensaque cornus in hastam
 Porrigitur, tremulisque ferit splendoribus Hebrum.
 Ut stetit ante ducem discussas Roma per auras,
 Conscia ter sonuit rupes, et inhorruit atrum 125
 Majestate nemus. Prior hic, "O numen amicum!"
 Dux ait, "et legum genitrix, longeque regendo
 Circumfusa polo, consors adjuncta Tonanti,
 Dic, agetum, quæ causa viæ? cur deseris arces
 Ausonias, cœlumque tuum? dic, maxima rerum. 130
 Non ego vel Libycos cessem tolerare vapores,
 Sarmaticosve pati medio sub frigore Coros,

Si tu, Roma, velis. Pro te, quascumque per oras
 Ibimus; et, nullâ sub tempestate timentes,
 Solstitio Meroën, brumâ tentabimus Istrum." 135

Tum regina refert: "Non me latet, inclyte rector,
 Quam tua pro Latio victricia castra laborent:
 Nec quod servitium rursus, Furisæque rebelles
 Edomitæ, paribus sub te cecidêre triumphis.
 Sed, precor, hoc donum, cum libertate recenti, 140
 Adde, precor, si vera manet reverentia nostri.

Sunt mihi pubentes alto de semine fratres,
 Pignora cara Probi, festâ quos luce creatos
 Ipsa meo fovi gremio: cunabula parvis
 Ipsa dedi, cum matris onus Lucina beatum 145
 Solveret, et magnos proferrent sidera partus.

His ego nec Decios pulchros, fortesve Metellos,
 Prætulerim; non, qui Pœnum domuêre ferocem,
 Scipiadas, Gallisque genus fatale, Camillos.
 Pieriis pollent studiis, multoque redundant 150
 Eloquio: nec desidiis, dapibusve paratis,

Indulgere juvat; nec tanta licentia vitæ
 Abripit, ut mores ætas lasciva relaxet:
 Sed, gravibus curis animum sortita senilem,
 Ignea longævo frenatur corde juvenus. 155

Illis, quam propriam ducunt ab origine, sortem
 Oramus, præbere velis, annique futurum
 Devoveas venientis iter: non improba posco:
 Non insueta dabis: domus hoc de more requirit.
 Annue: sic nobis Scythicus famuletur Araxes, 160
 Sic Rhænus per utrumque latus; Medisque subactis
 Nostra Semiramidæ timeant insignia turre:
 Sic fluat attonitus Romana per oppida Ganges."

Ductor ad hæc: "Optata jubes; ultroque volentem,

Diva, rogas: non hæc precibus tentanda fuissent. 165
 Usque adeone meam condunt obliviam mentem,
 Ut pigeat meminisse Probi, quo vindice totam
 Vidimus Hesperiam, fessasque resurgere gentes?
 Ante dabunt hiemes Nilum; per flumina damæ

Errabunt, glacieque niger-damnabitur Indus ; 170
 Ante, Thyesteis iterum conterrita mensis,
 Intercisa dies refugos vertetur in Ortus,
 Quam Probus a nostro possit discedere sensu."

Dixerat, et velox jam nuntius advolat Urbem.
 Extemplo strepuere chori ; colleeque, canoris 175
 Plausibus impuls, septenâ voce resultant.
 Latatur veneranda parens, et pollice docto
 Jam parat auratas trabeas, cinctusque micantes
 Stamine, quod molli tondent de stipite Seres,
 Frondea lanigeræ carpentes vellera silvæ ; 180
 Et longum tenues tractus producit in aurum,
 Filaeque concreto cogit squalere metallo.
 Qualis purpureas præbebat candida vestes
 Numinibus Latona suis, cum sacra redirent
 Ad loca nutricis, jam non errantia, Deli ; 185
 Illa feros saltus et desolata relinquens
 Mænala, lassato certis venatibus arcu ;
 Phœbus adhuc nigris rorantia tela venenis,
 Exstincto Pythone, ferens. Tunc insula notos
 Lambit amica pedes, ridetque Ægæus alumnis 190
 Lenior, et blando testatur gaudia fluctu.

Sic Proba præcipuo natos exornat amictu ;
 Quæ decorat mundum ; cujus Romana potestas
 Fetibus augetur. Credas ex æthere lapsam
 Stare Pudicitiam, vel sacro thure vocatam 195
 Junonem Inachiis oculos advertere templis.
 Talem nulla refert antiquis pagina libris,
 Nec Latæ cecinere tubæ, nec Graia vetustas :
 Coniuge digna Probo : nam tantum cœtibus exstat
 Feminæis, quantum supereminet ille maritos : 200
 Ceu sibi certantes, sexus quid possit uterque,
 Hunc legere torum : taceat Nereïda nuptam
 Pelion : o duplici fecundam consule matrem,
 Felicemque uterum, qui nomina parturit annis !

Ut sceptrum gessere manu, membrisque rigentes
 Aptavere togas, signum dat summus hiulcâ 206
 Nube Pater ; gratamque facem per inane rotantes,

- Prospera vibrati tonuerunt omīna nimbi. 208
 Accepit sonitus curvis Tiberinus in antris,
 Imā valle sedens; arrectisque auribus hæsit, 210
 Unde repentinus cœli fragor. Illicet herbis
 Pallentes thalamos, et structa cubilia musco,
 Deserit, ac Nymphis urnam commendat herilem.
 Illi glauca nitent hirsuto lumina vultu,
 Cœruleis infecta notis, reddentia patrem 215
 Oceanum: crispo densatur gramine colla.
 Vertice luxuriat toto crinalis arundo,
 Quam neque fas Zephyris frangi, nec, sole perustam,
 Æstivo candore mori; sed vivida frondet,
 Æquævum complexa caput: taurina levantur 220
 Cornua temporibus raucos sudantia rivos.
 Destillant per pectus aquæ: frons hispida manat
 Imbribus: in liquidos fontes se barba repectit.
 Palla graves humeros velat, quam neverat uxor
 Iliæ, percurrrens vitreas sub gurgite telas. 225
 Est in Romuleo procumbens insula Tibri,
 Quâ media geminas interfluit alveus urbes
 Discretas subeunte freto; pariterque minantes
 Ardua turrigeræ surgunt in culmina ripæ.
 Hic stetit, et subitum prospexit ab aggere votum; 230
 Unanimes fratres, juncto stipante senatu,
 Ire forum, strictasque procul radiare secures,
 Atque uno bijuges tolli de limine fascēs.
 Obstupuit visu; suspensaque gaudia vocem
 Oppressam tenuère diu; mox inchoat ore: 235
 "Respice, si tales jactas aluisse fluentis,
 Eurota Spartane, tuis. Quid protulit æquum
 Falsus olor, valido quamvis discernere cæstu
 Nôrint, et ratibus sævas arcere procellas?
 En nova Ledæis soboles fulgentior astris! 240
 Ecce mei cives! quorū jam Signifer optat
 Adventum, stellisque parat convexa futuris.
 Jam per noctivagos dominetur Olybrius axes,
 Pro Polluce rubens, pro Castore flamma Probini.
 Ipsi vela regent: ipsis donantibus auras, 245

Navita tranquillo moderabitur æquore pinum. 246
 Nunc pateras libare Deis, nunc solvere multo
 Nectare corda libet : niveos jam pandite coetus,
 Naïdes, et totum violis prætexite fontem.
 Mella ferant silvæ : jam profluat ebrius amnis, 250
 Mutatis in vina vadis : jam sponte per agros
 Sudent irriguæ spirantia balsama venæ.
 Currat, qui sociæ roget in convivia mensæ
 Indigenas fluvios, Italis quicumque suberrant
 Montibus, Alpinasque bibunt de more pruinas ; 255
 Vulturnusque rapax, et Nar vitiat odor
 Sulfure, tardatusque suis erroribus Ufens ;
 Et Phaëthontæ perpressus damna ruinæ
 Eridanus, flavæque terens querceta Maricæ
 Liris, et Cæbalis qui temperat arva Galesus. 260
 Semper honoratus nostris celebrabitur undis
 Iste dies : semper dapibus recoletur opimis."
 Sic ait : et Nymphæ, patris præcepta secutæ,
 Tecta parant epulis ; ostroque infecta corusco,
 Humida gemmiferis illuxit regia mensis. 265
 O bene signatum fraterno nomine tempus !
 O consanguineis felix auctoribus anne !
 Incipe quadrifidum Phœbi torquere laborem.
 Prima tibi procedat hiems, non frigore torpens,
 Non canas vestita nives, non aspera ventis, 270
 Sed tepido calefacta Noto : ver inde serenum
 Protinus, et liquidi clementior aura Favoni,
 Pratis te croceis pingat ; te messibus æstas
 Induat ; auctumnusque madentibus ambiat uvis.
 Omni nobilior lustris tibi gloria soli 275
 Contigit, exactum nunquam memorata per ævum,
 Germanos habuisse duces : te cuncta loquetur
 Tellus : te variis scribent in floribus Horæ ;
 Longaque perpetui ducent in sæcula fasti.

CL. CLAUDIANI

IV

RUFINUM

LIBER I.

PRÆFATIO.

PHŒÆO domitus Python cum decidit arcu,
Membraque Cirrhæo fudit anhela jugo,
Qui spiris tegetet montes, hauriret hiatu
Flumina, sanguineis tangeret astra jubis ;
Jam liber Parnassus erat ; nexuque soluto, 5
Cœperat erectâ surgere fronde nemus :
Concussæque diu spatiosis tractibus orni
Securas ventis explicuère comas :
Et qui vipereo spumavit sæpe veneno
Cephissos, liquidis purior ibat aquis. 10
Omnis, " Iô Pæan ! " regio sonat : omnia Phœbum
Rura canunt : tripodas plenior aura rotat.
Auditoque procul Musarum carmine ducti,
Ad Themidis coëunt antra severa Dei.
Nunc, alio Domini telis Pythone peremto, 15
Convenit ad nostram sacra caterva lyram,
Qui stabilem servant Augustis fratribus orbem ;
Justitiâ pacem, viribus arma regunt.

IN RUFINUM

LIBER I.

SÆPE mihi dubiam traxit sententia mentem,
Curarent Superi terras, an nullus inesset
Rector, et incerto fluerent mortalia casu.
Nam, cum dispositi quæstissem fœdera mundi,
Præscriptosque mari fines, [annis]que meatus, 5
Et lucis noctisque vices; tunc omnia rebar
Consilio firmata Dei, qui lege moveri
Sidera, qui fruges diverso tempore nasci,
Qui variam Phœben alieno jusserit igni
Compleri, Solemque suo; porrexit undis 10
Litora; tellurem medio libraverit axe.
Sed, cum res hominum tantâ caligine volvi
Adspicerem, lætosque diu florere nocentes,
Vexarique pios; rursus labefacta cadebat
Relligio; causæque viam non sponte sequebar 15
Alterius, vacuo quæ currere semina motu
Affirmat, magnumque novas per inane figuras
Fortunâ, non arte, regi; quæ Numina sensu
Ambiguo, vel nulla putat, vel nescia nostri.
Abstulit hunc tandem Rufini pœna tumultum, 20
Absolvitque Deos: jam non ad culmina rerum
Injustos crevisse queror: tolluntur in altum,
Ut lapsu graviore ruant. Vos pandite vati,
Pierides, quo tanta lues eruperit ortu.
Invidiæ quondam stimulis incanduit atrox 25
Aleto, placidas late cum cerneret urbes.
Protinus infernas ad limina tetra sorores,

Concilium deforme, vocat : glomerantur in unum
 Innumeræ pestes Erebi, quascumque sinistro
 Nox genuit fetu : nutrix Discordia belli, 30
 Imperiosa Fames, leto vicina Senectus,
 Impatiensque sui Morbus, Livorque secundis
 Anxius, et scisso mœrens velamine Luctus,
 Et Timor, et cæco præceps Audacia vultu,
 Et Luxus populator opum, quem semper adhærens 35
 Infelix humili gressu comitatur Egestas,
 Fœdaque Avaritiæ complexæ pectora matris,
 Insomnes longo veniunt examine Cursæ.
 Complentur vario ferrata sedilia cœtu ;
 Torvaque collectis stipatur curia monstria. 40
 Aleto stetit in mediis ; vulgusque tacere
 Jussit, et obstantes in tergum reppulit hydros,
 Perque humeros errare dedit : tum corde sub imo
 Inclusam rabidis patefecit vocibus iram.
 “ Siccine tranquillo produci sæcula cursu, 45
 Sic fortunatas patiemur vivere gentes ?
 Quæ nova corrumpit nostros clementia mores ?
 Quo rabies innata perit ? quid inania prosunt
 Verbera ? quid facibus nequidquam cingimur atris ?
 Heu nimis ignavæ ! quas Jupiter arcet Olympo, 50
 Theodosius terris. En, aurea nascitur ætas :
 En, proles antiqua redit. Concordia, Virtus,
 Cumque Fide Pietas, altâ cervice vagantur,
 Insignemque canunt nostrâ de plebe triumphum.
 Pro dolor ! ipsa mihi, liquidas delapsa per auras, 55
 Justitia insultat ; vitisque a stirpe recisis,
 Elicit oppressas tenebroso carcere leges,
 At nos indecores longo torpebimus ævo,
 Omnibus ejectæ regnis ? Agnoscite tandem,
 Quid Furias deceat : consuetas sumite vires ; 60
 Conventuque nefas tanto decernite dignum.
 Jam cupio Stygiis invadere nubibus astra,
 Jam flatu violare diem, laxare profundo
 Frena mari, fluvios ruptis immittere ripis,
 Et rerum vexare fidem.” Sic fata cruentum 65

Mugit, et totos serpentūm erexit hiatus, 66
 Noxiaque effudit concusso crine venena.
 Anceps motus erat vulgi: pars maxima bellum
 Indicit Superis; pars Ditis jura tuetur:
 Dissensuque alitur rumor; ceu murmurat alti 70
 Impacata quies pelagi, cum, flamine fracto,
 Durat adhuc sævitque tumor, dubiumque per æstum
 Lassa recedentis fluitant vestigia venti.
 Improba mox surgit tristi de sede Megæra,
 Quam penes insani fremitus, animique profanus 75
 Error, et undantes spumis furialibus iræ.
 Non nisi quæsitum cognatâ cæde cruorem,
 Illicitumve, bibit, patrius quem fuderit ensis,
 Quem dederint fratres. Hæc terruit Herculis ora,
 Et defensores terrarum polluit arcus; 80
 Hæc Athamantææ direxit spicula dextræ;
 Hæc, Agamemnonios inter bacchata penates,
 Alternis lusit jugulis; hac auspice, tædæ
 Œdipoden matri, natæ junxere Thyesten.
 Quæ tunc horrisonis effatur talia dictis: 85
 “Signa quidem, o sociæ! Divos attollere contra
 Nec fas est, nec posse reor: sed lædere mundum
 Si libet, et populis commune intendere letum,
 Est mihi prodigium cunctis immanius hydriæ,
 Tigride mobilius fetâ, violentius Austris 90
 Acribus, Euripi refluis incertius undis,
 Rufinus; quem prima meo, de matre cadentem,
 Suscepi gremio: parvus reptavit in isto
 Sæpe sinu; tenero [perque] ardua colla volutus
 Ubra quæsiuit fletu; linguisque trisulcis 95
 Mollia lambentes finxerunt ora cerastæ.
 Meque etiam tradente, dolos artemque nocendi
 Edidicit: simulare fidem, sensusque minaces
 Protegere, et blando fraudem prætexere risu,
 Plenus sævitæ, lucrique cupidine fervens. 100
 Non Tartessiacis illum satiârît arenis
 Tempesta pretiosa Tagi, non stagna rubentis
 Aurea Pactoli: totumque exhausit Hermum;

Ardebit majore siti : quam fallere mentes
 Doctus, et unanimos odiis turbare sodales ! 105
 Talem progenies hominum si prisca tulisset,
 Pirithoum fugeret Theseus ; offensus Oresten
 Desereret Pylades ; odisset Castora Pollux.
 Ipsa quidem fateor vinci ; rapidoque magistram
 Prævenit ingenio : nec plus sermone morabor : 110
 Solus habet, quidquid scelerum possedimus omnes.
 Hunc ego, si vestrae res est accommoda turbæ,
 Regalem ad summi producam principis aulam.
 Sit licet ille Numâ gravior, sit denique Minos ;
 Cedet ; et insidiis nostri flectetur alumni." 115

Orantem sequitur clamor : cunctæque profanas
 Porrexere manus, inventaque tristia laudant.
 Illa, ubi cœruleo vestes connexuit angue,
 Nodavitque adamante comas, Phlegethonta sonorum
 Poscit ; et ambusto flagrantis ab aggere ripæ 120
 Ingentem piceo succendit gurgite pinum ;
 Pigraque veloces per Tartara concutit alas.

Est locus, extremum pandit quâ Gallia litus,
 Oceani prætentus aquis, ubi fertur Ulysses
 Sanguine libato populum movisse silentem. 125
 Illic umbrarum tenui stridore volantûm
 Flebilis auditur questus : simulacra coloni
 Pallida, defunctasque vident migrare figuras.
 Hinc Dea prosiluit, Phœbique egressa serenos
 Infecit radios, ululatuque æthera rupit 130
 Terrifico. Sensit ferale Britannia murmur ;
 Et Senonum quatit arva fragor ; revolutaque Tethys
 Substitit, et Rhenus projectâ torpuit urnâ.
 Tunc, in canitiem mutatis sponte colubris,
 Longævum mentita senem, rugisque severas 135
 Persulcata genas, et ficto languida passu,
 Invadit muros Elusæ, notissima dudum
 Tecta petens, oculisque diu viventibus hæsit,
 Pejorem mirata virum : tunc talia fatur :
 " Otia te, Rufine, juvant ? frustra que juventæ 140
 Consumis florem patriis inglorius arvis ?

Heu ! nescis, quid fata tibi, quid sidera donent, 142
 Quid Fortuna paret. Toti dominabere mundo,
 Si parere velis. Artus ne sperne seniles :
 Namque mihi magicæ vires, ævique futuri 145
 Præscius ardor inest : novi, quo Thessala cantu
 Eripiat lunare jubar, quid signa sagaxis
 Ægypti valeant, quâ gens Chaldæa vocatis
 Imperet arte Deis : nec me latuère fluentes
 Arboribus succi, funestarumque potestas 150
 Herbarum, quidquid letali germine pollens
 Caucasus, et Scythicæ vernant in gramina rupes,
 Quas legit Medea ferox, et callida Circe.
 Sæpius horrendos Manes sacrisque citavi
 Nocturnis Hecaten, et condita funera traxi, 155
 Carminibus victura meis ; multosque canendo,
 Quamvis Parcarum restarent fila, peremi :
 Ire vagas quercus, et fulmen stare coëgi :
 Versaque non pronò curvavi flumina lapsu,
 In fontes reditura suos : neu vana locutum 160
 Me fortasse putes, mutatos cerne penates."

Dixerat : et nivæ (mirum !) cœpère columnæ
 Ditari, subitoque trabes lucere metallo.
 Illecebris capitur, nimiumque elatus avaro
 Pascitur intuitu : sic rex ad prima tumebat 165
 Mæonius, pulchro cum verteret omnia tactu.
 Sed, postquam riguisse dapes, fulvamque revinctos
 In glaciem vidit latices ; tum munus acerbum
 Sensit, et invisò votum damnavit in auro.

Ergo animi victus, " Sequimur, quocumque vocabis,
 Seu tu vir, seu Numen," ait : patriâque relictâ, 171
 Eoas jussu Furia tendebat ad arces,
 Instabilesque olim Symplegadas, et freta remis
 Inclyta Thessalicis ; celsâ quâ Bosporus urbe
 Splendet, et Odrysiis Asiam determinat oris. 175
 Ut, longum permensus iter, ductusque maligno
 Stamine fatorum, claram subrepsit in aulam,
 Ilicet ambitio nasci, discedere rectum ;
 Venum cuncta dari : profert arcana ; clientes

Fallit, et ambitos a principe vendit honores. 180
 Ingeminat crimen; commoti pectoris ignem
 Nutrit, et exiguum stimulando vulnus acerbat.

Ac velut innumeros amnes accedere Nereus
 Nescit; et, undantem quamvis hinc hauriat Istrum,
 Hinc bibat æstivum septeno gurgite Nilum, 185

Par semper similisque manet; sic fluctibus auri
 Expleri sitis ista nequit; cuicumque monile
 Contextum gemmis, aut prædia culta fuissent,
 Rufino populandus erat; dominoque parabat
 Exitium fecundus ager: metuenda colonis 190

Fertilitas: laribus pellit, detrudit avitis
 Finibus: aut aufert vivis, aut occupat hæres.
 Congestæ cumulantur opes, orbisque ruinas
 Accipit una domus: populi servire coacti,
 Plenaque privato succumbunt oppida regno. 195

Quo, vesane, ruis? teneas utrumque licebit
 Oceanum, laxet rutilos tibi Lydia fontes,
 Jungantur solium Croesi Cyrique tiara;
 Nunquam dives eris, nunquam satiabere quæstu.
 Semper inops, quicumque cupit. Contentus honesto
 Fabricius parvo spernebat munera regum; 201
 Sudabatque gravi consul Serranus aratro;
 Et casa pugnaces Curios angusta tegebat.

Hæc mihi paupertas augustior: hæc mihi tecta
 Culminibus majora tuis: tibi quærit inanes 205

Luxuries nocitura cibos; mihi donat inemptas
 Terra dapes. Rapiunt Tyrios ibi vellera fucos,
 Et picturatæ saturantur murice vestes:

Hic radiant flores, et prati viva voluptas
 Ingenio variata suo: fulgentibus illic 210

Surgunt strata toris; hic mollis panditur herba,
 Sollicitum curis non abruptura soporem.

Turba salutantum latas ibi perstrepat ædes;
 Hic avium cantus, labentis murmura rivi.
 Vivitur exiguo melius: natura beatis 215

Omnibus esse dedit, si quis cognoverit uti.

Hæc si nota forent, frueremur simplice cultu:

Classica non fremerent: non stridula fraxinus iret:
Non ventus quateret puppes, non machina muros.

Crescebat scelerata sitis, prædæque recentis 220

Incestus flagrabat amor; nullusque petendi

Cogendive pudor. Crebris perjuria nectit

Blanditiis: sociat perituro foedere dextras.

Si semel e tantis poscenti quisque negâsset,

Effera prætumido quatiebat corda furore. 225

Quæ sic Gætuli jaculo percussa læna,

Aut Hyrcana premens raptorem bellua partûs,

Aut serpens calcata, furit? Jurata Deorum

Majestas teritur: nusquam reverentia mensæ:

Non conjux, non ipse simul, non pignora cæsa 230

Sufficiunt odiis: non extinxisse propinquos,

Non notos egisse sat est: excindere cives

Funditus, et nomen gentis delere, laborat.

Nec celeri mittit leto: crudelibus ante

Suppliciis fruitur: cruciatus, vincla, tenebras, 235

Dilato mucrone, parat: pro! sævior ense

Parcendi rabies, concessaque vita dolori!

Mors adeone parum est? causis fallacibus instat:

Arguit attonitos, se iudice; cætera segnis,

Ad facinus velox; penitus regione remotas 240

Impiger ire vias: non illum Sirius ardens,

Brumæ Rhipæo stridens Aquilone retardat.

Effera torquebant avidæ præcordia curæ,

Effugeret ne quis gladios, neu perderet ullum,

Augusto miserante, nefas. Non flectitur annis; 245

Non ætate labat: juvenum rorantia colla

Ante patrum vultus strictâ cecidêre securi.

Ibat grandævus, nato moriente superstes,

Post trabeas exsul. Quis prodere tanta relatu

Funera, quis cædes possit deflere nefandas? 250

Quid tale immanes unquam gessisse feruntur

Vel Sinis Isthmiacâ pinu, vel rupe profundâ

Sciron, vel Phalaris tauro, vel carcere Sulla?

O mites Diomedis equi! Busiridis aræ

Clementes! jam, Cinna, pius, jam, Spartace, lenis,

Rufino collatus, eris. Dejecerat omnes 256
 Occultis odiis terror; tacitique sepultos
 Suspirant gemitus, indignarique verentur.

At non magnanimi virtus Stilichonis eodem
 Fracta metu: solus medio sed turbine rerum 260
 Contra letiferos rictus, contraque rapacem
 Movit tela feram, volucris non præpete cursu
 Vectus equi, non Pegaseis adjutus habenis.
 Hic cunctis optata quies, hic sola pericli
 Turris erat, clypeusque trucem projectus in hostem:
 Hic profugis sedes, adversaque signa furori; 266
 Servandis hic castra bonis. Huc usque minatus
 Hærebat, retroque fugâ cedebat inerti.

Haud secus, hiberno tumidus cum vortice torrens
 Saxa rotat, volvitque nemus, pontesque revellit, 270
 Frangitur objectu scopuli; quærensque meatum
 Spumat, et illisâ montem circumtonat undâ.
 Quâ dignum te laude feram, qui pæne ruenti
 Lapsuroque tuos humeros objeceris orbi?

Te nobis, trepidæ ceu sidus dulce carinæ, 275

Ostendêre Dei, geminis quæ lassa procellis
 Tunditur, et victo trahitur jam cæca magistro.

Inachus rubro perhibetur in æquore Perseus
 Neptuni domuisse pecus, sed tutior alis;

Te non penna vehit: rigidâ cum Gorgone Perseus;

Tu non vipereo defensus crine Medusæ. 281

Illum vilis amor suspensæ virginis egit;

Te Romana salus. Taceat superata vetustas:

Herculeos conferre tuis jam desinat actus.

Una Cleonæum pascebat silva leonem: 285

Arcadiæ saltum vastabat dentibus unum

Sævus aper: tuque o, compressâ matre rebellis,

Non ultra Libyæ fines, Antæe, nocebas:

Solaque fulmineo resonabat Creta juvenco;

Lernæamque virens obsederat Hydra paludem. 290

Hoc monstrum non una palus, non una tremebat

Insula: sed Latiâ quidquid ditione subactum

Vivit, et a primis Ganges horrebat Iberis.

Hoc neque Geryones triplex, nec turbidus Orci
 Janitor, æquabunt; nec, si concurrat in unum 295
 Vis Hydræ, Scyllæque fames, et flamma Chimærae.
 Certamen sublime diu, sed moribus impar,
 Virtutum scelerumque fuit. Jugulare minatur;
 Tu prohibes: ditem spoliât; tu reddis egenti.
 Eruit; instauras: accendit prælia; vincis. 300
 Ac velut infecto morbus crudescere cœlo
 Incipiens, primos pecudum depascitur artus;
 Mox populos urbesque rapit, ventisque perustis
 Corruptos Stygiam pestem desudat in amnes;
 Sic avidus prædo jam non per singula sævit, 305
 Sed sceptris inferre minas, omnique perempto
 Milite, Romanas ardet prosternere vires.
 Jam gentes Istrumque movet, Scythiamque receptat
 Auxilio, traditque suas hostilibus armis
 Reliquias. Mixtis descendit Sarmata Dacis; 310
 Et qui cornipedes in pocula vulnerat audax
 Massagetes, cæsamque bibens Mæotin Alanus,
 Membraque qui ferro gaudet pinxisse Gelonus;
 Rufino collecta manus. Vetat ille domari;
 Innectitque moras, et congrua tempora differt. 315
 Nam tua cum Geticas stravisset dextra catervas,
 Ulta ducis socii letum, parsque una maneret
 Debilior, facilisque capi; tunc impius ille
 Proditor imperii, conjuratusque Getarum
 Distulit instantes, eluso principe, pugnas, 320
 Hunnorum laturus opem: quos affore bello
 Nôrat, et invisis mox æe conjungere castris.
 Est genus extremos Scythiæ vergentis in Ortus
 Trans gelidum Tanai, quo non deformius ullum
 Arctos alit: turpes habitus, obscœnaque visu 325
 Corpora; mens duro nunquam cessura labori.
 Præda cibus; vitanda Ceres; frontemque secari
 Ludus, et occisos pulchrum jurare parentes.
 Nec plus nubigenas duplex natura bifformes
 Cognatis aptavit equis: acerrima nullo 330
 Ordine mobilitas, insperatique recursus.

Quos tamen impavidus contra spumantis ad Hebri
 Tendis aquas, sic ante tubas ferrumque precatus :
 “ Mavors, nubifero seu tu procumbis in Hæmo,
 Seu te cana gelu Rhodope, seu remige Medo 335
 Sollicitatus Athos, seu caligantia nigris
 Illicibus Pangæa tenent, accingere mecum,
 Et Thracas defende tuos. Si lætior adsit
 Gloria, vestitâ spoliis donabere quercu.”

Audiit illa pater, scopulisque nivalibus Hæmi 340
 Surgit, et hortatur celeres clamore ministros.
 “ Fer galeam, Bellona, mihi, nexusque rotarum
 Tende, Pavor: frena rapidos, Formido, jugales.
 Festinas urgete manus: meus ecce paratur
 Ad bellum Stilichon, qui me de more tropæis 345
 Ditat, et hostiles suspendit in arbore cristas.
 Communes semper litui, communia nobis
 Signa canunt; junctoque sequor tentoria curru.”

Sic fatus campo insiluit, lateque fugatas
 Hinc Stilichon turmas, illinc Gradivus, agebant, 350
 Et clypeis et mole pares: stat cassis utrique
 Sidereis hirsuta júbis; loricaque cursu
 Æstuat, et largo satiatur vulnere cornus.

Acrior interea voto, multoque Megæra
 Luxuriata malo, mœstam deprendit in arce 355
 Justitiam, diroque prior sic ore lacescit:

“ En, tibi prisca quies, revocataque sæcula rursus,
 Ut rebare, vigent: en, nostra potentia cessit;
 Nec locus est usquam Furtis. Huc lumina flecte:
 Adspice, barbaricis jaceant quot mœnia flammis; 360
 Quas mihi Rufinus strages, quantumque cruoris
 Præbeat, et quantis epulentur cædibus hydri.
 Linque homines, sortemque meam: pete sidera: notis
 Auctumni te redde plagis, quâ vergit in Austrum
 Signifer: æstivo sedes vicina Leoni 365
 Jampridem, geminæque vacant confinia Libræ.
 Atque utinam per magna sequi convexa liceret!”

Diva refert: “ Non ulterius bacchabere, dc mens.
 Jam pœnas tuus iste dabit: jam debitus ultor

Imminet: et, terras qui nunc ipsumque fatigat 370
Æthera, nec vili moriens condetur arenâ.
Jamque aderit læto promissus Honorius ævo,
Nec forti genitore minor, nec fratre corusco;
Qui subigat Medos, qui cuspide proterat Indos.
Sub juga venturi reges: calcabitur asper 375
Phasis equo, pontemque pati cogetur Araxes.
Tuque simul, gravibus ferri religata catenis,
Expellêre die, debellatasque draconum
Tonsa comas, imo barathri condêre recessu.
Tum tellus communis erit: tum limite nullo 380
Discernetur ager; nec vomere sulcus adunco
Findetur: subitis messor gaudebit aristis.
Rorabunt querceta favis; stagnantia passim
Vina fluent, oleique lacus: nec murice tinctis
Velleribus quæretur honos; sed sponte rubebunt, 385.
Attonito pastore, greges; pontumque per omnem
Ridebunt virides gemmis nascentibus algæ."

CL. CLAUDIANI

IN

RUFINUM

LIBER II.

PRÆFATIO.

PANDITE defensum, reduces, Helicon, sorores ;
Pandite : permissis jam licet ire choris.
Nulla per Aonios hostilis buccina campos
Carmina mugitu deteriore vetat.
Tu quoque, securis pulsâ formidine Delphis, 5
Floribus ultorem, Delie, cinge tuum.
Nullus Castalios latices, et præscia fati
Flumina, polluto barbarus ore bibit.
Alphæus late rubuit ; Siculumque per æquor
Sanguineas belli rettulit unda notas : 10
Agnovitque novos absens Arethusa triumphos ;
Et Geticam sensit, teste cruore, necem.
Immensis, Stilichon, succedant otia curis,
Et nostræ patiens corda remitte lyrae.
Nec pudeat longos interrupisse labores, 15
Et tenuem Musis constituisse moram.
Fertur et indomitus tandem post prælia Mavors
Lassa per Odrysias fundere membra nives ;
Oblitusque sui, positâ clementior hastâ,
Pieriis aures pacificare modis. 20

IN RUFINUM

LIBER II.

JAM, post edomitas Alpes, defensaque regna
Hesperiaë, meritâ complexus sede parentem,
Auctior adjecto fulgebat sidere mundus;
Jamque tuis, Stilichon, Romana potentia curis, 5
Et rerum commissus apex: tibi credita fratrum
Utraque majestas, geminæque exercitus aulæ.
Rufinus (neque enim patiuntur sæva quietem
Crimina, pollutæque negant arescere fauces)
Infandis iterum terras accendere bellis
Inchoat, et solito pacem vexare tumultu. 10
Hæc etiam secum: "Quânam ratione tuebor
Spem vitæ fragilem? quâ tot depellere fluctus
Arte queam? premor hinc odiis; hinc milite cingor.
Heu! quid agam? non arma mihi, non principis ullus
Auxiliatur amor. Matura pericula surgunt 15
Undique; et impositi radiant cervicibus enses.
Quid restat, nisi cuncta novo confundere luctu,
Insontesque meæ populos miscere ruinæ?
Everso juvat orbe mori: solatia leto
Exitium commune dabit: nec territus ante 20
Discedam: cum luce simul linquenda potestas."
Hæc fatus, ventis veluti si frena remittat
Æolus, abrupto gentes sic objice fudit,
Laxavitque viam bellis: et, ne qua maneret
Immunis regio, cladem divisit in orbem, 25
Disposuitque nefas. Alii per terga ferocis
Danubii solidata ruunt, expertaque remos

Frangunt stagna rotis : alii per Caspia claustra,
 Armeniasque nives, inopino tramite ducti,
 Invadunt Orientis opes : jam pascua fumant 30
 Cappadocum, volucrumque parens Argæus equorum.
 Jam rubet altus Halys : nec se defendit iniquo
 Monte Cilix. Syriæ tractus vastantur amœni :
 Assuetumque choris, et lætâ plebe canorum,
 Proterit imbellem sonipes hostilis Oronten. 35
 Hinc planctus Asiæ : Geticis Europa catervis
 Ludibrio prædæque datur, frondentis adusque
 Dalmatiæ fines : omnis quâ mobile Ponti
 Æquor, et Adriacas tellus interjacet undas,
 Squalet inops pecudum, nullis habitata colonis, 40
 Instar anhelantis Libyæ, quæ, torrida semper
 Solibus, humano nescit mansuescere cultu.
 Thessalus ardet ager : reticet, pastore fugato,
 Pelion. Emathias ignis populatur aristas.
 Jam plaga Pannoniæ, miserandaque mœnia Thracum,
 Arvaque Mysorum, jam nulli flebile damnum, 46
 Sed cursus sollennis erat, campusque furori
 Expositus ; sensumque malis detraxerat usus.
 Heu ! heu ! quam brevibus pereunt ingentia fatis !
 Imperium tanto quæsitum sanguine, tanto 50
 Servatum, quod mille ducum peperêre labores,
 Quod tantis Romana manus contexuit annis,
 Proditor unus iners angusto tempore vertit.
 Urbs etiam, magnæ quæ dicitur æmula Romæ,
 Et Chalcedonias contra despectat arenas, 55
 Jam non finitimo Martis terrore movetur,
 Sed propius lucere faces, et rauca sonare
 Cornua, vibratisque peti fastigia telis
 Adspicit. Hi vigili muros statione tueri,
 Hi junctis properant portus munire carinis : 60
 Obsessâ tamen ille ferus lætatur in urbe,
 Exultatque malis ; summæque e culmine turris
 Impia vicini cernit spectacula campi :
 Vincetas ire nurus ; hunc per vada proxima mergi
 Seminecem ; hunc subito percussum vulnere labi, 65

Dum fugit ; hunc animam portis efflare sub ipsis ;
 Nec canos prodesse seni, puerique cruore
 Maternos undare sinus : immensa voluptas,
 Et risus plerumque subit : dolor afficit unus,
 Quod feriat non ipse manu. Videt omnia late, 70
 Exceptis, incensa, suis ; et crimine tanto
 Luxuriat ; carumque sibi non abnuat hostem.
 Jactabatque ultro, quod soli castra paterent,
 Sermonumque foret vicibus permissa facultas,
 Egregii quoties exisset foederis auctor. 75
 Stipatur sociis ; circumque armata clientum
 Agmina privatis ibant famulantia signis.
 Ipse inter medios, ne quâ de parte relinquat
 Barbariem, revocat fulvas in pectora pelles.
 Frenaque, et immanes pharetras, arcusque sonoros,
 Assimulat ; mentemque palam testatur amictu. 81
 Nec pudet Ausonios currus et jura regentem
 Sumere deformes ritus, vestemque Getarum ;
 Insignemque habitum Latii mutare togæque.
 Mœrent pellito captivæ judice leges. 85
 Quis populi tunc vultus erat ? quæ murmura furtim ?
 Nam miseris nec flere quidem, aut lenire dolorem
 Colloquiis impune licet. " Quonam usque feremus
 Exitiale jugum ? duræ quis terminus unquam
 Sortis erit ? quis nos funesto turbine rerum, 90
 Aut tantis solvet lacrymis, quos barbarus illinc,
 Hinc Rufinus, agit ; quibus arva fretumque negatur ?
 Magna quidem per rura lues ; sed major oberrat
 Intra tecta timor. Tandem succurre ruenti 94
 Heu ! patriæ, Stilichon. Dilecta hîc pignora certe ;
 Hîc domus ; hîc thalamis primum genialibus omen ;
 Hîc tibi felices erexit regia tædas.
 Vel solus, sperate, veni : te proelia viso
 Languescent, avidique cadet dementia monstri. " 100
 Talibus urgetur discors Aurora procellis.
 At Stilichon, Zephyris cum primum bruma remitti,
 Et juga diffusis nudari cœpta pruinis,
 Partibus Italiæ tranquillâ in pace locatis,

Utraque castra movens, Phœbi properabat ad ortus,
 Gallica discretis Eoque robora turmis 105
 Complexus: nunquam tantæ ditione sub unâ
 Convenêre manus, nec tot discrimina vocum.
 Illinc Armeniæ vibratis criminibus alæ,
 Herbida collectæ facili velamina nodo;
 Inde truces flavo comitantur vertice Galli, 110
 Quos Rhodanus velox, Araris quos tardior ambit;
 Et quos nascentes explorat gurgite Rhenus;
 Quosque rigat retro perniciosior unda Garumnæ,
 Oceani pleno quoties impellitur æstu.
 Mens eadem cunctis, animique recentia ponunt 115
 Vulnera: non odit victus, victorve superbit.
 Et quamvis præsens tumor, et civilia nuper
 Classica, bellatrixque etiam nunc ira caleret,
 In ducis eximium conspiravêre favorem.
 Haud aliter, Xerxen toto simul orbe secutus, 120
 Narratur rapuisse vagos exercitus amnes,
 Et telis umbrâsse diem, cum classibus iret
 Per scopulos, tectumque pedes contemneret æquor.
 Vix Alpes transgressus erat; nec jam amplius errat
 Barbarus; adventumque tremens, se cogit in unam
 Planitiem, tutoque includit pascua gyro. 126
 Tum duplicem fossam, non exsuperabile vallum,
 Asperat alternis sudibus; murique locata
 In speciem, cæsis obtendit plaustra juvenis.
 At procul exsanguis Rufinum perculit horror:
 Infectæ pallore genæ: stetit ore gelato 131
 Incertus, peteretne fugam, veniamne subactus
 Posceret, an fidos sese transferret in hostes.
 Quid nunc divitiæ, quid fulvi vasta metalli
 Congeries, quid purpureis effulta columnis 135
 Atria, prolataeque juvant ad sidera moles?
 Audit iter, numeratque dies, spatioque viarum
 Metitur vitam. Torquetur pace futurâ;
 Nec recipit somnos; et sæpe cubilibus amens
 Excutitur, pœnamque luit formidine pœnæ. 140
 Sed redit in rabiem, seelerumque immane resumit.

Ingenium, sacrasque fores prædivitis aulæ 142
Intrat, et Arcadium mixto terrore precatur:

“ Per fratris regale jubar, per facta parentis
Ætherii, floremque tui te deprecor ævi, 145

Eripe me gladiis: liceat Stilichonis iniquas
Evitare minas: in nostram Gallia cædem
Conjurata venit: quidquid ligat ultima Tethys,
Extremos ultra volitat gens si qua Britannos,
Mota mihi: tantis capiendi credimur armis? 150

Tot signis unum petitur caput? unde cruoris
Ista sitis? geminum cœli sibi vindicat axem,

Et nullum vult esse parem. Succumbere poscit
Cuncta sibi: regit Italiam, Libyenque coercet:

Hispanis Gallisque jubet: non orbita Solis, 155
Non illum Natura capit: quascumque paravit

Hic Augustus opes, et quas post bella recepit,
Solutus habet: possessa semel non reddere curat.

Scilicet ille quidem tranquillâ pace fruatur;
Nos premat obsidio? quid partem invadere tentat?

Deserat Illyricos fines; Eoa remittat 161
Agmina; fraternas ex æquo dividat hastas;

Nec sceptri tantum fueris, sed militis, hæres.
Quod si dissimulas nostræ succurrere morti,

Nec prohibere paras; Manes et sidera testor, 165
Hæc cervix non sola cadet: miscebitur alter

Sanguis; nec Stygias ferar incommitatus ad umbras,
Nec mea securus ridebit funera victor.”

Hæc ubi, dictatur facinus; missusque repente,
Qui ferat extortas invito principe voces. 170

Interea Stilichon, jam lætior hoste propinquo,
Nec multo spatii distantibus æquore vallis,

Pugnandi cupidas accendit voce cohortes.
Armeniis frons læva datur; per cornua Gallos

Dexteriores locat. Spumis ignescere frena, 175
Pulveris extolli nimbos, lateque videres

Surgere purpureis undantes anguibus hastas,
Serpentumque vago cœlum sævire volatu.

Implet Thessaliam ferri nitor; antraque docti

Cornipedis, teneroque amnis reptatus Achilli, 180
 Et nemus Cætæum radiat: clamore nivalis
 Ossa tonat, pulsoque fragor geminatur Olympo.
 Intumult virtus, et lucis prodigus arsit
 Impetus: haud illos rupes, haud alta vetarent
 Flumina: præcipiti stravissent omnia cursu. 185
 Si tunc his animis acies collata fuisset,
 Proditæ non tantas vidisset Græcia cædes:
 Oppida semoto Pelopœia Marte vigerent:
 Starent Arcadiæ, starent Lacedæmonis, arces:
 Non mare fumasset geminum, flagrante Corintho;
 Nec fera Cecropias traxissent vincula matres. 191
 Illa dies potuit nostris imponere finem
 Cladibus, et sceleris causas auferre futuri.
 Invida, pro! quantum rapuit Fortuna triumphum!
 Inter equos, interque tubas, mandata feruntur 195
 Regia, et armati veniunt ductoris ad aures.
 Obstupuit: simul ira virum, simul obruit ingens
 Mœror: et ignavo tantum licuisse nocenti
 Miratur. Dubios anceps sententia volvit
 Eventus, peragat pugnæ, an fortia cœpta 200
 Deserat. Illyricis ardet succurrere damnis:
 Præceptis obstare timet: reverentia frangit
 Virtutis stimulos: hinc publica commoda suadent,
 Hinc metus invidiæ: tandem indignatus ad astra
 Extollit palmas, et ab imo pictore fatur: 205
 " Numina, Romanis necdum satiata ruinis,
 Si juvat imperium penitus de stirpe revelli;
 Uno si placuit deleri sæcula lapsu;
 Si piget humani generis; prorumpat in arva
 Libertas effrena maris, vel limite nullo 210
 Devius errantes Phaëthon confundat habenas.
 Cur per Rufinum geritur; procumbere mundum
 Hoc auctore pudet. Mediis revocamur ab armis,
 (Pro dolor!) et strictos deponere cogimur enses.
 Vos, arsuræ urbes, perituraque mœnia, testor: 215
 Cedo equidem, et miserum permitto casibus orbem.
 Flectite signa, duces: redeat jam miles Eois.

Parendum est : taceant litui : prohibete sagittas :
 Parcite contiguo, Rufinus præcipit, hosti."

His dictis, omnes unâ fremuere manipuli, 220
 Quantum non Italò percussa Ceraunia fluctu,
 Quantum non madidis elisa tonitrua Coris :
 Secernique negant, ereptaque prælia poscunt ;
 Insignemque ducem populus defendit uterque,
 Et sibi quisque trahit : magno certatur amore ; 225
 Alternamque fidem non illaudata lacescit
 Seditio ; talique simul clamore queruntur :

" Quis mihi nudatos enses, quis tela lacertis
 Excutit, et solvi curvatos imperat arcus ?
 Quisnam audet leges vibrato imponere ferro ? 230
 Inflammata semel nescit mitescere virtus.
 Jam mihi barbaricos sitientia pila cruores
 Sponte volant ; ultrixque manus mucrone furenti
 Ducitur, et siceum gladium vagina recusat.
 Num patiar ? semperne Getis discordia nostra 235
 Proderit ? en iterum belli civilis imago !
 Quid consanguineas acies, quid dividis olim
 Concordes aquilas ? non dissociabile corpus,
 Coniunctumque sumus : te, quo libet ire, sequemur.
 Te vel Hyperboreo damnatam sidere Thulen, 240
 Te vel ad incensas Libyæ comitabor arenas.
 Indorum si stagna petas, rubrique recessus
 Æquoris, auriferum veniam poturus Hydaspen.
 Si calcare Notum, secretaque litora Nili
 Nascentis, jubeas, mundum post terga relinquam.
 Et, quocumque loco Stilichon tentoria figet, 246
 Hic patria est." Dux inde vetat : " Desistite, quæso,
 Atque avidam differte manum : cadat iste minacis
 Invidiæ cumulus : non est victoria tanti,
 Ut videar vicisse mihi. Vos, fida juvenus, 250
 Ite, mei quondam socii." Nec plura locutus,
 Flectit iter ; vacuo qualis discedit hiatu,
 Impatiens remeare, leo, quem plurima cuspis,
 Et pastorales pepulerunt igne catervæ ;
 Inclinatque jubas, demissaque lumina velat, 255

Et trepidas mœsto rimatur murmure silvas. 256

Ut sese legio vidit disjuncta relinqui,

Ingentem tollit gemitum; galeasque [solutis]

Humectant lacrymis; pressamque morantia vocem,

Thoracum validos pulsant suspiria nexus. 260

“Tradimur? heu! tantumque sequi prohibemur amorem?”

Exclant: “spernisne tuas, dux optime, dexteras,

Quas tibi victrices toties Bellona probavit?

Nos adeo viles? adeo felicior axis

Hesperius, meruit qui te rectore teneri? 265

Quid nobis patriam, quid clara revisere tandem

Pignora, dilectosve juvat coluisse penates?

Te sine, dulce nihil. Jam formidata tyranni

Tempestas subeunda mihi; qui forte nefandas

Jam parat insidias; qui nos aut turpibus Hunnis, 270

Aut impacatis famulos præstabit Alanis;

Quamquam non adeo robur defecerit omne,

Tantave gestandi fuerit penuria ferri.

Tu licet occiduo maneat sub cardine Solis,

Tu mihi dux semper, Stilichon; nostramque vel absens

Experiêre fidem: dabitur tibi debita pridem 276

Victima: promissis [longum] placabere sacris.”

Tristior Hæmoniis miles digressus ab oris

Tangebatur Macetôm fines, murosque subibat,

Thessalonica, tuos. Sensus dolor hæret in alto 280

Abditus, et tacitas vindictæ præstruit iras;

Spectaturque favens odiis locus, aptaque leto

Tempora: nec quisquam tantâ de plebe repertus,

Proderet incautis qui corda minantia verbis.

Quæ non posteritas, quæ non mirabitur ætas 285

Tanti consilium vulgi potuisse taceri,

Aut facinus tam grande tegi? mentisque calorem

Non sermone viæ, non inter pocula, rumpi?

Æqualis tantam tenuit constantia turbam;

Et fuit arcanum populo. Percurritur Hebrus; 290

Deseritur Rhodope; Thracumque per ardua tendunt,

Donec ad Herculei perventum nominis urbem.

Ut cessisse ducem, propius venisse cohortes,
Cognita Rufino, magnâ cervice triumphat,
Omnia tuta ratus ; sceptrumque capessere fervet, 295
Et conjuratos accendit voce clientes.

“ Vicimus, expulimus : facilis jam copia regni.
Nullus ab hoste timor. Quid enim ? quem poscere
solum

Horruit, hunc tanto munitum milite vincat ?
Quis ferat armatum, quem non superavit inermem ?
I nunc, exitium nobis meditare remotus 301

Incassum, Stilichon ; dum nos longissima tellus
Dividat, et mediis Nereus interstrepit undis.
Alpinas transire tibi, me sospite, rupes
Haud dabitur : jaculis illinc me figere tenta : 305

Quære ferox ensem, qui nostra ad mœnia tendi
Possit ab Italiâ. Non te documenta priorum,
Non exempla, vetant ? quis, par, conatus adire,
Has jactat vitasse manus ? Detrusimus orbe
Te medio, tantisque simul spoliavimus armis. 310

Nunc epulas tempus, socii, nunc larga parare
Munera, donandumque novis legionibus aurum.
Opportuna meis oritur lux crastina votis.
Quod nolit, rex ipse velit, jubeatque coactus
In partem mihi regna dari : contingat in uno 315
Privati fugisse modum, crimenque tyranni.”

Talibus acclamant dictis infame nocentûm
Concilium, qui perpetuis crevère rapinis,
Et quos una facit Rufino causa sodales,
Illicitum duxisse nihil : delicta fuère 320
Nexus amicitiae : jam jam connubia læti
Despondent aliena sibi : frustra que vicissim
Promittunt, quas quisque petat, quas devoret, urbes.

Cœperat humanos alto sopire labores
Nox gremio ; pigrasque Sopor diffuderat alas. 325
Ille, diu curis animum stimulantibus ægrum,
Labitur in somnos. Vix toto corde quierat ;
Ecce, videt diras alludere protinus umbras,
Quas dedit ipse neci ; quarum, quæ clarior, una

Visa loqui : " Pro ! surge toro : quid plurima volvis
Anxius ? hæc requiem rebus finemque labori 331
Allatura dies : omni jam plebe redibis
Altior, et læti manibus portabere vulgi."

Has canit ambages : occulto fallitur ille
Omine, nec capitis sentit præsagia fixi. 335

Jam summum radiis stringebat Lucifer Hæmum ;
Festinamque rotam solito properantior urget,
Tandem Rufini visurus funera, Titan.
Prosiluit stratis, densæque capacia turbæ
Atria regifico jussit splendere paratu, 340
Exceptura dapes ; et, quod post vota daretur,
Inscribi propriis aurum fatale figuris.

Ipse salutatum reduces post prælia turmas,
Jam regale tumens, et principe celsior, ibat ;
Collaque femineo jactabat mollia gestu, 345
Imperii certus ; tegeret ceu purpura dudum
Corpus, et ambirent ardentes tempora gemmæ.

Urbis ab angusto tractu, quâ vergit in Austrum,
Planities vicina patet : nam cætera Pontus
Circuit, exiguo dirimi se tramite passus. 350
Hic ultrix acies, ornatu fulgida Martis,
Explicuit cuneos : pedites in parte sinistra
Consistunt : equites illinc poscentia cursum
Ora reluctantur pressis sedare lupatis.

Hinc alii sævum cristato vertice nutant, 355
Et tremulos humeris gaudent vibrare colores,
Quos operit formatque chalybs : conjuncta per artem
Flexilis inductis animatur lamina membris,
Horribilis visu : credas simulacra moveri
Ferreæ, cognatoque viros spirare metallo. 360

Par vestitus equis : ferratâ fronte minantur ;
Ferratosque levant, securi vulneris, armos.
Diviso stat quisque loco : metuenda voluptas
Cernenti, pulcherque timor ; spirisque remissis
Mansuescunt varii, vento cessante, dracones. 365
Augustus veneranda prior vexilla salutat.
Rufinus sequitur, quo fallere cuncta solebat

Callidus affatu ; devotaque brachia laudat,
 Nomine quemque vocans : natosque patresque reversis
 Nuntiat incolumes. Illi, dum plurima ficto 370

Certatim sermone petunt, extendere longos
 A tergo flexus, insperatoque suprema
 Circuitu sociare parant : decrescere campus
 Incipit, et clypeis in se redeuntia junctis
 Curvo paulatim sinuantur cornua ductu. 375

Sic ligat immensâ virides indagine saltus
 Venator : sic attonitos ad litora pisces
 Æquoreus populator agit, rarosque plagarum
 Contrahit anfractus, et hiantes colligit oras.
 Excludunt alios : cingi se fervidus ille 380

Nescit adhuc, graviterque, apprensâ veste, morantem
 Increpat Augustum : scandat sublime tribunal ;
 Participem sceptri, socium declaret honoris.
 Cum subito stringunt gladios : vox desuper ingens
 Infremuit : " Nobis etiam, teterrime, nobis 385

Sperâsti famulas imponere posse catenas ?
 Unde redi, nescis ? patiarne audire satelles,
 Qui leges aliis libertatemque reduxi ?
 Bis domitum civile nefas : bis rupimus Alpes.
 Tot nos bella docent nulli servire tyranno." 390

Dirigit : spes nulla fugæ : seges undique ferri
 Circumfusa micat : dextrâ lævâque revinctus
 Hæsit, et ensiferæ stupuit mucrone coronæ.
 Ut fera, quæ montes nuper dimisit avitos,
 Altorumque exsul nemorum, damnatur arenæ 395
 Muneribus, commota ruit ; vir murmure contra
 Hortatur, nixusque genu venabula tendit.
 Illa pavet strepitus, cuneosque erecta theatri
 Respicit, et tanti miratur sibila vulgi.

Unus per medios, audendi pronior, ense 400
 Prosilit exserto, dictisque et vulnere torvus :
 " Hac petit, hac Stilichon, quem jactas pellere, dextrâ
 Te ferit : hoc absens invadit viscera ferro."

Sic fatur, meritoque latus transverberat ictu.
 Felix illa manus, talem quæ prima cruorem 405

- Hauserit, et fessi pœnam libaverit orbis. 406
 Mox omnes fodiunt hastis, artusque trementes
 Dilaniant: uno tot corpore pila tepescunt;
 Et non infecto puduit mucrone reverti.
 Hi vultus avidos, et adhuc spirantia vellunt 410
 Lumina: truncatos alii rapuere lacertos.
 Amputat ille pedes, humerum quatit ille solutis
 Nexibus: hic fracti resecat curvamina dorsi.
 Hic jecur, hic cordis fibras, hic pandit anhelas
 Pulmonis latebras: spatium non invenit ira; 415
 Nec locus est odiis: consumto funere, vix tum
 Deseritur, sparsumque perit per tela cadaver.
 Sic mons Aonius rubuit, cum Penthea ferrent
 Mænades, aut subito mutatum Actæona cornu
 Traderet insanis Latonia [visa] Molossia. 420
 Criminibusne tuis speras, Fortuna, mederi?
 Et male donatum certas æquare favorem
 Supplicii? unâ tot millia morte rependis?
 Eversis agedum Rufinum divide terris:
 Da caput Odrysiis: truncum mereatur Achivi. 425
 Quid reliquis dabitur? nec singula membra peremtis
 Sufficiunt populis. Vacuo plebs obvia muro,
 Jam secura, fluit: senibus non obstitit ætas,
 Virginibusve pudor: viduæ, quibus ille maritos
 Abstulit, orbatæque ruunt ad gaudia matres; 430
 Insultantque alacres: laceros juvat ire per artus,
 Pressaque calcato vestigia sanguine tingi.
 Nec minus assiduis flagrant elidere saxis
 Prodigiale caput; quod jam de cuspide summâ
 Nutabat, dignâ rediens ad mœnia pompâ. 435
 Dexterâ quin etiam, ludo concessa, vagatur,
 Æra petens, fraudesque animi persolvit avari
 Terribili lucro; vivosque imitata retentus,
 Cogitur adductis digitos inflectere nervis.
 Desinat elatis quisquam confidere rebus; 440
 Instabilesque Deos ac lubrica Numina discat.
 Illa manus, quæ sceptrâ sibi gestanda parabat,
 Cujus se toties submisit ad oscula supplex

Nobilitas, inhumata diu, miseroque revulsa
 Corpore, feralem quæstum post fata poposcit. 445
 Adspiciat, quisquis nimium sublata secundis
 Colla gerit: triviis calcandus spargitur, ecce,
 Qui sibi pyramidas, qui, non cedentia templis,
 Ornatura suos extruxit culmina Manes:
 Et, qui Sidonio velari [credidit] ostro, 450
 Nudus pascit aves: jacet, en, qui possidet orbem,
 Exiguæ telluris inops; et pulvere raro
 Per partes tegitur, nusquam totiesquæ sepultus.

Senserunt convexa necem, tellusque nefandum
 Amolitur onus: jam respirantibus astris, 455
 Infernos gravat umbra lacus: pater Æacus horret;
 Intranque etiam latratu Cerberus urget.
 Tunc animæ, quas ille fero sub jure peremit,
 Circumstant, nigrique trabunt ad iudicis urnam,
 Infesto fremitu; veluti pastoris in ora 460
 Commotæ glomerantur apes, qui dulcia raptu
 Mella trahit, pennasque cient, et spicula tendunt;
 Et, tenuis saxi per propugnacula cinctæ,
 Rimosam patriam, dilecta que pumicis antra,
 Defendunt, pronoque favos examine velant. 465

Est locus, infaustis quo conciliantur in unum
 Cocytos Phlegethonque vadis: inamœnus uterque
 Alveus: hic volvit lacrymas: hic igne redundat.
 Turris per geminos flammis vicinior amnes
 Porrigitur, solidoque rigens adamante sinistrum 470
 Proluit igne latus: dextrâ Cocytia findit
 Æquora, triste gemens, et fletu concita plangit.
 Huc post emeritam mortalia sæcula vitam
 Deveniunt: ibi nulla manent discrimina fati,
 Nullus honos: vanoque exutum nomine regem 475
 Proturbat plebeius egens. Quæsit, in alto
 Conspicuus solio, pertentat crimina Minos,
 Et justis dirimit fontes: quos nolle fateri
 Viderit, ad rigidi transmittit verbera fratris:
 Nam juxta Rhadamanthus agit: cum gesta superni
 Curriculi, totosque diu perspexerit actus; 481

Exæquat damnum meritis, et muta ferarum 482
 Cogit vincla pati : truculentos ingerit ursis ;
 Prædonesque lupis, fallaces vulpibus addit.
 At qui desidîa semper vinoque gravatus, 485
 [Indulgens Veneri, voluit torpescere luxu,]
 Hunc suis immundæ pingues detrudit in artus.
 Qui justo plus esse loquax, arcanaque suevit
 Prodere, piscolas fertur victurus in undas,
 Ut nimiam pensent æterna silentia vocem. 490
 Quos ubi per varias, annis ter mille, figuras
 Egit Lethæo purgatos flumine ; tandem
 Rursus ad humanæ revocat primordia formæ.
 Tum quoque, dum lites Stygiique negotia solvit
 Dura fori, veteresque reos ex ordine quærit, 495
 Rufinum procul æce notat, visuque severo
 Lustrat, et ex imo concussâ sede profatur :
 “ Huc, superûm labes, huc insatiabilis auri
 Proluvies, pretioque nihil non ause parato,
 Quodque mihi summum scelus est, huc, improbe legum
 Venditor ; Arctoi stimulator perfide Martis, 501
 Cujus ob innumeras strages angustus Avernî
 Jam sinus, et plenâ lassatur portitor alno.
 Quid demens manifesta negas ? en, pectus inustæ
 Deformant maculæ, vitiisque inolevit imago ; 505
 Nec sese commissa tegunt. Genus omne dolorum
 In te ferre libet : dubio tibi pendula rupes
 Immineat lapsu : volucer te torqueat axis :
 Te refugi fallant latices, atque ore natanti
 Arescat decepta sitis ; dapibusque relictis, 510
 In tua mansurus migret præcordia vultur.
 Quamquam omnes alii, quos hæc tormenta fatigant,
 Pars quota sunt, Rufine, tui ! quid tale vel audax
 Fulmine Salmoneus, vel linguâ Tantalus egit,
 Aut inconcesso Tityos deliquit amore ? 515
 Cunctorum si facta simul jungantur in unum,
 Præcedes numero. Cui tanta piacula quisquam
 Supplicio conferre valet ? quid denique dignum
 Omnibus inveniam, vincant cum singula pœnas ?

Tollite de mediis animarum dedecus umbris. 520
Adspexisse sat est : oculis jam parcite nostris,
Et Ditis purgate domos : agitate flagellis
Trans Styga, trans Erebum : vacuo mandate barathro,
Infra Titanum tenebras, infraque recessus
Tartareos, nostrumque Chaos, quâ noctis opacæ 525
Fundamenta latent : penitusque immersus anhelet,
Dum rotet astra polus ; feriant dum litora venti."

CL. CLAUDIANI
DE TERTIO CONSULATU
HONORII AUGUSTI
PANEGYRIS.

PRÆFATIO.

PARVOS non aquilis fas est educere fetus,
Ante fidem solis, iudiciumque poli.
Nam pater, excusso saluit cum tegmine proles,
Ovaeque maternus rupit hiulca tepor,
Protinus implumes convertit ad æthera nidos, 5
Et recto flammæ imperat ore pati.
Consulit ardentes radios; et, luce magistrâ,
Natorum vires ingeniumque probat.
Degeneres refugo torsit qui lumine visus,
Unguibus hunc sævis ira paterna ferit. 10
Exploratores oculis qui pertulit ignes,
Sustinuitque acie nobiliore diem,
Nutritur, volucrumque potens, et fulminis hæres,
Gesturus summo tela trisulca Jovi.
Me quoque, Pieriis tentatum sæpius antris, 15
Audet magna suo mittere Roma Deo.
Jam dominas aures, jam regia tecta, meremur;
Et chelys, Augusto iudice, nostra sonat.

DE TERTIO CONSULATU
HONORII AUGUSTI
PANEGYRIS.

TERTIA Romulei sumant exordia fasces,
 Terque suas ducat bellatrix pompa curules.
 Festior annus eat; cinctusque imitata Gabinos,
 Dives Hydaspeis augescat purpura gemmis.
 Succedant armis trabæ: tentoria lictor 5
 Ambiat; et Latiae redeant ad signa secures.
 Tuque, o! qui patrium curis æqualibus orbem
 Eoo cum fratre regis, procede secundis
 Alitibus; Phœbique novos ordire meatus,
 Spes votumque poli, quem primo a limine vitæ 10
 Nutrix aula fovet; strictis quem fulgida telis
 Inter laurigeros aluerunt castra triumphos.
 Ardua privatos nescit Fortuna penates,
 Et regnum cum luce dedit: cognata potestas
 Excepit Tyrio venerabile pignus in ostro; 15
 Lustravitque tuos aquilis victricibus ortus
 Miles, et in mediis cunabula præbuit hastis.
 Te nascente, ferox toto Germania Rheno
 Intremuit; movitque suas formidine silvas
 Caucasus: et, positis numen confessa pharetris, 20
 Ignavas Meroë traxit de crine sagittas.
 Reptâsti per scuta puer; regumque recentes
 Exuviae tibi ludus erant; primusque solebas
 Aspera complecti torvum post prælia patrem,
 Signa triumphato quoties flexisset ab Istro, 25

Arctoâ de strage calens ; et poscere partem 26
De spoliis, Scythicosve arcus, aut rapta Gelonis
Cingula, vel jaculum Daci, vel frena Suëvi.
Ille coruscanti clypeo te sæpe volentem
Sustulit arridens, et pectore pressit anhelo 30
Intrepidum ferri, galeæ nec triste timentem
Fulgur, et ad summas tendentem brachia cristas.
Tum sic lætus ait : " Rex, o ! stellantis Olympi,
Talis perdomito redeat mihi filius hoste,
Hyrcanas populatus opes, aut cæde superbus 35
Assyriâ : sic ense rubens, sic flamine crebro
Turbidus, et grato respersus pulvere belli :
Armaque gavisio referat captiva parenti."
Mox, ubi firmâsti recto vestigia gressu,
Non tibi desidias molles, non marcida luxu 40
Otia, nec somnos genitor permisit inertes :
Sed nova per duros instruxit membra labores,
Et crudâ teneras exercuit indole vires :
Frigora sæva pati, gravibus non cedere nimbis ;
Æstivum tolerare jubar ; tranare sonoras 45
Torrentum furias ; adscensu vincere montes,
Planitiem cursu, valles et concava saltu :
Necnon in clypeo vigiles perducere noctes ;
In galeâ potare nives ; nunc spicula cornu
Tendere, nunc glandes Baleari spargere fundâ. 50
Quoque magis ninium pugnæ inflammaret amorem,
Facta tui numerabat avi, quem litus adustæ
Horrescit Libyæ, ratibusque impervia Thule.
Ille leves Mauros, nec falso nomine Pictos,
Edomuit : Scotumque vago mucrone secutus, 55
Fregit Hyperboreas remis audacibus undas ;
Et geminis fulgens utroque sub axe tropæis,
Tethyos alternæ refluas calcavit arenas.
Hos tibi virtutum stimulos, hæc semina laudum,
Hæc exempla dabat. Non ocyus hausit Achilles 60
Semiferi præcepta senis, seu cuspidis artes,
Sive lyræ cantus, medicas seu disceret herbas.
Interea turbata fides : civilia rursus

Iratus, stimulante Noto, vivitque receptis : 140
Flatibus, et vario mentitur sibila tractu.

Ut ventum ad sedes, cunctos discedere tectis
Dux jubet, et generum compellat talibus ultro :
" Bellipotens Stilichon, cujus mihi robur in armis,
Pace probata fides : quid enim per prœlia gessi 145
Te sine ? quem merui, te non sudante, triumphum ?
Odrysium pariter Getico fœdavimus Hebrum
Sanguine : Sarmaticas pariter prostravimus alas ;
Rhipæâque simul fessos porreximus artus
In glacie, stantemque rotâ sulcavimus Istrum. 150
Ergo age, (me quoniam cœlestis regia poscit)
Tu curis succede meis : tu pignora solus
Nostra fove : geminos dextrâ tu protege fratres.
Per consanguineos thalamos, noctemque beatam,
Per tædas, quas ipsa tuo regina levavit 155
Conjugio, sociâque nurum produxit ab aulâ,
Indue mente patrem : crescentes dilige fetus,
Ut, ducis, ut soceri jamjam securus, ad astra,
Te custode, ferar. Ruptâ si mole Typhœus
Vinculis prosiliat, Tityos si membra resolvat, 160
Si furor Enceladi projectâ mugiat Ætnâ,
Opposito Stilichone cadant." Nec plura locutus,
Sicut erat, liquido signavit tramite nubes,
Ingrediturque globum Lunæ, limenque relinquit
Arcados, et Veneris clementes advolat auras. 165
Hinc Phœbi permensus iter, flammamque nocentem
Gradivi, placidumque Jovem, stetit arce supremâ,
Argenti quâ zona riget Saturnia tractu.
Machina laxatur cœli, rutilæque patescunt
Sponte fores : Arctoa parat convexa Bootes ; 170
Australes reserat portas succinctus Orion ;
Invitantque novum sidus, pendentque vicissim,
Quas partes velit ille sequi, quibus esse sodalis
Dignetur stellis, aut quâ regione moveri.
O decus ætherium, terrarum gloria quondam ! 175
Te tuus Oceanus natali gurgite lassum
Excipit, et notis Hispania proluit undis,

Fortunate parens, primos cum detegis ortus,
Adspicias Arcadium: cum te proclivior urges,
Occiduum visus remoratur Honorius ignem. 180
Et quocumque vagos flectas sub cardine cursus,
Natorum per regna venis, qui mente serenâ,
Matureque regunt victas moderamine gentes;
Sæcula qui rursus formant meliore metallo.
Luget Avarities Stygiis innexa catenis; 185
Cumque suo demens expellitur Ambitus auro.
Non dominantur opes: non corrumpentia sensus
Dona valent: emitur solâ virtute potestas.
Unanimi fratres, quorum mare terraque fatis
Debentur, quodcumque manus evasit avitas, 190
Quod superest patri; vobis jam Mulciber arma
Præparat, et Siculâ Cyclops incude laborat.
Brontes innumeris exasperat ægida signis;
Altum fulmineâ crispâre in casside conum
Festinat Steropes; nectit thoraca Pyracmon;
Ignifluisque gemit Lipare fumosa cavernis. 195
Vobis Ioniâ virides Neptunus in algâ
Nutrit equos, qui summa freti per cœrula possint
Ferre viam, segetemque levi percurrere motu;
Nesciat ut spumas, nec proterat ungula culmos.
Jam video Babylona rapi, Parthumque coactum 200
Non fictâ trepidare fugâ; jam Bactra teneri
Legibus, et famulis Gangem pallescere ripis,
Gemmatosque humilem dispergere Persida cultus.
Ite per extremum Tanain, pigrosque Triones:
Ite per ardentem Libyam: superate vapores 205
Solis, et arcanos Nili deprendite fontes.
Herculeum finem, Bacchi transcurrite metas.
Vestri juris erit, quidquid complectitur axis.
Vobis Rubra dabunt pretiosas æquora conchas,
Indus ebur, ramos Panchaia, vellera Seres. 210

CL. CLAUDIANI
DE QUARTO CONSULATU
HONORII AUGUSTI
PANEGYRIS.

Auspiciis iterum sese regalibus annus
Induit, et notâ fruitur jactantior aulâ.
Limina nec passi circum privata morari,
Exsultant reduces, Augusto consule, fasces.
Cernis, ut armorum proceres, legumque potentes, 5
Patricios sumunt habitus; et more Gabino
Discolor incedit legio, positisque parumper
Bellorum signis, sequitur vexilla Quirini;
Lictori cedunt aquilæ; ridetque togatus
Miles, et in mediis effulget curia castris? 10
Ipsa, Palatino circumvallata senatu,
Jam trabeam Bellona gerit; parmamque removit,
Et galeam, sacras humeris vectura curules.
Nec te laurigeras pudeat, Gradive, secures
Pacatâ gestare manu, Latiâque micantem 15
Loricam mutare togâ, dum ferreus hæret
Currus, et Eridani ludunt per prata jugales.
Haud indigna coli, nec nuper cognita Marti,
Ulpia progenies, et, quæ diademata mundo
Sparsit, Ibera domus: nec tantæ vilior unda 20
Promeruit gentis seriem: cunabula fovit
Oceanus: terræ dominos pelagique futuros

Immenso decuit rerum de principe nasci.
Hinc processit avus (cui, post Arctoa frementi
Classica, Massylas annexuit Africa lauros) 25
Ille, Caledoniis posuit qui castra pruinis,
Qui medios Libyæ sub casside pertulit æstus,
Terribilis Mauro, debellatorque Britanni
Litoris, ac pariter Boreæ vastator et Austri.
Quid rigor æternus cœli, quid sidera prosunt, 30
Ignotumque fretum? maduerunt Saxone fuso
Orcades: incaluit Pictorum sanguine Thule:
Scotorum cumulos flevit glacialis Ierne.
Quid calor obsistit forti? per vasta cucurrit
Æthiopum, cinxitque novis Atlanta manipulis. 35
Virgineum Tritona bibit; sparsosque venenis
Gorgoneis vidit thalamos; et vile virentes
Hesperidum risit, quos ditat fabula, ramos.
Arx incensa Jubæ: rabies Maurusia ferro
Cessit; et antiqui penetralia diruta Bocchi. 40
Sed laudes genitor longe transgressus avitas,
Subdidit Oceanum sceptris, et margine cœli
Clausit opes: quantum distant a Tigride Gades,
Inter se Tanaïs quantum Nilusque relinquunt.
Hæc tamen innumeris per se quæsita tropæis: 45
Non generis dono, non ambitione potitus.
Digna legi virtus: ultro se purpura supplex
Obtulit, et solus meruit regnare rogatus.
Nam, cum barbaries penitus commota gementem
Irrueret Rhodopen, et, mixto turbine gentis, 50
Jam deserta suas in nos transfunderet Arctos,
Danubii totæ vomerent cum prœlia ripæ,
Cum Geticis ingens premeretur Mysia plaustis,
Flavaque Bistonios operirent agmina campos;
Omnibus afflictis, et vel labentibus ictu, 55
Vel prope casuris, unus tot funera contra
Restitit, exstinxitque faces, agrisque colonos
Reddidit, et leti rapuit de faucibus urbes.
Nulla relictæ foret Romani nominis umbra,
Ni pater ille tuus jamjam ruitura sublasset 60

Pondera, turbatamque ratem ; certâque levâsset 61
 Naufragium commune manu. Velut, ordine rupto,
 Cum procul insanæ traherent Phaëthonta quadrigæ,
 Sæviretque dies, terramque et stagna propinqui
 Haurirent radii, solito cum murmure torvis 65
 Sol occurrit equis ; qui postquam rursus heriles
 Agnovêre sonos ; rediit meliore magistro
 Machina, concentusque poli, currusque recepit
 Imperium, flammæque modum : sic traditus illi,
 Servatusque Oriens : at non pars altera rerum 70
 Tradita, bis possessa manu, bis parta periclis.
 Per varium gemini scelus erupêre tyranni
 Tractibus occiduis : hunc sæva Britannia fudit ;
 Hunc sibi Germanus famulum delegerat exsul ;
 Ausus uterque nefas, domini respersus uterque 75
 Insontis jugulo : novitas audere priori
 Suadebat, cautumque dabant exempla sequentem.
 Hic nova moliri præceps ; hic quærerere tuta
 Providus : hic fusis, collectis viribus ille :
 Hic vagus, excurrens ; hic intra claustra reductus.
 Dissimiles ; sed morte pares : evadere neutri 81
 Dedecus, aut mixtis licuit procumbere telis.
 Amissâ specie, raptis insignibus, ambo
 In vultus rediêre suos : manibusque revinctis
 Oblati gladiis submittunt colla paratis : 85
 Et vitam veniamque rogant. Pro damna pudoris !
 Qui modo tam densas nutu movêre cohortes,
 In quos jam dubius sese libraverat orbis,
 Non hostes victore cadunt, sed iudice sontes.
 Damnat voce reos, petiit quos Marte tyrannos. 90
 Amborum periêre duces : hic sponte carinâ
 Decidit in fluctus ; illum suus abstulit ensis.
 Hunc Alpes, hunc pontus habet. Solatia cæsis
 Fratribus hæc ultor tribuit : necis auctor uterque
 Labitur : Augustas par victima mitigat umbras. 95
 Has dedit inferias tumulis, juvenumque duorum
 Purpureos merito placavit sanguine Manes.
 Illi justitiam confirmavêre triumphî ;

Præsentes docuère Deos. Hinc sæcula discant,
Indomitum nihil esse pio, tutumve nocenti. 100
Nuntius ipse sui, longas incognitus egit,
Prævento rumore, vias : inopinus utrumque
Perculit, et clausos montes, ut plana, reliquit.

Exstruite immanes scopulos, attollite turres,
Cingite vos fluviis, vastas opponite silvas : 105
Garganum Alpinis, Apenninumque nivalem
Permixtis sociate jugis, et rupibus Hæmum
Addite, Caucaseis, involvite Pelion Ossæ :
Non dabitis murum sceleri : qui vindicet, ibit.
Omnia subsident, meliori pervia causæ. 110

Nec tamen, oblitus civem, cedentibus atrox
Partibus infremuit. Non insultare jacenti
Malebat : mitis precibus, pietatis abundans,
Pœnæ parcus erat : paci non intulit iram.
Post acies, odiis idem, qui terminus armis. 115
Profuit, hoc vincente, capi ; multosque subactos,
Prospera laturæ, commendavère catenæ.

Magnarum largitor opum, largitor honorum ;
Pronus, et in melius gaudens convertere fata.
Hinc amor, hinc validum, devoto milite, robur : 120
Hinc natis mansura fides : hoc nobilis ortu
Nasceris, æquævâ cum majestate creatus,
Nullaque privatæ passus contagia sortis.

Omnibus acceptis, ultro te regia solum
Protulit : et patrio felix adolescens in ostro ; 125
Membraque, vestitu nunquam temerata profano,
In sacros cecidère sinus. Hispania patrem
Auriferis eduxit aquis : te gaudet alumno
Bosporus. Hesperio de limine surgit origo :

Sed nutrix Aurora tibi. Pro pignore tanto 130
Certatur : geminus te civem vindicat axis.

Herculis et Bromii sustentat gloria Thebas :
Hæsit Apollineo Delos Latonia partu :
Cretaque se jactat tenero reptata Tonanti :
Sed melior Delo, Dictæis clarior oris, 135
Quæ dedit hoc Numen regio. Non litora nostro

Sufficerent angusta Deo; nec inhospita Cynti 137
 Saxa tuos artus duro læsere cubili.
 Acclinis genitrix auro, circumflua gemmis,
 In Tyrios enixa toros: ululata verendis 140
 Aula puerperiis. Quæ tunc documenta futuri!
 Quæ voces avium, quanti per inane volatus!
 Quis vatum discursus erat! tibi corniger Ammon,
 Et dudum taciti rupere silentia Delphi.
 Te Persæ cecinere Magi; te sensit Etruscus 145
 Augur; et inspectis Babylonius horruit astra.
 Chaldæi stupere senes; Cumanaque rursus
 Intonuit rupes, rabidæ delubra Sibyllæ.
 Nec te progenitum Cybeleius ære sonoro
 Lustravit Corybas: exercitus undique fulgens 150
 Adstitit: ambitur signis augustior infans.
 Sentit adorantes galeas, redditque ferocera
 Vagitus lituis. Vitam tibi contulit idem
 Imperiumque dies: inter cunabula consul
 Proveheris: signas, posito modo nomine, fastos;
 Donaturque tibi, qui te produxerat, annus. 156
 Ipsa Quirinali parvum te cinxit amictu
 Mater, et ad primas docuit reptare curules.
 Uberibus sanctis, immortalique Dearum
 Crescis adoratus gremio: tibi sæpe Diana 160
 Mænalios arcus venatricesque pharetras
 Suspendit, puerile decus: tu sæpe Minervæ
 Lusisti clypeo, fulvamque impune pererrans
 Ægida, tractasti blandos interritus angues.
 Sæpe tuas etiam, jam tum gaudente marito, 165
 Velavit regina comas, festinaque voti
 Præsumtum diadema dedit: tum lenibus ulnis
 Sustulit, et magno porrexit ad oscula patri.
 Nec dilatus honos: mutatus Principe Cæsar,
 Protinus æquaris fratri: nec certius unquam 170
 Hortati Superi: nullis præsentior æther
 Affluit omnibus: tenebris involverat atra
 Lumen hiems, densosque Notus collegerat imbres.
 Sed mox, cum solitâ miles te voce levasset,

Nubila dissolvit Phœbus ; pariterque dabantur 175
 Sceptra tibi, mundoque dies : caligine liber,
 Bosphorus adversam patitur Chalcedona cerni.
 Nec tantum vicina nitent : sed tota repulsis
 Nubibus exuitur Thrace : Pangæa resident,
 Insuetosque palus radios Mæotia vibrat. 180
 Nec Boreas nimbos, aut Sol ardentior egit :
 Imperii lux illa fuit : præsaus obibat
 Cuncta nitor : risitique tuo Natura sereno.
 Visa etiam medio, populis mirantibus, audax
 Stella die, dubitanda nihil, nec crine retuso 185
 Languida, sed quantus numeratur nocte Bootes.
 Emicuitque plagis alieni temporis hospes
 Ignis, et agnosci potuit, cum Luna lateret.
 Sive parens Augusta fuit, seu forte reluxit
 Divi sidus avi ; seu, te properantibus astris 190
 Cernere, Sol patiens cœlum commune remisit.
 Apparet, quid signa ferant : ventura potestas
 Claruit Ascanio, subitâ cum luce comarum
 Innocuus flagraret apex, Phrygioque volutus
 Vertice fatalis redimiret tempora candor. 195
 At tuæ cœlestes illustrant omina flammæ.
 Talis ab Idæis primævus Jupiter antris
 Possessi stetit arce poli, famulosque recepit,
 Naturâ tradente, Deos. Lanugine nondum
 Vernabant vultus, nec adhuc per colla fluebant 200
 Moturæ convexa comæ : tum scindere nubes
 Discebat, fulmenque rudi torquere lacerto.
 Lætior augurio genitor, natisque superbus
 Jam paribus, duplici fultus consorte redibat,
 Splendebatque pio complexus pignora curru. 205
 Haud aliter summo gemini cum patre Lacones,
 Progenies Lædæa, sedent : in utroque relucet
 Frater, utroque soror : simili chlamys effluit auro :
 Stellati pariter crines : juvat ipse Tonantem
 Error, et ambiguae placet ignorantia matri. 210
 Eurotas proprios discernere nescit alumnos.
 Ut domus exceperit reduces, ibi talia tecum

Pro rerum stabili fertur ditione locutus:

“ Si tibi Parthorum solium Fortuna dedisset,
Care puer, terrisque procul venerandus Eois, 215

Barbarus Arsacio consurgeret ore tiaras;
Sufficeret sublime genus, luxuque fluentem
Deside nobilitas posset te sola tueri.

Altera Romanæ longe rectoribus aulæ
Conditio: virtute decet, non sanguine, niti. 220

Major et utilior fato conjuncta potenti,
Vile latens, virtus: quid enim submersa tenebris
Proderit obscuro? veluti sine remige puppis;
Vel lyra, quæ reticet; vel, qui non tenditur, arcus.
Hanc tamen haud quisquam, qui non agnovit ante
Semet, et incertos animi pacaverit æstus, 226

Inveniet: longis illuc ambagibus itur.
Disce orbi, quod quisque sibi. Cum conderet artus
Nostros, ætheriis miscens terrena Prometheus,
Sinceram patrio mentem furatus Olympo, 230

Continuit claustris, indignantemque revinxit.
Et, cum non aliter possent mortalia fingi,
Adjunxit geminas: illæ, cum corpore lapsæ,
Inteunt: hæc sola manet, bustoque superstes
Evolat: hanc altâ capitis fundavit in arce, 235

Mandatricem operum, prospecturamque labori.
Illas inferius collo, præceptaque summæ
Passuras dominæ, dignâ statione locavit.
Quippe opifex, veritus confundere sacra profanis,
Distribuit partes animæ, sedesque removit. 240

Iram sanguinei regio sub pectore cordis
Protegit imbutam flammis, avidamque nocendi,
Præcipitemque sui. Rabie succensa tumescit:
Contrahitur [stupefacta] metu: cumque omnia secum
Duceret, et requiem membris vesana negaret; 245
Invenit pulmonis opem, madidumque furenti
Præbuit, ut tumidæ ruerent in mollia fibræ.

At sibi cuncta petens, nil collatura Cupido,
In jecur et tractus imos compulsa recessit.
Quæ, velut immanes præerat dum bellua rictus, 250

Expleri pascique nequit : nunc verbere curas 251
Torquet avaritiæ ; stimulis nunc flagrat amorum ;
Nunc gaudet ; nunc mœsta dolet ; satiataque rursus
Exoritur, cæsâque redit pollentius Hydrâ.
Hos igitur potuit si quis sedare tumultus, 255
Inconcussa dabit puræ sacraria menti.
Tu licet extremos late dominere per Indos,
Te Medus, te mollis Arabs, te Seres adorent ;
Si metuis, si prava cupis, si duceris irâ,
Servitii patiêre jugum : tolerabis iniquas 260
Interius leges. Tunc omnia jure tenebis,
Cum poteris rex esse tui. Proclivior usus
In pejora datur : suadetque licentia luxum,
Illecebrisque effrena favet : tum vivere caste
Asperius, cum prompta Venus : tum durius iræ 265
Consultitur, cum pœna patet : sed comprime motus :
Nec tibi, quid liceat, sed quid fecisse decebit,
Occurrat : mentemque domet respectus honesti.
Hoc te præterea crebro sermone monebo,
Ut te totius medio telluris in ore 270
Vivere cognoscas, cunctis tua gentibus esse
Facta palam ; nec posse dari regalibus usquam
Secretum vitiis : nam lux altissima fati
Occultum nihil esse sinit ; latebrasque per omnes
Intrat, et abstrusos explorat fama recessus. 275
Sis pius in primis : nam, cum vincamur in omni
Munere, sola Deos æquat clementia nobis.
Neu dubie suspectus agas, neu falsus amicis,
Rumorumve avidus : qui talia curat, inanes
Horrebit strepitus, nullâ non anxius horâ. 280
Non sic excubiæ, non circumstantia pila,
Quam tutatur amor : non extorquebis amari.
Hoc alterna fides, hoc simplex gratia donat.
Nonne vides, operum quo se pulcherrimus ille
Mundus amore liget, nec vi connexa per ævum 285
Conspirent elementa sibi ? quod limite Phœbus
Contentus medio, contentus litore pontus ?
Et qui perpetuo terras ambitque vehitque,

Nec premat incumbens, oneri nec cesserit, aër?
 Qui terret, plus ipse timet: sors ista tyrannis 290
 Convenit. Invideant claris, fortesque trucidant;
 Muniti vivant gladiis, septique venenis;
 Ancipites habeant arces, trepidique minentur:
 Tu civem patremque geras: tu consule cunctis,
 Non tibi: nec tua te moveant, sed publica vota. 295
 In commune jubes si quid, censesve tenendum,
 Primus jussa subi: tunc observantior æqui
 Fit populus; nec ferre negat, cum viderit ipsum
 Auctorem parere sibi. Componitur orbis
 Regis ad exemplum: nec sic inflectere sensus 300
 Humanos edicta valent, ut vita regentis.
 Mobile mutatur semper, cum principe, vulgus.
 His tamen effectis; neu fastidire minores,
 Neu pete præscriptos homini transcendere fines:
 Inquinat egregios adjuncta superbia mores. 305
 Non tibi tradidimus dociles servire Sabæos;
 Armeniæ dominum non te præfecimus oræ;
 Non damus Assyriam, tenuit quam femina, gentem.
 Romani, qui cuncta diu rexêre, regendi:
 Qui nec Tarquinii fastus, nec jura tulêre 310
 Cæsaris. Annales veterum delicta loquuntur.
 Hærebunt maculae. Quis non per sæcula damnet
 Cæsareæ portenta domûs? quem dira Neronis
 Funera, quem rupes Caprearum tetra latebit,
 Incesto possessa seni? Victura feretur 315
 Gloria Trajani; non tam quod, Tigride victo,
 Nostra triumphati fuerint provincia Parthi,
 Alta quod invectus fractis Capitolia Dacis;
 Quam patriæ quod mitis erat. Ne desine tales,
 Nate, sequi. Si bella tonant, prius agmina duris
 Exerce studiis; et sævo præstrue Marti. 321
 Non brumæ requies, non hibernacula segnes
 Enervent torpore manus. Ponenda salubri
 Castra loco: præbenda vigil custodia vallo.
 Disce, ubi denseri cuneos, ubi cornua tendi 325
 Æquius, aut iterum flecti; quæ montibus aptæ,

Quæ campis acies; quæ fraudi accommoda vallis;
 Quæ via difficilis. Fidit si mœnibus hostis,
 Tum tibi muralis librato machinæ pulsu
 Saxa rotet; præceps aries, protectaque portas 330
 Testudo feriat: ruat emersura juvenus
 Effossi per operta soli. Si longa moretur
 Obsidio; tum vota cave secura remittas,
 Inclusumve putes: multis damnosa fuere
 Gaudia: dispersi pereunt, somnove soluti. 335
 Sæpius incautæ nocuit victoria turbæ.
 Neu tibi regificis tentoria larga redundant
 Deliciis; neve imbelles ad signa maniplos
 Luxuries armata trahat: neu flantibus Austriis
 Neu pluviis cedas; neu, defensura calorem, 340
 Aurea submoveant rapidos umbracula soles.
 Inventis utêre cibis: solabere partes
 Æquali sudore tuas. Si collis iniquus,
 Primus ini: silvam si cedere provocat usus,
 Sumtâ ne pudeat quercum straxisse bipenni. 345
 Calcatur si pigra palus, tuus ante profundum
 Prætentet sonipes: fluvios tu protere cursu
 Hærentes glacie; liquidos tu scinde natatu.
 Nunc eques in medias equitum te consere turmas;
 Nunc pedes assistas pediti: tum promptius ibunt, 350
 Te socio: tum conspicuus gratusque feretur,
 Sub te teste, labor." Dicturum plura parentem
 Voce subis: "Equidem, faveant modo Numina cœp-
 tis,
 Hæc effecta dabo: nec me fratrique tibi que
 Dissimilem populi commissaque regna videbunt. 355
 Sed cur non potius, verbis quæ disseris, usu
 Experior? gelidas certe nunc tendis in Alpes:
 Duc tecum comitem: figant, sine, nostra tyrannum
 Spicula: pallescat nostro, sine, barbarus arcu.
 Italiane feram furiis prædonis acerbi 360
 Subjectam? patiar Romam servire clienti?
 Quæque adeone puer? nec me polluta potestas,
 Nec pia cognati tanget vindicta cruoris?

Per strages equitare libet. Da protinus arma.
 Cur annos obicis? pugnae cur arguor impar? 365
 Æqualis mihi Pyrrhus erat, cum Pergama solus
 Verteret, et patri non degeneraret Achilli.
 Denique si princeps castris hære nequibo,
 Vel miles veniam." Delibat dulcia nati
 Oscula, miratusque refert: "Laudanda petisti: 370
 Sed festinus amor. Veniet robustior ætas:
 Ne propere: necdum decimas emensus aristas,
 Aggrederis metuenda viris. Vestigia magnæ
 Indolis agnosco. Fertur Pellæus, Eoum
 Qui domuit Porum, cum prospera sæpe Philippi 375
 Audiret, lætos inter flevisse sodales,
 Nil sibi vincendum patris virtute relinqui.
 Hos video motus: fas sit promittere patri:
 Tantus eris: nostro nec debes regna favori,
 Quæ tibi jam Natura dedit. Sic mollibus olim 380
 Stridula ducturum pratis examina regem
 Nascentem venerantur apes, et publica mellis
 Jura petunt, traduntque favos: sic pascua parvus
 Vindicat, et, necdum firmatis cornibus, audax
 Jam regit armentum vitulus: sed proelia differ 385
 In juvenem; patiensque meum cum fratre tuere,
 Me bellante, locum. Vos impacatus Araxes,
 Vos celer Euphrates timeat: sit Nilus ubique
 Vester, et emisso quidquid Sol imbuit ortu.
 Si pateant Alpes, habeat si causa secundos 390
 Justior eventus, aderis, partesque receptas
 Suscipies; animosa tuas ut Gallia leges
 Audiat, et nostros æquus modereris Iberos.
 Tunc ego, securus fati, lætusque laborum,
 Discedam, vobis utrumque regentibus axem. 395
 Interea Musis, animus dum mollior, instes:
 Et, quæ mox imitere, legas; nec desinat unquam
 Tecum Graia loqui, tecum Romana vetustas.
 Antiquos evolve duces: assuesce futuræ
 Militiæ: Latium retro te confer in ævum. 400
 Libertas quæsita placet? mirabere Brutum.

Perfidiam damnas? Metti satiabere pœnis. 402

Triste rigor nimius? Torquati despue mores.

Mors impensa bonum? Decios venerare ruentes.

Vel solus quid fortis agat, te ponte soluto 405

Oppositus Cocles, Muſſi te flamma, docebit.

Quid mora perfringat, Fabius; quid rebus in arctis

Dux gerat, ostendat Gallorum strage Camillus.

Discitur hinc nullos meritis obsistere casus:

Prorogat æternam feritas tibi Punica famam, 410

Regule: successus superant adversa Catonia.

Discitur hinc, quantum paupertas sobria possit:

Pauper erat Curius, reges cum vinceret armis;

Pauper Fabricius, Pyrrhi cum sperneret aurum.

Sordida Serranus flexit dictator aratra: 415

Lustratæ lictore casæ, fascesque salignis

Postibus affixi: collectæ consule messes,

Et sulcata diu trabeato rura colono."

Hæc genitor præcepta dabat: velut ille carinæ

Longævus rector, variis quem sæpe procellis 420

Exploravit hiems, ponto jam fessus et annis,

Æquoreas alni nato commendat habenas,

Et casus artesque docet, quo dextra regatur

Sidere, quo fluctus possint moderamine falli;

Quæ nota nimborum; quæ fraus infida sereni; 425

Quid Sol occiduus prodat; quo saucia vento,

Decolor iratos attollat Cynthia vultus.

Adspice nunc, quâcumque micas, seu circulus Austri,

Magne parens, seu te gelidi meruère Triones;

Adspice: completur votum: jam natus adæquat 430

Te meritis, et (quod magis est optabile) vincit,

Subnixus Stilichone tuo; quem fratribus ipse,

Discedens, clypeum defensoremque, dedisti.

Pro nobis nihil ille pati, nullumque recusat

Discrimen tentare sui: non dura viarum, 435

Non incerta maris. Libyæ squalentis arenas

Audebit superare pedes; madidâque cadente

Pliade, Gætulas intrabit navita Syrtes.

Hunc tamen in primis populos levitate feroces,

Et Rhenum, pacare jubes : volat ille citatis 440
 Vectus equis ; nullâque latus stipante catervâ,
 Aspera nubiferas quâ Rhætia porrigit Alpes,
 Pergit, et hostiles (tanta est fiducia) ripas
 Incomitatus adit. Totum properare per amnem
 Attonitos humili reges cervice videres. 445
 Ante ducem nostrum flavam sparsêre Sicambri
 Cæsariem ; pavidoque orantes murmure Franci
 Procubuêre solo. Juratur Honorius absens ;
 Imploratque tuum supplex Alamannia nomen.
 Bastarnæ venêre truces ; venit accola silvæ 450
 Bructerus Hercyniæ : latisque paludibus exit
 Cimbrus, et ingentes Albin liquêre Cherusci.
 Accipit ille preces varias, tardeque rogatus
 Annuit ; et magno pacem pro munere donat.
 Nobilitant veteres Germanica fœdera Drusus, 455
 Marte sed ancipiti, sed multis cladibus emta.
 Quis victum meminit solâ formidine Rhenum ?
 Quod longis alii bellis potuêre mereri,
 Hoc tibi dat Stilichonis iter. Post otia Galli
 Limitis, hortaris Graias fulcire ruinas : 460
 Ionium tégitur velis, ventique laborant
 Tot curvare sinus : servaturasque Corinthum
 Prosequitur facili Neptunus gurgite classes.
 Et puer, Isthmiaci jam pridem litoris exsul,
 Securâ repetit portus cum matre, Palæmon. 465
 Plaustra cruore natant : metitur pellita juvenus.
 Pars morbo, pars ense perit. Non lustra Lycei,
 Non Erymanthæ jam copia sufficit umbræ,
 Innumeris exusta rogis : nudataque ferro
 Sic flagrâsse suas lætantur Mænala silvas. 470
 Excutiat cineres Ephyre ; Spartanus et Arcas
 Tutior exsanges pedibus proculcet acervos.
 Fessaque pensatis respiret Græcia pœnis :
 Gens, quâ non Scythicos diffusior ulla Triones
 Incoluit, (cui parvus Athos, angustaque Thrace, 475
 Cum transiret, erat) per te, viresque tuorum
 Fracta ducum ; lugetque sibi jam rara superstes.

Et, quorum turbæ spatium vix præbuit orbis,
 Uno colle latent: sitiens, inclusaque vallo,
 Ereptas quæsitit aquas, quas, hostibus ante 480
 Contiguas, alio Stilichon deflexerat actu;
 Mirantemque novas ignota per avia valles,
 Jusserat averso fluvium migrare meatu.
 Obvia quid mirum vinci, cum barbarus ultro
 Jam cupiat servire tibi? Tua Sarmata discors 485
 Sacramenta petit: projectâ pelle, Gelonus
 Militat: in Latios ritus transistis, Alani.
 Ut fortes in Marte viros, animisque paratos,
 Sic justos in pace legis, longumque tueris
 Electos: crebris nec succedentibus urges. 490
 Judicibus notis regimur, fruimurque quietis
 Militiæque bonis; ceu bellatore Quirino,
 Ceu placido moderante Numâ. Non imminet ensis:
 Nullæ nobilium cædes: non crimina vulgo
 Texuntur: patriâ mœstus non truditur exsul. 495
 Impia continui cessant augmenta tributi:
 Non infelices tabulæ, non hasta refixas
 Vendit opes: avidâ sector non voce citatur:
 Nec tua privatis crescunt æraria damnis.
 Munificus largi, sed non et prodigus, auri. 500
 Perdurat non emta fides: nec pectora merces
 Alligat: ipsa suo pro pignore castra laborant.
 Te miles nutritor amat: quæ denique Romæ
 Cura tibi! quam fixa manet reverentia Patrum!
 Firmatur senium juris; priscamque resumunt 505
 Canitiem leges; emendanturque vetustæ,
 Acceduntque novæ. Talem sensère Solonem
 Res Pandionis: sic armipotens Lacedæmon
 Despexit muros, rigido munita Lycurgo.
 Quæ, sub te, vel causa brevis, vel judicis error, 510
 Negligitur? dubiis quis litibus addere finem
 Justior, et mersum latebris educere verum?
 Quæ pietas, quantusque rigor, tranquillaque magni
 Vis animi, nulloque levis terrore moveri,
 Nec nova mirari facilis! quam docta facultas 515

Ingenii, linguæque modus! Responsa verentur 516
Legati, gravibusque latet sub moribus ætas.
Quantus in ore pater! radiat quam torva voluptas
Frontis, et Augusti majestas grata pudoris!
Jam patrias imples galeas: jam cornus avita 520
Tentatur vibranda tibi: promittitur ingens
Dextra rudimentis, Romanaque vota moratur.
Quis decor, incedis quoties clypeatus, et auro
Squameus, et rutilus cristis, et casside major!
Sic, cum Threïciâ primum sudaret in hastâ, 525
Flumina laverunt puerum Rhodopeia Martem.
Quæ vires jaculis! vel, cum Gortynia tendis
Spicula, quam felix arcus, certique petitor
Vulneris, et jussum mentiri nescius ictum!
Scis, quo more Cydon, quâ dirigat arte sagittas 530
Armenius; refugo quæ sit fiducia Partho.
Sic, Amphiionia pulcher sudore palæstræ,
Alcides pharetras, Dircæaque tela solebat
Prætentare feris, olim domitura Gigantas,
Et pacem latura polo: semperque cruentus 535
Ibat, et Alcmenæ prædam referebat ovanti.
Cœruleus, tali prostratus Apolline, Python
Implicuit fractis moritura volumina silvis.
Cum vectaris equo, simulacraque Martia ludis,
Quis molles sinuare fugas, quis tendere contum 540
Acrior, aut subitos melior flexisse recursus?
Non te Massagetæ, non gens exercita campo
Thessala, non ipsi poterunt æquare bimembres.
Vix comites alæ, vix te suspensa sequuntur
Agmina: ferventesque tument post terga dracones.
Utque tuis primum sonipes calcaribus arsit, 546
Ignescunt patulæ nares; non sentit arenas
Ungula; discussæque jubæ sparguntur in armos.
Turbantur phaleræ; spumosis morsibus aurum
Fumat; anhelantes exundant sanguine gemmæ. 550
Ipse labor pulvisque decent, confusaque motu
Cæsaries: vestis radiato murice solem
Combibit: ingesto crispatur purpura vento.

Si dominus legeretur equis, tua posceret ultro
Verbera, Nereïdum stabulis nutritus, Arion ; 555
Serviretque tuis, contempto Castore, frenis
Cyllarus ; et flavum Xanthus sprevisset Achillem.
Ipse tibi famulas præberet Pegasus alas,
Portaretque libens ; melioraque pondera passus,
Bellerophontas indignaretur habenas. 560
Quin etiam velox Auroræ nuntius, Æthon,
Qui fugat hinnitu stellas, roseoque domatur
Lucifero, quoties equitem te cernit ab astris,
Invidet, inque tuis mavult spumare lupatis.
Nunc quoque quos habitus, quantæ miracula pompæ
Vidimus, Ausonio cum jam succinctus amictu 566
Per Ligurum populos solito conspectior ires,
Atque inter niveas alte veherere cohortes ;
Obnixisque simul pubes electa lacertis
Sidereum gestaret onus ! Sic numina Memphis 570
In vulgus proferre solet : penetralibus exit
Effigies ; brevis illa quidem : sed plurimus infra
Liniger imposito suspirat veste sacerdos,
Testatus sudore Deum. Nilotica sistris
Ripa sonat, Phariosque modos Ægyptia ducit 575
Tibia : submissis admugit cornibus Apia.
Omnis nobilitas, omnis tua sacra frequentant
Thybridis et Latii soboles : convenit in unum
Quidquid in orbe fuit procerum ; quibus auctor honoris
Vel tu, vel genitor : numeroso consule consul 580
Cingeris, et socios gaudes admittere Patres.
Illustri te prole Tagus, te Gallia doctis
Civibus, et toto stipavit Roma senatu.
Portatur juvenum cervicibus aurea sedes,
Ornatuque novo gravior Deus : asperat Indus 585
Velamenta lapis, pretiosaque fila smaragdis
Ducta virent : amethystus inest ; et fulgor Iberus
Temperat arcanis hyacinthi cœrula flammis.
Nec rudis in tali suffecit gratia textu :
Auget acus meritum ; picturatumque metallis 590
Vivit opus, multâque ornantur iaspide cultus,

- Et variis spirat Nereia bacca figuris. 592
 Quæ tantum potuit digitis mollire rigorem
 Ambitiosa colus? vel cujus pectinis arte
 Traxerunt solidæ gemmarum stamina telæ? 595
 Invia quis calidi scrutatus stagna profundi
 Tethyos invasit gremium? quis divitis algæ
 Germina flagrant inter quæsivit arenas?
 Quis junxit lapides ostro? quis miscuit ignes
 Sidonii Rubrique maris? tribuere colorem 600
 Phœnices, Seres subtemina, pondus Hydaspea.
 Hoc si Mæonias cinctu graderere per urbes,
 In te pampineos transferret Lydia thyrsos,
 In te Nysa choros: dubitarent orgia Bacchi,
 Cui furerent: irent blandæ sub vincula tigres. 605
 Talis Erythræis intextus nebrida gemmis
 Liber agit currus, et Caspia flectit eburnis
 Colla jugis: Satyri circum, crinemque solutæ
 Mænades, adstringunt hederis victricibus Indos:
 Ebrius hostili velatur palmite Ganges. 610
 Auspice mox lætum sonuit clamore tribunal,
 Te fastos ineunte quater: sollennia ludit
 Omina Libertas: deductum Vindice morem
 Lex celebrat; famulusque jugo laxatus herili
 Ducitur, et grato remeat securior ictu. 615
 Tristis conditio, pulsata fronte, recedit.
 In civem rubuere genæ; tergoque removit
 Verbera permissi felix injuria voti.
 Prospera Romuleis sperantur tempora rebus,
 In nomen ventura tuum: permissa futuris 620
 Dant exempla fidem: quoties te cursibus ævi
 Præfecit, toties accessit laurea patri.
 Ausi Danubium quondam tranare Gruthungi
 In lintres fregere nemus: ter mille ruebant
 Per fluvium plenæ cuneis immanibus alni: 625
 Dux Odothæus erat: tantæ conamina classis
 Incipiens [ætas] et primus contudit annus.
 Submersæ sedere rates: fluitantia nunquam
 Largius Arctos pavere cadavera pisces.

Corporibus premitur Peuce: per quinque recurrens
Ostia, barbaricos vix egerit unda cruores. . 631

Confessusque parens Odothæi regis opima
Retrulit exuviasque tibi. Civile secundis
Conficis auspiciis bellum. Tibi debeat orbis
Fata Gruthungorum, debellatumque tyrannum. 635
Ister sanguineos egit, te consule, fluctus.

Sed patriis olim fueras successibus auctor,
Nunc eris ipse tuis. Semper venêre triumphî
Cum trabeis; sequiturque tuos Victoria fasces.
Sis, precor, assiduus consul; Mariique relinquas, 640

Et senis Augusti, numerum. Quæ gaudia mundo,
Per tua lanugo cum serpere cœperit ora,
Cum tibi prodiderit festas nox pronuba tædas!
Quæ tali devota toro, quæ murice fulgens
Ibit in amplexus tanti regina mariti? 645

Quænam tot Divis veniet nurus, omnibus arvis
Et toto dotanda mari? quantusque feretur

Idem per Zephyri metas Hymenæus et Buri!

O! mihi si liceat thalamis intendere carmen
Connubiale tuis, si te jam dicere patrem! 650

Tempus erit, cum tu trans Rhēni cornua victor,

Arcadius captæ spoliis Babylonos onustus,

Communem majore togâ signabitis annum,

Crinitusque tuo sudabit fasce Suëvus:

Ultima fraternas horrebunt Bactra secures. 655

CL. CLAUDIANI
EPITHALAMII IN NUPTIAS
HONORII AUG. ET MARIÆ
PRÆFATIO.

SURGERET in thalamum ducto cum Pelion arcu,
Nec caperet tantos hospita terra Deos;
Cum socer æquoreus, numerosaque turba sororum,
Certarent epulis continuare dies;
Præberetque Jovi communia pocula Chiron, 5
Molliter obliquâ parte refusus equi;
Penëus gelidos mutaret nectare fontes,
Ætæis fluerent spumea vina jugis;
Terpsichore facilem lascivo pollice movit
Barbiton, et molles duxit in antra choros. 10
Carmina nec Superis, nec displicuêre Tonanti,
Cum teneris nôssent congrua vota modis.
Centauri Faunique negant: quæ flectere Rhæton,
Quæ rigidum poterant plectra movere Pholum?
Septima lux aderat cœlo; totiesque renato 15
Viderat exactos Hesperus igne choros.
Tum Phœbus, quo saxa domat, quo pertrahit ornos,
Pectine tentavit nobiliore lyram:
Venturumque sacris fidibus jam spondet Achillem:
Jam Phrygiæ cædes, jam Simoënta canit. 20
Fronroso strepuit felix Hymenæus Olympo:
Reginam resonant Othrys et Ossa Thetin.

EPITHALAMIUM

HONORII AUG. ET MARIÆ.

HAUSERAT insolitos promissæ virginis ignes
Augustus, pronoque rudis flagraverat æstu.
Nec, novus unde calor, nec quid suspiria vellent,
Noverat incipiens, et adhuc ignarus amandi.
Non illi venator equus, non spicula curæ : 5
Non jaculum torquere libet : mens omnis aberrat
In vultus, quos finxit Amor. Quam sæpe medullis
Erupt gemitus ! quoties incanduit ore,
Confessus secreta, rubor ; nomenque beatum
Injussæ scripsêre manus ! Jam munera nuptæ 10
Præparat ; et pulchros, Mariæ sed luce minores,
Eligit ornatus ; quidquid vënerabilis olim
Livia, Divorumque nurus gessêre superbæ.
Incusat spes ægra moras ; longique videntur
Stare dies, segnemque rotam non flectere Phœbe. 15
Scyria sic tenerum virgo flammabat Achillem,
Fraudis adhuc expers ; bellatricesque docebat
Ducere fila manus, et, mox quos horruit Ide,
Thessalicos roseo pectebat pollice crines.
Hæc etiam queritur secum : “ Quonam usque verend-
dus 20
Cunctatur mea vota socer ? quid jungere differt,
Quam pepigit, castasque preces implere recusat ?
Non ego, luxuriem regum moremque secutus,
Quæsivi vultum tabulis ; ut, nuntia formæ,
Lena par innumeros iret pictura penates ; 25
Nec, variis dubium thalamis lecturus amorem,

Ardua commisi falsæ connubia ceræ. 27
 Non rapio præceps alienæ fœdera tædæ,
 Sed, quæ sponsa mihi pridem, patriisque relictæ
 Mandatis, uno materni sanguinis ortu 30
 Communem partitur avum. Fastigia supplex
 Deposui, gessique procum : de limine sacro
 Oratum misi proceres, qui proxima nobis
 Jura tenent. Fateor, Stilichon, non parva poposci :
 Sed certe mereor princeps, hoc principe natus, 35
 Qui sibi te generum fraternâ prole revinxit,
 Cui Mariam debes : fœnus mihi solve paternum :
 Redde suos aulæ. Mater fortasse rogari
 Mollior. O patrui germen, cui nominis hæres
 Successi, sùblime decus torrentis Iberi, 40
 Stirpe soror, pietate parens ! tibi creditus infans,
 Inque tuo crevi gremio ; partuque remoto,
 Tu potius Flaccilla mihi. Quid dividis ergo
 Pignora ? quid juveni natam non tradis alumno ?
 Optatusne dies aderit ? dabiturne jugalis 45
 Nox unquam ?" Tali solatur vulnera questu.
 Risit Amor, placidæque volat trans æquora Matri
 Nuntius, et totas jactantior explicat alas.
 Mons latus Eoum Cypri præruptus obumbrat,
 Inuius humano gressu ; Phariumque cubile 50
 Proteos, et septem despectat cornua Nili.
 Hunc neque canentes audent vestire pruinae ;
 Hunc venti pulsare timent, hunc lædere nimbi.
 Luxuriæ Venerique vacat. Pars acrior anni
 Exsulat : æterni patet indulgentia veris. 55
 In campum se fundit apex : hunc aurea sepes
 Circuit, et fulvo defendit prata metallo.
 Mulciber, ut perhibent, his oscula conjugis emit
 Mœnibus, et tales uxorius obtulit arces.
 Intus rura micant, manibus quæ subdita nullis 60
 Perpetuum florent, Zephyro contenta colono ;
 Umbrosumque nemus, quo non admittitur ales,
 Nî probet ante suos Divâ sub iudice cantus.
 Quæ placuit, fruitur ramis ; quæ victa, recedit.

Vivunt in Venerem frondes ; omnisque viciissim 65
 Felix arbor amat : nutant ad mutua palmæ
 Fœdera : populeo suspirat populus ictu ;
 Et platani platanis, alnoque assibilat alnus.
 Labuntur gemini fontes : hic dulcis, amarus
 Alter, et infusis corrumpit mella venenis, 70
 Unde Cupidineas armavit fama sagittas.
 Mille pharetrati ludunt in margine fratres,
 Ore pares, similes habitu, gens mollis Amorum.
 Hos Nymphæ pariunt : illum Venus aurea solum
 Edidit : ille Deos cœlumque et sidera cornu 75
 Temperat, et summos dignatur figere reges :
 Hi plebem feriunt. Nec cætera numina desunt.
 Hic habitat nullo constricta Licentia nodo,
 Et flecti faciles Iræ, vinoque madentes
 Excubiæ, Lacrymæque rudes, et gratus amantûm 80
 Pallor, et in primis titubans Audacia furtis,
 Jucundique Metus, et non securo Voluptas ;
 Et lasciva volant levibus Perjuria pennis.
 Quos inter petulans altâ cervice Juventas
 Excludit Senium luco. Procul atria Divæ 85
 Permutant radios, silvæque obstante virescunt.
 Lemnius hæc etiam gemmis extruxit et auro,
 Admiscens artem pretio, trabibusque smaragdis
 Supposuit cæsas hyacinthi rupe columnas.
 Beryllo paries, et iaspide lubrica surgunt 90
 Limina ; despectusque solo calcatur achates.
 In medio glebis redolentibus area dives
 Præbet odoratas messes : hic mitis amomi,
 Hic casie matura seges, Panchæaque turgent
 Cinnama ; nec siccâ frondescunt vimina costo ; 95
 Tardaque sudanti prorepunt balsama ligno.
 Quo postquam dilapsus Amor, longasque peregit
 Penna vias ; alacer, passuque superbiior intrat.
 Cæsariem tunc forte Venus subnixa corusco
 Fingebat solio : dextrâ lævæque sorores 100
 Stabant. Idaliæ : largos hæc nectaris imbres

Irrigat : hæc morsu numerosi dentis eburno 102
 Multifidum discrimen arat : sed tertia retro
 Dat varios nexus, et justo dividit orbes
 Ordine, neglectam partem studiosa relinquens. 105
 Plus error decuit : speculi nec vultus egebat
 Judicio : similis tecto monstratur in omni,
 Et rapitur, quocumque videt. Dum singula cernit,
 Seque probat, nati venientis conspicit umbram ;
 Ambrosioque sinu puerum complexa ferocem, 110
 " Quid tantum gavisus ? " ait : " quæ proelia sudas,
 Improbe ? quis jacuit telis ? iterumne Tonantem
 Inter Sidonias cogis mugire juvenecas ?
 An Titana domas ? an pastoralia Lunam
 Rursus in antra vocas ? durum magnumque videris
 Debellâsse Deum." Suspensus in oscula matris 116
 Ille refert : " Lætare, parens. Immane tropæum
 Rettulimus : nostrum jam sentit Honorius arcum.
 Scis Mariam, patremque ducem, qui cuspidè Gallos
 Italiamque fovet ; nec te præclara Serenæ 120
 Fama latet. Propera : regalibus annue votis.
 Junge toros." Gremio natum Cytherea removit ;
 Et crines festina ligat, peplumque fluentem
 Allevat, et blando spirantem numine cæston
 Cingitur, impulsos pluviis quo mitigat amnes, 125
 Quo mare, quo ventos, irataque fulmina solvit.
 Ut stetit ad litus, parvos affatur alumnos :
 " Equis erit, pueri, vitreas qui lapsus in undas
 Huc rapidum Tritona vocet, quo vecta per altum
 Deferar ? haud unquam tanto mihi venerit usu : 130
 Sacri, quos petimus, thalami : pernicios omnes
 Quærite, seu conchâ Libycum circumtonat æquor,
 Ægæas seu frangit aquas. Quicumque repertum
 Duxerit, auratâ donabitur ille pharetrâ."
 Dixerat ; et sparsâ diversi plebe feruntur 135
 Exploratores. Pelagi sub fluctibus ibat
 Carpathii Triton, obluctantemque petebat
 Cymothœon : timet illa ferum, seseque sequenti .

Surripit, et duris elabitur uda lacertis.

“Heus!” inquit speculatus Amor: “non vestra sub
imis 140

Furta tegi potuere vadis. Accingere, nostram
Vecturus dominam: pretium non vile laboris
Cymothoën facilem, quæ nunc detrectat, habebis.

Hac mercede veni.” Prorupit gurgite torvus
Semifer: undosi verrebant brachia crines. 145

Hispida tendebat bifido vestigia cornu,
Quâ pristis commissa viro. Ter pectora movit:
Jam quarto Paphias tractu sulcabat arenas.

Umbratura Deam retro sinuatur in arcum
Bellua: tum vivo squalentia murice terga 150

Purpureis mollita rosis: hoc navigat ostro.

Fulta Venus: niveæ delibant æquora plantæ.

Prosequitur volucrum late comitatus Amorum;

Tranquillumque ehoris quatitur mare:serta per omnem
Neptuni dispersa domum. Cadmeia ludit 155

Leucothoë, frenatque rosis delphina Palæmon:

Alternas violis Nereus interserit algas:

Canitiem Glaucus ligat immortalibus herbis.

Necnon et variis vectæ Nereïdes ibant,

Audito rumore, feris: hanc, pisce volutam, 160

Sublevat, Oceani monstrum, Tartessia tigris:

Hanc timor Ægæi, rupturus fronte carinas,

Trux aries: hæc cœruleæ suspensa lænæ

Innatat: hæc viridem trahitur complexa juvencum.

Certatimque novis onerant connubia donis. 165

Cingula Cymothoë, rarum Galatea monile,

Et gravibus Spatale baccis diadema ferebat

Intextum, Rubro quas legerat ipsa profundo.

Mergit se subito, vellitque corallia Doto.

Vimen erat, dum stagna subit: processerat undis:

Gemma fuit. Nudâ Venerem cinxere catervâ; 171

Plaudentesque simul tali cum voce sequuntur:

“Hos Mariæ cultus, hæc munera nostra, precamur,

Reginæ regina feras. Dic talia nunquam

Promeruisse Thetin, nec cum soror Amphitrite 175

Nostro nupta Jovi. Devotum sentiat æquor ; 176:
 Agnoscat famulum virgo Stilichonia pontum.
 [Victricis nos spem patriæ, classemque paternam
 Veximus, ad tristes cum tenderet ultor Achivos.]”

Jam Ligurum terris spumantia pectora Triton 180
 Appulerat, lassosque fretis extenderat orbes.
 Continuo, sublime volans, ad mœnia Gallis
 Condita, lanigeri suis ostentantia pellem,
 Pervenit. Adventu Veneris spissata recedunt
 Nubila : clarescunt puris Aquilonibus Alpes. 185
 Lætitiæ causas ignorat dicere miles ;
 Lætaturque tamen. Mavortia signa rubescunt
 Floribus, et subitis animantur frondibus hastæ.
 Illa suum dictis affatur talibus agmen :
 “ Gradivum, nostræ comites, arcete parumper ; 190
 Ut soli vacet aula mihi. Procul igneus horror
 Thoracum, gladiosque tegat vagina minaces.
 Stent bellatrices aquilæ, sævique dracones.
 Fas sit castra meis hodie succumbere signis.
 Tibia pro lituis, et, pro clangore tubarum, 195
 Molle lyræ festumque canant. Epulentur ad ipsas
 Excubias : mediis spirent crateres in armis.
 Laxet terribiles majestas regia fastus ;
 Et, sociam plebem non indignata, potestas
 Confundat turbæ proceres ; solvantur habenis 200
 Gaudia : nec leges pudeat ridere severas.
 Tu festas, Hymenæe, faces ; tu, Gratia, flores
 Elige ; tu geminas, Concordia, necte coronas.
 Vos, pennata cohors, quocumque vocaverit usus,
 Divisâ properate manu : neu marceat ulla 205
 Segnities. Alii, funalibus ordine ductis,
 Plurima venturæ suspendite lumina nocti :
 Hi nostrâ nitidos postes obducere myrto
 Contendant : pars nectareis adspergite tecta
 Fontibus, et flammâ lucos adolete Sabæos. 210
 Pars infecta croco velamina lutea Serum
 Pandite, Sidoniasque solo prosternite vestes.
 Ast alii thalamum docto componite textu ;

Stamine gemmato, picturatisque columnis,
 Ædificetur apex : qualem non Lydia dives 215
 Erexit Pelopi : nec quem struxêre Lyæo
 Indorum spoliis et opaco palmitè Bacchæ.
 Illic exuvias omnes cumulate parentûm :
 Quidquid avus senior, Mauro vel Saxone victis,
 Quidquid ab innumeris, socio Stilichone tremendus,
 Quæsivit genitor bellis ; quodcumque Gelonus 221
 Armeniusve dedit ; quantum crinita sagittis
 Attulit extremo Meroë circumflua Nilo ;
 Misit Achæmenio quidquid de Tigride Medus,
 Cum supplex emeret Romanam Parthia pacem. 225
 Nobilibus gazis opibusque cubilia surgant
 Barbaricis : omnes thalamo conferte triumphos."
 Sic ait : et sponsæ petit improvisa penates.

Illa autem, secura tori, tædasque parari
 Nescia, divinæ fruitur sermone parentis ; 230
 Maternosque bibit mores ; exemplaue discit
 Prisca pudicitæ. Latios nec volvere libros
 Desinit, aut Graios, ipsâ genitrice magistrâ ;
 Mæonius quæcumque senex, aut Thracius Orpheus,
 Aut Mitylenæo modulatur pectine Sappho ; 235
 (Sic Triviam Latona monet : sic mitis in antro
 Mnemosyne docili tradit præcepta Thalæ)
 Cum procul augeri nitor, et jucundior ær
 Attonitam lustrare domum, fundique comarum
 Gratus odor. Mox vera fides, numenque refulsit.
 Cunctatur stupefacta Venus : nunc ora puellæ, 241
 Nunc [flavo niveam] miratur vertice matrem.
 Hæc modo crescenti, plenæ par altera Lunæ ;
 Assurgit ceu forte minor sub matre virenti
 Laurus, et ingentes ramos, olimque futuras 245
 Promittit jam parva comas : vel flore sub uno
 Ceu geminæ Pæstana rosæ per jugera regnant :
 Hæc largo matura die, saturataque vernis
 Roribus, indulget spatio : latet altera nodo,
 Nec teneris audet foliis admittere soles. 250

Adstitit, et blande Mariam Cytherea salutet :

" Salve, sideres proles augusta Serenæ, 252
 Magnorum soboles regum, parituraque reges!
 Te propter, Paphias sedes Cyprumque reliqui;
 Te propter libuit tantos explere labores, 255
 Et tantum tranâsse maris; ne vilior ultra
 Privatos paterere lares; neu tempore longo
 Dilatæ juvenis nutriret Honorius ignes.
 Accipe fortunam generis: diadema resume,
 Quod tribuas natis; et in hæc penetralia rursus, 260
 Unde parens progressa, redi. Fac nulla subesse
 Vincula cognatæ; quamvis aliena fuisses
 Principibus, regnum poteras hoc ore mereri.
 Quæ propior sceptris facies? quis dignior aulâ
 Vultus erat? non labra rosæ, non colla pruinæ, 265
 Non crines æquant violæ, non lumina flammæ.
 Quam juncto leviter sese discrimine confert
 Umbra supercilii! miscet quam justa ruborem
 Temperies! nimio nec sanguine candor abundat.
 Auroræ vincis digitos, humerosque Dianæ. 270
 Ipsam jam superas matrem. Si Bacchus amator
 Dotali potuit cælum signare coronâ,
 Cur nullis virgæ redimitur pulchrior astris?
 Jam tibi molitur stellantia sarta Bootes;
 Inque decus Mariæ jam sidera parturit æther. 275
 I digno nectenda viro, tantique per orbem
 Consors imperii! Jam te venerabitur Ister:
 Nomen adorabunt populi: jam Rhenus et Albis
 Serviet: in medios ibis regina Sicambros.
 Quid numerem gentes, Atlanteosque recessus 280
 Oceani? toto pariter dotabere mundo."

Dixit; et ornatus, dederant quos nuper ovantes
 Nereïdes, collo membrisque micantibus aptat.
 Ipsa caput distinguit acu, substringit amictus:
 Flammea virgineis accommodat ipsa capillis. 285
 Ante fores jam pompa sonat, pilentaque sacram
 Præradiant ductura nurum. Calet obviis ire
 Jam princeps, tardumque cupit discedere solem.
 Nobiliſ haud aliter sonipes, quem primus amoris

Sollicitavit odor, tumidus, quatiensque decoras 290

Turbatâ cervice jubeas, Pharsalia rura

Pervolat, et notos hinnitu flagitat amnes,

Naribus accensis : mulcet fecunda magistros

Spes gregis, et pulchro gaudent armenta marito.

Candidus interea positus exercitus armis 295

Exsultat socerum circa ; nec signifer ullus,

Nec miles, pluviae flores dispergere ritu

Cessat, purpureoque ducem perfundere nimbo.

Hæc quoque velati lauro myrtoque canebant :

“ Dive parens, seu te complectitur axis Olympi,

Seu colis Elysias, animarum præmia, valles, 301

En promissa tibi Stilichon jam vota peregit :

Jam gratæ rediêre vices : cunabula pensat :

Acceptum reddit thalamum : natoque reponit,

Quod dederas genitor. Nunquam te, sancte, pigebit

Judicii : nec te pietas suprema fefellit. 306

Dignus, quem legeres ; dignus, cui pignora tanti

Principis, et rerum commendarentur habenæ.

Dicere nunc possem, quæ prælia gesta sub Hæmo,

Quæque cruentârint fumantem Strymona pugnae ;

Quam notus clypeo, quantâ vi fulminet hostem ; 311

Ni prohiberet Hymen. Quæ tempestiva relatu,

Nunc canimus. Quis consilio, quis juris et æqui

Nôsse modum, melior ? quod semper dissidet, in te

Convenit, ingenio robur, prudentia forti. 315

Fronte quis æquali ? quem sic Romana decerent

Culmina ? sufficerent tantis quæ pectora curis ?

Stes licet in populo ; clamet, quicumque videbit,

Hic est, hic Stilichon : sic se testatûr et offert

Celsa potestatis species ; non voce feroci, 320

Non alto simulata gradu, non improba gestu.

Affectant alii quidquid, fingique laborant,

Hoc donat Natura tibi. Pudor emicat unâ,

Formosusque rigor : vultusque auctura verendos

Canities festina venit ; [cum, sorte remotæ,] 325

Contingunt gravitasque senî, viresque juventæ.

Utraque te cingit propriis insignibus ætas.

Ornatur fortuna viro : non ulla nocendi
 Tela, nec infecti jugulis civilibus enses.
 Non odium terrore moves, nec frena resolvit 330
 Gratia : diligimus pariter, pariterque timemus.
 Ipse metus te noster amat : justissime legum
 Arbiter, egregiæ custos fidiſſime pacis,
 Optime ductorum, fortunatiſſime patrum,
 Plus jam, plus domino cuncti debere ſatemur, 335
 Quod gener eſt, invicte, tuus. Vincire coronâ :
 Inſere te noſtris, contempto jure, choreis.
 Sic puer Eucherius ſuperet virtute parentem :
 Aurea ſic videat ſimiles Thermantia tædas :
 Sic uterus creſcat Mariæ : ſic, natus in oſtro, 340
 Parvus Honoriades genibus conſidat avitis.

CL. CLAUDIANI

IN NUPTIAS

HONORII AUG. ET MARIÆ

FESCENNINA.

PRINCEPS corusco sidere pulchrior,
Parthis sagittas tendere certior,
Eques Gelonis imperiosior,
Quæ digna mentis laus erit arduæ?
Quæ digna formæ laus erit igneæ? 5
Te Leda mallet, quam dare Castorem :
Præfert Achilli te proprio Thetis :
Victum fatetur Delos Apollinem :
Credit minorem Lydia Liberum.
Tu cum per altas impiger ilices 10
Prædo citatum cornipedem regis,
Luduntque ventis instabiles comæ,
Telis jacebunt sponte tuis feræ ;
Gaudensque sacris vulneribus leo
Admittet hastam, morte superbior. 15
Venus reversum spernat Adonidem,
Damnet reductum Cynthia Virbium.
Cum, post labores, sub platani voles
Virentis umbrâ, vel gelido specu,
Torrentiorem fallere Sirium, 20
Et membra somno fessa resolveris ;
O ! quantus uret tum Dryadas calor !

Quot aestuantes ancipiti gradu
 Furtiva carpent oscula Nāides !
 Quis vero acerbis horridior Scythia, 25
 Quis belluarum corde furentior,
 Qui, cum micantem te prope viderit,
 Non optet ultro servitium pati ?
 Quis non catenas arripiat libens,
 Colloque poscat vincula libero ? 30
 Tu si nivalis per juga Caucasi
 Sævas petisses pulcher Amazonas,
 Peltata pugnas desereret cohors,
 Sexu recepto ; patris et immemor,
 Inter frementes Hippolyte tubas 35
 Strictam securim languida poneret ;
 Et seminudo pectore cingulum
 Forti negatum solveret Herculi ;
 Bellumque solus conficeret decor.
 Beata, quæ te mox faciet virum, 40
 Primisque sese junget amoribus.

Agz ! cuncta nuptiali
 Redimita vere, tellus,
 Celebra toros heriles.
 Omne nemus, cum fluviis, omne canat profundum.
 Ligures, favete, campi ; 46
 Veneti, favete, montes ;
 Subitisque se rosetis
 Vestiat Alpinus apex ; et rubeant pruinæ.
 Athesis strepat choreis ; 50
 Calamisque flexuosus
 Leve Mincius susurret ;
 Et Padus electriferis admoduletur alnis.
 Epulisque jam repleto
 Resonet Quirite Thybris ; 55
 Dominique læta votis,
 Aurea septemgeminas Roma coronet arces.
 Procul audiant Iberi,
 Fluit unde semen aulæ ;

Ubi plena laudarum,
Imperio feta, domus vix numerat triumphos. 60

Habet hinc patrem maritus;

Habet hinc puella matrem;

Geminâque parte ductum,

Cæsareum flumineo stemma recurrit ortu. 65

Decorent vireta Bætin;

Tagus intumescat auro;

Genefisque procreator,

Sub vitreis Oceanus luxurietur antris.
Oriensque regna fratrum, 70

Simul Occidensque, plaudant.

Placidæ jocentur urbes,

Quæque novo, quæque nitent deficiente Phœbo.

Aquiloniæ procellæ,

Rabidi, tacete, Cori: 75

Taceat sonorus Auster:

Solus ovantem Zephyrus perdominetur annum.

SOLITAS galeâ fulgere comas,

Stilichon, molli necte coronâ.

Cessent litui, sævumque procul 80

Martem felix tæda releget.

Tractus ab aulâ, rursus in aulam

Redeat sanguis patris officiis.

Junge potenti pignora dextrâ.

Gener Augusti pridem fueras, 85

Nunc rursus eris socer Augusti.

Quæ jam rabies livoris erit?

Vel quis dabitur color invidiæ?

Stilichon socer est; pater est Stilichon.

ATTOLLENS thalamis Idalium jubar, 90

Dilectus Veneri nascitur Hesperus.

Jam nuptæ trepidat sollicitus pudor:

Jam produnt lacrymas flammea simplices.

Ne cessa, juvenis, comminus aggredi,

Impacata licet sæviat unguibus. 95

| | |
|--|-----------------------|
| Non quisquam fruitur veris odoribus, Hyblæos latebris nec spoliât favos, Si fronti caveat, si timeat rubos. Armat spina rosas : mella tegunt apes : Crescunt difficili gaudia jurgio ; | 96 100 |
| Accenditque magis, quæ refugit, Venus. Quod flenti tuleris, plus sapit, osculum. Dices o quoties, " Hoc mihi dulcius, Quam flavos decies vincere Sarmatas !" Adspirate novam pectoribus fidem, | 105 |
| Mansuramque facem tradite sensibus. Tam junctis manibus nectite vincula, Quam frondens hederâ stringitur æsculus, Quam lento premitur palmite populus. Et murmur, querulâ blandius alite, | 110 |
| Linguis assidui reddite mutuis. Et labris animam conciliantibus, Alternum rapiat somnus anhelitum. Amplexu caleat purpura regio ; Et vestes Tyrio sanguine fulgidas | 115 |
| Alter virgineus nobilitet cruor. Tum victor madido prosilias toro, Nocturni referens vulnera prælii. Ducant pervigiles carmina tibiz, Permissisque jocos turba licentior | 120 |
| Exsultet, tetricis libera legibus. Passim cum ducibus ludite, milites ; Passim cum pueris ludite, virgines. Hæc vox ætheriis insonet axibus : Hæc vox per populos, per mare transeat : | 125 |
| " Formosus Mariam ducit Honprius." | |

CL. CLAUDIANI
DE
BELLO GILDONICO
LIBER.

REDDITUS imperiis Auster, subjectaque rursum
Alterius convexa poli: rectore sub uno
Conspirat geminus frenis communibus orbis.
Junximus Europen Libyæ: concordia fratrum
Plena redit: patriis quod solum defuit armis, 5
Tertius occubuit nati virtute tyrannus.
Horret adhuc animus, manifestaue gaudia differt,
Dum stupet, et tanto cunctatur credere voto.
Necdum Cinyphias exercitus attigit oras;
Jam domitus Gildon. Nullis victoria nodis 10
Hæsit, non terræ spatio, non obijce ponti.
Congressum, profugum, captum, vox nuntiat una;
Rumoremque sui prævenit laurea belli.
Quo, precor, hæc effecta Deo? robusta vetusque
Tempore tam parvo potuit dementia vinci? 15
Quem veniens indixit hiems, ver perculit, hostem.
Exitii jam Roma timens, et fessa negatis
Frugibus, ad rapidi limen tendebat Olympi,
Non solito vultu, non qualis jura Britannis
Dividit, aut trepidos submittit fascibus Indos. 20
Vox tenuis, tardique gradus, oculique latentes
Interius: fugere genæ: jejuna lacertos

Exedit macies : humeris vix sustinet segris
 Squalentem clypeum : laxatâ casside prodit
 Canitiem, plenamque trahit rubiginis hastam. 25
 Attigit ut tandem cœlum, genibusque Tonantis
 Procubuit, tales orditur mœsta querelas :

“ Si mea mansuris meruerunt mœnia nasci,
 Jupiter, auguriis ; si stant immota Sibyllæ
 Carmina, Tarpeias si necdum respuis arces ; 30
 Advenio supplex, non ut proculcet Araxen
 Consul ovans, nostræve premant pharetrata secures
 Susa, nec ut Rubris aquilas figamus arenis.
 Hæc nobis, hæc ante dabas ; nunc pabula tantum
 Roma precor : miserere tuæ, pater optime, gentis.
 Extremam defende famem. Satiavimus iram, 36
 Si qua fuit : lugenda Getis, et flenda Suëvis
 Hausimus : ipsa meos exhorret Parthia casus.
 Quid referam morbive luem, tumultosve repletos
 Stragibus, et crebras corrupto sidere mortes ? 40
 Aut fluvium per tecta vagum, summisque minantem
 Collibus ? ingentes vixi submersa carinas ;
 Remorumque sonos, et Pyrrhæ sæcula, sensi.
 Hei mihi ! quo Latiae vires, Urbisque potestas
 [Decidit !] in qualem paulatim fluximus umbram ! 45
 Armato quondam populo, Patrumque vigebam
 Consiliis : domui terras, urbesque revinxi
 Legibus : ad Solem victrix utrumque cucurri.
 Postquam jura ferox in se communia Cæsar
 Transtulit, et lapsi mores, desuetaque priscis 50
 Artibus in gremium pacis servile recessi,
 Tot mihi pro meritis Libyam Nilumque dedêre,
 Ut dominam plebem, bellatoremque senatum,
 Classibus æstivis alerent, geminoque vicissim
 Litore diversi complerent horrea venti. 55
 Stabat certa salus : Memphis si forte negâsset,
 Pensabam Pharium Gætulis messibus annum.
 Frugiferas certare rates, latoque videbam
 Punica Niliacis concurrere carbasa velis.
 Cum subiit par Roma mihi, divisaque sumsit 60

Æquales Aurora togas, Ægyptia rura 61
In partem cessêre novam : spes unica nobis
Restabat Libye, quæ vix ægreque fovebat,
Solo ducta Noto : nunquam secura futuri,
Semper inops, ventique fidem poscebat et anni. 65
Hanc quoque nunc Gildon rapuit sub fine cadentis
Auctumni : pavido metimur cœrula voto,
Puppis si qua venit, si quid fortasse potenti
Vel pudor extorsit domino, vel prædo reliquit.
Pascimur arbitrio Mauri : nec debita reddi, 70
Sed sua concedi, jactat ; gaudetque diurnos,
Ut famulæ, præbere cibos ; vitamque famemque
Librat barbarico fastu, vulgique superbit
Fletibus, et tantæ suspendit fata ruinæ.
Romuleas vendit segetes, et possidet arva 75
Vulneribus quæsita meis. Ideone tot annos
Flebile cum tumidâ bellum Carthagine gessi ?
Idcirco voluit, contemptâ luce, reverti
Regulus ? hæc damnis, genitor, Cannensibus emi ?
Incassum toties lituis navalibus arsit 80
Hispanum Siculumque fretum ? vastataque telus,
Totque duces cæsi, ruptâque emissus ab Alpe
Pœnus, et attonitæ jam proximus Hannibal Urbi ?
Scilicet, ut domitis frueretur barbarus Africa,
Muro sustinui Martem, noctesque cruentas 85
Collinâ pro turre tuli ? Gildonis ad usum
Carthago ter victa ruit ? hoc mille gementis
Italix clades, impensa que sæcula bello,
Hoc Fabius, fortisque mihi Marcellus agebant,
Ut Gildon cumlaret opes ? Haurirè venena 90
Compulimus dirum Syphacem, fractumque Metello
Traximus immanem Marii sub vincla Jugurtham ;
Et Numidæ Gildonis erunt ? Pro funera tanta !
Pro labor ! in Bocchi regnum sudavit uterque
Scipio ! Romano vicistis sanguine, Mauri ! 95
Ille diu miles populus, qui præfuit orbi,
Qui trabeas et scepra dabat, quem semper in armis
Horribilem gentes, placidum sensère subactæ,

Nunc inhonorus, egenus, perfert miserabile pacis
 Supplicium; nulloque palam circumdatus hoste, 100
 Obsessi discrimen habet! per singula letum
 Impendet momenta mihi; dubitandaque pauci
 Præscribunt alimenta dies! Heu prospera fata!
 Quid mihi septenos montes, turbamque dedisti,
 Quæ parvo non posset ali? felicior essem 105
 Angustis opibus: malletm tolerare Sabinos,
 Et Veios: brevior duxi securius ævum.
 Ipsa nocet moles: utinam remeare liceret
 Ad veteres fines, et moenia pauperis Anci!
 Sufficerent Etrusca mihi Campanaque culta, 110
 Et Quinti Curiique seges; patriæque petenti
 Rusticus inferret proprias dictator aristas.
 Nunc quid agam? Libyam Gildon tenet; altera Nilum.
 Ast ego, quæ terras humeris pontumque subegi,
 Deseror: emeritæ jam præmia nulla senectæ. 115
 Di, quibus iratis crevi, succurrite tandem:
 Exorate patrem: tuque, o, quæ, vecta per altum,
 Sponte Palatinis mutasti collibus Idam,
 Prælatoque lavas Phrygios Almone leones,
 Maternis precibus natum jam flecte, Cybelle. 120
 Sin prohibent Parcæ, falsisque elusa vetustas
 Auspiciis; alio saltem prosternite casu,
 Et poenæ mutate genus. Porsenna reducat
 Tarquinius: renovet ferales Allia pugnæ.
 Me potius sævi manibus permittite Pyrrhi: 125
 Me Senonum furiis, Brenni me reddite flammis.
 Cuncta fame leviora mihi." Sic fata, refusis
 Obtulit lacrymis. Mater Cytherea, parensque
 Flet Mavors, sanctæque memor Tritonia Vestæ.
 Nec Cybele sicco nec stabat lumine Juno. 130
 Mœrent Indigetes, et si quos Roma recepit,
 Aut dedit ipsa Deos. Genitor jam corda remitti
 Cœperat, et sacrum dextrâ sedare tumultum;
 Cum procul, insanis quatiens ululatibus axem,
 Et contusa genas, mediis apparet in astris 135
 Africa: rescissæ vestes, et spicæ passim

Serta jacent: lacero crinales vertice dentes, 137
 Effractum pendebat ebur; talique superbas
 Irrupit clamore fores. " Quid, magne, moraris,
 Jupiter, avulso nexu, pelagique solutis 140
 Legibus, iratum populis immittere fratrem?
 Mergi prima peto. Veniant [prærupta] Pachyno
 Æquora: laxatis subsidant Syrtibus urbes.
 Si mihi Gildonem nequeunt abducere fata,
 Me rape Gildoni. Felicior illa perustæ 145
 Pars Libyæ, nimio quæ se munita calore
 Defendit, tantique vacat secura tyranni.
 Crescat zona rubens: medius flagrantis Olympi
 Me quoque limes agat: melius deserta jacebo,
 Vomeris impatiens. Pulsis dominantur aratris 150
 Dipsades, et sitiens attollat gleba cerastas.
 Quid me temperies juvit? quid mitior æther?
 Gildoni fecunda fui. Jam Solis habentæ
 Bis senas torquent hiemes, cervicibus ex quo
 Hæret triste jugum. Nostris jam luctibus ille 155
 Consenuit, regnumque sibi tot vindicat annos.
 Atque utinam regnum! privato jure tenetur,
 Exigui specie fundi, quod Nilus et Atlas
 Dissidet: occiduis quod Gadibus arida Barce,
 Quodque Parætonio secedit litore Ganges; 160
 Hoc sibi transcripsit proprium: pars tertia mundi,
 Unius prædonis ager. Distantibus idem
 Inter se vitiis cinctus, quodcumque profundâ
 Traxit avaritiâ, luxu pejore refundit.
 Instat terribilis vivis, morientibus hæres, 165
 Virginibus raptor, thalamis obscœnus adulter.
 Nulla quies: oritur, prædâ cessante, libido;
 Divitibusque dies, et nox metuenda maritis.
 Quisquis vel locuples, pulchrâ vel conjuge notus,
 Crimine pulsatur falso: si crimina desunt, 170
 Accitus conviva perit: mors nulla refugit
 Artificem: varios succos spumasque requirit
 Serpentûm virides, et adhuc ignota novercis
 Granina. Si quisquam vultu præsentia damnet,

Liberiueve gemat, dapibus crudelis in ipsis 175
 Emicat ad nutum stricto mucrone minister.
 Fixus quisque toro tacitâ formidine libat
 Carnifices epulas; incertaque pocula pallens
 Haurit, et intentos capiti circumspicit enses.
 Splendet Tartareo furialis mensa paratu, 180
 Cæde madens, atrox gladio, suspecta veneno.
 Ut vino calefacta Venus, tum sævior ardet
 Luxuries: mixtis redolent unguenta coronis.
 Crinitos inter famulos, pubemque canoram,
 Orbatas jubet ire nurus, nuperque peremtis 185
 Arridere viris. Phalarin, tormentaue flammæ,
 Profuit, et Siculi mugitus ferre iuveni,
 Quam tales audire choros. Nec damna pudoris
 Turpia sufficiunt. Mauris clarissima quæque
 Fastidita datur: mediâ Carthagine ductæ, 190
 Barbara Sidoniæ subeunt connubia matres.
 Æthiopem nobis generum, Nasamona maritum,
 Ingerit: exterret cunabula discolor infans.
 His fretus sociis, ipso jam principe major
 Incedit. Peditum præcurrunt agmina longe: 195
 Circumdant equitum turmæ, regesque clientes,
 Quos nostris ditat spoliis. Proturbat avitâ
 Quemque domo: veteres detrudit rure colonos.
 Exsiliis dispersa feror. Nunquamne reverti
 Fas erit, errantesque solo jam reddere cives?" 200
 Iret adhuc in verba dolor, ni Jupiter alto
 Cœpisset solio: voces adamante notabat
 Atropos; et Lachesis jungebat stamina dictis.
 "Nec te, Roma, diu, nec te patiemur inultam,
 Africa; Communem prosternet Honorius hostem.
 Pergite securæ. Vestrum vis nulla tenorem 206
 Separat: et soli famulabitur Africa Romæ."
 Dixit, et afflavit Romam meliore juventâ.
 Continuo redit ille vigor; senique colorem
 Mutavêre comæ. Solidatam crista resurgens 210
 Erexit galeam; clypeiue recanduit orbis,
 Et levis excussâ micuit rubigine cornus.

Humentes jam Noctis equos, Lethæaque Somnus
Frena regens, tacitoolvebat sidera curru.
Jam duo Divorum proceres, seniorque minorque 215
Theodosii, pacem laturi gentibus, ibant;
Qui Jovis arcanos monitus, mandataque ferrent
Fratribus, et geminis sancirent fœdera regnis.
Sic, cum præcipites artem vicere procellæ,
Assiduoque gemens undarum verberere nutat 220
Descensura ratis, cæcâ sub nocte vocati,
Naufraga Lædæi sustentant vela Lacones.
Circulus ut patuit Lunæ, secuere meatus
Diversos. Italas senior tendebat in oras:
At pater, intrantem Pontum quæ Bosphoros arctat,
Arcadii thalamis, urbiue illapsus Eoæ. 226
Quem simul ut vidit natus, (nam clara nitebat
Cynthia) permixto tremuerunt gaudia fletu;
Complexuque fovens, quos non speraverat, artus,
"O mihi post Alpes nunc primum reddite!" dixit,
"Unde tuis optatus ades? Da tangere dextram, 231
Quæ gentes cecidere feræ. Quis tale removit
Præsidium terris? Ut te mortalia pridem
Implorant, lugentque pium, fortemque requirunt!"
Cui pater in tales rupit suspiria voces: 235
"Hoc erat? in fratres medio discordia Mauro
Nascitur? et mundus, germanaque dissidet aula?
Gildoniaque salus tanti sit palma furoris?
Scilicet egregius morum, magnoque tuendus,
Et cujus meritis pietas a fratre recedat! 240
In primo genitore, (vide) civile calebat
Dissidium: dubio stabant Romana sub ictu.
Quis procul Armenius, vel quis Mæotide ripâ
Rex ignotus agit, qui me non juvit euntem?
Auxilio fovère Getæ, venère Geloni. 245
Solut at hic, non puppe datâ, non milite misso,
Subsedit, fluitante fide. Si signa petisset
Obvia, detecto submissius hoste dolerem.
Restitit in speculis fati; turbâque reductus,
Libavit geminas, eventu judice, vires, 250

Ad rerum momenta cliens, seseque daturus 251
 Victori: fortuna simul cum Marte pependit.
 Et, si non cupidis essem præreptus ab astris,
 Exemplum sequerer Tulli, laniandaque dumis
 Impia diversis raptarem membra quadrigis. 255
 Germani nunc usque tui responsa colebat:
 En, iterum calcat. Tali te credere monstro,
 Post patrem fratremque, paras? Sed magna rependit,
 Inque tuam sortem numerosas transtulit urbes!
 Ergo fas pretio cedit? mercede placebit 260
 Seditio? Taceo, læsi quod transfuga fratris,
 Quod levis ingenio. Quamvis, discrimine summo,
 Proditor apportet suspensâ morte salutem,
 Nunquam gratus erit. Damnamus, luce repertâ,
 Perfidiam: nec nos patimur committere tali 265
 Hoc genus emtori. Cives cum mœnibus offert?
 Hoc vendit patriam. Plerique, in tempus abusi,
 Mox odere tamen. Tenuit sic Graia Philippus
 Oppida. Pellæo libertas concidit auro.
 Romani scelerum semper sprevere ministros. 270
 Noxia pollicitum domino miscere venena
 Fabricius regi, nudatâ fraude, remisit,
 Infesto quem Marte petiit; bellamque negavit
 Per famuli patrare nefas: duetosque Camillus
 Trans murum pueros obsessæ reddidit urbi. 275
 Traduntur pœnis alii, cum prælia solvant;
 Hic manet, ut moveat? Quod respuit alter in hostem,
 Suscipis in fratrem? Longi pro dedecus ævi!
 Cui placet, Australes Gildon condonat habenas;
 Tantaque mutatos sequitur provincia mores. 280
 Quaslibet ad partes animus nutaverit anceps:
 Transfundit secum Libyam, refluxumque malignus
 Commodat imperium. Mauri fuit Africa munus.
 Tollite Massylas fraudes: removete bilingues
 Insidias, et verba soli spirantia virus. 285
 Ne consanguineis certetur comminus armis,
 Ne, precor: hæc trucibus Thebis, hæc digna Mycenis;
 In Mauros hoc crimen eat. Quid noster iniquum

Molitur Stilichon? quando non ille iubenti
 Paruit? an quisquam nobis devotior exstat? 290
 Ut sileam varios, mecum quos gesserit, actus;
 Quæ vidi post fata, loquar. Cum Divus abirem,
 Res incompositas, fateor, tumidasque reliqui.
 Stringebat vetitos etiamnum exercitus enses
 Alpini odii; alternaque jurgia victi 295
 Victoresque dabant. Vix hæc amentia nostris
 Excubiis, nedum puero rectore, quiëset.
 Heu! quantum timui vobis, quid libera tanti
 Militis auderet moles, cum cæca remoto
 Ferperet jam læta metu! Dissensus acerbus, 300
 Sed gravior consensus erat. Tunc ipse paternâ
 Successit pietate mihi; tenerumque rudemque
 Fovit, et in veros eduxit principis annos:
 Rufinumque tibi, quem tu tremuisse fateris,
 Depulit. Hunc solum memorem, solumque fidelem,
 Experior. Volui si quid, dum vita maneret, 306
 Aut visus voluisse, gerit: venerabilis illi,
 Ceu numen præsensque, vocor. Si tanta recusas,
 At soceri reverere faces; at respice fratris
 Connubium, pignusque meæ regale Serenæ. 310
 Debueras etiam fraternis obvius ire
 Hostibus, ille tuis. Quæ gens, quis Rhenus et Ister
 Vos opibus junctos, conspirantesque, tulisset?
 Sed tantum permitte cadat: nil poscimus ultra.
 Ille licet sese præsentis Syrtibus armet, 315
 Oppositoque Atlante tegat; licet arvâ referta
 Anguibz, et Solis medios objecerit sæstus;
 Novi consilium, novi Stilichonis in omnes
 Æqualem casus animum: penetrabit arenas:
 Inveniet virtute viam." Sic Divus; et inde 320
 Sic natus: "Jussis, genitor, parebitur ultro.
 Amplector præcepta lubens: nec carior alter
 Cognato Stilichone mihi. Commissa profanus
 Ille luat: redeat jam tutior Africa fratri."
 Talia dum longo secum sermone retexunt, 325
 Hesperiam pervenit avus, castumque cubile

- Ingreditur, Tyrio quâ fusus Honorius ostro 327
 Carpebat teneros Mariâ cum conjuge somnos.
 Assistit capiti: tunc sic per somnia fatur:
 "Tantane devictis tumultu fiducia Mauris, 330
 Care nepos? Iterum, post me, conjurat in arma
 Progenies vesana Jubæ, bellumque resumit
 Victoris cum stirpe sui? Firmumne jacentem
 Obliti, Libyam, nostro sudore receptam,
 Rursus habent? ausus Latio contendere Gildon?
 Germani nec fata timet? Nunc ire profecto 336
 Nunc vellem, notosque senex ostendere vultus.
 Nonne meam fugiet Maurus, cum viderit, umbram?
 Quid dubitas? exsurge toris: invade rebellem.
 Captivum mihi redde meum: desiste morari. 340
 Hoc generi fatale tuo; dum sanguis in orbe
 Noster erit, semper pallebit regia Bocchi.
 Jungantur spoliis Firmi Gildonis opima.
 Exornet geminos Maurusia laurea currus.
 Una domus toties unâ de gente triumphet. 348
 Dî bene, quod, tantis interlabentibus annis,
 Servati Firmusque mihi, fraterque nepoti."
 Dixit, et afflatus vicino sole refugit.
 At juvenem stimulis immanibus æmula virtus
 Exacuit: jam puppe vehi, jam stagna secare 350
 Fervet, et absentes invadere cuspide Mauros.
 Tum jubet acciri socerum, dextramque vocato
 Conserit, et, quæ sit potior sententia, querit.
 "Per somnos mihi, sancte pater, jam sæpe futura
 Panduntur; multæque canunt præsagia noctes. 355
 Namque procul Libyco venatu cingere saltus,
 Et juga rimari canibus Gætula, videbar.
 Mœrebat regio, sævi vastata leonis
 Incursu: pecudum strages, passimque juvenci
 Semineces, et adhuc infecta mapalia tabo, 360
 Sparsaque sanguineis pastorum funera campis.
 Aggredior latebras monstri, mirumque relatu
 Conspicio: dilapsus honos: cervice minaces
 Defluxêre jubæ: fractos inglorius armos /

Supposuit, servile gemens; ingestaque vincla 365
 Unguibus, et subitæ collo sonuere catenæ.
 Nunc etiam paribus secum certare tropæis
 Hortator me cogit avus. Quonam usque morati
 Cunctamur? Decuit pridem complere bremes,
 Et pelagi superare minas. Transmittere primus 870
 Ipse paro: quæcumque meo gens barbara nutu
 Stringitur, adveniat. Germania cuncta feratur
 Navibus, et sociâ comitentur classe Sicambri.
 Pallida translatum jam sentiat Africa Rhenum.
 An patiar tot probra sedens; juvenisque relinquam,
 Quæ tenui rexique puer? Bis noster ad Alpes 875
 Alterius genitor defensum regna cucurrit:
 Nos prædæ faciles, insultandique, jacemus?"
 Finierat. Stilichon contra cui talia reddit:
 "Adversine tubam, princeps, dignabere Mauri? 880
 An feret ignavus clari solatia fati,
 Te bellante mori? Decernet Honorius inde,
 Hinc Gildon? Prius astra Chaos miscebit Averno.
 Vindictam mandâsse sat est. Plus nominis horror,
 Quam tuus ensis, aget: minuit præsentia famam.
 Qui stetit, æquatur campo; collataque nescit 885
 Majestatem acies. Sed, quod magis utile facto,
 Atque hosti gravius, (sensus adverte) docebo.
 Est illi patribus, sed non et moribus, isdem
 Mæcezel; fugiens qui dira piscula fratris, 890
 Spesque suas vitamque tuo commisit asylo.
 Hunc ubi tentatis frustra mactare nequivit
 Insidiis, patrias in pignora contulit iras;
 Et, quos ipse sinu parvos gestaverat, unâ
 Obtruncat juvenes: inhumataque corpora vulgo 895
 [Dispulit,] et tumulo cognatas aruit umbras:
 Naturamque simul, fratremque, hominemque, cruentus
 Exuit, et tenuem cæsis invidit arenam.
 Hoc facinus refugo damnavit sole Mycenæ.
 Avertitque diem: scelerei sed reddidit Atreus 400
 Crimen, et infandas excusat conjugæ mensas.
 Hic odium, non pœna, fuit. Te prodita jura,

Te pater ultorem, te nudi pulvere Manes,
 Te pietas polluta rogat. Si flentibus aram,
 Et proprium miseris numen statuistis, Athenæ; 405
 Si Pandionias planctu traxêre phalanges
 Inachides, belloque rogos meruêre maritis;
 Si mœstæ squalore comæ, lacrymisque, senatum
 In Numidas pulsus solio commovit Adherbal;
 Hunc quoque nunc Gildon, tanto quem funere mersit,
 Hunc doleat venisse ducem, seseque minorem 411
 Supplicibus sciat esse tuis. Quem sede fugavit,
 Hunc præceps fugiat: fregit quem clade, tremiscat;
 Agnoscatque suum, trahitur dum victima, fratrem."

Hæc ubi sederunt genero; notissima Marti 415
 Robora, præcipuos electâ pube maniplos
 Disponit, portuque rates instaurat Etrusco.
 Herculeam suus Alcides, Joviamque cohortem
 Rex ducit Superûm: premitur nec signifer ullo
 Pondere: festinant adeo vexilla moveri. 420
 Nervius insequitur, meritusque vocabula Felix,
 Dictaque ab Augusto legio, nomenque probantes
 Invicti, clypeoque animosi teste Leones.
 Dietis ante fâmen princeps confirmat ituros,
 Aggere conspicuus. Stat circumfusa juvenus 426
 Nixa hastis, pronasque ferox accommodat aures:
 "Gildonem domitura manus! promissa minasque
 Tempus agi. Si quid pro me doluistis, in armis
 Ostentate mihi. Justo magnoque triumpho
 Civiles abolete notas: sciat orbis Eous, 430
 Sitque palam, Gallos causâ, non robore, vinci.
 Nec vos, barbariem quamvis collegerit omnem,
 Terreat. An Mauri fremitum, raucosque repulsus
 Umbonum, et vestros passuri comminus enses?
 Non contra clypeis tectos, galeisve micantes, 435
 Ibitis: in solis longe fiducia telis.
 Exarmatus erit, cum missile torserit, hostia.
 Dextra movet jaculum; prætentat pallia læva:
 Cætera nudus eques. Sonipes ignarus habensæ:
 Virga regit. Non ulla fides, non agminis ordo. 440

Arma oneri, fuga præsidio: connubia mille: 441
 Non ulli generis nexus, non pignora curæ;
 Sed numero languet pietas. Hæc copia vulgi.
 Umbratus dux ipse rosis, et marcidus ibit
 Unguentis, crudusque cibo, titubansque Lyæo, 445
 Confectus senio, morbis stuprisque solutus.
 Excitet incestos turmalis buccina somnos:
 Imploret citharas, cantatricesque choreas,
 Offensus stridore tubæ; discatque coactus,
 Quas vigilat Veneri, castris impendere noctes. 450
 Nonne mori satius, vitæ quam ferre pudorem?
 Nam quæ jam regio restat, si, dedita Mauris
 Regibus, Illyricis accesserit Africa damnis?
 Jus Latium, quod tunc Meroë, Rubroque solebat
 Oceano cingi, Tyrrhenâ clauditur undâ? 455
 Et cui non Nilus, non intulit India metas,
 Romani jam finis erit Trinacria regni?
 Ite, recepturi, prædo quem sustulit, axem,
 Breptumque Notum. Caput insuperabile rerum
 Aut ruet, in vestris aut stabit Roma lacertis. 460
 Tot mihi debetis populos, tot rura, tot urbes
 Amissas. Uno Libyam defendite bello.
 Vestros imperium remos, et vestra sequatur
 Carbasæ: despectas trans æquora ducite leges.
 Tertia jam solito cervix mucrone rotetur, 465
 Tandem funereis finem positura tyrannis.”
 Omina conveniunt dicto; fulvasque Tonantis
 Armiger ad liquidam, cunctis spectantibus, æthram
 Correptum pedibus curvis innexuit hydrum.
 Dumque reluctantem morsu partitur obunco, 470
 Hæsit in ungue caput: truncatus decidit anguis.
 Illicet, auguriis alacres, per saxa citati,
 Terrentesque ruunt: non mons, non silva retardat.
 Pendula cœu parvis moturæ bella colonis
 Ingenti clangore grues æstiva relinquunt 475
 Thræcia, cum tepido permutant Strymona Nilo:
 Ordinibus variis per nubila textitur ales
 Litera; penarumque notis inscribitur ær.

Ut fluctus tetigêre maris, tunc acrior arsit
 Impetus: arripiunt naves, ipsique rudentes 480
 Expediunt, et vela ligant, et cornua summis
 Associant malis. Quatitur Tyrrhena tumultu
 Ora, nec Alphææ capiunt gavalia Pisæ.
 Sic Agamemnoniam vindex cum Græcia classem
 Solveret, innumeris fervebat vocibus Aulis. 485
 Non illos strepitus, impendentisque procellæ
 Signa, nec adventus dubii deterruit Austri.
 "Vellite," proclamant, "socii, jam vellite funem.
 Per vada Gildonem quamvis adversa petamus.
 Ad bellum nos trudat hiems: per devia ponti 490
 Quassatis cupio tellurem figere rostris.
 Heu nimium segnes! cautâ qui mente notatis,
 Si revolant mergi, graditur si litore cornix.
 Ora licet maculis adperserit occiduus Sol,
 Lunaque conceptis livescat turbida Coris, 495
 Et contusa vagos jaculentur sidera crines,
 Imbribus humescant Hædi, nimboaque Taurum
 Ducat Hyas, totusque fretis descendat Orion;
 Certa fides cœli; sed major Honorius auctor.
 Illius auspiciis immensa per æquora miles, 500
 Non Plaustris Arctove regor. Contemne Booten,
 Navita: turbinibus mediis permitte carinas.
 Si mihi tempestas Libyam ventique negabunt,
 Augusti Fortuna dabit." Jam classis in altum
 Provehitur: dextrâ Ligures, Etruria lævâ 505
 Linquitur, et cæcis vitatur Corsica saxis.
 Humanæ in speciem plantæ se magna figurat
 Insula, (Sardoam veteres dixêre coloni:
 Dives ager frugum) Pœnos Italosve petenti
 Opportuna situ. Quæ pars vicinior Afris, 510
 Plana solo, ratibus clemens; quæ respicit Arcton,
 Immitis, scopulosa, procax, subitisque sonora
 Flatibus. Insanos infamat navita montes.
 Hinc hominum pecudumque lues, hinc pestifer aër
 Sævit, et exclusis regnant Aquilonibus Austri. 515
 Quos ubi luctatis procul effugêre carinis,

Per diversa ruunt sinuosae litora terrae. 517
Pars adit antiquâ ductos Carthagine Sulcos :
Partem litoreo complectitur Olbia muro.
Urbs, Libyam contra, Tyrio fundata potenti, 520
Tenditur in longum Caralis, tenuemque per undas
Obvia dimittit fracturum flamina collem.
Efficitur portus medium mare : tutaque ventis
Omnibus, ingenti mansuescunt stagna recessu.
Hanc omni petiêre manu ; prorisque reductis, 525
Suspensâ Zephyros expectant classe faventes.

• • • • •

CL. CLAUDIANI

IN

FL. MALLII THEODORI

CONSULATUM

PROLOGUS.



AVDENTANE, precor, doctæ subjecta catervæ,
Inter tot proceres, nostra Thalia, loqui ?
Nec te fama vetat, vero quam celsius actam
Vel servâsse labor, vel minuisse pudor.
An tibi continuis crevit fiducia castris ? 5
Totaque jam vatis pectora miles habet ?
Culmina Romani majestatemque senatûs,
Et, quibus exsultat Gallia, cerne viros.
Omnibus audimur terris ; mundique per aures
Ibimus. Ah ! nimius consulis urget amor. 10
Jupiter, ut perhibent, spatium cum discere vellet
Naturæ, regni nescius ipse sui ;
Armigeros utrimque duos æqualibus alis
Misit ab Eois Occiduisque plagis.
Parnassus geminos fertur junxisse volatus ; 15
Contulit alternas Pythius axis aves.
Princeps non aquilis terram cognoscere curat.
Certius in nobis æstimat imperium.
Hoc ego concilio collectum metior orbem :
Hoc video cœtu, quidquid ubique micat. 20

DE CONSULATU
FL. MALLII THEODORI
PANEGYRIS.

Irsa quidem virtus pretium sibi; solaque late,
Fortunæ secura, nitet; nec fascibus ullis
Erigitur, plausuve petit clarescere vulgi.
Nil opis externæ cupiens, nil indiga laudis,
Divitiis animosa suis, immotaque cunctis 5
Casibus, ex altâ mortalia despicit arce.
Attamen invitam blande vestigat, et ultro
Ambit Honos. Docuit toties a rure profectus
Lictor, et in mediis consul quæsitus aratris.
Te quoque, Naturæ sacris mundique vacantem, 10
Emeritum pridem, desudatisque remotum
Judiciis, eadem rursus complexa potestas
Evehit, et reducem notis imponit habenis.
Accedunt trabes. Nil jam, Theodore, relictum,
Quo virtus animo crescat, vel splendor honore. 15
Culmen utrumque tenes. Talem te protinus anni
Formavère rudes; et dignum vita curuli
Traxit iter; primæque senes cessère juventæ.
Jam tum canities animi, jam dulce loquendi
Pondus, et attonitas sermo qui duceret aures. 20
Mox undare foro victrix opulentia linguæ,
Tutarique reos. Ipsa hæc amplissima sedes
Orantem stupuit, bis laudatura regentem.
Hinc te pars Libyæ, moderantem jura, probavit,
Quæ nunc tota probat: longi sed pignus amoris 25

Exiguæ peperêre moræ ; populumque clientem 26
 Publica mansuris testantur vocibus æra.
 Inde tibi Macetûm tellus, et credita Pellæ
 Mœnia, quæ famulus quondam ditavit Hydaspes.
 Tantaque commissæ revocâsti gaudia genti 30
 Mitibus arbitriis, quantum, bellante Philippo,
 Floruit, aut nigri cecidit cum regia Port.
 Sed non ulterius te præbuit urbibus aula :
 Maluit esse suum. Terris edicta daturus,
 Supplicibus responsa, venia. Oracula regis 35
 Eloquio crevêre tuo : nec dignius unquam
 Majestas meminit sese Romana locutam.
 Hinc sacræ mandantur opes, orbisque tributa
 Possessi ; quidquid fluviis evolvitur auri ;
 Quidquid, luce procul, venas rimata sequaces, 40
 Abdita pallentis fodit sollertia Bessi.
 Ac velut exsertus lentandis navita tonsis
 Præficitur lateri custos ; hinc ardua proræ
 Temperat, et fluctus tempestatesque futuras
 Edocet : assiduo cum Dorida vicerit usu, 45
 Jam clavum totamque subit torquere carinam.
 Sic, cum clara diu rerum documenta dedisses,
 Non te parte sui, sed in omni corpore, summit
 Imperium, cunctâque dedit tellure regendos
 Rectores. Hispana tibi Germanaque Tethys 50
 Paruit, et nostro diducta Britannia mundo :
 Diversoque tuas coluerunt gurgite voces
 Lentus Arar, Rhodanusque ferox, et dives Iberus.
 O ! quoties doluit Rhenus, quâ barbarus ibat,
 Quod te non gefhinis frueretur iudice ripis ! 55
 Unius fit cura viri, quodcumque rubescit
 Occasu, quodcumque dies devexior ambit.
 Tam celer assiduos explevit cursus honores :
 Una potestatum spatiis interfuit ætas ;
 Totque gradus fati juvenilibus intulit annis. 60
 Postquam parta quies, et summum nacta cacumen,
 Jam secûra petit privatum gloria portum ;
 Ingenii redeunt fructus, aliique labores ;

Et vitæ pars nulla perit. Quodcumque recedit
 Litibus, incumbit studiis; animusque vicissim 65
 Aut curam [apponit] populi, aut otia Musis.
 Omnia Cecropiæ relegis secreta senectæ,
 Discutiens quod quisque novum mandaverit sevo;
 Quantaque diversæ producant agmina sectæ.
 Namque aliis princeps rerum disponitur ær: 70
 Hic confidit aquis: hic procreat omnia flammis.
 Alter, in Ætnæas casurus sponte favillas,
 Dispergit revocatque Deum; rursumque receptis
 Nectit amicitias, quidquid discordia solvit.
 Corporis hic damnat sensus, verumque videri 75
 Pernegat: hic semper lapsuræ pondera terræ
 Conatur rapido cœli fulcire rotatu,
 Accenditque diem prærupti turbine saxi.
 Ille ferox, unoque tegi non passus Olympo,
 Immensum per inane volat; finemque perosus, 80
 Parturit innumeros angusto pectore mundos.
 Hi vaga collidunt cæcis primordia plagis.
 Numina constituunt alii, casusque relegant.
 Graiorum obscuras Romanis floribus artes
 Irradias, vicibus gratis formare loquentes 85
 Suetus, et alterno verum contexere nodo.
 Quidquid Socratico manavit ab ordine, quidquid
 Docta Cleanthæ sonuerunt atria turbæ,
 Inventum quodcumque tuo, Chrysippe, recessu;
 Quidquid Democritus risit, dixitque tacendo 90
 Pythagoras; uno se pectore cuncta vetustas
 Condidit, et major collectis viribus exit.
 Ornantur veteres; et, nobiliore magistro,
 In Latium spretis Academia migrat Athenis,
 Ut tandem propius discat, quo fine beatum 95
 Dirigitur; quæ norma boni, quis limes honesti,
 Quænam membra sui virtus divisa domandis
 Objectet vitiis; quæ pars injusta recidat;
 Quæ vincat ratione metus; quæ frenet amores.
 Aut quoties elementa doces, semperque fluentis 100
 Materis causas: quæ vis animaverit astra,

Impuleritque choros ; quo vivat machina motu. 102
 Sidera cur septem retro nitantur in Ortus,
 Obluctata polo : variisne meatibus idem
 Arbiter, an geminæ convertant æthera mentes : 105
 Sitne color proprius rerum, lucisne repulso
 Eludant aciem : tumidos quæ Luna recursus
 Nutriat Oceani : quo fracta tonitrua vento :
 Quid trahat imbriferas nubes : quo saxa creentur
 Grandinis : unde rigor nivibus : quæ flamma per auras
 Excutiat rutilos tractus, aut fulmina velox 111
 Torqueat, aut tristem figat crinita cometen.

Jam tibi compositam fundaverat ancora puppim.
 Telluris jam certus eras. Fecunda placebant
 Otia ; nascentes ibant in sæcula libri ; 115
 Cum subito liquidâ cessantem vidit ab æthrâ
 Justitia, et tanto viduatas judice leges.
 Continuo, frontem nimbo velata pudicam,
 Deserit Auctumni portas, quâ vergit in Austrum
 Signifer, et noctis reparant dispendia Chelæ. 120
 Pax avibus, quâcumque volat ; rabiemque frementes
 Deposuere feræ. Lætatur terra reverso
 Numine, quod prisci post tempora perdidit auri.
 Illa, per occultum, Ligurum se mœnibus infert ;
 Et, castos levibus plantis ingressa penates, 125
 Invenit ætherios signantem pulvere cursus,
 Quos pia sollicito deprendit pollice Memphis :
 Quæ moveant momenta polum ; quam certus in astris
 Error : quis tenebras Soli, causisque meantem
 [Defectum indicat numerus :] quæ linea Phœben
 Damnet, et excluso pallentem fratre relinquat. 131
 Ut procul adspexit fulgentia virginis ora,
 Cognovitque Deam, vultus veneratus amicos,
 Occurrit, scriptæque notas confundit arenæ.
 Tum sic Diva prior : “ Malli, sincera bonorum 135
 Congeries, in quo veteris vestigia recti,
 Et ductos video mores meliore metallo !
 Jam satis indultum studiis ; Musæque tot annos
 Eripuere mihi. Pridem te jura reposcunt.

Aggredere, et nostro rursum te redde labori. 140
 Nec tibi sufficiat transmissæ gloria vitæ.
 Humanum curare genus, quis terminus unquam
 Præscripsit? nullas recipit prudentia metas.
 Adde, quod hæc multis potuit contingere sedes :
 Sed meriti tantum redeunt; actusque priores 145
 Commendat repetitus honos : virtusque reducit,
 Quos Fortuna legit. Melius, magnoque petendum,
 Credis, in abstrusâ rerum ratione morari?
 Scilicet illa tui patriam præcepta Platonis
 Erexere magis, quam qui, responsa secutus, 150
 Obruit Eoas classes, urbemque carinis
 Vexit, et arsuras Medo subduxit Athenas?
 Spartanis potuit robur præstare Lycurgus
 Matribus, et sexum leges vicere severæ :
 Civibus et vetitis ignavo credere muro, 155
 Tutius objecit nudam Lacedæmona bellis.
 At non Pythagoræ monitus, annique silentes,
 Famosum Cebalii luxum pressere Tarenti.
 Quis vero insignem tanto sub principe curam
 Respuat? aut quando meritis majora patebunt 160
 Præmia? quis demens adeo, qui jungere sensus
 Cum Stilichone neget? similem quæ protulit ætas
 Consilio vel Marte virum? Nunc Brutus amaret
 Vivere sub regno : tali succumberet aulæ
 Fabricius; cuperent ipsi servire Catones. 165
 Nonne vides, ut nostra soror, Clementia, tristes
 Obtundat gladios; fratresque amplexa serenos,
 Assurgat Pietas; fractis ut lugeat armis
 Perfidia; et laceris morientes crinibus hydri
 Lambant invalido Furiarum vincla veneno? 170
 Exsultat cum Pace Fides. Jam sidera cunctæ
 Liquimus, et placidas inter discurrimus urbes.
 Nobiscum, Theodore, redi." Subit ille loquentem
 Talibus : "Agrestem dudum me, Diva, reverti
 Cogis; et infectum longi rubigine ruris 175
 Ad tua signa vocas? nam quæ mihi cura tot annos
 Altera, quam duras sulcis mollire novalis;

Nôsse soli vires ; nemori quæ commoda rupes ;
 Quis felix oleæ tractus ; quæ gleba faveret
 Frugibus ; aut quales tegeret vindemia colles ? 180
 Terribiles rursus lituos veteranus adibo,
 Et desueta vetus tentabo cœrula vector ?
 Collectamque diu, et certis utcumque locatam
 Sedibus, in dubium patiar deponere famam ?
 Nec me, quid valeat, Naturâ fortior, usus, 185
 Præterit, aut quantum neglectæ defluat arti.
 Desidis aurigæ non audit verbera currus :
 Nec manus agnoscit, quem non exercuit, arcum.
 Esse sed injustum fateor, quodcumque negatur
 Justitiæ. Tu prima hominem silvestribus antris 190
 Elicis, et fœdo detergis sæcula victu.
 Te propter, colimus leges, animosque ferarum
 Exuimus. Nitidis quisquis te sensibus hausit,
 Irruet intrepidus flammæ ; hiberna secabit
 Æquora ; confertos hostes superabit inermis. 195
 Ille vel Æthiopum pluviis solabitur æstus :
 Illum trans Scythiam vernus comitabitur aër."

Sic fatus, tradente Deâ, suscepit habenas
 Quattuor, ingenti Juris temone refusas.
 Prima Padum Tiberimque ligat, crebrisque micantem
 Urbibus Italiam : Libyas Pœnosque secunda 201
 Temperat : Illyrico se tertia porrigit orbi :
 Ultima Sardiniam, Cynnon, trifidamque retentat
 Sicaniam, et quidquid Tyrrhenâ tunditur undâ,
 Vel gemit Ioniâ. Nec tot molimina rerum, 205
 Aut tantum turbavit onus : sed, ut altus Olympi
 Vertex, qui spatio ventos hiemesque relinquit,
 Perpetuum nullâ temeratus nube serenum,
 Celsior exsurgit pluviis, auditque ruentes
 Sub pedibus nimbos, et rauca tonitrua calcat ; 210
 Sic patiens animus, per tanta negotia liber
 Emergit, similisque sui : justique tenorem
 Flectere non odium cogit, non gratia suadet.
 Nam spretas quis opes, intactaque pectora lucro
 Commemoret ? fuerint aliis hæc forte decori : 215

Nulla potest laus esse tibi, quæ crimina purget. 216
 Servat inoffensam divina modestia vocem :
 Temperiem servant oculi ; nec lumina fervor
 Asperat, aut rabidas suffundit sanguine venas ;
 Nullaque mutati tempestas proditur oris. 220
 Quin etiam fontes expulsâ corrigis irâ,
 Et placidus delicta domas : nec dentibus unquam
 Instrepis horrendum, fremitu nec verbera poscis.
 Qui fruitur poenâ, ferus est, legumque videtur
 Vindictam præstare sibi : cum viscera felle 225
 Canduerint, ardet stimulis, ferturque nocendi
 Prodigus, ignarus causæ. Dis proximus ille est,
 Quem ratio, non ira, movet ; qui, facta rependens,
 Consilio punire potest. Mucrone cruento
 Se jactent alii ; studeant feritate timeri ; 230
 Addictoque hominum cumulent æraria censu.
 Lene fluit Nilus ; sed cunctis amnibus exstat
 Utilior, nullo confessus murmure vires.
 Acrior ac rapidus tacitas prætermeat ingens
 Danubius ripas : eadem clementia sani 235
 Gurgitis immensum deducit in ostia Gangen.
 Torrentes immane fremant, lassisque minentur
 Pontibus : involvant spumoso vortice silvas :
 Pax majora decet : peragit tranquilla potestas,
 Quod violenta nequit ; mandataque fortius urget 240
 Imperiosa quies. Idem prædurus iniquas
 Accepisse preces ; rursus, quæ digna petitu,
 Largiri facilis : nec, quæ comitatur honores,
 Ausa tuam leviter tentare superbia mentem.
 Frons privata manet : nec se meruisse fatetur, 245
 Qui crevisse putat : rigidi sed plena pudoris
 Elicet gravitas, fastu jucunda modesto.
 Quæ non seditio, quæ non insania vulgi,
 Te viso, lenita cadat ? quæ dissona ritu
 Barbaries, medii quam non reverentia frangat ? 250
 Vel quis non, sitiens sermonis mella politi,
 Deserat Orpheos blandâ testudine cantus ?
 Qualem te legimus, teneri primordia mundi

Scribentem, aut partes animæ; per singula talem
Cernimus; et similes agnoscit pagina mores. 255

Nec dilata tuis, Augusto iudice, merces
Officiis: illumque habitum, quo jungitur aulæ
Curia, qui socio procures cum principe nectit,
Quem quater ipse gerit, perfecto detulit anno;
Deposuitque suas, te succedente, curules. 260

Crescite, virtutes; secundaque floreat ætas
Ingeniis: patuit campus; certusque merenti
Stat favor: ornatur propriis industria donis.
Surgite, sopitæ, quas obruit ambitus, artes.
Nil licet invidiæ, Stilichon dum prospicit orbi, 265
Sidereusque gener. Non hinc violata curulis;
Turpia non Latios incestant nomina fastos.
Fortibus hæc concessa viris, solisque gerenda
Patribus, et Romæ nunquam latura pudorem.

Nuntia votorum, celeri jam Fama volatu 270
Moverat Aonios, audito consule, lucos.
Concinuit felix Helicon, fluxitque Aganippe
Largior; et docti riserunt floribus amnes.
Uranie, redimita comas, (quæ sæpe magistrâ
Mallius igniferos radio descripserat axes) 275

Sic alias hortata Deas: "Patimurne, sorores,
Optato procul esse die? nec limina nostri
Consulis, et semper dilectas visimus aedes?
Notior est Helicone domus. Gestare curules,
Et fasces subiisse libet. Miracula plebi 280

Colligite, et claris nomen celebrate theatris.
Tu Jovis æquorei submersam fluctibus aulam,
Oratum volucres, Erato, jam perge, quadrigas,
A quibus haud unquam palmam rapturus Arion.
Illustret Circum sonipes, quicumque superbo 285

Perstreptit hinnitu Bætin, qui splendida potat
Stagna Tagi, madidoque jubar adspergitur auro.
Calliope, liquidas Alciden posce palæstras.
Cuncta Palæmonii manus explorata coronis
Adsit, et Eleo pubes laudata Tonanti. 290

Tu juga Tæygeti, frondosaque Mænala, Clio,

- I. Trivise supplex: non adspersa rogantem, 292
 Amphitheatrali faveat Latonia pompæ.
 Audaces legat ipsa viros, qui colla ferarum
 Arte ligent, certoque premant venabula nisu. 295
 Ipsa truces fetus, captivæque ducat ab antris
 Prodigia, et cædis sitientem differat arcum.
 Conveniant ursi, magnâ quos mole rudentes
 Torva Lycaoniis Helice miretur ab astris:
 Perfossique ruant, populo pallente, leones, 300
 Quales Mygdonio curru frenare Cybelle
 Optet, et Herculei mallent fregisse lacerti.
 Obvia fulminei properent ad vulnera pardi,
 Semine permixto geniti, cum forte leænæ
 Nobiliorem uterum viridis corrumpit adulter; 305
 Hi maculis patres referunt, et robore matres.
 Quidquid monstriferis nutrit Gætulia campis,
 Alpina quidquid tegitur nive, Gallica quidquid
 Silva timet, jaceat. Largo ditiescat arena
 Sanguine: consumant totos spectacula montes. 310
 Nec molles egeant notâ dulcedine ludi.
 Qui lætis risum salibus movisse facetus,
 Qui nutu manibusque loquax; cui tibia flatu,
 Cui plectro pulsanda chelys; qui pulpita socco
 Personat, aut alte graditur majore cothurno; 315
 Et qui magna levi detrudens murmura tactu
 Innumeras voces segetis moderatus ænæ,
 Intonet erranti digito, penitusque trabali
 Vecte laborantes in carmina concitet undas.
 Vel qui more avium sese jaculentur in auras, 320
 Corporaque sedificant, celeri crescentia nexu;
 Quorum compositam puer amentatus in arcem
 Emicet, et, vinctus plantæ vel cruribus hærens,
 Pendula librato figat vestigia saltu.
 Mobile ponderibus descendat pegma reductis; 325
 Inque chori speciem, spargentes ardua flammæ
 Scena rotet: varios effingat Mulciber orbes,
 Per tabulas impune vagus; pictæque citato
 Ludant igne trabes; et, non permissa morari,

| | |
|--|-----|
| Fida per innocuas errent incendia turre. | 330 |
| Lascivæ subito configant æquore lembi; | |
| Stagnaue remigibus spument immissa canoris. | |
| Consul per populos, idemque gravissimus auctor | |
| Eloquii, duplici vitâ subnixus in ævum | |
| Procedat, libris pariter fastisque legendus. | 335 |
| Accipiat patris exemplum, tribuatque nepoti | |
| Filius, et cœptis ne desit fascibus hæres. | |
| Deeurrat trabeata domus; tradatque secures | |
| Mutua posteritas; servatoque ordine fati, | |
| Mallia continuo numeretur consule proles. | 340 |

CL. CLAUDIANI

IN EUTROPIUM

LIBER I.

Sanguineos partus, metuendaque pignora matri,
Mœnibus in mediis auditum nocte luporum
Murmur, et attonito pecudes pastore locutas,
Et lapidum diras hiemes, nimboque minacem
Sanguineo rubuisse Jovem, puteosque cruore 5
Mutatos, visasque polo concurrere lunas,
Et geminos soles, mirari desinat orbis.
Omnia cesserunt, eunucho consule, monstra.
Heu terræ cœlique pudor! trabeata per urbes
Ostentatur anus, titulumque effeminat anni! 10
Pandite, pontifices, Cumanæ carmina vatis;
Fulmineos sollers Etruria consulat ignes;
Immersumque nefas fibris exploret haruspex.
Quæ nova portendunt Superi? Nilusne meatu
Devius, et nostri tentat jam transfuga mundi 15
Se Rubro miscere mari? ruptone Niphate,
Rursum barbaricis Oriens vastabitur armis?
An morbi ventura lues? an nulla colono
Responsura seges? quæ tantas expiet iras
Victima? quo diras jugulo placabimus aras? 20
Consule lustrandi fasces, ipsoque litandum
Prodigio: quodeumque parant hoc omine fata,
Eutropius cervice luat. Sic omnia volvis?
Hoc regni, Fortuna, tenes? quænam ista jocandi
Sævitia? humanis quantum bacchabere rebus? 25
Si tibi servili placuit fodare curules
Crimine, procedat laxatâ compede consul:

Rupta Quirinales sumant ergastula cinctus.
 Da saltem quemcumque virum. Discrimina quædam
 Sunt famulis, splendorque suus; maculamque mino-
 rem 30

Conditionis habet, domino qui vixerit uni.
 Si pelagi fluctus, Libyæ si discis arenas,
 Eutropii numerabis heros. Quot jura, quot ille
 Mutavit tabulas! vel quanta vocabula vertit!
 Nudatus quoties, medicum dum consulit emtor, 35
 Ne qua per occultum lateat jactura dolorem!
 Omnes poenituit pretii; venumque redibat,
 Dum vendi potuit. Postquam deforme cadaver
 Mansit, et in rugas totus defluxit aniles;
 Jam specie doni certatim limine pellunt; 40
 Et foedum ignaris properant obtrudere munus.
 Tot translata jugis submitit colla vetustum
 Servitium, semperque novum: nec destitit unquam;
 Sæpe tamen coepit. Cunabula prima cruentis
 Debita supplicii: rapitur castrandus ab ipso 45
 Ubere: suscipiunt, matris post viscera, poenæ.
 Advolat Armenius, certo mucrone recisos
 Edoctus mollires mares; damnoque nefandum
 Aucturus pretium, fecundum corporis ignem
 Sedibus exhaurit geminis; unoque sub ictu 50
 Eripit officiumque patris, nomenque mariti.
 Ambiguus vitæ jacuit, penitusque supremum
 In cerebrum secti traxerunt frigora nervi.
 Laudemusne marium, quæ vires abstulit hosti?
 An potius fato causam tribuisse queramur? 55
 Profuerat mansisse virum: felicior exstat
 Opprobrio: serviret adhuc, si fortior esset.

Inde per Assyriæ trahitur commercia ripæ:
 Hinc fora venalia, Galatæ ductore, frequentat;
 Permutatque domos varias. Quis nomina possit 60
 Tanta sequi? Miles stabulis Ptolemæus in illis
 Notior: hic longo lassatus pellicis usu
 Donat Arinthæo: neque enim jam dignus haberi,
 Nec maturus eni. Cum fastiditus abiit,

Quam gemuit! quanto planxit divortia luctu! 65
 "Hæc erat, hæc, Ptolemæe, fides? hoc profuit ætas
 In gremio consumpta tuo, lectusque jugalis,
 Et ducti toties inter præsepia somni?
 Libertas promissa perit? viduumne relinquis
 Eutropium? tantasque premunt oblivia noctes, 70
 Crudelis? pro sors generis durissima nostri!
 Femina cum senuit, retinet connubia partu;
 Uxorisque decus matris reverentia pensat.
 Nos Lucina fugit; nec pignore nitimur ullo.
 Cum formâ dilapsus amor: defloruit oris 75
 Gratia: quâ miseri scapulas tutabimur arte?
 Quâ placeam ratione senex?" Sic fatus, acutum
 Aggreditur lenonis opus: nec segnis ad artem
 Mens erat, officiique capax: omnesque pudoris
 Hauserat insidias. Custodia nulla tuendo 80
 Fida toro; nulli poterant excludere vectes.
 Ille vel seratâ Danaën in turre latentem
 Eliceret. Fletus domini fingebat amantis:
 Indomitasque morâ, pretio lenibat avaras,
 Lascivasque joci. Non blandior ullus euntis 85
 Ancillæ tetigisse latus, leviterque reductis
 Vestibus occulto crimen mandâsse susurro;
 Nec furtis quæsisse locum, nec, fraude repertâ,
 Cautior elusi fremitus vitare mariti.
 Haud aliter juvenum flammis Ephyreia Laïs 90
 E gemine dotata mari, cum sarta refundit
 Canities, jam turba procax, noctisque recedit
 Ambitus, et raro pulsatur janua tactu;
 Sequê reformidat speculo damnare senectus;
 Stat tamen, atque alias succingit lena ministras; 95
 Dilectumque semel, quamvis longæva, lupanar
 Circuit; et retinent mores, quod perdidit ætas.
 Hinc honor Eutropio; cumque omnibus unica virtus
 Esset in eunuchis, thalamos servare pudicos,
 Solus adulteriis crevit: nec verbera tergo 100
 Cessavêre tamen, quoties decepta libido
 Irati caluisset heri: frustra rogantem,

- Jactantemque suos tot jam per lustra labores,
 Dotalem genero nutritorique puellæ
 Tradidit. Rous rector consulque futurus 105
 Pectebat dominæ crines; et sæpe lavanti
 Nudus in argento lympham gestabat alumnae:
 Et, cum se rapido fessam projecerat aestu,
 Patricius roseis pavonum ventilat alis.
 Jamque sævo laxata cutis, sulcisque genarum 110
 Corruerat passâ facies rugosior uvâ.
 Flava minus presso finduntur vomere rura;
 Nec vento sic vela tremunt. Miserabile turpes
 Exedère caput tineæ; deserta patebant
 Intervalla comæ; qualis, sitientibus arvis, 115
 Arida jejunæ seges interlucet aristæ;
 Vel qualis, gelidis, plumâ labente, pruinis,
 Arboris immoritur trunco brumalis hirundo.
 Scilicet ut trabeis injuria cresceret olim,
 Has in fronte notas, hoc dedecus addidit oris 120
 Luxuriæ Fortuna suæ. Cum pallida nudis
 Ossibus horrorem dominis præberet imago,
 Decolor et macies ocurso læderet omnes,
 Aut pueris latura metus, aut tædia mensis,
 Aut crimen famulis, aut procedentibus omen; 125
 Et nihil exhausto caperent in stipite lucri;
 (Sternere quippe toros, vel cedere ligna culinæ,
 Membra negant: aurum, vestes, arcana tueri
 Mens infida vetat: quis enim committere vellet
 Lenoni thalamum?) tandem, ceu funus acerbum, 130
 Infaustamque suis trusère penatibus umbram.
 Contemptu jam liber erat. Sic pastor obesum
 Lacte canem ferroque ligat, pascitque revinctum,
 Dum validus servare gregem, vigilique rapaces
 Latratu terrere lupos: cum tardior idem 135
 Jam scabie laceras dejecit sordidus aures,
 Solvit, et exuto lucratur vincula collo.
 Est, ubi despectus nimius juvat. Undique pulso
 Per cunctas licuit fraudes impune vagari,
 Et fatis aperire viam. Pro! quisquis Olympi 140

Summa tenes, tantum libet mortalia risu 141
Vertere? qui servi non est admissus in usum,
Suscipitur regnis; et quem privata ministrum
Dedignata domus, moderantem sustinet aula.

Ut primum vetulam traxêre Palatia vulpem, 145
Quis non ingemuit? quis non irrepere sacris
Obsequiis doluit toties venale cadaver?
Ipsi quinetiam tali consorte fremebant
Regales famuli, quibus est illustrior ordo
Servitii; sociumque sibi sprevere superbi. 150

Cernite, quem Latii poscant annexere fastis:
Cujus et eunuchos puduit. Sed vilior ante
Obscuræ latuit pars ignotissima turbæ,
Donec, Abundanti furis, (qui rebus Eois
Exitium, primoque sibi produxit) ab imis 155
Evectus thalamis, summos invasit honores.
Quam bene dispositum terris, ut dignus iniqui
Fructus consilii primis auctoribus instet!

Sic multos fluvio vates arente per annos,
Hospite qui caeso monuit placare Tonantem, 160
Inventas primus Busiridis imbuat aras;
Et cecidit sævi, quod dixerat, hostia sacri.
Sic opifex tauri, tormentorumque repertor,
Qui funesta novo fabricaverat æra dolori,
Primus inexpertum, Siculo cogente tyranno, 165
Sensit opus, docuitque suum mugire juvenum.

Nullius Eutropius, quam qui se protulit, ante
Ereptas possedit opes; nullumque priorem
Perculit exsilio: solumque hoc rite peregit,
Auctorem damnare suum. Postquam obaitus sevo
Semivir excelsam rerum sublatus in arcem, 171

Quod nec vota pati, nec fingere somnia possent,
Vidit sub pedibus leges, subjectaque colla
Nobilium, tantumque sibi permittere fata,
Qui nihil optasset plus libertate mereri; 175

Jamjam dissimulat dominos, alteque tumescunt
Serviles animi: procerum squalore repletur
Carcer, et exsulis Meroë campique gemiscunt

Æthiopum ; pœnis hominum plaga personat ardens :
Marmaricus claris violatur cœdibus Hammon. 180

Asperius nihil est humili, cum surgit in altum :
Cuncta ferit, dum cuncta timet : dessevit in omnes,
Ut se posse putent : nec bellua tetrior ulla,
Quam servi rabies in libera terga furentia.
Agnoscit gemitus ; et pœnæ parcere nescit, 185
Quam subiit ; dominique memor, quem verberat, odit.
Adde, quod eunuchus nullâ pietate movetur,
Nec generi natisve cavet. Clementia cunctis
In similes, animosque ligant consortia damni.
Iste nec eunuchis placidus : sed pejus in aurum 190
Æstuat : hoc uno fruitur succisa libido.

Quid nervos secuisse juvat ? vis nulla cruentam
Castrat avaritiam. Parvis exercita furtis,
Quæ vastare penum, neglectaque sueverat arcæ
Claustra remoliri, nunc uberiore rapinâ 195
Peccat in orbe manus. Quidquid se Tigris ab Æmo
Dividit, hoc certâ proponit merce locandum,
Institor imperii, caupo famosus honorum.
Hic Asiam, villâ pactus, regit ; ille redemit
Conjugis ornatu Syriam : dolet ille paternâ 200
Bithynos mutâsse domo : suffixa patenti
Vestibulo, pretiis distinguit regula gentes.
Tot Galatæ, tot Pontus eat, tot Lydia nummis.
Si Lyciam tenuisse velis, tot millia ponas ;
Si Phrygas, adde parum. Propriæ solatia sorti 205
Communes vult esse notas ; et, venditus ipse,
Vendere cuncta cupit : certantûm sæpe quorum
Diversum suspendit onus : cum pondere iudex
Vergit, et in geminas nutat provincia lances.

Non pudet, heu Superi ! populos venire sub hasta ?
Vendentis certe pudeat. Quid jure sepultum 211
Mancipium tot regna tenet, tot distrahit urbes ?
Pollentem solio Crœsum victoria Cyri
Fregit, ut eunucho fluerent Pactolus et Hermus ?
Attalus hæredem voluit te, Roma, relinqui ; 215
Restitit Antiochus præscripto margine Tauri ;

Indomitos curru Servilius egit Isauros; 217

Et Pharos Augusto jacuit, vel Creta Metello,

Ne non Eutropio quæstus numerosior esset?

In mercem veniunt Cilices, Judæa, Sophene, 220

Romanusque labor, Pompeianique triumph.

Quo struis hos auri cumulos? quæ pignora tantis

Succedent opibus? Nubas, ducasve, licebit;

Nunquam mater eris, nunquam pater: hoc tibi ferrum,

Hoc natura negat. Te grandibus India gemmis, 225

Te foliis Arabes ditent, te vellere Seres;

Nullus inops adeo, nullum sic urget egestas,

Ut velit Eutropii fortunam et membra paciisci.

Jamque oblita sui, nec sobria divitiis, mens

In miseras leges hominumque negotia ludit. 230

Judicat eunuchus: quid jam de consule miror?

Prodigium, quodcumque gerit. Quæ pagina lites

Femineas meminit? quibus unquam sæcula terris

Eunuchi videre forum? Sed, ne qua vacaret

Pars ignominia, neu quid restaret inausum, 235

Arma etiam violare parat, portentaque monstros

Aggerat; et secum petulans amentia certat.

Erubuit Mavors, aversaque risit Enyo

Dedecus Eoum; quoties, intenta sagittis,

Et pharetrâ fulgens, anus exercetur Amazon; 240

Arbiter aut quoties belli pacisque recurrit,

Alloquiturque Getas. Gaudet, cum viderit, hostis;

Et sentit jam deesse viros. Incendia fumant:

Muris nulla fides: squalent populatibus agri;

Et medio spes sola mari. Trans Phasin aguntur 245

Cappadocum matres; stabulisque abducta paternis,

Caucasias captiva bibunt armenta pruinas,

Et Scythicis mutant Argei pabula silvis.

Extra Cimmerias, Taurorum claustra, paludes,

Flos Syriæ servit: spoliis nec sufficit atrox 250

Barbarus: in cædem vertunt fastidia prædæ.

Ille tamen (quid enim servum, mollemque pudebit?

Aut quid in hoc vultu poterit flagrare ruboris?)

Pro victore redit. Peditum vexilla sequuntur,

Et turmæ similes, eunuchorumque manipuli, 255
 Hellespontiacis legio dignissima signis.
 Obvius ire cliens, defensoremque reversum
 Complecti. Placet ipse sibi; laxasque laborat
 Distendisse genas, fictumque inflatus anhelat,
 Pulvere respersus tineas, et solibus ora 260
 Pallidior; verbisque sonat plorabile quiddam
 Ultra nequitiam fractis, et prælia narrat:
 Perque suam tremulâ testatur voce sororem,
 Defecisse vagas ad publica commoda vires.
 Cedere livori, nec sustentare procellas 265
 Invidiæ, mergique fretis spumantibus orat;
 Exoretque utinam! Dum talia fatur, ineptas
 Detergit lacrymas, atque inter singula dicta
 Flebile suspirat: qualis venit arida socrus,
 Longinquam visura nurum: vix lassa resedit, 270
 Et jam vina petit. Quid te, turpissima, bellis
 Inseris, aut sævi pertentas Pallada campi?
 Tu potes alterius studiis hæere Minervæ;
 Tu telas, non tela, pati: tu stamina nôsse;
 Tu segnes operum sollers urgere puellas, 275
 Et niveam dominæ pensis involvere lanam.
 Vel, si sacra placent, habeas pro Marte Cybellen:
 Rauca Celæniæ ad tympana disce furores.
 Cymbala ferre licet, pectusque illidere pinu,
 Inguinis et reliquum Phrygiis abscindere cultris. 280
 Arma relinque viris. Geminam quid dividis aulam,
 Conarisque pios odii committere fratres?
 Te magis, ah! demens, veterem si respicis artem,
 Conciliare decet. Gestis pro talibus, annum
 Flagitet Eutropius, ne quid non polluat unus; 285
 Dux acies, iudex prætoriam, tempora consul.
 Nil adeo fœdum est, quod non exacta vetustas
 Ediderit, longique labor commiserit sævi.
 Œdipodes matrem, natam duxisse Thyestes,
 Cantantur: peperit fratres Iocasta marito, 290
 Et Pelopea sibi. Thebas ac funera Trojæ
 Tristis Krechthei deploret scena theatri.

In volucrem Tereus, Cadmus se vertit in anguem :
 Scylla novos mirata canes : hunc arbore fligit ;
 Elevat hunc plumâ ; squamis hunc fabula vestit ; 295
 Hunc solvit fluvio. Nusquam spado consul in orbe,
 Nec iudex ductorve, fuit. Quodcumque virorum
 Est decus, eunuchi scelus est. Exempla creantur,
 Quæ socci superent risus, luctusque cothurni.
 Quam pulchre conspectus erat, cum tenderet artus
 Exsanguis onerare togâ ; cinctuque gravatus, 301
 Indutoque senex obocœnor iret in auro !
 Humani qualis simulator simius oris,
 Quem puer arridens pretioso stamine Serum
 Velavit, nudasque nates ac terga reliquit, 305
 Ludibrium mensis. Erecto pectore dives
 Âmbulat, et claro sese deformat amictu.
 Candida pollutos comitatur curia fasces,
 Forsitan et dominus : præbet miracula lictor
 Consule nobilior ; libertatemque daturus, 310
 Quam nondum meruit, scandit sublime tribunal ;
 Atque inter proprias laudes Ægyptia jactat
 Somnia, prostratosque canit se vate tyrannos.
 Scilicet in dubio vindex Bellona pependit,
 Dum spado Tiresias, enervatusque Melampus 315
 Reptat, ab extremo referens oracula Nilo.
 Obstrepuere avium voces : exhorruit annus
 Nomen ; et insanum gemino proclamat ab ore,
 Eunuchumque vetat fastis accedere, Janus.
 Sumeret illicitos etenim si femina fasces, 320
 Esset turpe minus. Medis levibusque Sabæis
 Imperat hic sexus ; reginarumque sub armis
 Barbarite pars magna jacet. Gens nulla probatur,
 Eunuchi quæ sceptrâ ferat. Tritonia, Phœbe,
 Vesta, Ceres, Cybele, Juno, Latona, coluntur : 325
 Eunuchi quæ templa Dei, quas vidimus aras ?
 Inde sacerdotes : hæc intrat pectora Phœbus :
 Inde canunt Delphi. Trojanam sola Minervam
 Virginitas Vestalis adit, flammæque tuetur.
 Hi nullas meriti vittas, semperque profani. 330

Nascitur ad fructum mulier, prolemque futuram : 33
 Hoc genus inventum est, ut serviat. Herculis arcu
 Concidit Hippolyte; Danaï fugere bipennem,
 Penthesilea, tuam : claras Carthaginis arces
 Creditur, et centum portis Babylona superbam, 335
 Feminæ struxisse labor : quid nobile gessit
 Eunuchus ? quæ bella tulit ? quas condidit urbes ?
 Illas præterea rerum natura creavit :
 Hos fecere manus : seu prima Semiramis, astu
 Assyriis mentita virum, ne vocis acutæ 340
 Mollities, lævesque genæ, se prodere possent,
 Hos sibi conjunxit similes ; seu Parthica ferro
 Luxuries vetuit nasci lanuginis umbram ;
 Servatoque diu puerili flore, coëgit
 Arte retardatam Veneri servire juventam. 345
 Fama prius falso similis, vanoque videri
 Ficta joco : levior volitare per oppida rumor,
 Riderique nefas ; veluti nigrantibus alis
 Audiretur olor, corvo certante ligustria. 349
 Atque aliquis gravior morum, " Si talibus," inquit,
 " Creditur, et nimis turgent mendacia monstria,
 Jam testudo volat ; profert jam cornua vultur ;
 Prona petunt retro fluvii juga ; Gadibus ortum
 Carmani texere djem ; jam frugibus aptum
 Æquor, et advectum silvis delphina videbo ; 355
 Jam cochleis homines junctos, et quidquid inane
 Nutrit, Judaicis quæ pingitur India velis."
 Subjicit et mixtis salibus lascivior alter :
 " Miraris ? nihil est, quod non in pectore magnum
 Concipit Eutropius : semper nova, grandia semper
 Diligit, et celerî degustat singula sensu. 361
 Nil timet a tergo : vigilantibus undique curis
 Nocte dieque patet : lenis facilisque moveri
 Supplicibus, mediâque tamen mollissimus irâ.
 Nil negat, et sese vel non poscentibus offert. 365
 Quidlibet ingenio subigit ; traditque fruendum.
 Quidquid amas, dabit illa manus : communiter omni
 Fungitur officio, gaudetque potentia flecti.

Hoc quoque conciliis peperit, meritoque laborum :
Accipit et trabas, argutæ præmia dextræ." 370

Postquam vera fides facinus vulgavit Eoum
Gentibus, et Romæ jam certius impulit aures :
"Eutropiumne etiam nostrâ dignabimur irâ ?
Hic quoque Romani meruit pars esse doloris ?"
Sic effata, rapit cœli per inania cursum 375

Diva potens ; unoque Padum transalapsa volatu,
Castra sui rectoris adit. Tum forte decorus,
Cum Stilichone, gener pacem implorantibus ultro
Germanis responsa dabat, legesque Caiicis,
Arduus, et flavis signabat jura Suëvis. 380

His tribuit reges : his obinde fœdera sancit
Indicto : bellorum alios transcribit in usus,
Militet ut nostris detonsa Sicambria signis.
Læta subit Romam pietas : et gaudia pæne
Moverunt lacrymas ; tantoque exultat alumno. 385

Sic, armenta suo jam defensante juvenco,
Celsius assurgunt erectæ cornua matri.
Sic jam terribilem stabulis, dominumque ferarum,
Crescere miratur genitrix Massyla leonem.

Dimovit nebulam, juvenique apparuit ingens : 390
Tum sic orsa loqui : "Quantum, te principe, possim,
Non longinqua docent ; domito quod Saxone Tethys
Mitior, aut fracto secura Britannia Picto.

Ante pedes humili Franco tristique Suëvo
Perfruo ; et nostrum video, Germanice, Rhenum.
Sed quid agam ? discors Oriens felicibus actis 395

Invidet ; atque alio Phœbi de cardine surgunt
Crimina, ne toto conspiret corpore regnum.
Gildonis taceo magnâ cum laude [reptam]
Perfidiam, et fretos Eoo robore Mauros. 400

Quam suspecta fames, quantum discriminis Urbi !
Ni tua vel soceri nunquam non provida virtus
Australi Arctois pensâset frugibus annum.

Invectæ Rhodani Tiberina per ostia classes,
Cinyphisque ferax Araris successit æstiva. 405

Teutonicus vomer, Pyrenæique juvenis

Sudavère mihi : sagetes mirantur Iberas 407
 Horrea : nec Libyæ senserunt damna rebellis,
 Jam Transalpinâ contenti messe, Quirites.
 Ille quidem solvit meritas (scit Tabraca) poenas ; 410
 Ut pereat, quicumque tuis conflixerit armis !
 Ecce repens isdem clades a partibus exit,
 Terrorisque minus, sed plus habitura pudoris,
 Eutropius consul. Pridem tolerare fatemur
 Hoc genus, Arsacio postquam se regia fastu 415
 Sustulit, et nostros corrumpit Parthia mores.
 Præfecti sed adhuc gemmis, vestique dabantur
 Custodes, sacroque adhibere silentia somno.
 Militia Eunuchi nunquam transgressa cubile,
 Non vitâ spondente fidem ; sed inertia tutum 420
 Mentis pignus erat. Secreta monilia servant ;
 Ornatus curent Tyrios ; a fronte recedant
 Imperi. Tenero tractari pectore nescit
 Publica majestas : nunquam vel in æquore puppim
 Vidimus eunuchi clavo parere magistrî. 425
 Nos adeo sperni faciles ? orbisque carinâ
 Vilior ? Auroram sane, quæ talia ferre
 Gaudet, et assuetas sceptris muliebribus urbes,
 Possideant : quid belliferam communibus urunt
 Italiam maculis, nocituraque probra severis 430
 Admiscent populis ? Peregrina piacula forti
 Pellantur longe Latio ; nec transeat Alpes
 Dedecus : in solis, quibus exstitit, hæreat arvis.
 Scribat Halys, scribat famæ contemtor Orontes.
 Per te, perque tuos, obtestor, Roma, triumphos, 435
 Nesciat hoc Thybris ! Nunquam poscentibus olim
 Qui dare Dentatis annos Fabiisque solebat,
 Martius eunuchi repetet suffragia Campus ?
 Æmilios inter, servatoresque Camillos,
 Eutropius ? jam Chrysogonis tua, Brute, potestas,
 Narcissique datur ? Natos hoc dedere poenæ 441
 Profuit, et misero civem præponere patri ?
 Hoc mihi Janiculo positis Etruria castris
 Quæsiit, et tantum fluvio Porsetennæ remotus ?

Hoc meruit vel ponte Cocles, vel Mucius igne? 445
 Visceribus frustra castum Lucretia ferrum
 Mersit, et attonitum tranavit Cloelia Thybrim?
 Eutropio fasces asservabantur, adempti
 Tarquinii? quemcumque mense vexere curules,
 Laxato veniat, socium aversatus, Averno. 450
 Impensi sacris Decii, prorumpite bustis,
 Torquatique truces, animosaque pauperis umbra
 Fabricii; tuque, o, si forte inferna piorum
 Jugera, et Elysias scindis, Serrane, novales:
 Poeno Scipiade, Poeno praeclare Lutati, 455
 Sicaniâ Marcelle ferox: gens Claudia surgat,
 Et Curii series; et qui sub jure negasti
 Vivere Cæsareo, parvo procede sepulcro,
 Eutropium passure, Cato. Remeate tenebris,
 Agmina Brutorum, Corvinorumque catervæ. 460
 Eunuchi vestros habitus, insignia sumunt
 Ambigui Romana mares: rapuere tremendas
 Hannibali Pyrroque togas: flabella perosi,
 Adspirant trabeis: jam non umbracula gestant
 Virginibus, Latias ausi vibrare secures. 465
 Linquite femineas, infelix turba, latebras,
 Alter quos pepulit sexus, nec suscipit alter:
 Exsecti Veneris stimulos, et vulnere casti:
 Mixta duplex ætas: inter puerumque senemque
 Nil medium; falsi complete sedilia Patres. 470
 Ite novi procures; infecundoque senatu
 Eutropium stipate ducem: celebrate tribunal
 Pro thalamis; verso jam discite more curules,
 Non matrum pilenta, sequi. Neu prisca revolvam,
 Neu numerem; quantis injuria mille per annos 475
 [Fit] retro ducibus! quanti foedabitur sevi
 Canities! unam subeunt quot sæcula culpam!
 Inter Arinthæi fastus, et nomen herile,
 Servus erit; dominoque suos aequalis honores
 Insetet! Heu, semper Ptolemæi noxia mundo 480
 Mancipia! en alio lædor graviore Pothino:
 Ea patior majus Phario scelus. Ille cruorem

Consul is unius Pellæis ensibus hausit :
 Inquinat hic omnes. Si nil privata movebunt,
 At tu principibus, nostræ tu prospice causæ ; 485
 Regalesque averte notas. Hunc adspicit unum
 Aula magistratum : vobis Patribusque recurrit
 Hic alternus honos. In crimen euntibus annis
 Parce, quater consul : contagia fascibus, oro,
 Defendas ignava tuis : neu tradita libris 490
 Nomina, vestitusque meos, quibus omne, quod ambit
 Oceanus, domui, tantâ caligine mergi
 Calcarique sinas : nam quæ jam bella geramus
 Mollibus auspiciis ? quæ jam connubia prolem,
 Vel frugem latura seges ? quid fertile terris, 495
 Quid plenum, sterili possit sub consule nasci ?
 Eunuchi si jura dabunt, legesque tenebunt,
 Ducant pensa viri ; mutatoque ordine rerum,
 Vivat Amazonio confusa licentia ritu.
 Quid trahor ulterius ? Stilichon, quid vincere differs,
 Dum certare pudet ? nescis, quod turpior hostis 501
 Lætitia majore cadit ? piratica Magnum
 Erigit ; illustrat servillis laurea Crassum.
 Annuis : agnosco fremitum, quo palluit Euris,
 Quo Mauri, Gildoque ruit. Quid Martia signa 505
 Sollicitas ? non est jaculis hastisve petendus :
 Consilia succumbent, audito verberare, terga :
 Ut Scythia post multos rediens exercitus annos,
 Cum sibi servillis pro finibus obvia pubes
 Iret, et arceret dominos tellure revereos, 510
 Armata ostensis aciem fudere flagellis.
 Notus ab inceptis ignobile reppulit horror
 Vulgus ; et adductus sub verberare torpuit ensis."

CL. CLAUDIANI
LIBRI II.
IN EUTROPIUM

PRÆFATIO.



Qui modo sublimes rerum flectebat habenas
Patricius, rursum verbera nota timet ;
Et, solitos tardæ passurus compedis orbes,
In dominos vanas luget abîsse minas.
Culmine dejectum vitæ Fortuna priori
Reddidit, insano jam satiata joco.
Scindere nunc aliâ meditatur ligna securi ;
Fascibus et tandem vapulat ipse suis.
Illatas consul pœnas, se consule, solvit.
Annus qui trabeas, hic dedit exsilium.
Infaustum populis in se quoque vertitur omen :
Sævit in auctorem prodigiosus honos.
Ablato penitus respirant nomine fasti ;
Maturamque luem sanior aula vomit.
Dissimulant socii, conjuratique recedunt ;
Procumbunt pariter cum duce tota cohors ;
Non acie victi, non obsidione subacti,
Ne pereant ritu, quo periêre viri.
Concidit exiguæ dementia vulnere chartæ ;
Confecit sævum litera Martis opus.
Mollis femineâ detruditur arce tyrannus,
Et, thalamo pulsus, perdidit imperium.

- Sic, juvenis nutante fide, veterique reductâ
 Pellice, defletam linquit amica domum.
 Canitiem largo raram de pulvere turpat ; 25
 Et lacrymis rugas implet, anile gemens :
 Suppliciterque pias humilis prostratus ad aras,
 Mitigat iratas voce tremente nurus.
 Innumeri glomerantur heri, sibi quisque petentes
 Mancipium solis utile suppliciis. 30
 Quamvis fœdus enim, mentemque obscenior ore,
 Ira dabit pretium : poena meretur emi.
 Quas, spado, nunc terras, aut quem transibis in axem ?
 Cingeris hinc odiis ; inde recessit amor.
 Utraque te gemino sub sidere regia damnat. 35
 Hesperius nunquam, jam nec Eous eris.
 Miror cur, aliis qui pandere fata solebas,
 Ad propriam cladem, cæca Sibylla, taces.
 Jam tibi nulla videt fallax insomnia Nilus ;
 Pervigilant vates nec, miserande, tui. 40
 Quid soror ? audebit tecum conscendere puppem,
 Et veniet longum per mare fida comes ?
 An fortasse toros eunuchi pœperis odit :
 Et te nunc inopem dives amare negat ?
 Eunuchi jugulum primus secuisse fateris : 45
 Sed tamen exemplo non ferière tuo.
 Vive pudor fati. En, quem tremuère tot urbes !
 En, cujus populi sustinuère jugum !
 Direptas quid plangis opes, quas natus habebit ?
 Non aliter poteris principis esse pater. 50
 Improbe, quid pulsas muliebribus astra querelis,
 Quod tibi sub Cypri litore parta quies ?
 Omnia barbarico per te concussa tumultu.
 Crede mihi, terrâ tutius æquor erat.
 Jam non Armenios jaculis terrebis et arcu : 55
 Per campos volucrem non agitabis equum.
 Dilecto caruit Byzantius ore senatus :
 Curia consiliis æstuat orba tuis.
 Emeritam suspende togam ; suspende pharetram.
 Ad Veneris partes, ingeniumque, redi. 60

- Non bene Gradivo lenonia dextera servit : 61
Suscipiet famulum te Cytherea libens.
Insula læta choris, blandorum mater amorum :
Nulla pudicitiae cura placere potest.
Prospectant Paphiae celsa de rupe puellae, 65
Sollicitae, salvam dum ferat unda ratem.
Sed vereor, ne te teneant Tritones in alto,
Lascivas doctum fallere Nereidas ;
Aut idem cupiant pelago te mergere venti,
Gildonis nuper qui tenuere fugam. 70
Inclita captivo memoratur Tabraca Mauro.
Naufragio Cyprus sit memoranda tuo.
Vecturum moriens frustra delphina vocabis :
Ad terram solos devehit ille viros.
Quisquis adhuc similes eunuchus tendit in actus, 75
Respicens Cyprum, desinat esse ferox.

IN EUTROPIUM

LIBER II.

MYRONI cineres, et si quid restat Eoi,
Quod pereat, regni, certæ, non augure falso,
Prodigii patuere minæ; frustra que peracto
Vulnere, monstriferi præsentia discitis anni.
Cautior ante tamen violentum navita Corum 5
Prospicit, et tumidæ subducit vela procellæ.
Quid juvat errorem, mersâ jam puppe, fateri?
Quid lacrymæ delicta levant? stant omina vestri
Consulis: immotis hæsere piacula fati.
Tunc decuit sentire nefas, tunc ire recentes 10
Detersum maculas: veteri post obruta morbo
Corpora, Pæonias nequidquam admoveris herbas.
Ulcera, possessis alte suffusa medullis,
Non leviori manu, ferro sanantur et igni,
Ne coëat frustra, mox eruptura, cicatrix. 15
Ad vivum penetrant flammæ, quo funditus humor
Defluat, et vacuis corrupto sanguine venis
Arescat fons ille mali. Truncantur et artus,
Ut liceat reliquis securum degere membris.
At vos egregie purgatam creditis aulam, 20
Eutropium si Cypros habet, vindictaque mundi
Semivir exsul erit. Quis vos lustrare valebit
Oceanus? tantum facinus quæ diluet setas?
Induerat necdum trabeas; mugitus ab alto
Redditus: infernas rabies arcana cavernas 25
Vibrat, et alterno configunt culmina lapsu.
Bacchatus per operta tremor Chalcedona movit;
Pronus et in geminas nutavit Bosporus urbes:

Concurrere freti fauces : radice revulsâ,
 Vitant instabilem rursus Symplegada nautæ. 30
 Scilicet hæc Stygiæ præmittunt signa sorores ;
 Et sibi jam tradi populos, hoc consule, gaudent.
 Mox oritur diversa lues : hinc Mulciber ignes
 Sparserat : hinc victâ proruperat oblice Nereus. 34
 Hæc flagrant, hæc tecta natant. Quam, Numina, poenam
 Servatis scelere, cujus tot cladibus omen
 Constitit ? Incumbas utinam, Neptune, tridenti ;
 Pollutumque solum toto cum crimine mergas !
 Unam, pro mundo, Furiis concedimus urbem. 39
 Utque semel patuit monstris iter, [omnia,] tempus
 Nacta suum, properant : nasci tum decolor imber,
 Infantûmque novi vultus, et dissona partu
 Semina : tum lapidum fletus, armentaque vulgo
 Ausa loqui, mediisque feræ se credere muris.
 Tum vates sine more rapi, lymphataque passim 45
 Pectora terrifici stimulis ignescere Phœbi.
 Fac nullos cecinisse Deos : adeone retusi
 Quisquam cordis erit, dubitet qui partibus illis
 Affore fatalem castrati consulis annum ? 49
 Sed quam cæcus inest vitiis amor ! omne futurum
 Despicitur ; suadentque brevem præsentia fructum ;
 Et ruit in vetitum, damni secura, libido ;
 Dum mora supplicii lucro, serumque, quod instat,
 Creditur. Haud equidem, contra tot signa, Camillo
 Detulerim fasces, ne dum (pro sexus !) inertî 55
 Mancipio, cui (cuncta licet responsa juberent,
 Hortantesque licet sponderent prospera Divi)
 Turpe fuit cessisse viros. Exquirite retro
 Crimina, continui lectis annalibus ævi :
 Prisca recensitis evolvite sæcula fastis : 60
 Quid senis infandi Capræ, quid scena Neronis,
 Tale ferunt ? Spado, Romuleo succinctus amictu,
 Sedit in Augustis laribus : vulgata patebat
 Aula salutantûm studiis : huc plebe senatus
 Permixtâ, trepidique duces, omnisque potestas 65
 Confluit : advolvi genibus, contingere dextram,

Ambitus; et votum, deformibus oscula rugis 67
 Figere. Præsidium legum, genitorque vocatur
 Principis, et famulum dignatur regia patrem.

Posteritas, admitte fidem: monimenta petuntur
 Dedecoris; multisque gemunt incudibus æra, 71
 Formatura nefas: hæc iudicia, illa togati,
 Hæc nitet armati species: numerosus ubique
 Fulget eques: præfert eunuchi curia vultus.
 Ac, veluti caveant, ne quo consistere virtus 75
 Possit pura loco, cunctas hoc ore laborant
 Incestare vias. Maneant immota, precamur,
 Certaue perpetui sint argumenta pudoris.
 Subter adulantes tituli, nimiaque leguntur
 Vel maribus laudes: claro quod nobilis ortu, 80
 (Cum vivant domini!) quod maxima proelia solus
 Impleat, (et patitur miles?) quod tertius urbis
 Conditor: (hoc Byzas, Constantinusque, videbunt?)
 Inter quæ, tumidus leno producere cœnas
 In lucem, foetere mero; dispergere, plausum 85
 Emitturas, in vulgus opes, totosque theatris
 Indulgere dies, alieni prodigus auri.

At soror, et, si quid portentis creditur, uxor,
 Mulcebat matres epulis; et, more pudicæ
 Conjugis, eunuchi celebrabat vota mariti. 90
 Hanc amat; hanc summâ de re, vel pace vel armis,
 Consulit; huic curas et clausa palatia mandat,
 Ceu stabulum vacuumque domum. Sic magna tueri
 Regna nihil? patiensque jugi deluditur orbis?

Mitior alternum Zephyri jam bruma teporem 95
 Senserat; et primi laxabant germina flores.
 Jamque iter in gremio pacis solenne parabant
 Ad muros, Ancyra, tuos, auctore repertum
 Eutropio, pelagi ne tædia longa subirent,
 Sed vaga lascivis flueret discursibus ætas. 100
 Unde tamen tantâ sublimes mole redibant,
 Ceu victos traherent Medos, Indumque bibissent.
 Ecce autem, flavis Gradivus ab usque Gelonis
 Arva cruentato repetebat Thracia curru.

Subsident Pangaea rotis, altæque sonoro 106
 Stridunt axe nives. Ut vertice constitit Hæmi,
 Femineasque togas pressis conspexit habentis,
 Subrisit crudele pater, cristisque micantem
 Quassabat galeam: tunc implacabile numen,
 Bellonam, alloquitur, quæ, sanguine sordida vestem,
 Illyricis pingues pectebat stragibus hydros: 110
 "Necdum mollitiæ, necdum, germana, mederi
 Possumus Eos? nunquam corrupta rigescent
 Sæcula? Cappadocum tepidis Argæus acervis
 Æstuat: infelix etiamnum pallet Orontes. 115
 Dum pereunt, meminere mali: si corda parumper
 Respirare sinas, nullo tot funera sensu
 Prætereunt; tantique levis jactura cruoris.
 Adspicis obscœnum facinus? quid criminibus ora
 Protegis? en quales sese diffundit in actus 120
 Parva quies! quantum nocuerunt otia ferri!
 Qui caruit bellis, eunucho traditur, annus.
 Actum de trabeis esset, si partibus una
 Mens foret Hesperii: rueret derisa vetustas;
 Nullaque calcati starent vestigia juris; 125
 Nî memor imperii Stilichon, morumque priorum,
 Turpe relegasset defenso a Thybride nomen,
 Intactamque novo servasset crimine Romam.
 Ille dedit portum, quo se pulsata referret
 Majestas Latii, deformatæque secures: 130
 Ille dedit fastos, ad quos, Oriente relicto,
 Confugeret sparsum maculis servilibus ævum.
 Quam similes hæc aula viros! (ad moenia visus
 Dirige) num saltem tacitâ formidine mussant?
 Num damnant animo? plaudentem cerne senatum,
 Et Byzantinos proceres, Graiosque Quirites. 136
 O Patribus plebes, o digni consule Patres!
 Quid, quod et armati cessant, et nulla virilem
 Inter tot gladios sexum reminiscitur ira?
 Huccine nostrorum cinctus abiære nepotum? 140
 Sic Bruti despectus honos? ignosce parenti,
 Romule, quod serus temeratis fascibus ultor

Advenio. Jam jam largis hæc gaudia faxo 143
 Compensent lacrymis. Quid dudum inflare moraris
 Tartaream, Bellona, tubam? quid stringere falcem,
 Quâ populos a stirpe [metis?] Molire tumultus: 146
 Excute delicias. Thracum Macetûmque ruinæ
 Tædet, et in gentes iterum sævire sepultas.
 Damna minus consueta movent. Trans æquora sævas
 Verte faces: aliis exordia sume rapina. 150
 Non tibi Rhipæis hostis quærendus ab oris:
 Non per Caucasias accito turbine valles
 Est opus. Ostrogothis colitur, mixtisque Gruthungis,
 Phryx ager: hos parvæ poterunt impellere causæ
 In scelus: ad mores facilis natura reverti. 155
 Sic eat! in nostro quando jam milite robur
 Torpuit, et molli didicit parere magistro,
 Vindicet Arctous violatas advena leges:
 Barbara Romano succurrant arma pudori."
 Sic fatus, clypeo, quantum vix ipse Deorum 160
 Arbiter, infesto cum percutit ægida nimbo,
 Intonuit: responsat Athos, Hæmusque remugit:
 Ingeminat raucum Rhodope concussa fragorem:
 Cornua cana gelu mirantibus extulit undis 164
 Hebrus, et exsanguem glacie timor alligat Istrum.
 Tunc adamante gravem nodiaque rigentibus hastam,
 Telum ingens, nullique Deo jaculabile, torsit.
 Fit late ruptis via nubibus: illa, per auras,
 Tot freta, tot montes, uno contenta volatu,
 Transilit, et Phrygiæ mediis affigitur arvis. 170
 Sensit humus: gemuit Nysæo palmite felix
 Hermus, et auratâ Pactolus inhorruit urnâ:
 Totaque submissis fleverunt Dindyma silvis.
 Nec Dea præmissæ stridorem segnius hastæ
 Consequitur; centumque vias meditata nocendi, 175
 Tandem Targibilum (Geticæ dux improbus alæ
 Hic erat) aggreditur. Viso tum forte redibat
 Eutropio, vacuus donis; feritasque dolore
 Creverat; et, teneris etiam quæ crimina suadet
 Ingeniis, Scythicum pectus flammabat egestas. 180

Huic sese vultu simulatæ conjugis offert, 181

Mentitoque ferox incedit barbara gressu,

Carbaseos induta sinus: post terga reductas

Uberibus propior mordebat fibula vestes:

Inque orbem tereti mitrâ redeunte capillum 185

Strinxerat, et virides flavescere jusserat angues.

Advolat, ac niveis reducem complectitur ulnis,

Infunditque animo furiale per oscula virus.

Principe quam largo veniat, quas inde reportet

Divitias, astu rabiem motura, requirit. 190

Ille iter ingratum, vanos deflere labores:

Quos super eunuchi fastus, quæ probra tulisset.

Continuo secat ungue genas, et tempore pandit

Arrepto gemitus: "I nunc! devotus aratri

Scinde solum! positoque tuos mucrone sodales 195

Ad rastros sudare doce: bene rura Gruthungus

Excolet, et certo disponet sidere vites.

Felices alizæ, quas debellata maritis

Oppida, quas magnis quæsitæ viribus ornant

Exuviz: quibus Argivæ pulchræque ministrant 200

Thessalides, famulas et quæ meruere Lacenas!

Me nimium timido, nimium junxere remisso

Fata viro, totum qui degener exuit Istrum;

Qui refugit patriæ ritus, quem detinet æqui

Gloriæ; concessoque cupit vixisse colonus, 205

Quam dominus rapto. Quid pulchra vocabula pigris

Prætentas vitlis? probitatis inertia nomen,

Justitiæ formido subit. Tolerabis iniquam

Pauperiem, cum tela geras? et flebis inultus,

Cum pateant tantæ nullis custodibus urbes? 210

Quippe metus pœnz? Pridem mos ille vigeat,

Ut meritos colerent, impacatisque rebelles

Urgerent odiis: at nunc, qui fœdera rumpit;

Ditatur; qui servat, eget. Vastator Achivæ

Gentis, et Epirum nuper populatus inultam, 215

Præsidet Illyrico: jam, quos obœdit, amicus

Ingreditur muros, illis responsa daturus,

Quorum conjugibus potitur, natosque peremit.

Sic hostes punire solent: hæc præmia solvunt 219
 Exscidiis. Cunctaris adhuc? numerumque tuorum
 Respicias, exiguamque manum? Tu rumpe quietem:
 Bella dabunt socios. Nec te tam prona monerem,
 Si contra paterere viros: nunc alter in armis
 Sexus, et eunuchis se defensoribus orbis 224
 Credidit: hos aquilæ Romanæque signa sequuntur.
 Incipe barbaricæ tandem te reddere vitæ.
 Te quoque jam timeant, admirenturque nocentem,
 Quem sprevere pium. Spoliis prædæque repletus,
 Cum libeat, Romanus eris." Sic fata, repente
 In diram se vertit avem, rostroque recurvo 230
 Turpis, et infernis tenebris obscurior alas,
 Auspicium veteri sedit ferale sepulcro.
 Ille, pavor postquam resoluta corde quievit,
 Et rigidæ sedere comæ, non distulit atrox
 Jussa Deæ. Sociis, quæ viderit, ordine pandit; 235
 Invitatque sequi. Conjurat barbara pubes,
 Nacta ducem, Latiusque palam descivit ab armis.
 Pars Phrygiæ, Scythicis quæcumque Trionibus alget
 Proxima, Bithynos; Solem quæ condit, Ionas;
 Quæ levat, attingit Galatas: utrimque propinqui 240
 Finibus obliquis Lydi Pisidæque feroces
 Continuant Australe latus: gens una fuêre
 Tot quondam populi, priscum cognomen et unum,
 Appellata Phryges: sed quid non longa valebit
 Permutare dies? dicti post Mæona regem 245
 Mæones. Ægæos insedit Græcia portus.
 Thyni Thraces arant, quæ nunc Bithynia fertur.
 Nuper ab Oceano Gallorum exercitus ingens
 Illis, ante vagus, tandem regionibus hæsit;
 Gæsaque deposuit, Graio jam mitis amictu, 250
 Pro Rheno poturus Halyn. Dat cuncta vetustas
 Principium Phrygibus: nec rex Ægyptius ultra
 Restitit, humani postquam puer uberis expers
 In Phrygiam primum laxavit murmura vocem.
 Hic cecidit Libycis jactata paludibus olim 255
 Tibia, fœdatam cum reddidit umbra Minervam.

- Hic et Apollineâ victus testudine pastor 257
 Suspensâ memores illustrat pelle Celsenas.
 Quattuor hinc magnis procedunt fontibus amnes
 Auriferi: nec miror aquas radiare metallo, 260
 Quæ toties lavêre Midan. Diversus ad Austrum
 Cursus et Arctoum fluviis mare. Dindyma fundant
 Sangarium, vitrei puro qui gurgite Galli
 Auctus Amazonii defertur ad ostia Ponti.
 Icarium pelagus Mycalseaque litora juncti 265
 Marsya Mæanderque petunt: sed Marsya velox,
 Dum suus est, flexuque carens: jam flumine mixtus
 Mollitur, Mæandre, tuo; contraria passus,
 Quam Rhodano stimulatus Arar: quos inter, aprica
 Planities Cererique favet, densisque ligatur 270
 Vitibus, et [glaucae] fructus attollit olivæ,
 Dives equis, felix pecori, pretiosaque picto
 Marmore, purpureis cedit cui Synnada venis.
 Talem tum Phrygiam Geticis populatibus uri
 Permisêre Dei. Securas barbarus urbes 275
 Irrupit, facilesque capi. Spes nulla salutis,
 Nulla fugæ: putribus jam propugnacula saxis
 Longo corruerant ævo, pacisque senectâ.
 Interea gelidæ secretis rupibus Idæ
 Dum sedet, et thiasos spectat de more, Cybelle, 280
 Curetumque alacres ad tympana suscitât enses;
 Aurea, sanctarum decus immortale comarum,
 Defluxit capiti turris; summoque volutus
 Vertice, crinalis violatur pulvere murus.
 Obstupuêre truces omen Corybantes; et uno 285
 Fixa metu tacitas presserunt orgia buxos.
 Indoluit genitrix; tum sic commota profatur:
 "Hoc mihi jampridem Lachesis grandæva canebat
 Augurium: Phrygiæ casus venisse supremos,
 Delapsus testatur apex. Heu! sanguine qualis 290
 Ibit Sangarius! quantasque cadavera lenti
 Mæandri passura moras! Immobiles hæret
 Terminus; hæc dudum nato placuêre Tonanti.
 Par et finitimis luctus: frustra que Lyzi . . .

Non defensuros implorat Lydia thyrsos. 295
 Jamque vale, Phrygiæ tellus; perituraque flammis
 Moenia, conspicuas quæ nunc attollitis arces;
 Mox campi, nudumque solum. Dilecta, valete,
 Flumina; non vestris ultra bacchabor in antris:
 Nec juga sulcabit noster Berecynthia currus." 300
 Dixit, et ad tristes convertit tympana planctus.
 Labentem patriam sacris ululatibus Attis
 Personat; et lacrymis torvi maduere leones.
 Eutropius, quamvis nequeat metuenda taceri
 Clades, et trepidus vulgaverit omnia rumor, 305
 Ignorare tamen fingit, regnique ruinas
 Dissimulat: parvam latronum errare catervam;
 In fontes tormenta magis, quam tela, parari;
 Nec duce frangendas jactat, sed judice, vires:
 Vasta velut Libyæ venantium vocibus ales 310
 Cum premitur, calidas cursu transmittit arenas,
 Inque modum veli sinuatis flamine pennis
 Pulverulenta volat: si jam vestigia retro
 Clara sonent, oblita fugæ stat lumine clauso,
 Ridendum revoluta caput; creditque latere, 315
 Quem non ipsa videt. Furtim tamen ardua mittit
 Cum donis promissa novis, si forte rogatus
 Desinat. Ille, semel notâ dulcedine prædæ,
 Se famulo servire negat; nec grata timentum
 Munera, militiam nullam, nec prima superbus 320
 Cingula dignari: nam quis non, consule tali,
 Vilis honos? Postquam precibus mitescere nullis,
 Non auro cessisse, videt; creberque recurrit
 Nuntius incassum, nec spes jam foederis exstat;
 Tandem consilium belli confessus agendi, 325
 Ad sua tecta vocat. Juvenes venere protervi,
 Lascivique senes, quibus est insignis edendi
 Gloria, corruptasque dapes variasse decorum:
 Qui ventrem invitant pretio, traduntque palato
 Sidereas Junonis aves, et, si qua loquendi 330
 Gnara coloratis viridis defertur ab Indis,
 Quæritos trans regna cibos: quorumque profundam

Inguviem non Ægeus, non alta Propontis,
 Non freta longinquis Mæotia piscibus explent.
 Vestis odoratæ studium; laus maxima risum
 Per vanos movissæ sales; minimeque viriles
 Munditiæ, comiti vultus, onerique vel ipsa
 Serica; si Chunus feriat, si Sarmata portas,
 Solliciti scenæ, Romam contemnere sueti,
 Mirarique suas, quas Bosporus alluit, ædes;
 Saltandi dociles, [aurigarum]que periti.
 Pars humili de plebe duces; pars, compede sura.
 Cruraque signati nigro liventia ferro,
 Jura regunt, facies quamvis inscripta repugnet,
 Seque suo prodat titulo. Sed prima potestas
 Eutropium præfert, Hosio subnixa secundo.
 Dulcior hic sane cunctis, prudensque movendi
 Juris, et admoto qui temperet omnia fumo;
 Fervidus, accensam sed qui bene decoquat iram.
 Considunt apices gemini ditionis Eoæ,
 Hic coquus, hic leno; defossi verberare terga;
 Servitio, non arte, pares: hic sæpius emtus,
 Alter ad Hispanos nutritus verna penates.

Ergo, ubi collecti procures, qui rebus in arctis
 Consulerent, tantisque darent solatia morbis;
 Obliti subito Phrygiæ, belloque relicto,
 Ad solitos cœpère jocos, et jurgia Circi,
 Tendere. Nequidquam magnâ configitur irâ,
 Quis melius vibrata puer vertigine molli
 Membra rotet; verrat quis marmora crine supino;
 Quis magis enodes laterum detorqueat artus;
 Quis vocis digitos, oculos quis motibus aptet.
 Hi tragicos meminere modos: his fabula Tereus,
 His, necdum commissa choro, cantatur Agave.

Increpat Eutropius, "Non hæc spectacula tempus
 Poscere: nunc alias armorum incumbere curas.
 Se satis Armenio fessum pro limite cingi;
 Nec tantis unum subsistere posse periclis.
 Ignoscant senio: juvenes ad prælia mittant."
 Qualis pauperibus nutrix invisa puellis

Assidet, et telâ communem querere victum 371

Rauca monet: festis illæ luisse diebus

Orant, et positis sequævas visere pensis:

Iratæque operi, jam lasso pollice fila

Turbant, et teneros detergunt stamine fletus. 375

Emicat extemplo, cunctis trepidantibus, audax

Crassâ mole Leo, quem vix Cyclopia solum

Æquatura fameæ, quem non jejuna Celæno

Vinceret: hinc nomen fertur meruisse Leonis.

Acer in absentes, linguæ jactator, abundans 380

Corporis, exiguiusque animi, doctissimus artis

Quondam lanificæ, moderator pectinis unci.

Non alius lanam purgatis sordibus æque

Præbuerit calathis; similis nec pinguis quisquam

Vellera per tenues ferri producere rimas. 385

Tunc Ajax erat Eutropii, lateque fremebat;

Non septem vasto quatiens umbone juvencos;

Sed, quam perpetuis dapibus, pigroque sedili,

Inter anus interque colos oneraverat, alvum.

Assurgit tandem, vocemque expromit anhelam: 390

“ Quis novus hic torpor, socii? quonam usque se-
demus

Femineis clausi thalamis, patimurque periculum

Glicere desidiâ? Graviorum turba malorum

Textitur, ignavis trahimus dum tempora votis.

Me petit hic sudor: nunquam mea dextera segnis

Ad ferrum. Faveat tantum Tritonia coeptis; 396

Inceptum peragetur opus: jam cuncta furore

Qui gravat, efficiam leviolem pondere lanæ

Targibilum tumidum; desertoresque Gruthungos,

Ut miseras, populabor, oves; et, pace relatâ, 400

Pristina restituum Phrygias ad stamina matres.”

His dictis iterum sedit: fit plausus, et ingens

Consilii clamor; qualis resonantibus olim

Exoritur cæveis, quoties crinitus ephebus

Aut rigidam Nioben, aut flentem Troada, fingit. 405

Protinus excitis iter irremeabile signis

Arripit; infaustoque jubet bubone moveri

Agmina, Mygdonias mox impletura volucres.
 Pulcher et urbanæ cupiens exercitus umbræ,
 Assiduus ludis, avidus splendere lavacris, 410
 Nec soles imbresve pati, multumque priori
 Dispar, sub clypeo Thracum qui ferre pruinas,
 Dum Stilichon regeret, nudoque hiemare sub axe
 Sueverat, et duris haurire bipennibus Hebrum.
 Cum duce mutatæ vires. Byzantia robur 415
 Fregit luxuries, Ancyranique triumphi.
 Non peditem præcedit eques: non commoda castris
 Eligitur regio: vicibus custodia nullis
 Advigilat vallo: non explorantur eundæ
 Vitandæque viæ: nullo se cornua flectunt 420
 Ordine: confusi passim per opaca vagantur
 Lastra, per ignotos angusto tramite valles.
 Sic vacui rectoris equi, sic orba magistro
 Fertur in abruptum casu, non sidere, puppis:
 Sic ruit in rupes, amisso pisce sodali, 425
 Bellua, sulcandas qui præviis edocet undas,
 Immensumque pecus parvæ moderamine caudæ
 Temperat; et tanto conjungit fœdera monstro:
 Illa natat rationis inops, et cæca profundi
 Jam brevibus deprensa vadis, ignara reverti, 430
 Palpitat, et vanos scopulis illidit hiatus.
 Targibilus simulare fugam, flatuque Leonis
 Spe nutrire leves; improvisusque repente,
 Dum gravibus marcent epulis, hostique catenas
 Inter vina crepant, largo sopita Lyæo 435
 Castra subit. Pereunt alii, dum membra cubili
 Tarda levant; alii leto junxere soporem:
 Ast alios vicina palus sine more ruentes
 Excipit, et cumulis immanibus aggerat undas.
 Ipse Leo, damâ ceruoque fugacior, ibat 440
 Sudanti tremebundus equo: qui pondere postquam
 Decidit, implicitus limo, cunctantia pronus
 Per vada reptabat, coeno subnixâ tenaci.
 Mergitur, et pingui suspirat corpore moles,
 More suis; dapibus quæ jam devota futuris 445

Turpe gemit, quoties Hosius mucrone corusco 445
 Armatur, cingitque sinus; secumque volutat,
 Quas figat verubus partes, quæ frusta calenti
 Mandet aquæ, quantoque cutem distendat echino.
 Flagrat opus; [crebro pulsatus perstreptit ictu: 450
 Contextit varius penetrans Chalcedona nidor.]
 Ecce levis frondes a tergo concutit aura;
 Credit tela Leo: valuit, pro vulnere, terror,
 Implevitque vicem jaculi; vitamque nocentem
 Integer, et solâ formidine saucius, efflat. 455

Quis tibi tractandos, pro pectine, degener, enses,
 Quis solio campum præponere suasit avito?
 Quam bene textentûm laudabas carmina tutus,
 Et matutinis pellebas frigora mensis!
 Hic, miserande, jaces: hic, dum tua vellera vitas, 460
 Tandem fila tibi neverunt ultima Parcæ.

Jam vaga pallentem densis terroribus aulam
 Fama quatit: stratas acies, deleta canebat
 Agmina, Mæonios fœdari cædibus agros,
 Pamphylos, Pisidasque rapi: metuendus ab omni 465
 Targibilus regione tonat: modo tendere cursum
 In Galatas, modo Bithynis incumbere, fertur.
 Sunt, qui per Cilicas rupto descendere Tauro,
 Sunt, qui, correptis ratibus, terræque marique
 Adventare ferant. Geminantur vera pavoris 470
 Ingenio: longe spectari e puppibus urbes
 Accensas, lucere fretum, ventoque citatas
 Omnibus in pelago velis hæerere favillas.

Hos inter strepitus, funestior advolat alter
 Nuntius, armatam rursus Babylona minari, 475
 Rege novo: resides Parthos, ignava perosos
 Otia, Romanæ finem jam quærere paci.
 Rarus apud Medos regum cruor; unaque cuncto
 Pœna manet generi: quamvis crudelibus æque
 Paretur dominis. Sed quid non audeat annus 480
 Eutropii? Socium nobis, fidumque Saporem
 Perculit, et Persas in regia vulnera movit;
 Rupturasque fidem, (leto pars ne qua vacaret)

Eumenidum tædas trans flumina Tigridis egit.
 Tum vero cecidère animi; tantisque procellis 485
 Deficiunt, septi latrantibus undique bellis.
 Infensos tandem Superos, et consulis omen
 Agnovère sui: nec jam revocabile damnum,
 Eventu rerum, [stolidi] didicère, magistro.

Namque ferunt geminos uno de semine fratres 490
 Iapetionidas generis primordia nostri*
 Dissimili finxisse manu: quoscumque Prometheus
 Excoluit, multoque intexuit æthera limo,
 Hi longe ventura notant; dubisque, parati,
 Casibus occurrunt, fabro meliore politi. 495
 Deteriore luto pravus quos condidit auctor,
 (Quem merito Graii perhibent Epimethea vates)
 Et nihil ætherii sparsit per membra vigoris,
 Hi, pecudum ritu, non impendentia vitant,
 Nec res ante vident: acceptâ clade, queruntur, 500
 Et seri transacta gemunt. Jam sola renidet
 In Stilichone salus: et, cujus semper acerbum,
 Ingratumque sibi, factorum conscius horror
 Credidit adventum; quem si procedere tantum
 Alpibus audissent, mortem pœnasque tremebant, 505
 Jam cuncti venisse volunt; scelerumque priorum
 Pœnitet. Hunc tantis bellorum sidus in undis
 Sperant: hunc pariter justi sonesque precantur.
 Ceu pueri, quibus alta pater trans sequora merces
 Devehit, intenti ludo, studiisque soluti, 510
 Lætius amoto passim custode vagantur:
 Si gravis auxilio vacuas invaserit ædes
 Vicinus, laribusque suis proturbet inultos,
 Tum demum patrem implorant, et nomen inani
 Voce cient, frustra que oculos ad litora tendunt. 515
 Omnes supplicio dignos letoque fatentur,
 Qui se tradiderint famulis, Stilichone relicto.
 Mutati stupuère diu; sensuque reducto,
 Paulatim proprii mirantur monstra furoris;
 Avertuntque oculos. Projectis fascibus, horret 520
 Lictor; et infames labuntur sponte secures.

Quales Aonio Thebas de monte reversæ 528
 Mænades, infectis Pentheo sanguine thyrsis,
 Cum patuit venatus atrox, matricque rotatum
 Conspexêre caput, gressus caligine figunt, 525
 Et rabiem desisse dolent. Quin protinus ipsa
 Tendit ad Italiam supplex Aurora potentem,
 Non radiis redimita comam, nec flammea vultum,
 Nec croceum vēstita diem : stat livida luctu, 529
 Qualis erat, Phrygio tegeret cum Memnona busto.
 Quam simul agnovit Stilichon, (nec causa latebat)
 Restitit : illa manum victricem amplexa moratur ;
 Altaque vix lacrymans inter suspiria fatur :
 " Tantane te nostri ceperunt tædia mundi ?
 Sic me ludibrium famulis risumque relinquis, 535
 Dux quondam rectorque meus ? solamque tueris
 Hesperiam ? domiti nec te post bella tyranni
 Cernere jam licuit ? sic te victoria nobis
 Eripuit, Gallisque dedit ? Rufinus origo
 Prima mali : geminas inter discordia partes 540
 Hoc auctore fuit : sed jam majora moventi
 Occurrit justâ rediens exercitus irâ,
 Fortis adhuc, ferrique memor. Brevis inde reluxit,
 Falsaque libertas : rursum Stilichonis habenis
 Sperabam me posse regi. Pro cæca futuri 545
 Gaudia ! fraterno conjungi cœperat orbis
 Imperio ; (quis enim, tanto terrore recentis
 Exempli, paribus sese committeret ausis ?)
 Cum subito, monstrosa mihi turpisque relatu
 Fabula, Rufini castratus prosilit hæres ; 550
 Et similes iterum luctus Fortuna reduxit,
 Ut solum domini sexum mutasse viderer.
 Hic primum thalami claustris delicta tegebat,
 Clam timideque jubens : erat invidiosa potestas,
 Sed tamen eunuchi : necdum sibi publica jura 555
 Sumere, nec totas audebat vertere leges.
 Sed postquam, pulsisque bonis, et fræce retentâ,
 Pejores legit socios ; dignusque satelles
 Hinc Hosius stetit, inde Leo, fiducia crevit ;

Regnandique palam flagravit aperta libido. 560
Patricius consul maculat, quos vendit, honores:
Plus maculat, quos ipse gerit. Jam signa tubæque
Mollescunt: ipsos ignavia fluxit in ense.
Insultant merito gentes; facilisque volenti
Præda sumus. Jam, Bistonis Hæmoque nivali 565
Vastior, expulsis Oriens squalabit aratris.
Hei mihi! quas urbes, et quanto tempore Martis
Ignaras, uno rapuerunt prælia cursu!
Nuper ab extremo veniens equitatus Araxe
Terruit Antiochi muros; ipsumque decoræ 570
Pæne caput Syriæ flammis hostilibus arsit.
Utque gravis spoliis, nulloque obstante, profundâ
Lætus cæde redit, sequitur mucrone secundo
Continuum vulnus: nec jam mihi Caucasus hostes,
Nec mittit gelidus Phasis: nascuntur in ipso 575
Bella sinu: legio pridem Romana, Gruthungi,
Jura quibus victis dedimus, quibus arva domosque
Præbuimus, Lydos Asiæque uberrima vastant
Ignibus, et si quid tempestas prima reliquit;
Nec duce nec numero freti: sed inertia nutrit 580
Proditioque ducum, quorum per crimina miles
Captivis dat terga suis, quos teste subegit
Danubio: partemque timet, qui reppulit omnes.
Aula choris epulisque vacat: nec perdita curant,
Dum superest aliquid. Ne quid tamen, orbe reciso,
Venditor amittat; provincia quæque superstes 586
Dividitur; geminumque duplex passura tribunal,
Cogitur alterius pretium sarcire peremtæ.
Sic mihi restituunt populos: hac arte repertâ,
Rectorum numerum terris pereuntibus augment. 590
In te jam spes una mihi. Pro fronde Minervæ,
Has tibi protendo lacrymas: succurre ruenti:
Eripe me tandem, servilibus eripe regnia.
Neve adeo cunctos paucorum crimine damnes;
Nec nova tot meritis offensâ prioribus obstat. 595
Jamjam flecte animum. Suprema pericula semper

Dant veniam culpæ. Quamvis iratus et exsul, 597
Pro patriæ flammis non distulit arma Camillus.
Non te subtrahimus Latio : defensor utrique
Sufficia. Armorum liceat splendore tuorum 600
In commune frui : clypeus nos protegat idem ;
Unaque pro gemino desudet cardine virtus."

• • • • •

CL. CLAUDIANI
IN PRIMUM CONSULATUM
FL. STILICHONIS
LIBER I

CONTINUANT Superi pleno Romana favore
Gaudia, successusque novis successibus urgent.
Connubii necdum festivos regia cantus
Sopierat; cecinit fuso Gildone triumphos;
Et calidis thalami successit laurea sertis; 5
Sumeret ut pariter princeps nomenque mariti,
Victorisque decus. Libyæ post proelia, crimen
Concidit Eoum: rursusque, Oriente subacto,
Consule defensæ surgunt Stilichone secures.
Ordine vota meant. Equidem si carmen in unum 10
Tantarum sperem cumulos advolvere rerum,
Promptius imponam glaciali Pelion Ossæ.
Si partem tacuisse velim, quodcumque relinquam,
Majus erit. Veteres actus, primamque juventam,
Prosequar? ad sese mentem præsentia ducunt. 15
Narrem justitiam? resplendet gloria Martia.
Armati referam vires? plus egit inermis;
Quod floret Latium, Latio quod reddita servit
Africa, vicinum quod nescit Iberia Maurum,
Tuta quod imbellem miratur Gallia Rhenum. 20
An gelidam Thracen decertatoique labores,

Hebro teste canam? magnum mihi panditur sequor;
 Ipsaque Pierios lassant proclivia currus
 Laudibus innumeris. Etenim, mortalibus ex quo
 Tellus cœpta coli, nunquam sincera bonorum 25
 Sors ulli concessa viro: quem vultus honestat,
 Dedecorant mores: animus quem pulchrior ornat,
 Corpus destituit: bellis insignior ille,
 Sed pacem fœdat vitiis: hic publica felix,
 Sed privata minus. Partitum singula quemque 30
 Nobilitant: hunc forma decens, hunc robur in armis,
 Hunc rigor, hunc pietas, illum sollertia juris,
 Hunc soboles castique tori. Sparguntur in omnes;
 In te mixta fluunt: et, quæ divisa beatos
 Efficiunt, collecta tenes. Quid facta revolvam 35
 Militiamque patris? cujus producere famam,
 Si nihil egisset clarum, nec fida Valenti
 Dexterâ duxisset rutilantes crinibus alas,
 Sufficeret natus Stilichon. Mens ardua semper
 A puero; tenerisque etiam fulgebat in annis 40
 Fortunæ majoris honos. Erectus et acer,
 Nil breve moliri, nullis hæerere potentum
 Liminibus; fatisque loqui jam digna futuris.
 Jam tum conspicuus, jam tum venerabilis, ibas;
 Spondebatque ducem celsi nitor igneus oris, 45
 Membrorumque modus; qualem nec carmina fingunt
 Semideis. Quâcumque alte gradereris in urbe,
 Cedentes spatiis assurgentesque videbas,
 Quamvis miles adhuc. Taciti suffragia vulgi
 Jam tibi detulerant, quidquid mox [debuit] aula. 50
 Vix primævus eras, pacis cum mitteris aucter
 Assyriæ: tantâ fœdus cum gente ferire
 Commissum juveni. Tigrin transgressus et altum
 Euphraten, Babylona petis. Stupuerê severi
 Parthorum procures; et plebs pharetrata videndi 55
 Flagravit studio; defixæque hospite pulchro,
 Persides arcanum suspiravêre calorem.
 Thuris odoratæ cumulis et messe Sabæâ
 Pacem conciliant aræ: penetralibus ignem.

Sacratum rapuère adyâs, ritumque juvencoſ
 Chaldæo ſtravère Magi. Rex ipſe micantem 60
 Inclinat dextrâ pateram : ſecretaque Beli,
 Et vaga teſtatur volventem ſidera Mithram.
 Si quando ſociis tecum venatibus ibant,
 Quis Stilichone prior ferro penetrare leones 65
 Comminus, aut longe virgatas figere tigres?
 Klectenti faciles Medus tibi ceſſit habenas.
 Torquebas refugum, Parthis mirantibus, arcum.
 Nubilis interea maturæ virginis ætas
 Urgebat patrias, ſuſpenſo principe, curas : 70
 Quem ſimul imperioque ducem, natæque maritum
 Proſpiceret, dubius toto quaerebat ab axe
 Dignum conjugio generum thalamisque Serenſe.
 Judicium virtutis erat. Per caſtra, per urbes,
 Per populos, animi cunctantis libra cucurrit. 75
 Tu legeris ; tantosque viros, quos obtulit orbis,
 Intra conſilium vincis ſenſumque legentis ;
 Et gener Auguſtis, olim ſocer ipſe futurus,
 Accedis. Radiis auri Tyriâque ſuperbit
 Majestate torus. Comitata parentibus exit 80
 Purpureis virgo : ſtabat pater inde tropæis
 Inſclutus ; inde pium matris regina regebat
 Obſequium, gravibus ſubnectens flammea gemmis.
 Tunc et Solis equos, tunc exultâſſe choreis
 Astra ferunt, mellisque lacus, et flumina lactis 85
 Erupisse ſolo, cum floribus æquora vernis
 Boſporus indueret, roſeisque evincta coronis
 Certantes Aſiæ tædas Europa levaret.
 Felix arbitrii princeps, qui congrua mundo
 Judicat, et primus cenſet, quod cernimus omnes. 90
 Talem quippe virum natis adjunxit et aulæ,
 Cui neque luxuries bello, nec blanda periclis
 Otia, nec lucis fructus pretioſior unquam
 Laude fuit. Quis enim [Viſos] in plauſtra feroces
 Reppulit, aut ſævâ Promoti cæde tumentes 95
 Baſtarnas unâ potuit delere ruinâ?
 Pallantis jugulum Turno moriente piavit

*Æneas; tractusque rotis ultricibus Hector
Irato vindicta fuit, vel quæstus, Achilli.*

Tu neque vesano raptas venalia curru 100

*Funera; nec, vanam corpus meditatus in unum
Sævitiæ, turmas equitum, peditumque catervas,*

Hostilesque globos, tumulto prosternis amici.

Inferiis gens tota datur. Nec Mulciber, auctor

Mendacis clypei, fabricataque, vatibus arma 105

Conatus juvère tuos: tot barbara solus

Millia, jampridem miseram vastantia Thræcen,

Finibus exiguæ vallis conclusa tenebas.

Non te terrisonus stridor venientis Alani,

Nec vaga Chunorum feritas, non falce Gelonus, 110

Non arcu populære Getæ, non Sarmata conto.

Exstinctique forent penitus, ni, more maligno,

Falleret Augustas occultus proditor aurea,

Obstrueretque moras, strictumque recondideret enses;

Solveret obsessos, præberet fœdera captia. 115

Assiduus castris aderat, rarissimus Urbi,

Si quando trepidâ princeps pietate vocaret:

Vixque salutatis Laribus, vix conjuge visâ,

Detergo necdum repetebat sanguine campum.

Nec stetit, Eucherii dum carperet oscula saltem 120

Per galeam: patris stimulos ignesque mariti

Vincit cura ducis. Quoties sub pellibus egit

Edonas hiemes, et tardi flabra Bootæ

Sub dio Rhipæa tulit! cumque ignæ propinquo

Frigora vix ferrent alii, tunc triste rigentem 125

Danubium calcabat eques, nivibusque profundum

Scandebat cristatus Athon; lateque corusco

Curvatas glaciæ silvas umbone ruebat.

Nunc prope Cimmerii tendebat litora Ponti:

Nunc dabat hibernum Rhodope nimboſa cubile. 130

Vos, Hæmi gelidæ valles, quas sæpe cruentis

Stragibus æquavit Stilichon, vos, Thræcia, testor,

Flumina, quæ largo mutâstis sanguine fluctus.

Dicite, Bisaltæ, vel qui Pangæa juvencis

Scinditis, offenso quantæ sub vomere putres 135

Dissiliant glebis galeas, vel qualia rustris 136
 Ossa peremtorum resonent immania regum.
 Singula complecti cuperem : sed densior instat
 Gestorum series, laudumque sequentibus undis
 Obruimur. Genitor, cæsi post bella tyranni, 140
 Jam tibi commissis conscenderat æthera terra.
 Ancipites rerum raituro culminæ lapsus
 Æquali cervice subis. Sic, Hercule quondam
 Sustentante polum, melius librata pependit
 Machina, nec dubiis titubavit Signifer astris ; 145
 Perpetuâque senex subductus mole parumper,
 Obstupuit, proprii spectator ponderis, Atlas.
 Nulli barbaris motus, nil turbida rupto
 Ordine tentavit novitas ; tantoque remoto
 Principe, mutatas orbis non sensit habenas. 150
 Nil inter geminas acies, ceu libera facis,
 Ausa manus certe : nec tantis dissona linguis
 Turba, nec armorum cultu diversior unquam
 Confluxit populus. Totam pater undique secum
 Moverat Auroram : mixtis hæc Colchus Iberia, 155
 Hæc mitrâ velatus Arabs, hæc crine decoro
 Armenius, hæc picta Saces, fucataque Medus,
 Hæc gemmata niger tentoria fixerat Indus ;
 Hæc Rhodani procera cohors, hæc miles [alumnus]
 Oceani. Ductor Stilichon tot gentibus unus, 160
 Quot vel progrediens vel conspicit occidens Sol.
 In quo tam vario vocum generumque tumultu
 Tanta quies, jurisque metus servator honesti,
 Te moderante, fuit, nullis ut vinea furtis,
 Vel seges exsectâ fraudârit messe colonum : 165
 Ut nihil aut sævum rabies, aut turpe libido
 Suaderent ; placidi servirent legibus enses.
 Scilicet in vulgus manant exempla regentum ;
 Utque ducum lituos, sic mores, castra sequuntur.
 Denique, victrices aquilas quocumque moveres, 170
 Arebant tantis epoti millibus annes.
 Illyricum peteres, campi montesque latebant :
 Vexillum navale dares, sub puppibus ibat.

Ionium: nullis succincta Ceramnia nimbis,
 Nec, juga Leucatae feriens spumantia fluctu, 175
 Deterrebat hiema. Tu si glaciale juberet
 Vestigare fratrum, securo milite ducti,
 Stagna reluctantes quaterent Saturnia remi:
 Si deserta Noti, fontem si quærere Nili,
 Æthiopum medios penetrassent vela vapores. 180
 Te memor Eurotas, te rustica Musa Lycei,
 Te pastorali modulantur Mœnala cantu,
 Partheniumque nemus, quo te pugnante, resurgens
 Ægra caput mediis erexit Græcia flammis.
 Plurima Parrhasius tunc inter corpora Ladon 185
 Hæsit; et Alphæus, Geticis angustus acervis,
 Tardior ad Siculos etiamnum pergit amores.
 Miramur rabidis hostem succumbere bellis,
 Cum solo terroræ ruant? num classica Francis
 Intulimus? jacuere tamen. Num Marte Suëvos 190
 Contudimus, quis jura damus? quis credere possit?
 Ante tubam nobis audax Germania servit.
 Cedant, Druse; tui, cedant, Trajane, labores.
 Vestra manus dubio quidquid discrimine gessit,
 Transcurrens egit Stilichon; totidemque diebus 195
 Edomuit Rhenum, quot vos potuistis in annis;
 Quem ferro, alloquiis, quem vos cum milite, solus:
 Impiger a primo descendens fluminis ortu
 Ad bifidos tractus, et juncta paludibus ora,
 Fulmineum præstrinxit iter: ducis impetus undas
 Vincebat celeres; et pax, a fonte profecta, 201
 Cum Rheni crescebat aquis. Ingentia quondam
 Nomina, crinigero flaventes vertice reges,
 Qui nec principibus, donis precibusve vocati,
 Paruerant, jussi properant; segnique verentur 205
 Offendisse morâ. Transvecti lintribus amnem,
 Occursant ubicumque velis. Nec fama fefellit
 Justitiæ: vidêre pium; vidêre fidelem:
 Quem veniens timuit, rediens Germanus amavit.
 Illi terribiles, quibus otia vendere semper 210
 Mos erat, et frædâ requiem mercede pacisci,

Natis obsidibus pacem, tam supplicis vultu 212
 Captivoque rogant, quam si, post terga revincti,
 Tarpeias pressis subeant cervicibus arces.
 Omne, quod Oceanum fontesque interjacet Istri, 215
 Unius incursu tremuit: sine cæde subactus,
 Servit, io! Boreas, exarmatique Triones.
 Tempore tam parvo tot prœlia sanguine nullo
 Perficia, et lunâ nuper nascente profectus,
 Ante redis, quam plena fuit: Rhenumque minacem,
 Cornibus infractis, adeo mitescere cogis, 221
 Ut Salius jam rura colat, flexosque Sicambros
 In falcem curvet gladios; geminasque viator
 Cum videat ripas, quæ sit Romana, requirat:
 Ut jam trans fluvium, non indignante Calico, 225
 Pascat Belga pecus, mediumque ingressa per Albin
 Gallica Francorum montes armenta pererrent:
 Ut procul Hercynisæ per vasta silentia silvæ
 Venari tuto liceat, lucosque vetustâ
 Relligione truces, et robora, numinis instar. 230
 Barbarici, nostræ feriant impune bipennes.
 Ultro quietiam devotâ mente tuentur,
 Victorique favent. Quoties sociare catervas
 Oravit, jungique tuis Alamannis signis!
 Nec doluit contempta tamen, sprotoque recessit 235
 Auxilio laudata fides. Prœvincia missos
 Expellet citius fasces, quam Francia reges,
 Quos dederis: acie nec jam pulsare rebelles,
 Sed vinclis punire, licet: sub iudice nostro
 Regia Romanus disquirat crimina carcer. 240
 Marcômeres Sonnoque docent, quorum alter Etrus-
 cum
 Pertulit exsilium: cum se promitteret alter
 Exsulis ulterem, jactit mucrone suorum:
 Res avidi concire novas, odioque furentes
 Pacis, et ingenio scelerumque cupidine fratres. 245
 Post domitas Arctos, alio prorumpit ab axe
 Tempestas; et, ne qua tuis intacta tropæis
 Pars foret, Australis sonuit tuba. Moveret amens

Maurorum Gildo populos, quibus imminet Atlas,
 Et quos interior nimio plaga sole relegat; 250
 Quos vagus humectat Cinyps, et proximus hortis
 Hesperidum Triton, et Gir notissimus amnis
 Æthiopum, simili mentitus gurgite Nilum.
 Venerat et parvis redimitus Nuba sagittis,
 Et velox Garamas: nec quamvis tristibus Hammon
 Responsis alacrem potuit Nasamona morari. 256
 Stipantur Numidæ campi: stant pulvere Syrtes
 Gætulæ: Pœnus jaculis obtexitur aër.
 Hi virgâ moderantur equos: his fulva leones
 Velamenta dabant, ignotarumque ferarum 260
 Exuviae, vastis Meroë quas nutrit arenis:
 Serpentum patulos gestant pro casside rictus:
 Splendent viperæ squamosâ pelle pharetræ.
 Non sic intremuit Simois, cum montibus Idæ
 Nigra coloratus produceret agmina Memnon; 265
 Non Ganges, cum, tela procul vibrantibus Indis,
 Immanis medium vectaret bellua Porum.
 Porus Alexandro, Memnon prostratus Achilli;
 Gildo nempe tibi. Nec solum fervidus Austrum,
 Sed partes etiam Mavors agitabat Eoas, 270
 Quamvis obstreperet pietas. His ille regendæ
 Transtulerat nomen Libyæ, scelerique profano
 Fallax legitimam regni præfenderat umbram.
 Surgebat variâ geminum formidine bellum:
 Hoc armis, hoc triste dolis: hoc Africa sævis 275
 Cinxerat auxiliis: hoc conjuratus alebat
 Insidiis Oriens: illinc edicta meabant,
 Corruptura duces: hinc frugibus atra negatis
 Urgebat, trepidamque fames obsederat Urbem.
 Exitiale palam Libycum; civile pudoris 280
 Obtentu tacitum. Tales utrimque procellæ
 Cum fremerent, lacerumque alternis ictibus anceps
 Imperium pulsaret hiems, nil seassa remisit
 Officii virtus; contraque minantia fata
 Pervigil, eventusque sibi latura secundos, 285
 Major in adversis micuit: velut arbiter alni,

Nubilus Ægæo quam turbine vexat Orion, 287
 Exiguo clavi flexu declinat aquarum
 Verbera, nunc rectâ, nunc obliquante carinâ,
 Callidus, et pelagi coelique obnititur irte. 290
 Quid primum mirer, Stilichon? quod cautus ad omnes
 Restiteris fraudes; ut te nec noxia furto
 Litera, nec pretio manus inflammata, laterent?
 Quod nihil, in tanto rerum terrore, locutus
 Indignum Latio? responsa quod ardua semper 295
 Eois dederis, quæ mox effecta probâsti
 Securus, quamvis et opes, et rura tenerent,
 Insignesque domos. Levis hæc jactura; nec unquam
 Publica privatæ cesserunt commoda causæ.
 Dividis ingentes curas; teque omnibus unum 300
 Objicis, inveniens animo, quæ mente gerenda,
 Efficiens patranda manu; dictare paratus,
 Quæ scriptis peragenda forent. Quæ brachia centum,
 Quis Briareus, aliis numero crescente lacertis,
 Tot simul objectis possent configere rebus? 305
 Evitare dolos? veteres firmare cohortes?
 Explorare novas? duplices disponere classes,
 Quæ fruges vel bella ferant? aulaeque tumultum,
 Et Romæ lenire famem? Quot, nube soporis
 Immunes, oculi per tot discurrere partes, 310
 Tot loca sufficerent, et tam longinqua tueri?
 Argum fama canit centeno lumine, centum
 Corporis excubiis unam servâsse juvencam.
 Unde tot allatæ segetes? quæ silva carinas
 Texuit? Unde rudis tanto tirone juvenus 315
 Emicuit; senioque iterum vernante, resumsit
 Gallia bis fractas Alpino vulnere vires?
 Non ego delectu, Tyrii sed vomere Cadmi,
 Tam subitas acies, conceptas dente draconis,
 Exsiluisse reor. Dirægis qualis in arvis 320
 Messis, cum proprio mox bellatura colono,
 Cognatos strinxit gladios, cum, semine jacto,
 Terrigenæ galeâ matrem nascente ferirent,
 Armiger et viridi floreret milite sulcus.

Hoc quoque non parvâ fas est cum laude relinqui, 325
 Quod non ante fretis exercitus adstitit ultor,
 Ordine quam prisco censeret bella senatus.
 Neglectum Stilichon per tot jam sæcula morem
 Rettulit, ut ducibus mandarent proelia Patres,
 Decretoque togæ felix legionibus iret 330
 Tessera. Romuleas leges rediisse fatemur;
 Cum procerum jussis famulantia cernimus arma.
 Tyrrhenum poteras junctis transmittere signis,
 Et ratibus Syrtis, Libyam complere manipulis:
 Consilio stetit ira minor; ne territus ille, 335
 Te duce, suspecto Martis graviore paratu,
 Aut in arenosos æstus zonamque rubentem
 Tenderet, aut solis fugiens transiret in ortus;
 Missurusve sibi certæ solatia mortis,
 Oppida dirueret flammis. Res mira relatu! 340
 Ne timeare, times; et, quem vindicta manebat,
 Desperare vetas. Quantum fiducia nobis
 Profuit hostilis! Salvæ Carthaginis arces:
 Illæsis Tyrii gaudent cultoribus agri,
 Quos potuit vastare fugâ: spe captus inani, 345
 Nec se surripuit pœnæ, nostrisque pepercit
 Demens: qui numero tantum, non robore, mensus
 Romanos, rapidis ibat ceu protinus omnes
 Calcaturus equis, et (quod jactare solebat)
 Solibus effetos mersurus pulvere Gallos. 350
 Sed didicit, non Æthiopum geminata venenis
 Vulnere, non fusum crebris hastilibus imbrem,
 Non equitum Latiis nimbos obsistere pilis.
 Sternitur ignavus Nasamon: nec spicula supplex
 Jam torquet Garamas: repetunt deserta fugaces 355
 Autololes: pavidus projecit missile Mazax.
 Cornipedem Maurus nequidquam hortatur anhelum.
 Prædonem lembo profugum, ventisque repulsum,
 Suscepit merito fatalis Tabracâ portu,
 Expertum, quod nulla tuis elementa paterent 360
 Hostibus, et lætæ passurum jurgia plebis,
 Fracturumque reos humili sub iudice vultus.

Nil tribuat Fortuna sibi, sic prospera semper
 Illa quidem: sed non uni certamina pugnae
 Credidimus, totis nec constitit alea castris, 365
 Nutatura semel. Si quid licuisset iniquis
 Casibus, instabant aliae post terga biremes:
 Venturus dux major erat. Victoria nulla
 Clarior, aut hominum votis optatior, unquam 369
 Contigit. An quisquam Tigranen, armaque Ponti,
 Vel Pyrrhum, Antiochique fugam, vel vincla Jugur-
 thae,

Conferat, aut Persen, debellatumque Philippum?
 Hi propagandi ruerant pro limite regni;
 Hic stabat Romana salus: ibi tempora tutas
 Traxerunt dilata moras; hic vincere tarde 375
 Vinci pæne fuit. Discrimine Roma supremo
 Inter supplicium populi deforme pependit;
 Et tanto Libyam fructu majore recepit,
 Quam peperit, quanto graviolem amissa dolorem,
 Quam necdum quæsitâ, movent. Quis Punica gesta,
 Quis vos, Scipiadae, quis te jam, Regule, nôsset? 381
 Quis lentum caneret Fabium? si, jure peremto,
 Insultaret atrox famulâ Carthagine Maurus.
 Hæc omnes veterum revocavit adorea lauros. 384
 Restituit Stilichon cunctos tibi, Roma, triumphos.

CL. CLAUDIANI,
IN
PRIMUM CONSULATUM
FL. STILICHONIS,
LIBER II.

HACTENUS armatæ laudes : nunc, qualibus orbem
Moribus, et quanto frenet metuendus amore,
Quo tandem flexus trabeas auctore rogantes
Induerit, fastisque suum concesserit annum,
Mitior incipiat fidibus jam Musa remissis. 5

Principio magni custos Clementia mundi,
Quæ Jovis incoluit zonam, quæ temperat æthram
Frigoris et flammæ mediam, quæ maxima natu
Cœlicolûm, (nam prima Chaos Clementia solvit,
Congeriem miserata rudem ; vultuque sereno, 10
Discussis tenebris, in lucem sæcula fudit)
Hæc Dea, pro templis et thure calentibus aris,
Te fruitur, posuitque suas hoc pectore sedes.
Hæc docet, ut pœnis hominum vel sanguine pasci
Turpe ferumque putes ; ut ferrum, Marte cruentum,
Siccum pace premas ; ut non infensus alendis 16
Materiem præstes odiis ; ut sontibus ultro
Ignovisse velis ; deponas ocyus iram,
Quam moveas ; precibus nunquam implacabilis obstes ;
Obvia prosternas, prostrataque more leonum 20
Despicias, alacres ardent qui frangere tauros,
Transiliunt prædas humiles. Hac ipse magistrâ

Das veniam victis: hæc extorante, calores
 Horrificos, et quæ nunquam nocitura timentur
 Jurgia, contentus solo terrore, coërces, 25
 Ætheril Patris exemplo; qui, cuncta sonoro
 Concutiens tonitru, Cyclopum spicula defert
 In scopulos et monstra maris; nostrique cruoris
 Parcus, in Cætæis exercet fulmina silvis.
 Huic Divæ germana Fides, eademque sorori 30
 Corde tuo delubra tenens, sese omnibus actis
 Inserit. Hæc nullo docuit livescere fuco;
 Nunquam falsa loqui, nunquam promissa morari;
 Invisos odisse palam; non virus in alto
 Condere, non lætam speciem præmittere fraudi; 35
 Sed certum mentique parem componere vultum.
 Occulto sævire vetat; prodesse remittit.
 Hæc et amicitias longo plus tempore firmat,
 Mansuroque adamante ligat: nec mobile mutat
 Ingenium; parvæ strepitu nec vincula noxæ 40
 Dissolvi patitur; nec fastidire priorem
 Allicitur, veniente novo: benefacta tenere,
 Respuere offensas facilis; pariterque minoris
 Officii magnique memor, superare laborat:
 Utque hostes armis, meritis sic vincit amicos. 45
 Hæc fovet absentes; hæc longe sola remotis
 Consulit; hæc nullis avidam rumoribus aurem
 Pandit, ut ignarum nunquam læsura clientem
 Insidiosa tuos alienent murmura sensus.
 Nec, vivis annexus, amor meminisse sepultos 50
 Desinit: in prolem transcurrit gratia patrum.
 Hac tu Theodosium, tenuit dum sceptrâ, colebas;
 Hac etiam post fata colis; nec pignora curas
 Plus tua, quam natos, dederat quos ille monendos
 Tutandosque tibi. Justos nimiumque fideles 55
 Fama putat, qui, cum possent commissa negare,
 Maluerint nullo violati reddere quæstu.
 At Stilichon non divitias, aurique relictum
 Pondus, sed geminos axes, tantumque reservat
 Depositum teneris, quantum Sol igneus ardebit. 60

Quid non intrepidus credas, cui regia tuto 61
 Creditur? Hoc clypeo munitus, Honorius altum
 Non genuit patrem; vitæque et lucis in ipso
 Limine, contemptus nusquam, dat jura subactis
 Gentibus, et secum sentit crevisse triumphos: 65
 Quem tu sic placidâ formas, sic mente severâ,
 Ut neque desidiæ tradas, dum pronus ad omne,
 Quod libet, obsequeris; nec contra nixus ovantem
 Confringas animum; secretus consona regno
 Seu juvenem doceas, moles quid publica poscat; 70
 Seu sanctum venerere senem, patriisque gubernes
 Imperium monitis; dominum submissus adores,
 Obsequiis moderere ducem, pietate parentem.
 Hinc fuit, ut primos in conjuge disceret ignes;
 Ordrique virum, non luxuriante juventâ, 75
 Sed cum lege tori, casto cum fœdere, vellet.
 Principe tu felix genero: felicior ille
 Te socero. Fratrem levior nec cura tuetur
 Arcadium: nec, si quid iners atque impia turba,
 Prætendens proprio nomen regale furori, 80
 Audeat, adscribis juveni: discordia quippe
 Cum fremeret, nunquam Stilichon sic canduit irâ,
 Sæpe lacessitus probris, gladiisque petitus,
 Ut bello furias ultum, quas pertulit, iret
 Illicito, causamque daret civilibus armis. 85
 Hujus fulta fide, mediis dissensibus aulæ,
 Intemeratorum stabat reverentia fratrum.
 Quin et Sidonias chlamydes, et cingula baccis
 Aspera, gemmatasque togas, viridesque smaragdo
 Loricæ, galeasque renidentes hyacinthis, 90
 Gestatosque patri capulis radiantibus enses,
 Et vario lapidum distinctas igne coronas,
 Dividis ex æquo; ne non Augusta supellex,
 Ornatusque pares, geminis hæredibus essent.
 Mittitur et miles, quamvis certamine partes 95
 Jam tumeant: hostem muniri robore mavis,
 Quam peccare fidem: permittis justa petenti,
 Idque negas solum, cujus mox ipse repulsâ

Gaudeat, et quidquid fuerat deforme mereri.
 Omnes præterea, puro quæ crimina pellunt 100
 Ore Deæ, junxêre choros; unoque receptæ
 Pectore, diversos tecum cinguntur in usus.
 Justitia utilibus rectum præponere suadet,
 Communesque sequi leges, injustaque nunquam
 Largiri sociis: durum Patientia corpus 105
 Instruit, ut nulli cupiat cessisse labori;
 Temperies, ut casta petas; Prudentia, ne quid
 Inconsultus agas; Constantia, futile ne quid
 Infirmumque geras. Procul importuna fugantur
 Numina, monstriferis quæ Tartarus edidit antris. 110
 Ac primam scelerum matrem, quæ, semper habendo
 Plus sitiens, patulis rimatur faucibus aurum,
 Trudis Avaritiam; cujus foedissima nutrix
 Ambitio, quæ vestibulis foribusque potentum
 Excubat, et pretiis commercia pascit honorum, 115
 Pulsa simul. Nec te gurges corruptior ævi
 Traxit ad exemplum; quod jam firmaverat annis
 Crimen, et in legem rapiendi verterat usus.
 Denique non dives sub te, pro rure paterno,
 Vel laribus, pendet: non insidiator oberrat, 120
 Facturus quemcumque reum: non obruta virtus
 Paupertate latet. Lectos ex omnibus oris
 Evehis; et meritum, non quæ cunabula, quæris;
 Et qualis, non unde satus. Sub teste benigno
 Vivitur: egregios invitant præmia mores. 125
 Hinc priscæ redeunt artes: felicibus inde
 Ingeniis aperitur iter; despectaque Musæ
 Colla levant; opibusque fluens, et pauper, eodem
 Nititur ad fructum studio; cum cernat uterque,
 Quod nec inops jaceat probitas, nec inertia surgat 130
 Divitiis. Nec te jucundâ fronte fefellit
 Luxuries, prædulce malum, quæ, dedita semper
 Corporis arbitriis, hebetat caligine sensus,
 Membraque Circæis effeminat acrius herbis;
 Blanda quidem vultus, sed quâ non tetrius ulla 135
 Ultrices fucata genas, et amicta dolosis

- Illecebris, torvos auro circumliniit hydros. 137
 Illa voluptatum multos innexuit hamis :
 Te nunquam, conata, capit : non prava libido
 Stupris advigilat : non tempora somnus agendi 140
 Frustratur : nullo citharæ convivium cantu,
 Non pueris lasciva sonant. Quis cernere curis
 Te vacuum potuit, quis totâ mente remissum,
 Aut indulgentem dapibus, ni causa juberet
 Lætitia? Non indecores æraria lassant 145
 Expensæ : parvo non improba litera libro
 Absentium condonat opes. A milite parvus
 Diligeris : neque enim neglectas pace cohortes
 Tunc ditas, cum bella fremunt : scis nulla placere
 Munera, quæ metuens illis, quos spreverit, offert 150
 Serus, et incassum servati prodigus auri.
 Antevenis tempus, non exspectantibus ultro
 Munificus ; mensæque adhibes, et nomine quemque
 Compellas, clari, sub te quod gesserit olim,
 Admonitum facti ; figendaque sensibus addis 155
 Verba, quibus magni geminatur gratia doni.
 Nec, si quid tribuas, jactatum sæpius idem
 Exprobrare soles ; nec, quos promoveris, alto
 Turgidus alloqueris fastu ; nec prospera flatus
 Attollunt nimios. Quin ipsa superbia longe 160
 Discessit, vitium rebus solenne secundis,
 Virtutumque ingrata comes. Contingere passim
 Affarique licet : non inter pocula sermo
 Captatur ; purâ sed libertate loquendi
 Seria quisque jocis nullâ formidine miscet. 165
 Quem videt Augusti socerum regnique parentem,
 Miratur conviva parem ; cum tanta potestas
 Civem lenis agat. Te doctus prisca loquentem,
 Te matura senex audit, te fortia miles ;
 Adspersis salibus, quibus haud Amphiona quisquam
 Præferat Aonios meditantem carmine muros ; 171
 Nec velit Orpheo migrantes pectine silvas.
 Hinc amor, hinc veris, et non fallacibus, omnes
 Pro te solliciti votis : hinc nomea ubique

Plausibus, auratis celebrant hinc ora figuris. 175

Quæ non incudes streperent? quæ flamma vacaret

Fabrilis? quantis fluere fornacibus æra,

Effigies ductura tuas? quis devius esset

Angulus, aut regio, quæ non pro numine vultus

Dilectos colerent, talem ni semper honorem 180

Respueres? decus hoc rapiat, quem falsa timentum

Munera decipiunt, qui se diffidit amari.

Hoc solus sprevisse potest, qui jure meretur.

Undique legati properant; generique sub ore

In tua centenas [optant] præconia voces. 185

Grates Gallus agit, quod, limite tutus inermi,

Et metuens hostile nihil, nova culmina totis

Ædificet ripis, et sævum gentibus amnem,

Thybridis in morem, domibus prævelet amœnis:

Hinc Pœni cumulant laudes, quod rura tyranno 190

Libera possideant: hinc obsidione solutus

Pannonius, potorque Savi, quod, clausa tot annis,

Oppida laxatis ausus jam pandere portis,

Rursum cote novat nigras rubigine falces,

Exesosque situ cogit splendere ligones; 195,

Agnoscitque casas, et collibus oscula notis

Figit, et impresso glebis non credit aratro.

Exsectis, inculta dabant quas sæcula, silvis,

Restituit terras, et opacum vitibus Istrum

Conserit, et patrium vectigal solvere gaudet, 200

Immunis qui clade fuit. Te sospite, fas est

Vexatum laceri corpus juvenescere regni.

Sub tot principibus quæcumque amissimus olim,

Tu reddis. Solo poterit Stilichone medente

Crescere, Romanum vulnus tectura, cicatrix: 205.

Inque suos fines tandem redeunte colono,

Illyricis iterum ditabitur aula tributis.

Nec tamen humano cedit cœleste favori

Judicium: cingunt Superi concordibus unum

Præsiidiis; hostesque tuos aut litore produnt, 210

Aut totum oppositi claudunt fugientibus æquor,

Aut in se vertunt furiis, aut militis ense

Bacchati lamiant Pentheo corpora ritu.
 Insidias retegunt, et in ipsa cubilia fraudum
 Ducunt, ceu tenerâ venantem nare Molossi. 215
 Ominibus ventura notant, aut alite monstrant,
 Aut monitos certâ dignantur imagine somnos.
 Pro quibus innumerae trabearum insignia terræ
 Certatim petiêre tibi. Poscentibus ipse
 Restiteras; et mens, aliorum prona favori, 220
 Judex dura sui, facibus succensa pudoris,
 Tarda verecundis excusat præmia causis.
 Ergo avidæ, tantosque novi spe consulis annos
 Elusæ, dominæ pergunt ad limina Romæ.
 Si minus annueres precibus, vel cogere certæ 225
 Cunctantem, votoque moras auferre paratæ,
 Conveniunt ad tecta Deæ, quæ candida lucent
 Monte Palatino. Glaucis tum prima Minervæ
 Nexa comam foliis, fulvâque intexta micantem
 Veste Tagum, tales profert Hispania voces: 230
 "Cuncta mihi semper Stilichon, quæcumque po-
 posci,
 Concessit; tantumque suos invidit honores.
 Augusti potuit socii contemnere fasces:
 Jam negat et genero. Si non, ut ductor, ab orbe
 Quem regit, accipiat saltem cognatus ab aulâ. 235
 Exiguumne putat, quod, sic amplexus Iberam
 Progeniem, nostros immoto jure nepotes
 Sustinet, ut patrium commendet purpura Bætin?
 Quod pulchro Mariæ fecundat germine regnum?
 Quod dominis speratur avus?" Tum flava repexo
 Gallia crine ferox, evinctaque torque decoro, 241
 Binaque gæsa tenens, animoso pectore fatur:
 "Qui mihi Germanos solus Francosque subegit,
 Cur nondum legitur fastis? cur pagina tantum
 Nescit adhuc nomen, quod jam numerare decebat?
 Usque adeone levis pacati gloria Rheni?" 246
 Inde Caledonio velata Britannia monstro,
 Ferro picta genas, cujus vestigia verrit
 Cœrulus, Oceanique æstum mentitur, amictus,

"Me quoque vicinis pereuntem gentibus," inquit, 250

"Munivit Stilichon, totam cum Scotus Iernen

Movit, et infesto spumavit remige Tethys.

Ilius effectum curis, ne tela timerem

Scotica, ne Pictum tremere, ne litore toto

Prospicerem dubiis venturum Saxona ventis." 255

Tum spicis et dente comas illustris eburno,

Et calido rubicunda die, sic Africa fatur :

"Sperabam nullas trabeis, Gildone peremto,

Nasci posse moras : etiam nunc ille repugnat,

Et tanto dubitat fasces præbere triumpho, 260

Qui mihi Maurorum penitus lacrymabile nomen

Ignorare dedit?" Post has, CEnotria, lentis

Vitibus intorquens hederas, et palmite largo

Vina fluens, "Si vos adeo Stilichone curules

Augeri flagratis," ait, "quas sola juvare 265

Fama potest ; quanto me dignius incitat ardor,

Ut præsentem fruar, conscendentemque tribunal

Prosequar, atque anni pandentem claustra salutem !"

Talibus alternant studiis ; Romamque, precantes,

Pro cunctis, hortantur, eat : nec segnius illa 270

Paruit officio ; sed, raptis protinus armis,

Ocyor excusso per nubila sidere tendit.

Transvehitur Tuscos ; Apenninusque volatu

Stringitur : Eridanus clypei jam fulgurat umbrâ.

Constitit ante ducem, tetricâ nec Pallade vultu 275

Deterior, nec Marta minor. Tremat orbe corusco

Jam domus, et summæ tergunt laquearia cristæ.

Tum prior attonitum gratis affata querelis :

"Servatas, Stilichon, per te, venerande, curules,

Ornatas necdum, fateor. Quid profuit anni 280

Servilem pepulisse notam ? defendis honorem,

Quem fugis ! et spernis, tantâ quem mole tueris !

Respuis oblatum, pro quo habente resistis !

Quænam causa moræ ? quo me cunctabere rursus

Ingenio ? Nullus Boreæ metus ; omnis et Austri 285

Ora silet : cecidit Maurus ; Germania cessit ;

Et Janum pax alta ligat. Te consule necdum

Digna feror? titulumne levem, parvique nitoris
 Credimus, Augusti quem se decorare fatentur?
 Sub juga quo gentes, captivis regibus, egi. 290
 Num, si prodigiis casus natura futuros
 Signat, polluimur maculâ? Quod reris, Eois
 Omen erat; quamquam nullis mihi cognita rebus
 Fabula: vix tanto risit de crimine rumor.
 Opprobriis stat nulla fides, nec litera venit 295
 Vulgatura nefas: in quo vel maxima virtus
 Est tua, quod, nostros qui consulis omnia Patres,
 De monstis taceas. Pellendi denique nulla
 Dedecoris sanctum violant oracula cœtum:
 Nec mea funestum versavit curia nomen. 300
 Pars sceleris dubitâsse fuit. Quæcumque profana
 Pagina de primo venisset limite Phœbi,
 Ante fretum deleta mihi, ne turpia castis
 Auribus Italiæ fatorum exempla nocerent.
 Publicus ille furor (quantum tua cura peregit!) 305
 Secretum meruit. Lætetur, quisquis [Eoos]
 Scribere desierit: fastos portenta Gabinos
 Ista latent: propriam labem tersisse laborent.
 Cur ego, quem nunquam didici sensive creatum,
 Gratuler exemptum? Delicti pœnitet illos: 310
 Nos nec credidimus. Fuerit tamen omnibus unum
 Crimen, et ad nostras manaverit usque secures;
 Plus ideo sumenda tibi fastigia juris,
 Ne pereat tam priscus honos, qui portus honorum
 Semper erat. Nullo sarciri consule damnum, 315
 Excepto Stilichone, potest. Bene præscia tempus
 Mens tua distulerat: titulo tunc crescere posses;
 Nunc per te titulus. Consul succurre gravatis
 Consulibus, quicumque fuit, quicumque futurus.
 Annum redde tuum, quem mox secuta sequatur 320
 Posteritas, nec jam doleat defensa vetustas.
 Sit trabeis ultor Stilichon, Brutusque repertor.
 Libertas populi, primo tunc consule Bruto,
 Reddita per fasces: hic fascibus expulit ipsis
 Servitium. Instituit sublimem Brutus honorem; 325

Asseruit Stilichon. Plus est servasse repertum, 326
 Quam quæsisse novum. Quid tardius ore rubenti
 Annuis, et solitus frontem circumlinit ignis?
 Tapdem vince tuum, qui vincis cuncta, pudorem.
 Hos etiam, quamvis corrumpi munere nullo 330
 Te certum est, mirare libens ac suscipe cinctus,
 Quos tibi divino mecum Tritonia duxit
 Pectine. Tincta simul repetito murice fila
 Contulimus pensis, et eodem nevimus auro,
 Aurea quo Lachesis sub te mihi sæcula texit. 335
 Hic ego promissam sobolem, sperataque mundo
 Pignora, prælusi: veram mox ipse probabis
 Me vatem; nostræque fidem venientia telæ
 Fata dabunt." Dixit, gremioque rigentia profert
 Dona, graves auro trabeas. Insigne Minervam 340
 Spirat opus: rutilis hic pingitur aula columnis,
 Et sacri Mariæ partus. Lucina labores
 Solatur: residet fulgente puerpera lecto.
 Sollicitæ juxta pallescunt gaudia matris.
 Susceptum puerum redimitæ tempora Nymphæ 345
 Auri fonte lavant. Teneros de stamine risus,
 Vagitusque audire putes. Jam creverat infans
 Ore ferens patrem: sed avus maturior ævi
 Martia recturo tradit præcepta nepoti.
 Parte aliâ spumis fucantem Serica frena 350
 Sanguineis, primæ signatus flore juventæ,
 Eucherius flectebat equum; jaculisque vel arcu
 Aurea purpureos tollentes cornua cervos,
 Aureus ipse, ferit. Venus hic, invecta columbis,
 Tertia regali jungit connubia nexu; 355
 Pennatique nurum circumstipantur Amores,
 Progenitam Augustis, Augustorumque sororem.
 Eucherius trepido jam flammea sublevat ore
 Virginis: arridet læto Thermantia fratri.
 Nam domus hæc utroque petit diademata sexu; 360
 Reginasque parit, reginarumque maritos.
 Talibus invitat donis, dextræque gerendum
 Diva simul porrexit ebur. Sollennibus urnam

Commovet auspiciis, avibusque incepta secundat.
 Tunc habiles armis humeros Dea vestibus ambit 365
 Romuleis : Latii sederunt pectore cultus :
 Loricæque locum decuit toga. Talis ab Istro,
 Vel Scythico victor rediens Gradivus ab axe,
 Deposito mitis clypeo, candentibus Urbem
 Ingreditur trabeatus equis : spatiosa Quirinus 370
 Frena regit, currumque patris Bellona, cruentam
 Ditibus exuviis tendens ad sidera quercum,
 Præcedit : lictorque Metus, cum fratre Pavore,
 Barbara ferratis innectunt colla catenis,
 Velati galeas lauro : propiusque jugales, 375
 Formido ingentem vibrat succincta securim.

Vidit ut optato se consule Roma potitam,
 " Nunc," ait, " Elysii lucos irrumpere campi,
 Nunc libet ; ut tanti Curiis miracula voti
 Fabriciisque feram, famæ qui vulnere nuper 380
 Calcatam flevêre togam. Jam prata choreis
 Pulsent, nec rigidos pudeat luisse Catones.
 Audiat hoc senior Brutus, Pœnisque tremendi
 Scipiadae, geminis tandem quod libera damnis,
 Unius auxilio fasces Libyamque recepi. 385
 Quod superest, unum precibus, fortissime consul,
 Adde meis ; Urbique tuum largire parumper,
 Quem rogat, adventum : quam tu, belloque fameque
 Depulsâ, terris iterum regnare dedisti.
 Splendida suscipiant alium te Rostra Camillum. 390
 Ultorem videant servatoremque Quirites,
 Et populus, quem ductor ames ; quibus Africa, per te,
 Nec prius auditas Rhodanus jam donat aristas ;
 Ut mihi vel Massyla Ceres, vel Gallica prosit
 Fertilitas, messesque vehant nunc humidus Auster,
 Nunc Aquilo ; cunctis ditescant horrea ventis. 396
 Quæ tunc Flaminiam stipabunt millia vulgi !
 Fallax o quoties pulvis deludet amorem
 Suspensum, veniens omni dum crederis horâ !
 Spectabunt cupidæ matres ; spargentur et omnes 400
 Flore viæ, superes cum Pythia limina consul

Arduus, antiqui species Romana senatûs. 402

Pompeiana dabunt quantos proscenia plausus !

Ad cœlum quoties vallis tibi Murcia ducet

Nomen, Aventino Pallanteoque recessu ! 405

Nunc te conspiciam castris, permitte, relictis,

Mox et cum genero trabeis visura secundis."

Hæc dum Roma refert, jam Fama loquacibus alis

Pervolat Oceanum ; linguis et mille citatos

Festinare jubet proceres : nullique senectus, 410

Non iter, hibernis obstant nec flatibus Alpes.

Vincit amor meriti pridem, clarique vetustis

Fascibus ad socii properant et vindicis annum.

Sic, ubi secunda reparavit morte juventam,

Et patrios idem cineres, collectaque portat 415

Unguibus ossa piis, Nilique ad litora tendens,

Unicus extremo Phoenix procedit ab Euro ;

Conveniunt aquilæ, cunctæque ex orbe volucres,

Ut Solis mirentur avem : procul ignea lucet

Ales, odorati redolent cui cinnama busti. 420

Nec minor in cœlo chorus est : exsultat uterque

Theodosius, Divique tui. Sol ipse, quadrigis

Vere coronatis, dignum tibi præparat annum.

Est ignota procul, nostræque impervia menti,

Vix adeunda Deis, annorum squalida mater, 425

Immensi spelunca ævi, quæ tempora vasto.

Suppeditat revocatque sinu. Complectitur antrum,

Omnia qui placido consumit numine, serpens :

Perpetuumque viret squamis, caudamque reducto

Ore vorat, tacito relegens exordia lapsu. 430

Vestibuli custos, vultu longæva decoro,

Ante fores Natura sedet ; cunctisque volantes

Dependent membris animæ. Mansura verendus

Scribit jura senex, numeros qui dividit astris,

Et cursus stabilesque moras, quibus omnia vivunt,

Ac pereunt fixis cum legibus. Ille recenset, 436

Incertum quid Martis iter, certumque Tonantis,

Proficiat mundo ; quid velox semita Lunæ,

Pigraque Saturni ; quantum Cytherea sereno

Curriculo, Phœbique comes Cyllenius, erret. 440
 Illius ut magno Sol limine constitit antri,
 Accurrit Natura potens, seniorque superbis
 Canitiem inclinat radiis : tunc sponte reclusos
 Laxavit postes adamas : penetrare profundum
 Panditur ; et sedes ævique arcana patescunt. 445
 Hic habitant, vario faciem distincta metallo,
 Sæcula certa locis ; illic glomerantur aëna ;
 Hic ferrata rigent ; illic argentea candent.
 Eximiâ regione domûs, contingere terris
 Difficiles, stabant rutili, grex aureus, anni ; 450
 Quorum præcipuum pretioso corpore Titan
 Signandum Stilichone legit : tunc imperat omnes
 Pone sequi ; dictisque simul compellat euntes :
 “ En, cui distulimus melioris sæcla metalli,
 Consul adest ! Ite optati mortalibus anni. 455
 Ducite virtutes : hominum florescite rursus
 Ingeniis, hilares Baccho, frugumque feraces.
 Non inter gēminos anguis glaciale Triones
 Sibilet ; immodico nec frigore sæviat Ursa.
 Non torvo fremat igne Leo ; nec brachia Cancri
 Urat atrox æstas ; madidæ nec prodigus urnæ 461
 Semina prærupto dissolvat Aquarius imbre.
 Phrixæus roseo producat fertile cornu
 Ver Aries ; pingues nec grandine tundat olivas
 Scorpions : auctumni maturet germina Virgo ; 465
 Lenior et gravidis allatret Sirius uvis.”
 Sic fatus, croceis rorantes ignibus hortos
 Ingreditur, vallemque suam, quam flammeus ambit ,
 Rivus, et irriguis largum jubar ingerit herbis,
 Quas Solis pascuntur equi. Fragrantibus inde 470
 Cæsariem sertis, et lutea lora jubasque
 Subligat alipedum : gelidas hinc Lucifer ornat,
 Hinc Aurora comas : juxtaque arridet habenis
 Aureus, et nomen prætendit consulis, annus :
 Inque novos iterum revoluta cardine cursus, 475
 Scribunt ætheriis Stilichonem sidera fastis.

CL. CLAUDIANI,
IN LIBRUM
DE SECUNDO CONSULATU
F. L. STILICHONIS,
PRÆFATIO.

MAJOR Scipiades, Italis qui solus ab oris
 In proprium vertit Punica bella caput,
 Non sine Pieriis exercuit artibus arma;
 Semper erat vatum maxima cura duci.
 Gaudet enim virtus testes sibi jungere Musas. 5
 Carmen amat, quisquis carmine digna gerit.
 Ergo, seu, patriis primævus Manibus ultor,
 Subderet Hispanum legibus Oceanum,
 Seu, Tyrias certâ fracturus cuspide vites,
 Inferret Libyco signa tremenda mari; 10
 Hærebat doctus lateri, castrisque solebat
 Omnibus in medias Ennius ire tubas.
 Illi, post lituos, pedites favère canenti;
 Laudavitque novâ cæde cruentus eques.
 Cumque triumpharet; geminâ Carthagine victâ, 15
 (Hanc vindex patris vicerat, hanc patriæ)
 Cum longi Libyam tandem post funera belli
 Ante suas mœstam cogeret ire rotas;
 Advexit reduces secum Victoria Musas;
 Et sertum vati Martia laurus erat. 20
 Noster Scipiades Stilichon, quo concidit alter
 Hannibal, antiquo sævior Hannibale,
 Te mihi, post quinos annorum, Roma, recursus,
 Reddidit, et votis jussit adesse suis.

DE SECUNDO CONSULATU
FL. STILICHONIS
LIBER.

QUEM populi plausu, procerum quem voce petebas,
Adspice, Roma, virum : jam tempora desine longæ
Dinumerare viæ, visoque assurgere semper
Pulvere : non dubiis ultra torquere votis.
Totus adest oculis, aderat qui mentibus olim, 5
Spe major, famâ melior. Venerare curulem,
Quæ tibi restituit fasces : complectere dextram,
Sub juga quæ Pœnos iterum Romana redegit.
Excipe magnanimum pectus, quo frena reguntur
Imperii, cujus libratur sensibus orbis. 10
Os sacrum, quod in ære colis, miraris in auro,
Cerne libens. Hic est pro te bellator ubique,
Defensor Libyæ, Rhēni pacator et Istri.
Ostentare suos prisco si more labores,
Et gentes cuperet vulgo monstrare subactas ; 15
Certâssent utroque pares a cardine laurus.
Hæc Alamannorum spoliis, Australibus illa
Ditior exuviis : illinc flavente Sicambri
Cæsarie, nigris hinc Mauri crinibus irent :
Ipse albis veheretur equis ; currumque secutus 20
Laurigerum, festo fremuisset carmine, miles.
Hi famulos traherent reges : hi facta metallo
Oppida, vel montes captivæque flumina, ferrent.
Hinc Libyci fractis lugerent cornibus amnes :
Inde catenato gemeret Germania Rhēno. 25

Sed non immodicus proprii jactator honoris 26
 Consul, Roma, tuus. Non illum præmia tantum,
 Quam labor ipse juvat. Strepitus fastidit inanes;
 Inque animis hominum pompâ meliore triumphat.
 Non alium certe Romanæ clarius arces 30
 Suscepere ducem, nec cum cedente rediret
 Fabricius Pyrrho, nec cum Capitolia curru
 Pellææ domitor Paulus conscenderet aulæ.
 Nec similis Latias patefecit gloria portas,
 Post Numidas Mario, post classica Martis Eoi 35
 Pompeio. Nulli pars æmula defuit unquam,
 Quæ gravis obstreperet laudes: stimulisque malignis
 Facta sequebatur, quamvis ingentia, Livor.
 Solus hic invidiæ fines virtute reliquit, 39
 Humanumque modum: quis enim livescere possit,
 Quod nunquam pereant stellæ? quod Jupiter altum
 Possideat cælum? quod noverit omnia Phœbus?
 Est aliquod meriti spatium, quod nulla furentis
 Invidiæ mensura capit. Ductoribus illis
 Præterea divisus erat favor: æquior ille 45
 Patribus, invisus plebi; popularibus illi
 Munito studiis languebat gratia Patrum.
 Ominis in hoc uno variis discordia cessit
 Ordinibus: lætatur eques, plauditque senator;
 Votaque patricio certant plebeia favori. 50
 O felix, servata vocat quem Roma parentem!
 O mundi communis amor, cui militat omnis
 Gallia, quem regum thalamis Hispania nectit!
 Cujus et adventum crebris petiere Quirites
 Vocibus, et genero meruit præstante senatus! 55
 Non sic virginibus flores, non frugibus imbres,
 Prospera non lassis optantur flamina nautis,
 Ut tuus adspectus populo. Quæ numine tanto
 Litora fatidicas attollunt Delia lauros,
 Venturi quoties affulget Apollinis arcus? 60
 Quæ sic aurifero Pactoli fonte tumescit
 Lydia, cum domitis apparuit Euius Indis?
 Nonne vides, et plebe vias, et tecta latere

Matribus? ut, Stilichon, cunctis inopina reluxit
 Te victore salus! Septem circumspice montes, 65
 Qui solis radios auri fulgore lacesunt,
 Indutosque arcus spoliis, æquataque templa
 Nubibus, et quidquid tanti struxêre triumphî.
 Quantum profueris, quantam servaveris urbem,
 Attonitis metire oculis: hæc fabula certe 70
 Cuncta forent, si Pœnus adhuc incumberet Austro.

Mos erat in veterum castris, ut tempora quercu
 Velaret, validis fuso qui viribus hoste
 Casurum potuit morti subducere civem.
 At tibi quæ poterit pro tantis civica reddi 75
 Moenibus? aut quantæ pensabunt facta coronæ?
 Nec solam populi vitam debere fatetur
 Armis Roma tuis; sed, quo jucundior esset
 Lucis honoratæ fructus, venerabile famæ
 Pondus, et amissas vires, et regna recepit. 80
 Jam non prætumidi supplex Orientis ademtam
 Legatis poscit Libyam, famulosve precatur,
 Dictu turpe, suos: sed, robore freta Gabino,
 Te duce, Romanâ tandem se vindicat ira.
 Ipsa jubet signis; bellaturoque togatus 85
 Imperat; et spectant aquilæ decreta senatûs.
 Ipsa tibi trabeas ultro dedit; ipsa curulem
 Obtulit ulti, fastosque ornare coëgit.
 Nil perdit decoris prisci, nec liberâ quærit
 Sæcula, cum donet fascès, cum prælia mandet; 90
 Seque etiam crevisse videt. Quis Gallica rura,
 Quis meminit Latio Senonum servisse ligonès?
 Aut quibus exemplis fecundâ Thybris ab Arcto
 Vexit Lingonico sudatas vomere messes?
 Illa seges non auxilium modo præbuit Urbi, 95
 Sed fuit indicio, quantum tibi, Roma, liceret.
 Admonuit dominæ gentes; instarque tropæi,
 Rettulit ignotum gelidis vectigal ab oris.
 Hoc quoque majestas augecît plena Quirini,
 Rectores Libyæ populo quod iudice pallent; 100
 Et post emeritas moderator quisque secures

Diserimen letale subit : quid Poenus arator . . . 102
Intulerit, madidus quantum transmiserit Auster.
Ardua qui late terris responsa dedêre,
Hinc trepidant humiles : tremuit quos Africa nuper,
Cernunt Rostra reos. Cani virtutibus ævi . . . 106
Materiem pandit Stilichon : populumque, vetusti
Culminis immemorem, dominandi rursus in usum
Excitat, ut magnos calcet metuendus honores,
Pendat justitiâ crimen, pietate remittat . . . 110
Errorem, purosque probet, damnetque nocentes,
Et patrias iterum clemens exerceat artes.
Fallitur, egregio quisquis sub principe credit
Servitium : nunquam libertas gratior exstat,
Quam sub rege pio. Quos præficit ipse regendis
Rebus, ad arbitrium plebis Patrumque reducit ; . . . 116
Conceditque libens, meritis seu præmia poscant,
Seu punire velint. Posito jam purpura fastu
De se iudicium non indignatur haberi.
Sic docuit regnare socer : sic cauta iuventæ . . . 120
Frena dedit : teneros his moribus [induit] annos,
Verior Augusti genitor, fiducia belli,
Pacis consiliū ; per quem, squalore remoto,
Pristina Romuleis in floruit arcibus ætas :
Per quem, fracta diu translataque pæne potestas,
Non, oblita sui, servilibus exsulat arvis ; . . . 126
In proprium sed ducta larem, victricia reddit
Fata solo, fruiturque iterum, quibus hæserat olim,
Auspiciis, capitique errantia membra reponit.
Proxime Dis consul, tantæ qui prospicis Urbi,
Quâ nihil in terris complectitur altius æther ; . . . 130
Cujus nec spatium visus, nec corda decorem,
Nec laudem vox ulla capit ; quæ luce metalli
Æmula vicinis fastigia conserit astris ;
Quæ septem scopulis zonas imitatur Olympi, . . . 135
Armorum legumque parens ; quæ fundit in omnes
Imperium, primique dedit cunabula juris.
Hæc est, exiguis quæ finibus orta tetendit
In geminos axes, parvæque a sede profectas

Dispersit cum Sole manus. Hæc, obvia fati, 140
 Innumeras uno gereret cum tempore pugnas,
 Hispanas caperet, Siculas obsideret urbes,
 Et Gallum terris prosterneret, æquore Pœnum,
 Nunquam succubuit damnis; et territa nullo 144
 Vulnere, post Cammas major Trebiamque fremebat:
 Et cum jam premerent flammæ, murumque feriret
 Hostis, in extremos aciem mittebat Iberos.
 Nec stetit Oceano: remisque ingressa profundum,
 Vincendos alio quæsit in orbe Britannos.
 Hæc est, in gremium victos quæ sola recepit, 150
 Humanumque genus communi nomine fovit,
 Matris, non dominæ, ritu; civesque vocavit,
 Quos domuit; nexuque pio longinqua revinxit.
 Hujus pacificis debemus moribus omnes,
 Quod veluti patris regionibus utitur hospes; 155
 Quod sedem mutare licet; quod cernere Thulen
 Lusus, et horrendos quondam penetrare recessus;
 Quod bibimus passim Rhodanum, potamus Orontem;
 Quod cuncti gens una sumus. Nec terminus unquam
 Romanæ ditionis erit: nam cætera regna 160
 Luxuries vitiiis, odiisque superbia, vertit.
 Sic male sublimes fregit Spartanus Athenas;
 Atque idem Thebis cecidit: sic Medus ademit
 Assyrio, Mædoque tulit moderamina Perses.
 Subjecit Persen Macedo, cessurus et ipse 165
 Romanis. Hæc auguriis firmata Sibyllæ,
 Hæc sacris animata Numæ: huic fulmina vibrat
 Jupiter; hanc totâ Tritonia Gorgone velat.
 Arcanas huc Vesta faces, huc orgia secum
 Transtulit, et Phrygios Genitrix turrata leones. 170
 Huc, depulsurus morbos, Epidaurius hospes
 Reptavit placido tractu; vectumque per undas
 Insula Pæonium textit Tiberina draconem.
 Hanc tu cum Superis, Stilichon præclare, tueris:
 Protegis hanc clypeo, matrem regumque ducumque,
 Præcipueque tuam. Dedit hæc exordia lucis 176
 Eucherio; puerumque ferens hic regia mater

Augusto monstravit avo: lætatus at ille
 Sustulit in Tyriâ reptantem veste nepotem.
 Romaque venturi gaudebat præscia fati, . 180
 Quod te jam tanto meruisset pignore civem.

Nec tamen ingratus, nec qui benefacta referre
 Nesciat, hunc credas populum, si volvere priscos
 Annales libeat. Quoties hic prælia sumsit
 Pro sociis! quoties dono concessit amicis 185
 Regibus Ausonio quæsitæ sanguine terras!

Publica sed nunquam tanto se gratia fudit
 Assensu: quis enim princeps [hoc omnibus egit]
 Obsequiis, dominum sese patremque vocari;
 Quod tibi continuis resonant convexa diebus? 190

Macte novis, consul, titulis! Mavortia plebes
 Te dominum, Bruto non indignante, fatetur.
 Et, quod adhuc nullo potuit terrore subacta
 Libertas Romana pati, Stilichonis amor
 Detulit. Exsultant avidi, quocumque decorus 195
 Conspiciare loco, nomenque ad sidera tollunt:

Nec vaga dilecto satiantur lumina vultu,
 Seu Circum, trabeis fulgentibus aureus, intres;
 Seu celebres ludos; solio seu fultus eburno
 Cingas jure forum; denso seu turbine vulgi 200
 Circumfusa tuæ conscendant Rostra secures.

Quæ vero procerum voces, quam certa fuêre
 Gaudia, cum, totis exsurgens ardua pennis,
 Ipsa duci sacras Victoria panderet alas!
 O palmâ viridi gaudens, et amicta tropæis, 205
 Custos imperii virgo, quæ sola mederis

Vulneribus, nullumque doces sentire laborem!

Seu tibi Dictææ placuerunt astra Coronæ;
 Seu magis æstivo sedes vicina Leoni;
 Seu sceptrum sublime Jovis, seu Pallados ambis
 Ægida; seu fessi mulces suspiria Martis; 211

Adsis perpetuum Latio, votisque senatûs
 Annue, Diva, tui. Stilichon tua sæpius ornet
 Limpida; teque simul rediens in castra reducat.

Hunc bellis comitare favens : hunc redde togatum
 Consiliis. Semper placidis te moribus egit ; 216
 Servavitque piam victis ; nec polluit unquam
 Laurum sævitiâ : cives nec fronte superbâ
 Despicit, aut trepidam vexat legionibus Urbem.
 Sed verus patriæ consul, cessantibus armis, 220
 Contentus lictore venit ; nec inutile quærit
 Ferri præsidium, solo munitus amore.
 Magnarum nec parvus opum geminare profundas
 Distulit impensas ; sed, post miracula castris
 Edita vel genero, Romæ majora reservat. 225
 Auratos Rhodiis imbres, nascente Minervâ,
 Indulsisse Jovem perhibent ; Bacchoque paternum
 Jam pulsante femur, mutatus palluit Hermus
 In pretium ; votique famem passurus avari,
 Ditabat rutilo, quidquid Mida tangeret, auro : 230
 Fabula, seu verum, canitur ; tua copia vincit
 Fontem Hermi, tactumque Midæ, pluviasque To-
 nantis.

Obscurat veteres, obscurabitque futuras,
 Par donis armisque manus. Si solveret ignis,
 Quas dedit immanes vili pro pondere massas, 235
 Argenti potuère lacus et flumina fundi.
 Nec tibi, quæ pariter silvis dominaris et astris,
 Exiguam Stilichon movit, Latonia, curam.
 Tu quoque nobilibus spectacula nostra laboras
 Illustrare feris ; summoque in vertice rupis 240
 Alpinae socias, arcu cessante, pudicas,
 Et pharetratarum comitum inviolabile cogis
 Concilium. Veniunt, humeros et brachia nudæ,
 Armataeque manus jaculis, et terga sagittis ;
 Incomtæ, pulchræque tamen : sudoribus ora 245
 Pulverulenta rubent : sexum nec cruda fatetur
 Virginitas : sine lege comæ : duo cingula vestem
 Crure tenuis pendere vetant. Præcedit amicas
 Flava Leontodame, sequitur nutrita Lyceo
 Nebrophone, telisque domat quæ Mænala, Théro.

Ignea Cretæâ properat Britomartis ab Idâ, 251
 Et cursu Zephyris nunquam cessura Lycaste.
 Jungunt se geminæ, metuenda feris Hecaërge,
 Et soror, optatum numen venantibus, Opis,
 Progenies Scythiæ: Divas nemorumque potentes
 Fecit Hyperboreis Delos prælata pruinis. 256

Hæ septem venêre duces: exercitus alter
 Nympharum incedunt, acies formosa Dianæ,
 Centum Tâÿgeti, centum de vertice Cynthi,
 Et totidem, casto genuit quas flumine Ladon. 260
 Has ubi collectas vidit, sic Delia cœpit:

"O sociæ, mecum thalami quæ jura perossæ
 Virgineo gelidos percurritis agmine montes,
 Cernitis, ut Latio Superi communibus ornent 264
 Hunc annum studiis? quantos Neptunus equorum
 Donet ab orbe greges? laudi quam nulla canendæ
 Fratris plectra vacent? Nostram quoque sentiat idem,
 Quam meritis debemus, opem. Non spicula poscit
 Iste labor; maneat clausis nunc sicca pharetris;
 Omnis et a solitis noster venatibus arcus 270

Temperet: in solam cruor hic servetur arenam.
 Retibus et clathris, dilatâ morte, tenendæ,
 Ducendæque feræ. Cupidas arcete sagittas:
 Consulis in plausum casuris parcite monstis.
 Acceleret divisa manus: mihi cursus anhelas 275
 Tenditur ad Syrtes: mecum Dictæa Lycaste,
 Et comes Opis eat: steriles juvat ire per æstus.
 Namque feras aliis tellus Maurusia donum
 Præbuit: huic soli debet, ceu victa, tributum.
 Dum nos horribiles Libyæ scrutamur alumnos, 280
 Europæ vos interea perquirite saltus,
 Et scopulos: positâ ludat formidine pastor;
 Securusque canat Stilichonem fistula silvis.
 Pacet muneribus montes, qui legibus urbes."

Dixit, et extemplo frondosâ fertur ab Alpe 285
 Trans pelagus. Cervi currum subiêre jugales,
 Quos, decus esse Deæ, præfimi sub limine cœli

Roscida fecundis concepit Lana cavernis.
 Par nitor intactis nivibus : frons discolor auro
 Germinat ; et, spatio summas æquantia fagos, 290
 Cornua ramoso surgunt procera metallo.
 Opis frena tenet : fert retia rara Lycaste,
 Auratasque plagas : immortalesque Molossi
 Latrantes mediis circum juga nubibus ibant.
 Quinque aliæ paribus (Phœbe sic jusserat) armis 295
 Diversâ regione ruunt ; ducuntque cohortem
 Quæque suam. Variæ formis et gente sequuntur,
 Ingenioque, canes : illæ gravioribus aptæ
 Morsibus ; hæ pedibus celeres ; hæ nare sagaces.
 Hirsutæque fremunt Cressæ, tenuesque Lacœnæ,
 Magnæque taurorum fracturæ colla Britannæ. 301
 Dalmatiæ lucos, abruptaque brachia Pindi,
 Sparsa comam Britomartis agit : tu Gallica cingis
 Lustra, Leontodame ; Germanorumque paludes
 Eruis, et si quis, defensus arundine Rheni, 306
 Vastus aper nimio dentes curvaverit sevo.
 Nubiferas Alpes, Apenninique recessus,
 Garganique nives, Hecaërge prompta fatigat.
 Speluncas canibus Thero rimatur Iberas ;
 Informesque cavis ursos detrudit ab antris, 310
 Quorum sæpe Tagus manantes sanguine rictus
 Non satiavit aquis, et quos jam frigore segnes
 Pyrenæa tegit latebrosis frondibus ilex.
 Cyrneis Siculisque jugis venata, virago
 Nebrophone, cervos aliasque in vincula cogit 315
 Non sævas pecudes, sed luxuriantis arenæ
 Delicias, pompam nemorum. Quodcumque tremendum
 Dentibus, aut insigne jubis, aut nobile cornu,
 Aut rigidum setis, capitur : decus omne timorque
 Silvarum. Non cauta latent ; non mole resistunt 320
 Fortia ; non volucris fugiunt pernicia cursu.
 Hæc laqueis innexa gemunt ; hæc clausa feruntur
 Ilignis domibus. Fabri nec tigna polire
 Sufficiunt : rudibus fagis texuntur et ornis

Frondentes cavem. Ratibus pars ibat onustis 325
 Per freta, per fluvios. Exsanguis dextera torpet
 Remigis, et propriam metuebat navita mereem.
 Per terram pars ducta rotis; longoque morantur
 Ordine plaustra vias, montani plena triumphi:
 Et fera sollicitis vehitur captiva juvenca, 330
 Explebat quibus ante famem: quotiesque reflexi
 Conspexêre boves, pavidi temone recedunt.
 Jamque pererratis Libyæ flagrantibus oris,
 Legerat eximios Phœbi germana leones,
 Hesperidas qui sæpe fugant, ventoque citatis 335
 Terrificant Atlanta jubeis, armentaue longe
 Vastant Æthiopum, quorumque impune fragosa
 Murmura pastorum nunquam venêre per aures.
 Non illos tædæ ardentes, non strata superne
 Lapsuro virgulta solo, non vocibus hædi 340
 Pendentis stimulata fames, non fossa fefellit.
 Ultro se voluêre capi; gaudentque videri
 Tantæ præda Deæ. Respirant pascua tandem:
 Agricolaë reserant jam tuta mapalia Mauri.
 Tum virides pardos, et cætera colligit Austri 345
 Prodigia, immanesque simul Latonia dentes,
 Qui secti ferro in tabulas, auroque micantes,
 Inscripti rutilum cælato consule nomen,
 Per procures et vulgus eant; stupor [amnibus] Indis,
 Plurimus ereptis elephas inglorius errat 350
 Dentibus. Insedit nigrâ cervice gementûm,
 Et fixum Dea quassat ebur; penitusque cruentis
 Stirpibus avulsis patulos exarmat hiatus.
 Ipsos quinetiam nobis miracula vellet
 Ducere: sed pigrâ cunctari mole veretur. 355
 Tyrrhenas fetus Libycos amplexa per undas
 Classica turba sonat; caudamque a puppe retorquens,
 In proram jacet usque leo: vix sublevat unum
 Tarda ratis. Fremitus stagnis auditur in imis;
 Cunctaque prosiliunt cete; terrenaue Nereus 360
 Confert monstra suis; et non æquare fatetur.

Æquora sic victor quoties per Rûbra Lyæus 362
Navigat, intorquet clavum Silenus, et acres
Insudant tonsis Satyri; taurinæque pulsu
Baccharum Bromios invitant tympana remos. 365
Transtra ligant hederæ: malum circumflua vestit
Pampinus: antennis illabitur ebria serpens;
Perque mero madidos currunt saliuntque rudentes
Lynceæ, et insolitæ mirantur carbasa tigres.

CL. CLAUDIANI
IN LIBRUM
DE BELLO GETICO
PRÆFATIO.

Post resides annos, longo velut excita somno,
Romanis fruitur nostra Thalia choris.
Optatos renovant eadem mihi culmina cœtus;
Personat et noto Pythia vate domus.
Consulis hîc fasces cecini, Libyamque receptam. 5
Hîc mihi prostratis bella canenda Getia.
Sed prior effigiem tribuit successus aënam,
Oraque patricius nostra dicavit honos.
Annuit hunc princeps titulum, poscente senatu.
Respice, iudicium quam grave, Musa, subis! 10
Ingenio minuit merces properata favorem;
Carminibus veniam præmia tanta negant.
Et magis intento studium censore laborat,
Quod legimur medio conspicimurque foro.
Materies tamen ipsa juvat, solitumque timoris 15
Dicturo magnâ sedula parte levat;
Nam mihi conciliat gratas impensius aures
Vel meritum belli, vel Stilichonis amor.

DE BELLO GETICO

LIBER.

INTACTI cum claustra freti, coëuntibus æquor
Armatum scopulis, audax irrumperet Argo,
Æetam Colchosque petens; propiore periclo
Omnibus attonitis, solus (post numina) Tiphys
Incolumem tenui damno servâsse carinam 5
Fertur, et ancipitem montis vitâsse ruinam,
Deceptoque vagæ concursu rupis in altum
Victricem duxisse ratem. Stupuère superbæ,
Arte viri domitæ, Symplegades; et nova passæ
Jura soli, cunctis faciles jam puppibus hærent, 10
Ut vinci didicêre semel. Quod si ardua Tiphyn
Navis ob innocuæ meritum sic gloria vexit;
Quæ tibi, pro tanti pulso discrimine regni,
Sufficiant laudes, Stilichon? Licet omnia vates
In majus celebrata ferant, ipsamque secandis 15
Argois trabibus jactent sudâsse Minervam;
Nec nemoris tantum junxiasse carentia sensu
Robora, sed, cæso Tmarii Jovis augure luco,
Arbore præ sagâ tabulas animâsse loquaces.
Plurima sed quamvis variis miracula monstria 20
Ingeminant teneras vincturo carmine mentes;
Harpyiasque truces, insopitisque refusum
Tractibus aurati custodem velleris anguem,
Et juga taurorum rapidis ambusta favillis,
Et virides galeis sulcos, fetasque novales 25
Martis, et in segetem crescentis semina belli;

Nil veris æquale dabunt. Prohibere rapaces 27
 Scilicet Harpyias, unâque excludere mensâ,
 Nobilior titulus, quam tot potuisse paratas
 In Latii prædara Geticas avertere fauces? 30
 Anne ego terrigenas potius mirabor in ipais
 Procubuisse satis, vitæ quibus attulit idem
 Principium finemque dies, quam cæsa Getarum
 Agmina, quos tantis aluit Bellona tropæis,
 Totaque sub galeis Mavortia canuit ætas? 35
 Per te namque unum mediis exuta tenebris
 Imperio sua forma redit; claustrisque solutæ
 Tristibus, exsanguis audent procedere leges.
 Jamque potestates priscus discriminat ordo
 Justitiæ, quas ante pares effecerat unâ 40
 Nube timor. Tua nos urgenti dextera leto
 Eripuit: tectisque suis redduntur et agris
 Damnati fato populi, virtute renati.
 Jam non, in pecorum morem formidine clausi,
 Prospicimus sævos campis ardentibus ignes; 45
 Alta nec incertis metimur flumina votis,
 Exscidio latura moram: non poscimus amnes
 Undosam servare fidem; nubesque fugaces,
 Aut conjuratum querimur splendere serenum.
 Ipsa quoque, [internis] furiis exercita plebis, 50
 Securas jam Roma levat tranquillior arces.
 Surge, precor, veneranda parens, et certa secundis
 Fide Deis; humilemque metum deponere senectæ,
 Urbs æquæva polo. Tum demum ferrea sumet
 Jus in te Lachesis, cum sic mutaverit axem 55
 Fœderibus Natura novis, ut, flumine verso,
 Irriget Ægyptum Tanais, Mæotida Nilus;
 Euris ab Occasu, Zephyrus se prodat ab Indis,
 Caucasique jugis calido nigrantibus Austro,
 Gætulas Aquilo glacie constringat arenas. 60
 Fatales hucusque manus, crebrisque notatæ
 Prodigis abiêre minæ: nec sidera pacem
 Semper habent: ipsumque Jovem, turbante Typhœo,
 Si fas est, tremuisse ferunt, cum brachia centum

Montibus armaret totidem, spiramque retorquens, 65
Lamberet attonitas erectis anguibus Arctos.

Quid mirum, si regna labor mortalia vexat?

Cum gemini fratres, genuit quos asper Alöeus,

Martem subdiderint vinculis, et in astra negatas

Tentârint munire vias, steteritque revulsis 70

Pæne tribus scopulis cœlesti machina bello.

Sed caret eventu nimius furor: improba nunquam

Spes lætata diu: nec pervenêre juventæ

Robur Aloïdæ: dum vellere Pelion Otus

Nititur, occubuit Phœbo; moriensque Ephialtes 75

In latus obliquam projecit languidus Ossam.

Adspice, Roma, tuum, jam vertice celsior, hostem:

Adspice, quam rarum referens inglorius agmen

Italiâ detrusus eat; quantumque priori

Dissimilis, qui, cuncta sibi cessura ruenti 80

Pollicitus, patrii numen juraverat Istri,

Non nisi calcatis loricam ponere Rostris.

O rerum fatique vices! qui fœda parabat

Romanas ad stupra nurus, sua pignora vidit

Conjugibus permixta trahi: qui mente profundâ 85

Hauserat Urbis opes, ultro victoribus ipse

Præda fuit: nostri quondam qui militis auro

Aggressus tehtare fidem, desertus ab omni

Gente suâ, manibusque redit truncatus et armis.

Hoc quoque, quod veniam leti valuêre mereri, 90

Si positis pendas odiis, ignoscere pulchrum

Jam misero, pœnæque genus vidisse precantem.

Quæ vindicta prior, quam cum formido superbos

Flectit, et assuetum spoliis affligit egestas?

Sed magis ex aliis fluxit clementia causis, 95

Consultur dum, Roma, tibi. Tua cura coëgit

Inclusis aperire fugam, ne pejor in arcto

Sæviret rabies, venturæ conscia mortis.

Nec tanti nomen stirpemque abolere Getarum,

Ut propius peterere, fuit. Procul arceat altus 100

Jupiter, ut delubra Numæ, sedemque Quirini,

Barbaries oculis saltem temerare profanis

Possit, et arcanum tanti deprendere regni.
 Quamquam, si veterum certamina rite recordor,
 Tunc etiam, pulchrâ cum libertate vigerent, 105
 Et proprio late florerent milite Patres,
 Semper ab his famæ petière insignia bellis,
 Quæ diversa procul tuto trans æquora vires
 Exercere dabant. Currus, regumque catenæ,
 Inter abundantis fati ludibria, ductæ. 110
 At vero Italiam quoties circumstetit atrox
 Tempestas, ipsumque caput læsura pependit;
 Non illis vani ratio ventosa favoris,
 Sed graviter spectata salus; ductorque placebat,
 Non qui præcipiti traheret simul omnia casu, 115
 Sed qui maturo vel læta vel aspera rerum
 Consilio momenta regens, nec tristibus impar,
 Nec pro successu nimius, spatiumque morandi,
 Vincendique modum, mutatis nôset habenis.
 Cautius ingentes morbos, et proxima cordi 120
 Ulcera, Pæoniæ tractat sollertia curæ;
 Paroendoque sæcat, ferro ne largius acto
 Irrevocandus eat sectis vitalibus error.
 Sublimi certe Curium canit ore vetustas,
 Æaciden Italo pepulit qui litore Pyrrhum. 125
 Nec magis insignis Pauli Mariique triumphus,
 Qui captos niveis reges egère quadrigis.
 Plus fuga laudatur Pyrrhi, quam vincla Jugurthæ.
 Et, quamvis geminâ fessum jam clade fugârit,
 Post Decii lituos, et nulli pervia culpæ 130
 Pectora Fabricii, donis invicta vel armis,
 Plena datur Curio pulsæ victoria Pyrrhi.
 Quanto majus opus solo Stilichone peractum
 Cernimus! hic validam gentem, quam dura nivosis
 Educat Ursa plagis, non Chaonas atque Molossos,
 Quos Epirus alit, nec Dodonæa subegit 136
 Agmina, fatidicam frustra jactantia quercum.
 Primus fulmineum lento luctamine Pœnum
 Compressit Fabius: campo post ausus aperto,
 Marcellus vinci docuit: sed tertia virtus 140

- Scipiadae Latile tandem deterruit oris. 141
 Unus in hoc Stilichon diversis artibus hoste
 Tres potuit superare duces; fregitque furentem
 Cunctando, vicitque manu, victumque relegat:
 Atque hæc tanta brevi! Miscentem incendia Pyrrhum
 Sustinuit toto mœrens CEnotria lustrò: 146
 Et prope ter senas Itali per graminis herbas
 Massylus Pœno sonipes vastante cucurrit;
 Hannibalemque senem vix ad sua reppulit arva,
 Vindex sera patrum, post bellum nata Juventus. 150
 Hic celer effecit, brumâ ne longior unâ
 Esset hiems rerum; primis sed mensibus æstas
 Temperiem coelo pariter belloque referret.
 Sed quid ego, Hannibalem contra Pyrrhumque, tot
 annis
 Certatum memorem? vilis cum Spartacus, omne 155
 Per latus Italiae ferro bacchatus et igni,
 Consulibusque palam toties congressus, inertes
 Exuerit castris dominos, et strage pudendâ
 Fuderit imbelles aquilas servilibus armis.
 Nos, terrorum experts et luxu mollior setas, 160
 Deficimus queruli, si bos abductus aratro,
 Si libata seges. Non hanc ergastula nobis
 Immisere manum, nec conjurantis arenæ
 Turba fuit. Qualem Stilichon dejecerit hostem,
 Thraces et Hæmonii poterunt, Mœsique, fateri. 165
 Frigida ter decies nudatum frondibus Hæmum
 Tendit hiems vestire gelu, totidemque solutis
 Ver nivibus viridem monti reparavit amictum,
 Ex quo jam patrios gens hæc oblita Triones,
 Atque Istrum transvecta semel, vestigia fixit 170
 Threicio funesta solo; seu fata vocabant,
 Seu gravis ira Deûm, seriem meditata ruinis.
 Ex illo, quocumque vagos impegit Erinnyis,
 Grandinis aut morbi ritu per devia rerum
 Præcipites, per clausa, ruunt: nec contigit ullis 175
 Annibus aut scopulis proprias defendere terras.
 Nil Rhodope, nil vastus Athos, nil profuit Hæmus

Odrysiis: facili contentum Strymona saltu,
 Et frustra rapidum damnant Haliacmona Bessi.
 Nubibus intactum Macedo miratur Olympum 180
 More pererratum campi: gemit irrita Tempe
 Thessalus, et domitis irrisam cautibus Ceten.
 Sperchiusque, et virginibus dilectus Enipeus,
 Barbaricas lavêre comas. Non objice Pindi
 Servati Dryopes; nec nubifer Actia textit 185
 Litora Leucates: ipsæ, quâ durius olim
 Restiterant Medis, primo conamine ruptæ
 Thermopylæ: vallata mari Scironia rupes,
 Et duo continuo connectens æquora muro
 Isthmos, et angusti patuerunt claustra Lechæi. 190
 Nec tibi Parrhasios licuit munire colonos
 Frondosis, Erymanthe, jugis; equitataque summi
 Culmina Tæygeti trepidæ vidistis Amyclæ.
 Tandem supplicium cunctis pro montibus Alpes
 Exegere Getis: tot tandem flumina victor 196
 Vindicat Eridanus. Docuit nunc exitus, alte
 Factorum secreta tegi. Quisquamne, reclusis
 Alpihus, ulterius Latii fore credidit umbram?
 Nonne, velut captâ, rumor miserabilis, Urbe,
 Trans freta, trans Gallos, Pyrenæumque cucurrit;
 Famaque, nigrantes succincta pavoribus alas, 201
 Secum cuncta trahens, a Gadibus usque Britannum
 Terruit Oceanum, et nostro procul axe remotam
 Insolito belli tremefecit murmure Thulen?
 Mandemusvane Noti flabris, quoscumque timores 205
 Pertulimus, festæ doleant ne tristibus aures?
 An potius meminisse juvat, semperque vicissim
 Gaudia præmissi cumulant inopina dolores?
 Utque sub occidua jactatis Plade nautis
 Commendat placidum maris inelementis portum; 210
 Sic mihi tunc major Stilichon, cum læta periclis
 Metior, atque illi redeunt in corda tumultus.
 Nonne videbantur, quamvis adamante rigentes,
 Turribus invalidis fragiles procumbere muri,
 Ferratæque Getis altro se pandere portæ; 215

Nec vallum densæque sudes arcere volantes. 216
 Cornipedum saltus? Jamjam conscendere puppes,
 Sardoosque habitare sinus, et inhospita Cynri
 Saxa parant, vitamque freto spumante tueri.
 Ipsa etiam diffusa brevi Trinacria ponto, 220
 Si rerum natura sinat, discedere longe
 Optet, et Iönium refugo laxare Peloro.
 Fultaque despiciens auro laquearia, dives
 Tutior Æoliis mallet vixisse cavernis.
 Jamque oneri creduntur opes; tandemque libido 225
 Hæsit avaritiæ, gravioribus obruta curis.
 Utque est ingenioque loquax, et plurima fingi
 Permittens, credique, timor; tum somnia vulgo
 Narrari; tum monstra Deum, monitusque sinistri:
 Quid meditentur aves; quid cum mortalibus æther
 Fulmineo velit igne loqui; quid carmine poscat 231
 Fatidico custos Romani carbasus ævi.
 Territat assiduus Lunæ labor, atraque Phœbe
 Noctibus ærisonas crebris ululata per urbes.
 Nec credunt vetito fraudatam Sole sororem 235
 Telluris subeunte globo; sed, castra secutas
 Barbara, Thessalidas patriis lunare venenis.
 Incestare jubar. Tunc anni signa prioris,
 Et si quod fortasse quies neglexerat omen,
 Addit cura novis: lapidosos grandinis ictus, 240
 Molitasque examen apes, passimque crematas
 Perbacchata domos nullis incendia causis,
 Et nunquam cœlo spectatum impune cometen,
 Qui, primum roseo Phœbi prolatus ab ortu,
 Quâ micat astrigerâ senior cum conjuge Cepheus,
 Inde Lycaoniâ paulatim expulsus ab Arcto, 246
 Crine vago Getici foedavit sidera plaustrî;
 Donec in exiguum moriens vanesceret ignem.
 Sed gravius mentes cæsorum ostenta luporum
 Horrificant: duo quippe lupi sub Principis ora, 250
 Dum campis exercet equos, violenter adorti
 Agmen, et excepti telis, immane relatu
 Prodigium, miramque notam duxere futuri.

Nam simul humano geminas de corpore palmas
 Utraque perfossis emisit bellua costis : 255
 Illo læva tremens, hoc dextera ventre, latebant,
 Intentis ambæ digitis, et sanguine vivo.
 Scrutari si vera velis, fera nuntia Martis
 Ore sub Augusti casurum prodidit hostem.
 Utque manus utero virides patuère relecto, 260
 Romula post ruptas virtus sic emicat Alpes.
 Sed, malus interpret rerum, metus omne trahebat
 Augurium pejore viâ ; truncataque membra,
 Nutricemque lupam, Romæ regnoque minari.
 Tunc reputant annos ; interceptoque volatu 265
 Vulturis, incidunt properatis sæcula metis.
 Solus erat Stilichon, qui desperantibus augur
 Sponderet meliora manu : dubiæque salutis
 Dux idem vatesque fuit. “ Durate parumper,”
 Inquit, “ et, excussis muliebribus ore querelis, 270
 Fatorum toleremus onus. Nil nautica prosunt
 Turbatæ lamenta rati ; nec segnibus undæ
 Planctibus, aut vanis mitescunt flamina votis.
 Nunc instare manu, toto nunc robore niti
 Communi pro luce decet : succurrere velis, 275
 Exhaustire fretum, varios aptare rudentes,
 Omnibus et docti jussis parere magistri.
 Non si, perfidiâ nacti penetrabile tempus,
 Irrupère Getæ, nostras dum Rhætia vires
 Occupat, atque alio desudant Marte cohortes, 280
 Idcirco spes omnis abiit. Mirabile posset
 Esse mihi, si fraude novâ, vel calle reperto,
 Barbarus ignotas invaderet inscius Alpes.
 Nunc vero geminis clades repetita tyrannis
 Famosum vulgavit iter : nec nota fefellit 285
 Semita præstructum bellis civilibus hostem.
 Per solitas venêre vias ; aditusque sequendos
 Barbarico Romana dedit discordia bello.
 Sed nec præteritis hæc res incognita sæclis.
 Sæpe lacessitam, sed non impune, fatemur 290
 Ausoniam ; hæc Senonum restinxit sanguine flammæ :

Hæc, et Teutonico quondam patefacta furori, 292
 Colla catenati vidit squalentia Cimbri.
 Vile decus, quod non erexit prævius horror.
 Ingentes geminant discrimina magna triumphos. 295
 Quid turpes jam mente fugas, quid Gallica rura
 Respicitis? Latioque libet post terga relicto
 Longinquum profugis Ararim præcingere castris?
 Scilicet, Arctois concessâ gentibus Urbe,
 Considet regnum Rhodano, capitique superstes 300
 Truncus erit? Vestros stimulant si pignora sepsus,
 Me quoque non impar naturæ cura remordet.
 Nec ferro sic corda rigent, ut nôsse recusem,
 Quam sanctum soceri nomen, quam dulce mariti,
 Quantus prolis amor. Sed nunquam, oblita decoris,
 Obscenam latebram pietas ignava requirit. 306
 Nec vobis fortis monitor, mihi cautior uni.
 Hic conjux, hic progenies, hic carior omni
 Luce gener: pars nulla mei subducta procellæ.
 Accipe tu nostræ, tellus Cœnotria, mentis 310
 Vincula, communes tecum subeuntia casus;
 Exiguamque moram muris impende tuendis;
 Dum redeo, lectum referens in classica robur."

His dictis pavidî firmavit inertia vulgi
 Pectora; migrantisque fugam compescuit aulæ. 315
 Ausaque tum primum tenebris emergere pulsâ
 Hesperia, ut secum junxisse pericula vidit
 Augustum, tantoque sui stetit obside fati.

Protinus, umbrosâ vestit quâ litus olivâ
 Larius, et dulci mentitur Nerea fluctu, 320
 Parvâ puppe lacum prætervolat: ocyus inde
 Scandit inaccessos brumali sidere montes,
 Nil hiemis cœlive memor. Sic ille, relinquens
 Jejunos antro catulos, immanior exit
 Hibernâ sub nocte leo, tacitusque per altas 325
 Incedit furiale nives: stant colla pruinis
 Aspera: flavescentes adstringit stiria setas:
 Nec meminit leti, nimbosque aut frigora curat,
 Dum natis alimenta paret. Sublimis in Arcton

Prominet Hercyniæ confinis Rhætia silvæ, 330
 Quæ se Danubii jactat Rhenique parentem,
 Utraque Romuleo prætendens flumina regno.
 Primo fonte breves, alto mox gurgite regnant,
 Et fluvios cogunt undâ coëunte minores
 In nomen transire suum. Te Cimbrica Tethys 335
 Divisum bifido consumit, Rhene, meatu.
 Thracia quinque vadis Istrum vorat Amphitrite.
 Ambo habiles remis, ambo glacialia secti
 Terga rotis: ambo Boreæ Martique sodales.
 Sed latus, Hesperiae quo Rhætia jungitur oræ, 340
 Præruptis ferit astra jugis, panditque [terendam]
 Vix æstate viam. Multi, ceu Gorgone visâ,
 Obriguère gelu: multos hausère profundæ
 Vastâ mole nives: cumque ipsis sæpe juvenis
 Naufraga candenti merguntur plaustra barathro. 345
 Interdum glacie subitam labente ruinam
 Mons dedit, et [tepidis fundamina subruit Austriis,]
 Pendenti malefida solo. Per talia tendit
 Frigoribus mediis Stilichon loca. Nulla Lyæi
 Pocula; rara Ceres. Raptos contentus in armis 350
 Delibâsse cibos, madidoque oneratus amictu,
 Argentem pulsabat equum. Nec mollia fesso
 Strata dedere torum: tenebris si cæca repressit
 Nox iter, aut spelæa subît metuenda ferarum,
 Aut pastorali jacuit sub culmine, fultus 355
 Cervicem clypeo. Stat pallidus hospite magno
 Pastor; et ignoto præclarum nomine vultum
 Rustica sordenti genitrix ostendit alumno.
 Illa sub horrendis prædura cubilia silvis,
 Illi sub nivibus somni, curæque, laborque 360
 Pervigil, hanc requiem terris, hæc otia rebus
 Insperata dabant. Illæ tibi, Roma, salutem
 Alpinae peperère casæ. Jam fœdera gentes
 Exuerant; Latique auditâ clade feroces,
 Vindelicos saltus et Norica rura tenebant. 365
 Ac, veluti famuli, mendax quos mortis herilis
 Nuntius in luxum falso rumore resolvit,

Dum marcent epulis, atque inter vina chorosque
 Persultat vacuis effrena licentia tectis;
 Si reducem dominum fors improvisa revexit, 370
 Hærent attoniti; libertatemque perosus,
 Conscia servilis præcordia concutit horror:
 Sic ducis adspectu cuncti stupuere rebelles;
 Inque uno princeps, Latiumque, et tota refulsit
 Roma viro. Frons læta parum, non tristior sequo,
 Non dejecta malis, mixtâ sed nobilis irâ; 376
 Qualis in Herculeo, quoties infanda jubebat
 Eurystheus, fuit ore dolor; vel qualis in atram
 Sollicitus nubem, mœsto Jove, cogitur æther.
 "Tantane vos," inquit, "Getici fiducia belli 380
 Erigit? hinc animo frustra tumuistis inani?
 Non ita Romanum fati violentia nomen
 Opprimit, ut vestros nequeat punire tumultus
 Parte sui: neu vos, longe sermone petito,
 Demorer, exemplum veteris cognoscite facti. 385
 Cum ferus Ausonias perfringeret Hannibal arces,
 Et Trebiam sævo geminassent funere Cannæ,
 Nequidquam Emathium pepulit spes vana Philippum,
 Ut, velut afflictos, ferro tentaret inert.
 Romanos commovit atrox injuria Patres, 390
 Urgerent majora licet; graviterque tulère,
 Urbibus inter se claris de culmine rerum
 Congressis, aliquid gentes audere minores.
 Nec pœnam differre placet; sed, bella gerenti
 Punica, Lævino regis quoque prælia mandant. 395
 Paruit imperiis consul: fususque Philippus
 (Vilia dum gravibus populis interserit arma)
 Prætereunte manu, didicit, non esse potentum
 Tentandas, mediis quamvis in luctibus, iras."
 Hoc monitu pariter nascentia bella repressit, 400
 Et bello quæsit opes, legitque precantes
 Auxilio, mensus numerum, qui congruus esset,
 Nec gravis Italiæ, formidandusve regenti.
 Nec minus accepto nostræ rumore cohortes
 (Sic ducis urget amor) properantibus undique signis

Conveniunt; visoque [animi Stilichone recepti,] 406
 Singultus varios lacrymosaque gaudia miscent.
 Sic armenta boum, quæ vastis turbida silvis
 Sparsit hiems, cantus ac sibila nota magistri
 Certatim repetunt, et avitæ pascua vallis; 410
 Inque vicem se voce regunt, gaudentque fideles
 Reddere mugitus; et, quâ sonus attingit aurem,
 Rara per obscuras apparent cornua frondes.
 Accurrit vicina manus, quam Rhætia nuper,
 Vindelicis auctam spoliis, defensa probavit. 415
 Venit et extremis legio prætenta Britannis,
 Quæ Scoto dat frena truci, ferroque notatas
 Perlegit exsanguis Picto moriente figuras.
 Agmina quinetiam flavis objecta Sicambris,
 Quæque domant Cattos immansuetosque Cheruscos,
 Huc omnes vertère minas; tutumque, remotis 421
 Excubiis, Rhenum solo terrore relinquunt.
 Ullane posteritas credat? Germania, quondam
 Illa ferox populis, quæ vix instantibus olim
 Principibus totâ poterat cum mole teneri, 425
 Tam sese placidam præstat Stilichonis habenis,
 Ut nec, præsiidiis nudato limite, tentet
 Expositum calcare solum, nec transeat amnem,
 Incustoditam metuens attingere ripam.
 Celsior o cunctis, unique æquande Camillo! 430
 Vestris namque armis Alarici fracta quievit
 Ac Brenni rabies. Confusis rebus uterque
 Divinam tribuistis opem: sed tardior ille
 Jam captæ vindex patriæ; tu sospitis ultor.
 O quantum mutata tuo Fortuna regressu! 435
 Ut sese pariter diffudit in omnia regni
 Membra vigor, vivusque redit color urbibus ægris!
 Creditur Herculeis lucem renovâsse lacertis
 Femina dilecti fatis impensa mariti:
 Et juvenem, spretæ laniatum fraude novercæ, 440
 Non sine Circæis Latonia reddidit herbis:
 Cretaque, si verax narratur fabula, vidit
 Minoum rupto puerum prodire sepulcro,

Quem senior vates, avium clangore repertum,
Gramine restituit : miræ nam munere sortis, 445
Dulcia mella necem, vitam dedit horridus anguis.

At tuus adventus non unum corpus ab umbris,
Sed tot communi populos sub morte jacentes,
Totaque Tartareis e faucibus oppida traxit.

Ipsa Roma die, nec adhuc ostenditur auctor, 450

Personuit venisse ducem ; lætisque Quirites

Vocibus auspicium certi plausere triumphi,

Muniti Stilichone suo. Quis gaudia vero

Principis, amplexus alacris quis disserat aulæ ?

Pulveris ambiguam nubem speculamur ab altis 455

Turribus, incerti, socios apportet an hostes

Ille globus. Mentem suspensa silentia librant :

Donec pulvereo sub turbine, sideris instar,

Emicuit Stilichonis apex, et cognita fulsit

Canities. Gavisa repens per mœnia clamor 460

Tollitur, " Ipse venit !" Portas secura per omnes

Turba salutatis effunditur obvia signis.

Non jam delectus miseri, nec, falce per agros

Deposita, jaculum vibrans ignobile messor ;

Nec tentat clypeum projectis sumere rastris, 465

Bellona ridente, Ceres, humilisque novorum

Seditio clamosa ducum : sed vera juvenus,

Verus ductor adest, et vivida Martis imago.

Prospera sed quantum nostræ spes addita menti,

Tantum exemta Getæ ; qui, vertice proximus astris,

Post Alpes jam cuncta sibi promisit apertas, 471

Nil superesse ratus : postquam tot flumina, pulsus,

Cluctaque fluminibus crebris tot mœnia cernit ;

Tot subitos pedites, equitum tot conspicit alas,

Seque velut clausum laqueis, sub pectore furtim 475

Æstuat ; et nimium prono fervore petitæ

Jam piget Italiæ ; sperataque Roma teneri

Visa procul : magni subeunt jam tædiæ cœpti.

Occultat tamen ore metum, primosque suorum

Consultare jubet, bellis annisque verendos. 480

Crinigeri sedere patres, pellita Getarum

Curia ; quos plagis decorat numerosa cicatrix : 482
Et tremulos regit hasta gradus ; et nititur altis,
Pro baculo, contis non exarmata senectus.
Hic aliquis gravior natus, cui plurima dictis 485
Consiliisque fides, defixus lumina terræ,
Concutiensque comam, capuloque acclinis eburno,
“ Si numero non fallor,” ait, “ tricesima currit
Bruma fere, rapidum postquam tranavimus Istrum,
Romanamque manum tantis eludimus annis. 490
Sed nunquam Mavors adeo constrinxit in arctum
Res, Alarice, tuas. Per tot certamina ducto
Crede seni, qui te tenero, vice patris, ab ævo
Gestatum parvâ solitus donare pharetrâ,
Atque aptare breves humeris puerilibus arcus. 495
Sæpe quidem frustra monui, servator ut icti
Fœderis Emathiâ tutus tellure maneres.
Sed, quoniam calidæ rapuit te flamma juventæ,
Nunc saltem, si cura tibi manet ulla tuorum,
His claustris evade, precor : dumque agmina longe,
Dum licet, Hesperis præceps elabere terris ; 501
Ne, nova prædari cupiens, et parta reponas ;
Pastorique lupus scelerum delicta priorum
Intra septa luas. Quid palmitis uber Etrusci,
Quid mihi nescio quam proprio cum Thybride Romam,
Semper in ore geris ? Referunt si vera parentes, 506
Hanc urbem insano nullus qui Marte petivit,
Lætatus violâsse redit. Nec Numina sedem
Destituunt : jactata procul dicuntur in hostem
Fulmina ; divinique volant pro mœnibus ignes ; 510
Seu cœlum, seu Roma, tonat. Si temnis Olympum,
A magno Stilichone cave, qui semper iniquos,
Fortunâ famulante, premit. Scis ipse, perosis
Arcadiæ quam densa jugis cumalaverit ossa ;
Sanguine quam largo Graios calefecerit amnes. 515
Exstinctusque fores, ni te, sub nomine legum,
Proditio regnique favor texisset Eoi.”
Talia grandævum flammata fronte loquentem
Obliquisque tuens oculis, non pertulit ultra ;

Sed rupit rabidas accensa superbia voces : 520
 " Si non, mentis inops, fraudataque sensibus, ætas
 Præberet veniam, nunquam hæc opprobria linguae
 Turpia Danubius, me sospite, ferret inultus.
 Anne, tot Augustos Hebro qui teste fugavi,
 Te patiar suadente fugam, cum cesserit omnis 525
 Obsequiis natura meis? Subsistere nostris
 Sub pedibus montes, arescere vidimus amnes.
 Non ita Di Getici faxint, Manesque parentum,
 Ut mea converso relegam vestigia cursu.
 Hanc ego vel victor regno, vel morte tenebo 530
 Victus, humum. Per tot populos urbesque cucurri :
 Fregi Alpes, galeisque Padum victricibus hausi :
 Quid restat, nisi Roma, mihi? Gens robore nostra
 Tunc quoque pollebat, nullis cum fideret armis.
 At nunc, Illyrici postquam mihi tradita jura, 535
 Meque suum fecere ducem ; tot tela, tot enses,
 Tot galeas multo Thracum sudore paravi ;
 Inque meos usus vectigal vertere ferri
 Oppida legitimo jussu Romana coëgi :
 Sic me fata fovent ! Ipsi, quos omnibus annis 540
 Vastabam, servire dati : nocitura gementes
 Arma dabant ; flammisque diu mollitus et arte,
 In sua damna chalybs, fabro lugente, rubebat.
 Hortantes his adde Deos : non somnia nobis, 544
 Nec volucres ; sed clara palam vox edita luco est :
 Rumpe omnes, Alarice, moras. Hoc impiger anno,
 Alpibus Italiæ ruptis, penetrabis ad Urbem :
 Huc iter usque datur. Quis jam, post talia, segnis
 Ambigat, aut cœlo dubitet parere vocanti ?"
 Sic ait : hortatusque suos belloque viæque 550
 Instruit. Attollunt vanos oracula fastus.
 O semper tacitâ sortes ambage malignæ ;
 Eventuque patens, et nescia vatibus ipsis,
 Veri sera fides ! Ligurum regione supremâ
 Pervenit ad fluvium, miri cognominis, Urbem. 555
 Atque illic domitus, vix tandem, interprete casu,
 Agnovit dubiis illusa vocabula fati.

Necnon et Stilichon pugnam poscentia movit
 Pleno castra gradu, dictisque instigat euntes :
 " Nunc, o nunc, socii ! temeratae sumite tandem
 Italiae poenas. Obsessi principis armis 561
 Excusate nefas ; deploratumque Timavo
 Vulnus, et Alpinum gladiis abolete pudorem.
 Hic est, quem toties campis fudistis Achivis :
 Quem discors odiiisque anceps civilibus orbis, 565
 Non sua vis tutata diu, dum foedera fallax
 Ludit, et alternæ perjuria venditat aulae.
 Credite, nunc omnes, quas dira Britannia gentes,
 Quas Ister, quas Rhenus alit, pendere paratas
 In speculis. Uno tot proelia vincite bello. 570
 Romanum reparate decus ; molemque labantis
 Imperii fulcite humeris. Hic omnia campus
 Vindicat : hæc mundo pacem victoria sancit.
 Non in Threïciis Hæmi decernimus oris :
 Nec super Alpheas umbrantia Mænala ripas 575
 Constitimus : non hîc Tegeen Argosque tuemur.
 Visceribus mediis, ipsoque in corde, videtis
 Bella geri. Patrem clypeis defendite Thybrin."
 Talia nunc pediti, turmæ nunc mixtus equestri,
 Dicta dabat : simul externis præcepta ferebat 580
 Auxiliis. Ibat patiens ditionis Alanus,
 Quâ nostræ jussêre tubæ : mortemque petendam
 Pro Latio docuit [gentis præclarus] Alanæ ;
 Cui natura breves animis ingentibus artus
 Finxerat, immanique oculos infecerat irâ. 585
 Vulneribus pars nulla vacat : rescissaque contis
 Gloria foedati splendet jactantior oris.
 Ille tamen, mandante procul Stilichone, citatis
 Acceleravit equis, Italamque momordit arenam
 Felix, Elysiisque plagis et carmine dignus, 590
 Qui male suspectam nobis impensius arsit
 Vel leto purgare fidem ; qui iudice ferro
 Diluit immeritum laudato sanguine crimen.
 Morte viri turbatus eques flectebat habenas :
 Totaque præciso nutâssent agmina cornu, 595

Ni celer instructâ Stilichon legione secutus, 596
Subsidiis peditum pugnam instaurâset equestrem.

Quis, Musis ipsoque licet Pæane recepto,
Enarrare queat, quantum Gradivus in illâ
Luce suæ dederit fundator originis urbi? 600

Altius haud unquam toto descendimus ense
In jugulum Scythiæ: tantâ nec clade superbum
Contudimus Tanaïm, vel cornua fregimus Istri.
Invisum miles sitiens haurire cruorem,
Per varias vestes, onerataque plaustra metallo, 605
Transit, et argenti cumulos; et, cædis avarus,
Contemptas proculcat opes: pretiosior auro
Sanguis erat: passim, neglecti prodiga lucri,
Ira furens strictis odium mucronibus explet.

Purpureos cultus, absumtique igne Valentis 610
Exuvias, miserisque graves crateras ab Argis,
Raptaque flagranti spirantia signa Corintho,
Callidus ante pedes venientibus objicit hostis
Incassum: neque enim feralis præda moratur;
Sed justos præbent stimulos monimenta doloris. 615

Asseritur ferro captivum vulgus; et omnes
Diversæ vocis populi, quos traxerat hostis
Servitio, tandem dominorum strage recepti,
Blanda cruentatis affigunt oscula dextris;
Desertosque lares et pignora læta revisunt. 620

Miratur sua quemque domus; cladesque renarrant
Ordine; tum grati referunt miracula belli.
Quis tibi nunc, Alarice, dolor, cum Marte perirent
Divitiæ, spoliisque diu quæsitâ supellex;
Pulsaretque tuas ululatus conjugis aures? 625

Conjugis, invicto quæ dudum freta marito
Demens Ausonidum gemmata monilia matrum,
Romanasque altâ famulas cervice petebat.
Scilicet Argolidas Ephyreïadasque puellas
Cœperat, et pulchras jam fastidire Lacænas. 630
Sed Dea, quæ nimis obstat Rhamnusia votis,
Ingemuit, flexitque rotam. Domat aspera victos
Pauperies; unoque die Romana rependit,

Quidquid ter denis, acies, amisimus annis.
O celebranda mihi cunctis Pollentia sæclis ! 635
O meritum nomen felicibus apta triumphis !
Virtutis fatale solum : memorabile bustum
Barbariæ ! nam sæpe locis ac finibus illis
Plena lacescito rediit vindicta Quirino.
Illic Oceani stagnis excita supremis 640
Cimbrica tempestas, aliasque immissa per Alpes,
isdem procubuit campis. Jam protinus ætas
Adveniens geminæ gentis permisceat ossa,
Et duplices signet titulos, commune tropæum :
Hic Cimbros, fortesque Getas, Stilichone peremptos
Et Mario, claris ducibus, tegit Itala tellus. 646
Discite, vesanæ, Romam non temnere, gentes.)

CL. CLAUDIANI
IN SEXTUM CONSULATUM
HONORII AUGUSTI
PRÆFATIO.

OMNIA quæ sensu volvuntur vota diurno,
Pectore sopito reddit amica quies.
Venator defessa toro cum membra reponit,
Mens tamen ad silvas et sua lustra redit.
Judicibus lites, aurigæ somnia currus; 5
Vanaque nocturnis meta cavetur equis.
Furto gaudet amans; permutat navita merces;
Et vigil elapsas quærit avarus opes.
Blandaque largitur frustra sitientibus ægris
Irriguus gelido pocula fonte sopor. 10
Me quoque Musarum studium sub nocte silenti
Artibus assuetis sollicitare solet.
Namque poli mediâ stellantis in arce videbar
Ante pedes summi carmina ferre Jovis.
Utque favet somnus, plaudebant Numina dictis, 15
Et circumfusi sacra corona chori.
Enceladus mihi carmen erat, vinctusque Typhœus:
Hic subit Inarimen; hunc gravis Ætna domat.
Quam lætum post bella Jovem suscepit æther,
Phlegrææ referens præmia militiæ. 20
Additur ecce fides: nec me mea lusit imago;
Irrita nec falsum somnia misit ebur.
En princeps, en orbis apex æquatus Olympo:
En, quales memini, turba verenda, Deos.
Fingere nil majus potuit sopor; altaque vati 25
Conventum cælo præbuit aula parem.

DE SEXTO CONSULATU

HONORII AUGUSTI

PANEGYRIS.

AUREA Fortunæ Reduci si templa priores
Ob redditum vovêre ducum, num dignius unquam
Hæc Dea, pro meritis, amplas sibi posceret ædes,
Quam, sua cum pariter trabeis reparetur et Urbi
Majestas? neque enim Campus sollennis et urna 5
Luditur in morem; species nec dissona cœtu,
Aut peregrina nitet simulati juris imago.
Indigenas habitus nativa Palatia sumunt;
Et, patriis plebem castris sociante Quirino,
Mars augusta sui renovat suffragia Campi. 10
Qualis erit terris, quem mons Euandrius offert
Romanis avibus, quem Thybris inaugurat annum?
Quamquam omnes, quicumque tui cognominis, anni
Semper inoffensum dederint successibus omen,
Sintque tropæa tuas semper comitata secures; 15
Hic tamen ante omnes miro promittitur ortu
Urbis et Augusti geminato nomine felix:
Namque, velut stellas Babylonia cura salubres
Optima tunc spondet mortalibus edere fata,
Cœlicolæ cum celsa tenent, summoque feruntur 20
Cardine, nec radios humili statione retundunt;
Haud aliter Latîæ sublimis signifer aulæ,
Imperii sidus propriâ cum sede locavit,
Auges spes Italas: et certius omina surgunt,
Victrici concepta solo. Cum pulcher Apollo 25

Lustrat Hyperboreas, Delphis cessantibus, aras, 26
 Nil tum Castaliæ rivis communibus undæ
 Dissimiles ; vili nec discrepat arbore laurus :
 Antraque mœsta silent, inconsultique recessus.
 At si Phœbus adest, et frenis grypha jugalem 30
 Rhipæo, tripodas repetens, detorsit ab axe,
 Tunc silvæ, tunc antra loqui, tunc vivere fontes :
 Tunc sacer horror aquis ; adytisque effunditur Echo
 Clarior ; et doctæ spirant præsagia rupes.

Ecce, Palatino crevit reverentia monti, 35
 Exsultatque habitante Deo ; potioraque Delphis
 Supplicibus late populis oracula pandit ;
 Atque suas ad signa jubet revirescere laurus.
 Non alium certe decuit rectoribus orbis
 Esse larem ; nulloque magis se colle potestas 40
 Æstimat, et summi sentit fastigia juris.
 Attollens apicem subjectis regia Rostris
 Tot circum delubra videt, tantisque Deorum
 Cingitur excubiis. Juvat infra tecta Tonantis
 Cernere Tarpeiâ pendentes rupe Gigantas, 45
 Cælatasque fores, mediisque volantia signa
 Nubibus, et densum stipantibus æthera templis ;
 Æraque vestitis numerosâ puppe columnis
 Consita, subnixasque jugis immanibus ædes,
 Naturam cumulante manu ; spoliisque micantes 50
 Innumeros arcus. Acies stupet igne metalli,
 Et circumfuso trepidans obtunditur auro.
 Agnoscisne tuos, princeps venerande, penates ?
 Hæc sunt, quæ primis olim miratus in annis,
 Patre pio monstrante, petis. Nil optimus ille 55
 Divorum toto meruit felicius ævo,
 Quam quod Romuleis victor sub mœnibus egit,
 Te consorte, diæ ; cum, se melioribus addens
 Exemplis, civem gereret, terrore remoto,
 Alternos cum plebe jocos, dilectaque passus 60
 Jurgia, patriciasque domos, privataque passim
 Visere deposito dignatus limina fastu.

Publicus hinc ardescit amor, cum moribus æquis
 Inclinat populo regale modestia culmen.
 Teque rudem vitæ, quamvis diademate necdum 65
 Cingebare comas, socium sumebat honorum,
 Purpureo fotum gremio; parvumque triumphis
 Induit, et magnis docuit præcludere fatis.
 Te linguis variæ gentes, missique rogatum
 Fœdera Persarum procures, cum patre sedentem 70
 Hac quondam vidêre domo, positoque tiaram
 Submisêre genu. Tecum prælargâ vocavit
 Ditandas ad dona tribus: fulgentia tecum
 Collecti trabeatus adit delubra senatûs,
 Romano puerum gaudens offerre favori, 75
 Ut novus imperio jam tunc assuesceret hæres.
 Hinc tibi concretâ radice tenacius hæsit,
 Et penitus totis inolevit Roma medullis;
 Dilectæque urbis tenero conceptus ab ungue
 Tecum crevit amor: nec te mutare reversum 80
 Evaluit propriâ nutritor Bosphorus arce.
 Et quoties optare tibi, quæ mœnia malles,
 Alludens genitor regni pro parte dedisset,
 Divitis Auroræ solium, sortemque paratam,
 Sponte remittebas fratri: "Regat ille volentes 85
 Assyrios; habeat Pharium cum Tigride Nilum:
 Contingat mea Roma mihi." Nec vota fefellit
 Eventus. Fortuna, novum molita tyrannum,
 Jam tibi quærebat Latium; belloque secundo
 Protinus Eoâ velox accitus ab aulâ 90
 Suscipis Hesperiam patrio bis Marte receptam.
 Ipsa per Illyricas urbes, Oriente relicto,
 Ire Serena comes, nullo deterrita casu,
 Maternâ te mente fovens, Latioque futurum
 Rectorem, generumque sibi. Seniore supernas 95
 Jam repetente plagas, illo sub cardine rerum,
 Sedula servatum per tot discrimina pignus
 Restituit sceptris patrui, castrisque mariti.
 Certavit pietate domus, fidæque reductum

- Conjugis officio Stillechonis cura recepit. 100
 Felix ille parens, qui te securus Olympum
 Succedente petît ? quam lætus ab æthere cernit
 Se factis crevisse tuis ! duo namque fuêre
 Europæ Libyæque hostes : Maurusius Atlas
 Gildonis furias, Alaricum barbara Peuce 105
 Nutrierat : qui sæpe tuum sprevere profanâ
 Mente patrem. Thracum venientem finibus alter
 Hebri clausit aquis ; alter præcepta vocantis
 Respuit : auxiliisque ad proxima bella negatis,
 Abjurata palam Libyæ possederat arva. 110
 Quorum nunc, meritam repetens non immemor iram,
 Suppliciiis fruitur, natoque ultore triumphat.
 Ense Thyestiadæ pœnas exegit Orestes ;
 Sed mixtum pietate nefas ; dubitandaque cædis
 Gloria materno laudem cum crimine pensat. 115
 Pavit Iuleos invisio sanguine Manes
 Augustus : sed falsa pii præconia sumsit,
 In luctum patriæ civili strage parentans.
 At tibi causa patris, rerum conjuncta saluti,
 Bellorum duplicat laurus, isdemque tropæis 120
 Reddita libertas orbi, vindicta parenti.
 Sed mihi jampridem captum Parnassia Maurum
 Pieriis egit fidibus chelys : arma Getarum
 Nuper apud socerum plectro celebrata recenti.
 Adventûs nunc sacra tui libet edere Musis, 125
 Grataque patris exordia sumere bellis.
 Jam Pollentini tenuatus funere campi,
 Concessâque sibi (rerum sic admonet usus)
 Luce, tot amissis sociis, atque omnibus unâ
 Direptis opibus, Latio discedere jussus 130
 Hostis, et immensi revolutus culmine fati,
 Turpe retexit iter. Qualis piratica puppis,
 Quæ, cunctis infensa fretis, scelerumque referta
 Divitiis, multasque diu populata carinas,
 Incidit in magnam bellatricemque triremem, 135
 Dum prædam de more parat ; viduataque cæsis

Remigibus, sciasis velorum debilis alis, 137
 Orba gubernaculis, antennis saucia fractis,
 Ludibrium pelagi vento jactatur et undâ,
 Vastato tandem poenas luitura profundo : 140
 Talis ab Urbe minas retro flectebat inanes,
 Italiam fugiens; et, quæ venientibus ante
 Prona fuit, jam difficilis, jam dura reversis.
 Clausa putat sibi cuncta pavor; retroque relictos,
 Quos modo temnebat, rediens exhorruit amnes. 145
 Undosâ tum forte domo vitreisque sub antris,
 Rerum ignarus adhuc, ingentes pectore curas
 Volvebat pater Eridanus, quis bella maneret
 Exitus: imperiumne Jovi, legesque placerent,
 Et vitæ Romana quies; an, jura perosus, 150
 Ad priscos pecudum damnaret sæcula ritus.
 Talia dum secum movet anxius, advolat una
 Naiadum, resoluta comam; complexaque patrem,
 "En Alaricus," ait, "non qualem nuper ovantem
 Vidimus: exsanguis, genitor, mirabere vultus. 155
 Percensere manum, tantâque ex gente juvabit
 Reliquias numerâsse breves. Jam desine mœstâ
 Fronte queri, nymphasque choris jam redde sorores."
 Dixerat. Ille caput placidis sublime fluentis
 Extulit, et totis lucem spargentia ripis 160
 Aurea roranti micuerunt cornua vultu.
 Non illi madidum vulgaris arundine crinem
 Velat honos: rami caput umbravêre virentes
 Heliadum; totisque fluunt electra capillis.
 Palla tegit latos humeros; curruque paterno 165
 Intextus Phaëthon glaucos incendit amictus.
 Fultaque sub gremio, cælatis nobilis astris,
 Ætherium probat urna decus: namque omnia luctûs
 Argumenta sui Titan signavit Olympo,
 Mutatumque senem plumis, et fronde sorores, 170
 Et fluvium, nati qui vulnera lavit anhel.
 Stat gelidis auriga plagis: vestigia fratris
 Germanæ servant Hyades; Cynique sodalis
 Lacteus extentas adspersit circulus alas.

- Stelliger Eridanus, sinuatis flexibus errans, 175
 Clara Noti convexa rigat, gladioque tremendum
 Gurgite sidereo subterluit Oriona.
 Hoc Deus effulgens habitu prospectat euntes
 Dejectâ cervice Getas : tunc talia fatur :
 “ Siccine mutatis properas, Alarice, reverti 180
 Consiliis ? Italæ sic te jam pœnitet oræ ?
 Nec jam cornipedem Tiberino gramine pascis,
 Ut rebare, tuum ; Tuscis nec figis aratrum
 Collibus ? O cunctis Erebi dignissime pœnis,
 Tune Giganteis urbem tentare Deorum 185
 Aggressus furiis ? nec te meus, improbe, saltem
 Terruit exemplo Phaëthon, qui fulmina præceps
 In nostris efflavit aquis, dum flammea coeli
 Flectere terrenis meditatur frena lacertis,
 Mortalique diem sperat diffundere vultu ? 190
 Crede mihi, simili bacchatur crimine, quisquis
 Adspirat Romæ spoliis, aut Solis habenis.”
 Sic fatus, Ligures Venetosque erectior amnes
 Magnâ voce ciet. Frondentibus humida ripis
 Colla levant pulcher Ticinus, et Addua visu 195
 Cœrulus, et velox Athesis, tardusque meatu
 Mincius, inque novem consurgens ora Timavus.
 Insultant omnes profugo, pacataque lætum
 Invitant ad prata pecus : jam Pana Lyceum, 199
 Jam Dryadas revocant, et rustica numina, Faunos.
 Tu quoque non parvum Getico, Verona, triumpho
 Adjungis cumulum : nec plus Pollentia rebus
 Contulit Ausoniis, aut mœnia vindicis Astæ.
 Hic rursus, dum pacta movet, damnisque coactus,
 Extremo mutare parat præsentia casu, 205
 Nil sibi perjurum sensit prodesse furorem,
 Converti nec fata loco ; multisque suorum
 Diras pavit aves ; inimicaque corpora volvens
 Ionios Athesis mutavit sanguine fluctus.
 Oblatum Stilichon violato fœdere Martem 210
 Omnibus arripuit votis, ubi Roma periclo
 Jam procul, et medius belli Padus arbiter ibat.

Jamque opportunam motu strepuisse rebelli
 Gaudet perfidiam ; præbensque exempla labori,
 Sustinet accensos æstivo pulvere soles. 215
 Ipse manu metuendus adest ; inopinaque cunctis
 Instruit arma locis ; et, quo vocat usus, ab omni
 Parte venit. Fesso si deficit agmine miles,
 Utitur auxiliis, damni securus ; et astu
 Debilitat sævum cognatis viribus Istrum : 220
 Et, duplici lucro committens prælia, vertit
 In se barbariem, nobis utrimque cadentem.
 Ipsum te caperet, letoque, Alarice, dedisset,
 Nî calor incauti male festinatus Alani
 Dispositum turbâsset opus. Prope captus, anhelum
 Verbere cogis equum : nec te vitâsse dolemus. 226
 I potius gentis reliquum, tantisque superstes
 Danubii populis : i ; nostrum vive tropæum.
 Non tamen ingenium tantis se cladibus atrox
 Dejecit : occulto tentabat tramite montis, 230
 Si quâ per scopulos subitas exquirere posset
 In Rhætos Gallosque vias. Sed fortior obstat
 Cura ducis : quis enim divinum fallere pectus
 Possit, et excubiis vigilantia lumina regni ?
 Cujus consilium non unquam repperit hostis, 235
 Nec potuit texisse suum : secreta Getarum
 Nôsse prior, celerique dolis occurrere sensu.
 Omnibus exclusus cœptis, considit in uno
 Colle tremens : frondesque, licet, depastus amaras,
 Arboreo figat sonipes in cortice morsus ; 240
 Et tetrus collecta cibus, annique vapore,
 Sæviat aucta lues, et miles probra superbus
 Ingerat obsesso, captivaque pignora monstret ;
 Non tamen aut morbi tabes, aut omne periculum
 Docta subire fames, aut prædæ luctus ademtæ, 245
 Aut pudor, aut dictis movêre procacibus iræ,
 Ut male tentato toties se credere campo
 Comminus auderet. Nulla est victoria major,
 Quam quæ confessos animo quoque subjugat hostes.
 Jamque frequens rarum decerpere transfuga robur

Coeperat, inque dies numerus decrescere castris.
 Nec jam seditio paucis occulta parari,
 Sed cunei, totæque palam discedere turmæ.
 Consequitur, vanoque fremens clamore retentat, 254
 Cumque suis jam bella gerit: mox nomina supplex
 Cum fletu precibusque ciet; veterumque laborum
 Admonet, et frustra jugulum parcentibus offert:
 Defixoque malis animo, sua membra suasque
 Cernit abire manus: qualis, Cybeleïa quassans
 Hyblæus procul æra senex, revocare fugaces 260
 Tinnitu conatur apes, quæ sponte relictis
 Descivêre favis; sonituque exhaustus inani,
 Raptas mellis opes, solitæque oblita latebræ,
 Perfida deplorat vacuis examina ceris.
 Ergo, ubi præclusæ voci laxata remisit 265
 Frena dolor, notas oculis humentibus Alpes
 Adspicit, et nimium diversi stamine fati
 Præsentis reditus, fortunatosque revolvit
 Ingressus. Solo peragens cum murmure bellum,
 Protento leviter frangebatur mœnia conto, 270
 Irridens scopulos: nunc desolatus et exspes
 Debita pulsato reddit spectacula monti.
 Tunc sic, Ausonium respectans æthera, fatur:
 "Heu regio funesta Getis! heu terra sinistris
 Auguriis calcata mihi! satiare nocentûm 275
 Cladibus, et tandem nostris inflectere poenis!
 En ego, qui toto sublimior orbe ferebar,
 Ante tuum felix aditum, ceu legibus exsul,
 Addictusque reus, flatu propiore sequentûm
 Terga premor. Quæ prima miser, quæ funera dictis
 Posteriora querar? non me Pollentia tantum, 281
 Nec captæ cruciâstis opes: hoc aspera fati
 Sors tulerit, Martisque vices. Non funditus armis
 Concideram: stipatus adhuc, equitumque catervis
 Integer, ad montes reliquo cum robore cessi, 285
 Quos Apenninum perhibent. Hunc esse ferebat
 Incola, qui, Siculum porrectus adusque Pelorum,
 Finibus ab Ligurum populos complectitur omnes

Italiæ, geminumque latus stringentia longe
 Utraque perpetuo discriminat æquora tractu. 290
 Huc ego continuum si per juga tendere cursum,
 (Ut prior iratæ fuerat sententia menti)
 Jam desperatâ valuissem luce; quid ultra?
 Omnibus, oppeterem famâ maiore, perustis;
 Et certe moriens propius te, Roma, viderem: 295
 Ipsaque per cultas segetes mors nostra secuto
 Victori damnosa foret. Sed pignora nobis
 Romanus, carasque nurus, prædamque, tenebat:
 Hoc magis exsertum raperem succinctior agmen.
 Heu! quibus insidiis, quâ me circumdedit arte 300
 Fatalis semper Stilichon! dum parcere fingit,
 Rettudit hostiles animos, bellumque remenso
 Evaluit transferre Pado. Pro fœdera sævo
 Deteriora jugo! Tunc vis extincta Getarum:
 Tunc mihi, tunc letum pepigi. Violentior armis 305
 Omnibus, expugnat nostram clementia gentem.
 Mars gravior sub pace latet; capiorque vicissim
 Fraudibus ipse meis. Quis jam solatia fesso
 Consiliumve ferat? socius suspectior hoste.
 Atque utinam cunctos licuisset perdere bello! 310
 Nam quisquis duro cecidit certamine, nunquam
 Desiit esse meus. Melius mucrone perirent;
 Auferretque mihi luctu leviori sodales
 Victa manus, quam læsa fides. Nullusne clientûm
 Permanet? offensi comites: odère propinqui. 315
 Quid moror invisam lucem? quâ sede recondam
 Naufragii fragmenta mei? quæve arva requiram,
 In quibus haud ânquam Stilichon, nimiumque potentis
 Italiæ nostras nomen circumsonet aures?"
 Hæc memorans instante fugam Stilichone tetendit,
 Expertas horrens aquilas. Comitatur euntem 321
 Pallor, et atra Fames, et saucia lividus ora
 Luctus, et inferno stridentes agmine Morbi.
 Lustralem sic rite facem, cui lumen odorum
 Sulfure cœruleo nigroque bitumine fumat, 325
 Circum membra rotat doctus purganda sacerdos,

Rore pio spargens, et dira fugantibus herbis 327
 Numina; purificumque Jovem Triviamque precatus,
 Trans caput aversis manibus jaculatur in Austrum,
 Secum rapturas cantata piacula, tædas. 330

Acrior interea visendi principis ardor
 Accendit cum plebe Patres; et sæpe negatum
 Flagitat adventum. Nec tali publica vota
 Consensu tradunt atavi caluisse per Urbem,
 Dacica bellipotens cum fregerat Ulpus arma, 335
 Atque indignantes in jura redegerat Arctos;
 Cum fasces cinxere Hypanim, mirataque leges
 Romanum stupuit Mæotia terra tribunal.
 Nec tantis patriæ studiis ad templa vocatus
 Clemens, Marce, redis; cum gentibus undique cinctam
 Exuit Hesperiam paribus Fortuna periclis. 340

Laus ibi nulla ducum: nam flammeus imber in hostem
 Decidit: hunc dorso trepidum fumante ferebat
 Ambustus sonipes: hic tabescente solutus
 Subsedit galeâ, liquefactaque fulgure cuspis 345
 Canduit, et subitis fluxere vaporibus enses.
 Tum, contenta polo, mortalis nescia teli
 Pugna fuit. Chaldæa mago seu carmina ritu
 Armavere Deos; seu (quod reor) omne Tonantis
 Obsequium Marci mores potuere mereri. 350

Nunc quoque præsidium Latio non deesset Olympi,
 Deficeret si nostra manus: sed providus æther
 Noluit humano titulos auferre labori;
 Ne tibi jam, princeps, soceri sudore paratam,
 Quam meruit virtus, ambirent fulmina laurum. 355
 Jam toties missi proceres responsa morandi
 Rettulerant, donec, differri longius orbis
 Communes non passa preces, penetralibus altis
 Prosiluit; vultusque palam confessa coruscus,
 Impulit ipsa suis cunctantem Roma querelis: 360

“Dissimulata diu tristes in amore repulsas
 Vestra parens, Auguste, queror. Quonam usque te-
 nebit

Prælatas mea vota Ligus? vetitumque propinquâ

Luce frui, spatiis discernens gaudia parvis,
 Torquebit Rubicon vicino nomine Thybrin? 365
 Nonne semel sprevisse sat est, cum reddita bellis
 Africa venturi lussit spe principis Urbem,
 Nec dūras tantis precibus permovimus aures?
 Ast ego frenabam geminos, quibus altior ires,
 Electi candoris equos; et nominis arcum 370
 Jam molita tui, per quem radiante decorus
 Ingredere togā, pugnae monimenta dicabam,
 Defensam titulo Libyam testata perenni.
 Jamque parabantur pompae simulacra futurae
 Tarpeio spectanda Jovi, caelata metallo 375
 Classis ut auratum sulcaret remige fluctum,
 Ut Massyla tuos anteirent oppida currus;
 Palladiāque comas innexus arundine Triton
 Edomitis veheretur equis, et in aere trementem
 Succinctae famulum ferrent Atlanta cohortes. 380
 Ipse Jugurthinam subiturus carcere poenam,
 Praeberet fera colla iugo, vi captus et armis,
 Non Bocchi Sullaeque dolis. Sed prima remitto.
 Num praesens etiam Getici me laurea belli
 Declinare potest? sedesne capacior ulla 385
 Tantae laudis erit? Tua te benefacta morantem
 Conveniunt, meritisque [suis] obnoxia virtus,
 Quos servavit, amat. Jam flavescencia centum
 Messibus aestivae detondent Gargara falces:
 Spectatosque iterum nulli celebrantia ludos 390
 Circumflexa rapit centenus saecula consul.
 His annis, qui lustra mihi bis dena recensent,
 Nostra ter Augustos intra pomeria vidi,
 Temporibus variis: eadem sed causa tropaeis
 Civilis dissensus erat. Venēre superbi, 395
 Scilicet ut Latio respersos sanguine currus
 Adspicerem? quisquamne pie laetanda parenti
 Natorum lamenta putet? Periēre tyranni,
 Sed nobis periēre tamen. Cum Gallica vulgo
 Proelia jactaret, tacuit Pharsalia, Caesar. 400
 Namque inter socias acies cognataque signa,

Ut vinci miserum, nunquam vicisse decorum est.
 Restituat priscum per te jam gloria morem
 Verior; et fructum sinceræ laudis ab hoste
 Desuetum jam redde mihi; justisque furoris 405
 Externi spoliis sontes absolve triumphos.
 Quem, precor, ad finem laribus sejuncta potestas
 Exsulat, imperiumque suis a sedibus errat?
 Cur mea, quæ cunctis tribuere Palatia nomen,
 Neglecto squalent senio? nec creditur orbis 410
 Illinc posse regi? medium non deserit unquam
 Cœli Phœbus iter; radiis tamen omnia lustrat.
 Segnius an veteres Istrum Rhenumque tenebant,
 Qui nostram coluere domum? leviusne tremebant
 Tigris et Euphrates, cum fœdera Medus et Indus
 Hinc peteret, pacemque meâ speraret ab arce? 416
 Hic illi mansere viri, quos mutua virtus
 Legit, et in nomen Romanis rebus adoptans,
 Judicio pulchram seriem, non sanguine, duxit.
 Hic proles atavum deducens Ælia Nervam, 420
 Tranquillique Pii, bellatoresque Severi.
 Hoc civis dignare forum; conspectaque dudum
 Ora refer; pompam recolens ut mente priorem,
 Quem tenero patris comitem susceperat ævo,
 Nunc, duce cum socero, juvenem te Thybris adoret."
 Orantem medio princeps sermone refovit: 426
 "Nunquam aliquid frustra per me voluisse dolebis,
 O Dea! nec legum fas est occurrere matri.
 Sed nec, post Libyam, (falsis ne perge querelis
 Incusare tuos) patriæ mandata vocantis 430
 Sprevimus. Advectæ misso Stilichone curules,
 Ut nostras tibi, Roma, vices pro principe consul
 Impleret, generoque socer. Vidistis in illo
 Me quoque: sic credit pietas, non sanguine solo,
 Sed claris potius factis, experta parentem. 435
 Cuncta quidem centum nequeam perstringere linguis,
 Quæ pro me mundoque gerit: sed ab omnibus unum
 (Si famâ necdum patuit) te, Roma, docebo,
 Subjectum nostris oculis, et cujus agendi

Spectator vel causa fui. Populator Achivæ 440
 Bistonizæque plagæ, crebris successibus amens,
 Et ruptas animis spirans immanibus Alpes,
 Jam Ligurum trepidis admoberat agmina muris,
 Tutior auxilio brumæ; quod gentibus illis
 Frigore consuetis favet inclementia cœli: 445
 Meque minabatur calcato obsidere vallo,
 Spem vano terrore fovens, si forte, remotis
 Præsidiiis, urgente metu, quâ vellet, obirem
 Conditione fidem: nec me timor impulit ullus,
 Et ducē venturo fretum, memoremque tuorum, 450
 Roma, ducum, quibus haud unquam, vel morte paratâ,
 Fœdus lucis amor pepigit dispendia famæ.
 Nox erat: et late, stellarum more, videbam
 Barbaricos ardere focos. Jam classica primos
 Excierant vigiles, gelidâ cum pulcher ab Arcto 455
 Adventat Stilichon. Medius sed clauserat hostis
 Inter me socerumque viam, pontemque tenebat,
 Addua quo scissas spumiosior incitat undas.
 Quid faceret? differret iter? discrimina nullas
 Nostra dabant adeunda moras. Perrumperet agmen?
 Sed paucis comitatus erat: nam plurima retro, 461
 Dum nobis properat succurrere, liquerat arma
 Extera, vel nostras acies. Hoc ille locatus
 Ancipiti, longum socias tardumque putavit
 Expectâsse manus; et nostra pericula tendit 465
 Posthabitis pulsare suis: mediumque per hostem,
 Flammatus virtute piâ, propriæque salutis
 Immemor, et stricto prosternens obvia ferro,
 Barbara fulmineo secuit tentoria cursu.

"Nunc mihi Tydiden attollant carmina vatum,
 Quod, juncto fidens Ithaco, patefacta Dolonis 471
 Indicio, dapibusque simul religataque somno
 Thracia sopiti penetraverit agmina Rhesi.
 Graiaque rettulerit captos ad castra jugales,
 Quorum, si qua fides augentibus omnia Musis, 475
 Impetus excessit Zephyros, candorque pruinas.
 Ecce virum, taciti qui nullâ fraude soporis

Ense palam sibi pandit iter, remeantque cruentus;
 Et Diomedeis tantum præclarior ausis,
 Quantum lux tenebris, manifestaue proelia furtis.
 Adde, quod et ripis steterat munitior hostis, 481
 Et cui nec vigilem fas est componere Rhesum.
 Thrax [erat:] hic Thracum domitor. Non tela retar-
 dant:

Obijce non hæsit fluvii. Sic ille minacem
 Tyrrhenam labente manum pro ponte repellens, 485
 Trajecit clypeo Thybrin, quo texerat Urbem,
 Tarquinio mirante, Cocles, mediisque superbis
 Porsennam respexit aquis. Celer Addua nostro
 Sulcatus socero. Sed, cum tranaret, Etruscis
 Ille dabat tergum, Geticis hic pectora bellis. 490
 Exsere nunc doctos, tantæ certamina laudis,
 Roma, choros; et, quanta tuis facundia pollet
 Ingeniis, nostrum digno sonet ore parentem."

Dixit, et, antiquæ muros egressa Ravennæ,
 Signa movet; jamque ora Padi, portusque relinquit
 Flumineos, certis ubi legibus advena Nereus 495
 Æstuat, et pronas puppes nunc amne secundo,
 Nunc redeunte, vehit; nudataque litora fluctu
 Deserit, Oceani lunaribus semula damnis.
 Lætior hinc Fano recipit Fortuna vetusto; 500
 Despiciturque vagus præruptâ valle Metaurus,
 Quâ mons, arte patens, vivo se perforat arcu,
 Admisitque viam sectæ per viscera rupis,
 Exsuperans delubra Jovis, saxoque minantes
 Apenninigenis cultas pastoribus aras. 505
 Quin et Clitumni sacras victoribus undas,
 Candida quæ Latiis præbent armenta triumphis,
 Visere cura fuit: nec te miracula fontis
 Prætereunt; tacito passu quem si quis adiret,
 Lentus erat; si voce gradum majore citâset, 510
 Commixtis fervebat aquis: cumque omnibus una
 Sit natura vadis, similes ut corporis umbras
 Ostendant; hæc sola, novam jactantia sortem,
 Humanos properant imitari flumina mores.

Celsa dehinc patulum prospectans Narnia campum
 Regali calcatur equo ; rarique coloris 516
 Non procul amnis abest, urbi qui nominis auctor,
 Ilice sub densâ silvis arctatus opacia,
 Inter utrumque jugum tortis anfractibus albet.
 Inde, salutato libatis Thybride nymphis, 520
 Excipiunt arcus, operosaque semita vastis
 Molibus, et quidquid tantæ præmittitur urbi.
 Ac, velut officiis trepidantibus ora puellæ,
 Spe propiore tori, mater sollertior ornat
 Adveniente proco, vestesque et cingula comit 525
 Sæpe manu, viridique angustat iaspide pectus,
 Substringitque comam gemmis, et colla monili
 Circuit, et baccis onerat candentibus aures :
 Sic, oculis placitura tuis, insignior auctis
 Collibus, et notâ major se Roma videndam 530
 Obtulit. Addebant pulchrum nova moenia vultum,
 Audito perfecta recens rumore Getarum.
 Profecitque opifex decori timor ; et, vice mirâ,
 Quam pax intulerat, bello discussa senectus.
 Erexit subitas turres, cinctosque coëgit 535
 Septem continuo montes juvenescere muro.
 Ipse favens votis, solitoque decentior aër,
 Quamvis assiduo noctem fœdaverat imbri,
 Principis et Solis radiis deterisa removit
 Nubila : namque ideo pluviis turbaverat omnes 540
 Ante dies, lunamque rudem madefecerat Auster,
 Ut tibi servatum scirent convexa serenum.
 Omne, Palatino quod pons a colle recedit
 Mulvius, et quantum licuit consurgere tectis,
 Una replet turbæ facies. Undare videres 545
 Ima viris, altas effulgere matribus ædes.
 Exsultant juvenes æquævi principis annis :
 Temnunt prisca senes, et in hunc sibi prospera fati
 Gratantur durâsse diem : moderataque laudant
 Tempora, quod clemens aditu, quod pectore, solus 550
 Romanos vetuit currum præcedere Patres ;
 Cum tamen Eucherius, cui regius undique sanguis,

Atque Augusta soror, fratri præberet ovanti
Militis obsequium. Sic illum dura parentis
Instituit pietas, in se vel pignora parci; 555
Quique neget nato, procerum quod præstet honori.

Hæc sibi cura senum, maturaque comprobât setas :
Idque inter veteris speciem præsentis et aulæ
Judicat, hunc civem, dominos venisse priores.

Conspicuas tum flore genas, diademate crinem, 560
Membraque gemmato trabæ viridantia cinctu,
Et fortes humeros, et certatura Lyæo
Inter Erythræas surgentia colla smaragdos,
Mirari sine fine nurus : ignaraque virgo,
Cui simplex calet ore pudor, per singula [cernens,]
Nutricem consultat anum, quid fixa draconum 566
Ora velint? ventis fluitent, an vera minentur
Sibila, suspensum rapturi faucibus hostem?

Ut chalybem indutos equites, et in ære latentes
Vidit cornipedes, "Quânam de gente," rogabat,
"Ferrati venêre viri? quæ terra metallo 571

Nascentes informat equos? num Lemnius auctor
Addidit hinnitum ferro, simulacraque belli
Viva dedit?" Gaudet metuens, et pollice monstrat,
Quod picturatas galeæ Junonia cristas 575

Ornet avis, vel quod, rigidos vibrata per armos,
Rubra sub ærato crispentur serica dorso.

Tum tibi magnorum mercem Fortuna laborum
Persolvit, Stilichon; curru cum vectus eodem,
Urbe triumphantem generum florente juventâ 580

Conspiceres, illumque diem sub corde referres,
Quo tibi, confusâ dubiis formidine rebus,
Infantem genitor moriens commisit alendum.

Virtutes variæ fructus sensêre receptos;
Depositum servâsse Fides; Constantia parvum 585
Præfecisse orbi; Pietas fovisse propinquum.

Hic est ille puer, qui nunc ad Rostra Quirites
Evocat, et solio fultus genitoris eburno
Gestarum Patribus causas ex ordine rerum,
Eventusque, refert: veterumque exempla secutus, 590

Digerit imperii sub iudice fata senatu. 591
 Nil cumulat, verbisque nihil fiducia celat.
 Fucati sermonis opem mens conscia laudis
 Abnuat. Agnoscunt procures; habituque Gabino
 Principis, et ducibus circumstipata togatis, 595
 Jure paludatæ jam curia militat aulae.
 Affuit ipsa suis ales Victoria templis,
 Romanæ tutela togæ; quæ divite pompâ
 Patricii reverenda fovet sacraria cœtûs;
 Castrorumque eadem comes indefessa tuorum, 600
 Nunc tandem fruitur [votis;] atque omne futurum
 Te Romæ, seseque tibi, promittit in ævum.
 Hinc te jam patriis laribus via nomine vero
 Sacra refert. Flagrat studiis concordia vulgi,
 Quam non illecebris dispersi colligis auri; 605
 Nec tibi venales captant æraria plausus,
 Corruptura fidem. Meritis offertur inemptus
 Purâ mente favor: nam, munere carior omni,
 Obstringit sua quemque salus. Procul ambitus erret.
 Non quærat pretium, vitam qui debet amori. 610
 O! quantum populo secreti numinis addit
 Imperii præsens Genius! quantamque rependit
 Majestas alterna vicem, cum regia Circi
 Connexum gradibus veneratur purpura vulgus!
 Assensuque cavæ sublatus in æthera vallis, 615
 Plebis adoratæ reboat fragor; unaque totis
 Intonat Augustum septenis arcibus Echo!
 Nec solis hic cursus equis: assueta quadrigis
 Cingunt arva trabes; subitæque adspectus arenæ
 Diffundit Libycos alienâ valle cruores. 620
 Hæc et belligeros exercuit area lusus.
 Armatos hic sæpe choros, certâque vagandi
 Textas lege fugas, inconfusosque recursus,
 Et pulchras errorum artes, jucundaque Martis
 Cernimus. Insonuit cum verbere signa magister, 625
 Mutatos edunt pariter tot pectora motus;
 In latus allisis clypeis, aut rursus in altum
 Vibratis: grave parma sonat; mucronis acutum

Murmur ; et, umbonum pulsu modulante resultans,
Ferreus alterno concentus clauditur ense. 630

Una omnis submissa phalanx, tantæque salutant
Te, Princeps, galeæ. Partitis inde catervis,
In varios docto discurritur ordine gyros,
Quos neque semiviri Gortynia tecta juvenci,
Flumina nec crebro vincant Mæandria flexu. 635

Discreto revoluta gradu, torquentur in orbes
Agmina : perpetuisque immoto cardine claustris
Janus bella premens, lætâ sub imagine pugnae,
Armorum innocuos paci largitur honores.

Jamque novum fastis aperit felicibus annum, 640
Ore coronatus gemino ; jam Thybris in uno
Et Bruti cernit trabeas, et scepra Quirini.

Consule lætatur post plurima sæcula viso
Pallanteus apex : agnoscunt Rostra curules
Auditas quondam proavis ; desuetaque cingit 645
Regius auratis fora fascibus Ulpia lictor.

Et sextas Geticâ prævelans fronde secures,
Colla triumphati proculcat Honorius Istri.
Exeat in populos cunctis illustrior annus,
Natus fonte suo ; quæm non aliena per arva 650

Induit hospes honos ; cujus cunabula fovit
Curia ; quem primi tandem vidêre Quirites ;
Quem domitis auspex peperit Victoria bellis.
Hunc et privati titulis famulantibus anni,
Et quos armipotens genitor, retroque priores 655

Diversis gessere locis, ceu Numen, adorent.
Hunc et quinque tui, vel quos habiturus in orbem
Post alios, Auguste, colant : licet unus in omnes
Consul eas, magno sextus tamen iste superbit
Nomine, præteritis melior, venientibus auctor,

CL. CLAUDIANI

LAUS SERENÆ, REGINÆ,

UXORIS STILICHONIS.

DIC mihi, Calliope, tanto cur tempore differs
Pierio meritam serito redimire Serenam?
Vile putas donum, solitam consurgere gemmis,
Et Rubro radiare mari, si floribus ornes
Reginæ regina comam? sed floribus illis, 5
Quos neque frigoribus Boreas, nec Sirius urit
Æstibus; æterno sed veris honore rubentes
Fons Aganippeâ Permessius educat undâ;
Unde piæ pascuntur apes, et prata legentes 10
Transmittunt sæclis Heliconia mella futuris.
Dignius an vates alios exercuit unum
Femineæ virtutis opus? consorte redempto,
Casta maritali successit Thessala fato,
Inque suos migrare virum non abnuvit annos.
Hoc Graii memorant. Latiis movet ora Camœnis 15
Præscia fatorum Tanaquil, rediensque per undas
Clœlia Thybrinas, et eodem flumine ducens
Claudia virgineo cunctantem crine Cybellen.
Anne aliud toto molitur carminis actu
Mæonii mens alta senis? quod stagna Charybdis 20
Armavit, quod Scylla canes, quod pocula Circe;
Antiphatæ vitata fames, surdoque carina

Remige Sirenum cantus transvecta tenaces;
 Lumine fraudatus Cyclops, contemta Calypso;
 Penelopæ decus est; atque uni tanta paratur 25
 Scena pudicitiae. Terræ pelagique labores,
 Et totidem sævi bellis, quot fluctibus, anni,
 Conjugii docuere fidem. Sit Claudia felix
 Teste Deâ; castosque probet sub numine mores,
 Absolvens puppisque moras, crimenque pudoris: 30
 Penelope trahat arte procos; fallatque furentes
 Stamina nocturnæ relegens sollertia telæ:
 Non tamen audebunt titulis certare Serenæ.
 Quod si nobilitas cunctis exordia pandit
 Laudibus, atque omnes redeunt in semina causæ, 35
 Quis venerabilior sanguis, quæ major origo,
 Quam regalis, erit? Non hoc privata dedere
 Limina; nec tantum poterat contingere numen
 Angustis laribus. Patruo te principe celsam
 Bellipotens illustrat avus, qui signa Britanno 40
 Intulit Oceano, Gætulaque reppulit arma.
 Claram Scipiadum taceat Cornelia gentem,
 Seque minus jactet Libycis dotata tropæia.
 Cardine tu gemino laurus prætendis avitas:
 Inde Caledoniis, Australibus inde, parentum 45
 Cingeris exuviis. Necdum moderamina mundi
 Sumserat illa domus, cum te Lucina beatas
 Ederet astrorum radiis: o maxima rerum
 Gloria! post genitam didicit regnare Serenam.
 Quid dignum memorare tuis, Hispania, terris 50
 Vox humana valet? primo levat sequore Solem
 India: tu fessos exactâ luce jugales
 Proluis; inque tuo respirant sidera fluctu.
 Dives equis, frugum facilis, pretiosa metallis,
 Principibus fecunda piis: tibi sæcula debent 55
 Trajanum: series his fontibus Ælia fluxit.
 Hinc senior pater; hinc juvenum diademata fratrum.
 Namque aliæ gentes, quas foedere Roma recepit,
 Aut armis domuit, varios aptantur in usus
 Imperii: Phariæ segetes, et Punica messis, 60

Castrorum devota cibo : dat Gallia robur 61
 Militis : Illyricis sudant equitatibus alæ.
 Sola novum Latiis vectigal Iberia rebus
 Contulit Augustos. Fruges, æraria, miles,
 Undique conveniunt, totoque ex orbe leguntur : 65
 Hæc generat, qui cuncta regant. Nec laude virorum
 Censeri contenta fuit, nisi matribus æque
 Vinceret, et, gemino certatim splendida sexu,
 Flaccillam Mariamque daret, pulchramque Serenam.
 Te nascente, ferunt per pingua culta tumentem 70
 Divitiis undâsse Tagum. Callæcia risit
 Floribus, et roseis formosus Duria ripis
 Vellera purpureo passim mutavit ovili.
 Cantaber Oceanus vicino litore gemmas
 Exspuit : effossis nec pallidus Astur oberrat 75
 Montibus : oblatum sacris natalibus aurum
 Vulgo vena vomit : Pyrenæisque sub antris
 Ignea fluminæ legêre Ceraunia Nymphæ.
 Quæque, relabentes undas æstumque secutæ,
 In refluos venêre palam Nereïdes amnes, 80
 Confessæ plausu dominam, cecinêre futuris
 Auspicium thalamis. Alio tum parvus in axe
 Crescebat Stilichon, votique ignarus agebat,
 Debita cui longe conjux, penitusque remoto
 Orbe parabatur tanti concordia fati. 85
 Nec tua mortalis meruit cunabula nutrix.
 Ubra prima dabant gremiis redolentibus Horæ,
 Ternaque te nudis innectens Gratia membris
 Afflavit, docuitque loqui. Quâcumque per herbam
 Reptares, fluxêre rosæ : candentia nasci 90
 Lilia. Si placido cessissent lumina somno,
 Purpura surgebat violæ, factura cubile
 Gramineum, vernansque tori regalis imago.
 Omina non audet genitrix tam magna fateri;
 Successusque suos, arcani conscia voti, 95
 Spe trepidante tegit. Gestabat Honorius arcto
 Te pater amplexu. Quoties ad limina princeps
 Theodosius, privatus adhuc, fraterna veniret,

Oscula libabat, teque ad sua tecta ferebat
 Lætior. In matrem teneris conversa querelis, 100
 " Quid me de propriis auferre penatibus," inquis,
 " Imperat hic semper?" Præsagia luserat error,
 Et dedit augurium regnis infantia linguæ.
 Defuncto genitore tuo, sublimis adoptat
 Te patruus; magnique animo solatia luctûs 105
 Restituens, propius, quam si genuisset, amavit
 Defuncti fratris sobolem: nec carior olim
 Mutua Lædæos devinxit cura Laconas.
 Addidit et proprio germana vocabula nato;
 Quâque datur, fratris speciem sibi reddit ademti.
 Denique cum rerum summas electus habenas 111
 Susciperet, non ante suis impendit amorem
 Pignoribus, quam te pariter fidamque sororem
 Litus ad Eoum terris acciret Iberis.
 Deseritur jam ripa Tagi; Zephyrique relictis
 Sedibus, Auroræ famulas properatur in urbes. 116
 Incedunt geminæ, proles fraterna, puellæ;
 Inde Serena minor, prior hinc Thermantia natu,
 Expertes thalami, quarum Cythereia necdum
 Sub juga cervices niveas Hymenæus adegit. 120
 Utraque luminibus tumidum micat: utraque pulchro
 Excitat ore faces: qualis Latonia virgo,
 Et solo Jove nata soror, cum forte revisunt
 Æquorei sortem patrui: spumantia cedunt
 Æquora, castarum gressus venerata Dearum. 125
 Non ludit Galatea procax; non improbus audet
 Tangere Cymothoën Triton; totoque severos
 Indicit mores pelago pudor: ipsaque Proteus
 Arcet ab amplexu turpi Neptunia monstra.
 Tales, sceptriferi visuræ tecta parentis, 130
 Limen Honoriades penetrant regale sorores.
 Ambas ille quidem patrio complexus amore:
 Sed merito pietas in te proclivior ibat.
 Et quoties, rerum moles ut publica cogit,
 Tristior, aut irâ tumidus flagrante redibat, 135
 Cum patrem nati fugerent, atque ipsa timeret

- Commotum Flaccilla virum, tu sola frementem 137
 Frangere, tu blando poteras sermone mederi.
 Alloquiis hærerere tuis : secreta fidei * * *
 Prisca puellares reverentia transiit annos. 140
 Non talem Triviæ confert laudator Homerus
 Alcinoë genitam ; quæ, dum per litora vestes
 Explicat, et famulas exercet læta choreas,
 Auratam jaculata pilam, post naufraga somni
 Otia, progressum foliis expavit Ulyssem. 145
 Pierius labor, et veterum tibi carmina vatum,
 Ludus erat : quos Smyrna dedit, quos Mantua, libros
 Percurrens, damnas Helenen, nec parcis Eliassæ.
 Nobiliora tenent animos exempla pudicos.
 Laodamia sequens remeantem rursus ad umbras
 Phyllaciden, et prona ruens Capaneïa conjux, 151
 Communes ardente viro mixtura favillas,
 Et gravis incumbens casto Lucretia ferro,
 Vulnere quæ proprio facinus testata tyranni,
 Armavit patriæ justos in bella dolores, 155
 Exsule Tarquinio ; memorandaque concidit, uno
 Ulta pudicitiam libertatemque cruore.
 Talia facta libens non tu virtute minori,
 Sed fato meliore, legis. Jam nubilis ætas,
 Principe sollicito, votis erexerat aulam 160
 Incertis, quem tanta tori fortuna maneret.
 Antiquos loquitur Musarum pagina reges,
 Quod durâ sub lege procos certare juberent,
 Emturos thalamum dubii discrimine leti ;
 Et sua crudeles gauderent pignora mortis 165
 Ambitione peti. Curru Pisæa marino
 Fugit tela Pelops : nam perfidus objice regis
 Prodidit CEnomai deceptum Myrtilus axem.
 Hippomenes trepidus cursu ferroque secutam
 Aurato volucrem flexit Schoeneïda pomo. 170
 Herculeas vidit fluvio luctante palæstras
 Mœnibus ex altis Calydon ; pretiumque labori
 Deïanira fuit, cum pectora victor anhelo
 Alcides premeret, retroque Acheloïus iret

Decolor : attonitæ stringebant vulnera Nymphæ :
 Saucia truncato pallebant flumina cornu. 176
 Te non Hesperidum pomis, non amne subacto,
 Non socerum fallente rotâ, sed iudice dignus
 Augusto, variis Stilichon spectatus in armis
 Accipit, et regni dotes virtute paravit. 180
 Sæpe duces meritis bello tribuere coronas :
 Hunc cingit muralis honos : hunc civica quercus
 Nexuit : hunc domitis ambit rostrata carinis.
 Solus militiæ mirâ mercede jugalem
 Promeruit Stilichon, socero referente, coronam.
 Agnovit patruî similem Thermantia curam : 186
 Nupsit et illa duci : sed longe fata sororis
 Inferiora tuis : alio tibi lumine tædas
 Accendit Romana Salus ; magnisque coronis
 Conjugium fit cura tuum. Delectus equorum, 190
 Quos Phrygiæ matres, Argæaque gramina pastæ,
 Semine Cappadocum sacris præsepibus edunt,
 Primus honos. Gemino mox idem culmine duxit
 Agmina, commissosque labor sic gessit honores,
 Ut semper merito princeps, cum magna dedisset,
 Deberet majora tamen. Si bellica nubes 196
 Ingrueret, quamvis annis et jure minori
 Cedere grandævos equitum peditumque magistros
 Adspiceres, totumque palam permittere Martem.
 Nec gradus, ætatisve pudor, senioribus obstat, 200
 Ne juveni parere velint. Ceu, flamine molli,
 Tranquillisque fretis, clavum sibi quisque regendum
 Vindicat : incumbat si turbidus Auster, et unda
 Pulset utrumque latus ; posito certamine, nautæ
 Contenti meliore manu, seseque ratemque 205
 Unius imperiis tradunt ; artemque pavore
 Confessis finem studiis fecêre procellæ.
 Haud aliter Stilichon, fremuit cum Thracia belli
 Tempestas, cunctis pariter cedentibus, unus
 Eligitur ductor : suffragia quippe peregit 210
 Judex vera timor : victus ratione salutis
 Ambitus, et pulsus tacuit formidine livor.

Quis tibi tunc per membra tremor ! quantæque cade-
bant

Uberrim lacrymæ, cum, sæva vocantibus arma
Jam lituis, madido respectans limina vultu, 215
Optares reducem, galeæque inserta minaci
Oscula cristati raperes festina mariti !
Gaudia quæ rursus, cum, post victricia tandem
Classica, sidereas ferratum pectus in ulnas
Exciperes ; castæ tuto per dulcia noctis 220
Otia pugnarum seriem narrare juberet !
Non illo nitidos unquam bellante capillos
Comere ; non solitos gemmarum sumere cultus.
Numinibus votisque vacas ; et supplice crine
Verris humum. Teritur neglectæ gratia formæ,
Jam proprio reditura viro : nec deside curâ 226
Segnis marcet amor. Laudem prudentia belli,
Femineâ pro parte, subit : dum gentibus ille
Confligit, vigili tu prospicis omnia sensu ;
Ne quid in absentem, virtutibus obvia semper, 230
Audeat invidiæ rabies, neu rumor iniquus,
Ne qua procul positis furto subsederit armis
Calliditas, nocitura domi. Tu sedula quondam,
Rufino meditante nefas, cum quæreret artes
In ducis exitium, conjuratosque foveret 235
Contra pila Getas, motus rimata latentes,
Mandatis trenebunda virum scriptisque monebas.

Cætera desiderantur.

CL. CLAUDIANI
EPITHALAMIUM
dictum
PALLADIO TRIBUNO ET NOTARIO,
ET CELERINÆ.



PRÆFATIO.

CARMINA per thalamum, quamvis festina, negare
Nec volui genero, nec potui socero.

Hic socius, dux ille mihi; nostrique per aulam
Ordinis hic consors emicat, ille prior.

Hunc mihi conjungit studiis communibus ætas; 5

Hunc mihi præponit vel senium vel honos.

Carmen amor generi, soceri reverentia poscit,
Officio vatis, militis obsequio.

EPITHALAMIUM

PALLADII ET CELERINÆ.

FORTE Venus blando quæsitum frigore somnum
Vitibus intexti gremio suscepit antri;
Densaque sidereos per gramina fuderat artus,
Acclinis florum cumulo: crispatur opaca
Pampinus, et mites undatim ventilat uvas. 5
Ora decet neglecta sopor: fastidit amictum
Æstus, et exuto translucent pectore frondes.
Idaliæ juxta famulæ, triplexque vicissim
Nexa sub ingenti requiescit Gratia quercu.
Pennati passim pueri, quo quemque vocavit 10
Umbra, jacent: fluitant arcus, ramisque propinquis
Pendentes placido suspirant igne pharetræ.
Pars vigiles ludunt, aut per virgulta vagantur.
Scrutantur nidos avium, vel roscida læti
Mala legunt, donum Veneris; flexusque sequuntur.
Palmitis, et summas pennis librantur in ulmos. 16
Defendunt alii lucum; Dryadasque procaces
Spectandi cupidas, et rustica numina pellunt,
Silvestresque Deos; longeque tuentibus antrum
Flammea lascivis intendunt spicula Faunis: 20
Cum subito varius vicinâ clamor ab urbe
Et fausti juvenum plausus, mixtæque choreis
Auditæ per rura lyræ. Celerina per omnes
Italiam canitur montes; omnisque maritum
Palladium resonabat ager. Pervenit ad aures 25
Vox jucunda Deæ, strepituque excita resedit,

Et reliquum nitido deterait pollice somnum. 27
 Utque erat [indigesta comas, turbata capillos,]
 Mollibus exsurgit stratis; Hymenæon et omne
 Agmen, et innumeros Hymenæon poscit Amores.
 Hunc Musâ genitum legit Cytherea, ducemque 31
 Præfecit thalamis: nullum junxisse cubile
 Hoc sine, nec primas fas est attollere tædas.
 Conspicitur tandem: platano namque ille sub altâ
 Fusus inæquales cerâ texebat avenas; 35
 Mænaliosque modos, et pastoralia labris
 Murmura tentabat relegens; orisque recurso
 Dissimili tenuem variabat arundine ventum.
 Restitit, ut vidit Venerem; digitisque remissis,
 Ad terram tacito defluxit fistula lapsu. 40
 Dulce micant oculi: niveas infecerat igni
 Solque pudorque genas: dubiam lanuginis umbram
 Cæsaries intonsa tegit. Prior ipsa silentem
 Compellat: "Nunquamne, puer, dilecta relinques
 Carmina? maternis nunquam satiabere donis, 45
 Dedite Musarum studio, nimiumque parentis
 Æmule? quid medio tecum modularis in æstu?
 Jamne tibi sordent citharæ? jam lustra Lycei,
 Atque pecus cordi, redituraque rupibus Echo?
 Huc ades, et tantæ nobis edissere causas 50
 Lætitiae; cui pompa toro tam clara resultet;
 Quæ nova dotetur virgo: patriamque genusque
 Pande, quibus terris orti, quo semine ducti:
 Haud ignarus enim: nec te connubia fallunt
 Ulla: tuo primæ libantur fœdere noctes." 55
 Ille refert: "Equidem dudum te, Diva, morantem
 Mirabar, quid adhuc tanti secura maneres
 Conjugii: non parva tibi mandatur origo.
 Fascibus insignes, et legum culmine fultæ,
 Convenère domus, et qui lectissimus orbi 60
 Sanguis erat. Rubris quæ fluctibus insula latrat,
 Quis locus Æthiopum, quæ sic impervia famæ
 Secessit regio, quo non rumore secundo
 Palladii penetravit amor, mentisque benignæ

Temperies, doctique sales, et grata senectus ? 65
 Per cunctos iit ille gradus ; aulæque labores
 Emensus, tenuit summæ fastigia sedis,
 Eoum stabili moderatus jure senatum.
 Hic splendor juveni. Cunabula prima puellæ
 Danubius, veteresque Tomi : Mavortia matris 70
 Nobilitas spoliis armisque exsultat avitis,
 Immensamque trahit Celerini robore lucem,
 Qui quondam, Meroën jussus Nilumque tueri,
 Cum sibi, [post obitus et Parthica fulmina Cari,]
 Sceptra daret miles, rebusque imponere vellet, 75
 Despexit fremitus, et prætulit otia regno.
 Respuit ingestum, quod vi, quod poscere ferro,
 Posthabitâ pietate, solent. Tum purpura primum
 Inferior virtute fuit ; meruitque repulsam
 Obvia majestas : doluit Fortuna, minorem 80
 Se confessa viro. Magnum delata potestas,
 Majorem contemta, probat. Cognomina sumsit
 Plena ducis genitor ; paulatim evectus in altum ;
 Princeps militiæ, quâ non illustrior exstat
 Altera, cunctorum tabulas assignat honorum ; 85
 Rectorum tractat numerum ; constringit in unum
 Sparsas imperii vires, cuneosque recenset
 Dispositos : quæ Sarmaticis custodia ripis,
 Quæ sævis objecta Getis, quæ Saxona frenat,
 Vel Scotum legio ; quantæ cinxêre cohortes 90
 Oceanum ; quanto pacatur milite Rhenus.
 Casta domus, sincera fides, industria sollers :
 Elegit Stilichon : nihil ultra laudibus addi
 Judiciove potest. Tali nubente puellâ,
 Nonne tibi cessare nefas ? Duc protinus omnes, 95
 Duc age. Marcentes cupio quassare coronas,
 Et vibrare faces, et noctem ducere ludo.
 Hæc quoque non vilem mihi fistula commodat usum,
 Responsura choris." Vix hæc Hymenæus : at illa
 Fontibus abluitur gelidis, legemque capillo 100
 Reddit, et ornatum formæ ; prelisque solutæ

Mira Dionææ sumit velamina telæ. 102
 Floribus exstruitur currus : juga floribus halant ;
 Florea purpureas annectunt frena columbas.
 Undique concurrunt volucres, quæcumque frementem
 Permulcent Athesin cantu, quas Larius audit, 106
 Quas Benacus alit, quas excipit amne quieto
 Mincius : ereptis obmutuit unda querelis,
 Eridani ripas, et raucae stagna Padusæ,
 Diffugiens nudavit olor. Lætantur Amores ; 110
 Frenatisque truces avibus per nubila vecti,
 Ostentant se quisque Deæ, magnoque tumultu
 Confligunt ; pronique manus in verbera tendunt,
 Atque impune cadunt. Lapsus meliore volatu
 Consequitur, vincitque suos auriga jugales. 115
 Ut thalami tetigêre fores, tum vere rubentes
 Desuper invertunt calathos, largosque rosarum
 Imbres, et violas plenis sparsêre pharetris,
 Collectas Veneris prato, quibus ipse pepercit
 Sirius, et teneras clementi sidere fovit. 120
 Gemmatis alii per totum balsama tectum
 Effudêre cadis, duro quæ saucius ungue
 Niliacus pingui desudat vulnere cortex.
 Aggreditur Cytherea nurum, flentemque pudico
 Detraxit matris gremio. Matura tumescit 125
 Virginitas ; superatque nives ac lilia candor,
 Et patrum flavis testatur crinibus Istrum.
 Tum dextram complexa viri, dextramque puellæ
 Tradit, et his ultro sancit connubia dictis :
 " Vivite concordēs, et nostrum discite munus. 130
 Oscula mille sonent : livescant brachia nexu :
 Labra ligent animas : neu tu virtute paternâ
 Confidas, juvenis : non est terrore domanda,
 Sed precibus pacanda tibi. Concede marito
 Tu quoque ; neu Scythicas infensis unguibus iras
 Exercere velis : vinci patiare, rogamus : 136
 Sic uxor, sic mater eris. Quid lumina tingis,
 Virgo ? crede mihi, quem nunc horrescis, amabis."

Dixit : et aligerâ geminos, arcuque manuque
 Præstantes, e plebe vocat. Puer ilicet Æthon, 140
 Et Pyroïs, rutilas respersi murice plumas,
 Prosiliunt ; puroque imbutis melle sagittis,
 Hic nuptam petit, ille virum. Sonuêre reducta
 Cornua : certa Notos pariter sulcavit arundo ;
 Et pariter fixis hæserunt tela medullis. 145

CL. CLAUDIANI

LIBRI I.

DE RAPTU PROSERPINÆ

PRÆFATIO.

INVENTÂ secuit primus qui nave profundum,
Et rudibus remis sollicitavit aquas ;
Qui, dubijs ausus committere flatibus alnum,
Quas natura negat, præbuit arte vias ;
Tranquillis primum trepidus se credidit undis, 5
Litora securo tramite summa legens :
Mox longos tentare sinus, et linquere terras,
Et leni cœpit pandere vela Noto.
Ast, ubi paulatim præceps audacia crevit,
Cordaque languentem dedidicêre metum ; 10
Jam vagus exsultat pelago ; cœlumque secutus,
Ægæas hiemes Iôniasque domat.

RAPTUS PROSERPINÆ.

LIBER I.

INFERNI raptoris equos, afflataque curru
Sidera Tænario, caligantesque profundæ
Junonis thalamos, audaci prodere cantu
Mens congesta jubet. Gressus removete, profani!
Jam furor humanos de nostro pectore sensus 5
Expulit; et totum spirant præcordia Phœbum.
Jam mihi cernuntur trepidis delubra moveri
Sedibus, et claram dispergere culmina lucem,
Adventum testata Dei. Jam magnus ab imis
Auditur fremitus terris; templumque remugit 10
Cecropium, sanctasque faces attollit Eleusin.
Angues Triptolemi stridunt, et squamea curvis
Colla levant attrita jugis, lapsuque sereno
Erecti roseas tendunt ad carmina cristas.
Ecce, procul ternas Hecate variata figuras 15
Exoritur; lenisque simul procedit Iacchus,
Crinali florens hederâ, quem Parthica velat
Tigris, et auratos in nodum colligit ungues.
Ebria Mæonius firmat vestigia thyrsus.

Dî, quibus innumerum vacui famulantur Averni
Vulgus iners, opibus quorum donatur avaris, 21
Quidquid in orbe perit; quos Styx viventibus ambit
Interfusa vadis, et quos fumantia torquens
Æquora gurgitibus Phlegethon perlustrat anhelis;
Vos mihi sacrarum penetralia pandite rerum, 25
Et vestri secreta poli: quâ lampade Ditem

Flexit Amor; quo ducta ferox Proserpina raptu 27
 Possedit dotale Chaos; quantasque per oras
 Sollicito genitrix erraverit anxia cursu:
 Unde datæ populis leges, et, glande relictâ, 30
 Cesserit inventis Dodonia quercus aristia.
 Dux Erebi quondam tumidas exarsit in iras,
 Prælia moturus Superis, quod solus egeret
 Connubii, sterilesque diu consumeret annos,
 Impatiens nescire torum, nullasque mariti 35
 Illecebras, nec dulce patris cognoscere nomen.
 Jam, quæcumque latent ferali monstra barathro,
 In turmas aciemque ruunt; contraque Tonantem
 Conjurant Furia; crinitaque sontibus hydrys,
 Tisiphone, quatiens infausto lumine pinum, 40
 Armatos ad castra vocat pallentia Manes.
 Pæne, reluctatis iterum pugnancia rebus,
 Rupissent elementa fidem; penitusque revulso
 Carcere, laxatis pubes Titania vinclis
 Vidisset cœleste jubar: rursusque cruentus 45
 Ægæon, positis arcto de corpore nodis,
 Obvia centeno vexâsset fulmina motu:
 Sed Parcæ vetuère minas; orbique timentes,
 Ante pedes soliumque ducis fudère severam
 Canitiem, genibusque suas cum supplice vultu 50
 Admovère manus, quarum sub jure tenentur
 Omnia, quæ seriem factorum pollice ducunt,
 Longaque ferratis evolvunt sæcula pensis.
 Prima fero Lachesis clamabat talia regi,
 Incultas dispersa comas: "O maxime noctis 55
 Arbiter, umbrarumque potens! cui nostra laborant
 Stamina; qui finem cunctis et semina præbes,
 Nascendique vices alternâ morte rependis;
 Qui vitam letumque regis; (nam quidquid ubique
 Gignit materies, hoc, te donante, creatur, 60
 Debeturque tibi; certisque ambagibus ævi
 Rursus corporeos animæ mutantur in artus)
 Ne pete firmatas pacis dissolvere leges,
 Quas dedimus, nevitque colus: neu fœdera fratrum

Civili converte tubâ. Cur impia tollis 65
 Signa? quid incestis aperis Titanibus auras?
 Posce Jovem; dabitur conjux." Vix illa: pepercit,
 Erubuitque preces; animusque relanguit atrox,
 Quamvis indocilis flecti: ceu turbine rauco
 Cum gravis armatur Boreas, glacieque nivali 70
 Hispidus, et Geticâ concretus grandine pennas,
 Bella cupit, pelagus, silvas, camposque sonoro
 Flamine rapturus: si forte adversus aënos
 Æolus objecit postes, vanescit inanis
 Impetus, et fractæ redeunt in claustra procellæ. 75
 Tum Maiâ genitum, qui fervida dicta reportet,
 Imperat acciri. Cyllenius adstitit ales,
 Somniferam quatiens virgam, tectusque galero.
 Ipse rudi fultus solio, nigrâque verendus
 Majestate sedet: squalent immania foedo 80
 Sceptra situ; sublime caput mœstissima nubes
 Asperat; et diræ riget inclementia formæ.
 Terrorem dolor augebat. Tum talia celso
 Ore tonat: (tremefacta silent, dicente tyranno,
 Atria; latratum triplicem compescuit ingens 85
 Janitor; et, presso lacrymarum fonte, resedit
 Cocytos, tacitisque Acheron obmutuit undis,
 Et Phlegethontææ requiêrunt murmura ripæ.)
 "Atlantis Tegææ nepos, commune Profundis
 Et Superis numen, qui fas per limen utrumque 90
 Solus habes, geminoque facis commercia mundo,
 I, celeres proscinde Notos, et jussa superbo
 Redde Jovi: Tantumne tibi, sævissime fratrum,
 In me juris erit? sic nobis noxia vires
 Cum cœlo Fortuna tulit? num robur et arma 95
 Perdidimus, si rapta dies? an forte jacentes
 Ignavosque putas, quod non Cyclopia tela
 Stringimus, aut vanas tonitru deludimus aures?
 Nonne satis visum, grati quod luminis experts
 Tertia supremæ patior dispendia sortis, 100
 Informesque plagas; cum te lætissimus ornet
 Signifer? et vario cingant splendore Triones?

Sed thalamis etiam prohibes? Nereia glauco
 Neptunum gremio complectitur Amphitrite.
 Te consanguineo recipit, post fulmina fessum, 105
 Juno sinu: quid enim narrem Latonia furti?
 Quid Cererem, magnamque Themis? tibi tanta creandi
 Copia: te felix natorum turba coronat.
 Ast ego, desertâ mœrens inglorius aulâ,
 Implacidas nullo solabor pignore curas? 110
 Non adeo toleranda quies. Primordia testor
 Noctis, et horrendæ stagna intemerata paludis,
 Si dicto parere negas, patefacta ciebo
 Tartara: Saturni veteres laxabo catenas:
 Obducam tenebris lucem: compage solutâ, 115
 Fulgidus umbroso miscebitur axis Averno."

Vix ea fatus erat; jam nuntius astra tenebat:
 Audierat mandata pater; secumque volutat,
 Diversos ducens animos, quæ tale sequatur
 Conjugium, Stygiosque velit, pro sole, recessus. 120
 Certa requirenti tandem sententia sedit.

Hænnææ Cereri proles optata virebat
 Unica; nec tribuit sobolem Lucina secundam;
 Fessaque post primos hæserunt viscera partus,
 Infecunda quidem; sed cunctis altior exstat 125
 Matribus, et numeri damnum Proserpina pensat.
 Hanc fovet, hanc sequitur. Vitulam non blandius ambit
 Torva parens, pedibus quæ nondum proterit arva,
 Nec nova lunatæ curvavit germina frontis.
 Jam vicina toro plenis adoleverat annis 130
 Virginitas: tenerum jam pronuba flamma pudorem
 Sollicitat; mixtæque tremuit formidine votum.
 Personat aula procis: pariter pro virgine certant
 Mars clypeo melior, Phœbus præstantior arcu.
 Mars donat Rhodopen, Phœbus largitur Amyclas,
 Et Delon, Clariosque lares. Hinc æmula Juno, 136
 Hinc poscit Latona nurum. Despexit utramque
 Flava Ceres; raptusque timens, (heu cæca futuri!)
 Commendat Siculis furtim sua gaudia terris,
 Ingenio confisa loci. Trinacria quondam 140

Italiæ pars una fuit: sed pontus et æstus 141
 Mutavère situm: rupit confinia Nereus
 Victor, et abscissos interluit æquore montes;
 Parvaque cognatas prohibent discrimina terras.
 Nunc illam, sociâ raptam tellure, trisulcam 145
 Opponit natura mari: caput inde Pachyui
 Respuit Iönias prætentis rupibus iras;
 Hinc latrat Gætula Thetis, Lilybæaque pulsat
 Brachia consurgens; hinc, dedignata teneri,
 Concutit objectum rabies Tyrrhena Pelorum. 150
 In medio scopulis se porrigit Ætna perustis;
 Ætna Giganteos nunquam tacitura triumphos;
 Enceladi bustum, qui, saucia terga revinctus,
 Spirat inexhaustum flagranti pectore sulfur.
 Et, quoties detrectat onus cervice rebeli 155
 In dextrum lævumve latus, tunc insula fundo
 Vellitur, et dubiæ nutant cum mœnibus urbes.
 Ætnæos apices solo cognoscere visu,
 Non aditu tentare, licet: pars cætera frondet
 Arboribus: teritur nullo cultore cacumen. 160
 Nunc vomit indigenas nimbos; piceâque gravatum
 Fœdat nube diem: nunc molibus astra lacessit
 Terrificis, damnisque suis incendia nutrit.
 Sed, quamvis nimio fervens exuberet æstu,
 Scit nivibus servare fidem; pariterque favillis 165
 Durescit glacies, tanti secreta vaporis,
 Arcano defensa gelu: fumoque fideli
 Lambit contiguas innoxia flamma pruinas.
 Quæ scopulos tormenta rotant? quæ tanta cavernas
 Vis glomerat? quo fonte ruit Vulcanius amnis? 170
 Sive quod objicibus discurrens ventus opertis
 Offenso per saxa furit rimosa meatu,
 Dum scrutatur iter, libertatemque repositens,
 Putria multivagis populatur flatibus antra;
 Seu mare, sulfurei ductum per viscera montis, 175
 Oppressis ignescit aquis, et pondera librat.
 Hic ubi servandum mater fidissima pignus
 Abdidit, ad Phrygios tendit secreta penates;

Turrigeramque petit Cybelen, sinuosa draconum
Membra regens, volucris qui pervia nubila tractu 180
Signant, et placidis humectant frena venenis.

Frontem crista tegit : pingunt maculosa virentes
Terga notæ : rutilum squamis intermicat aurum.
Nunc spiris Zephyros tranant : nunc arva volatu
Inferiore secant. Cano rota pulvere labens 185

Sulcatam fecundat humum : flavescit aristis
Orbita : surgentes condunt vestigia culmi :
Vestit iter comitata seges. Jam linquitur Ætna :
Totaque decrescit refugo Trinacria visu.

Heu ! quoties, præsaga mali, violavit oborto 190
Rore genas ! quoties oculos ad tecta retorsit,
Talia voce movens ! " Salve, gratissima tellus,
Quam nos prætulimus cœlo ! Tibi gaudia nostri
Sanguinis, et caros uteri commendo labores.

Præmia digna manent : nullos patiêre ligones, 195
Et nullo rigidi versabere vomeris ictu :
Sponte tuus florebit ager : cessante juvenco,
Ditior oblatas mirabitur incola messes."

Sic ait, et fulvis serpentibus attigit Iden.
Hic ædes augusta Deæ, templique colendi 200
Relligiosa silex, densis quam pinus opacat
Frondebis, et, nullâ lucos agitante procellâ,
Stridula coniferis modulatur carmina ramis.

Terribiles intus thiasi, vesanaque mixto
Concentu delubra gemunt : ululatibus Ide 205
Bacchatur : timidas inclinant Gargara silvas.

Postquam visa Ceres, mugitum tympana frenant ;
Conticuere chori ; Corybas non impulit ense ;
Non buxus, non æra sonant : blandasque leones
Submisere jubar. Adytis gavisâ Cybelle 210
Exsilit, et pronas intendit ad oscula turres.

Viderat hæc dudum summâ speculatus ab arce
Jupiter, ac Veneri mentis penetralia nudat.
" Curarum secreta tibi, Cytherea, fatebor.
Candida Tartareo nuptum Proserpina regi 215
Jamdudum decreta dari. Sic Atropos urget :

Sic cecinit longæva Themis. Nunc, matre remotâ,
 Rem peragi tempus. Fines invade Sicanos,
 Et Cereris prolem patulis illudere campis,
 Crastina puniceos cum lux detexerit ortus, 220
 Coge, tuis armata dolis; quibus urere cuncta,
 Me quoque sæpe, soles. Cur ultima regna quiescunt?
 Nulla sit immunis regio, nullumque sub umbris
 Pectus inaccensum Veneri. Jam tristis Erinnyis
 Sentiat ardores: Acheron, Ditisque severi 225
 Ferrea lascivis mollescant corda sagittis."

Accelerat præcepta Venus; jussuque parentis,
 Pallas, et inflexo quæ terret Mænala cornu,
 Addunt se comites. Divino semita gressu
 Claruit: augurium qualis laturus iniquum 230
 Præpes sanguineo dilabitur igne cometes,
 Prodigiale rubens: non illum navita tuto,
 Non impune vident populi: sed crine minaci
 Nuntiat aut ratibus ventos, aut urbibus hostes.

Devenêre locum, Cereris quo tecta [nitebant,] 235
 Cyclopum firmata manu: stant ardua ferro
 Mœnia: ferrati postes: immensaque nectit
 Claustrâ chalybs. Nullum tanto sudore Pyracmon,
 Nec Steropes, construxit opus: nec talibus unquam
 Spiravêre Notis animæ; nec flumine tanto 240
 Incoctum maduit lassâ fornace metallum.

Atriâ vestit ebur: trabibus solidatur aënis
 Culmen; et in celsas surgunt electra columnas.
 Ipsa domum tenero mulcens Proserpina cantu
 Irrita texebat redituræ munera matri. 245

Hic elementorum seriem, sedesque paternas,
 Insignibat acu: veterem quâ lege tumultum
 Discrevit Natura parens, et semina justis
 Discessêre locis: quidquid leve, fertur in altum:
 In medium graviora cadunt: incanduit æther: 250
 Egit flamma polum: fluxit mare: terra pendit.
 Nec color unus inest: stellas accendit in auro;
 Ostro fundit aquas; attollit litora gemmis,
 Filaque mentitos [jamjam cælantia] fluctus

Arte tument : credas illidi cautibus algam, 255
 Et raucum bibulis inserpere murmur arenis.
 Addit quinque plagas : mediam subtemine rubro
 Obsessam fervore notat : squalebat adustus
 Limes, et assiduo sitiebant stamina sole :
 Vitales utrimque duas ; quas mitis oberrat 260
 Temperies, habitanda viris : tum fine supremo
 Torpentes traxit geminas, brumâque perenni
 Fœdat, et æterno contristat frigore telas.
 Necnon et patrui pingit sacraria Ditis,
 Fatalesque sibi Manes. Nec defuit omen : 265
 Præscia nam subitis maduerunt fletibus ora.

Coeperat et vitreis summo jam margine texti
 Oceanum sinuare vadis ; sed, cardine verso,
 Sentit adesse Deas, imperfectumque laborem
 Deserit ; et niveos infecit purpura vultus, 270
 Per liquidas succensa genas ; castæque pudoris
 Illuxêre faces. Non sic decus ardet eburnum,
 Lydia Sidonio quod femina tinxerit ostro.

Merserat unda diem : sparso nox humida somno
 Languida cœruleis invexerat otia bigis. 275
 Jamque viam Pluton superas molitur ad auras,
 Germani monitu : torvos invisâ jugales
 Alecto temone ligat, qui pascua mandunt
 Cocyti, spatiisque Erebi nigrantibus errant ;
 Stagnaue tranquillæ potantes marcida Lethes, 280
 Ægra soporatis spumant oblivia linguis :
 Orphnæus crudele micans, Æthonque sagittâ
 Ocyor, et Stygii sublimis gloria Nycteus
 Armenti, Ditisque notâ signatus Alastor,
 Stabant ante fores juncti, sævumque fremebant, 285
 Crastina venturæ spectantes gaudia prædæ.

CL. CLAUDIANI

IN LIBRUM II.

RAPTÛS PROSERPINÆ

PRÆFATIO

AD FLORENTINUM.



OTIA sopitis ageret cum cantibus Orpheus,
Neglectumque diu seposuisset ebur ;
Lugebant erepta sibi solatia Nymphæ :
Quærebant dulces flumina mœsta modos :
Sæva feris natura redît ; metuensque leonum, 5
Implorat citharæ vacca tacentis opem.
Illius et durî flevêre silentia montes,
Silvaque, Bistoniam sæpe secuta chelyn.
Sed, postquam Inachiis Alcides missus ab Argis
Thracia pacifero contigit arva pede, 10
Diraque sanguinei vertit præsepia regis,
Et Diomedeos gramine pavit equos ;
Tum, patriæ festo lætatus tempore, vates
Desuetæ repetît fila canora lyræ ;
Et, resides lævi modulatus pectine nervos, 15
Pollice festino mobile duxit ebur.
Vix auditus erat : venti frenantur et undæ :
Pigrior adstrictis torpuit Hebrus aquis :
Porrexit Rhodope sitièntes carmina rupes :
Excussit gelidas pronior Ossa nives : 20

| | |
|--|----|
| Ardua nudato descendit populus Hæmo ; | 21 |
| Et comitem quercum pinus amica trahit : | |
| Cirrhaëasque Dei quamvis despexerit artes, | |
| Orpheis laurus vocibus acta venit. | |
| Securum blandi leporem fovère Molossi ; | 25 |
| Vicinumque lupo præbuit agna latus : | |
| Concordes variâ ludunt cum tigride damæ ; | |
| Massylam cervi non timuère jubam. | |
| Ille novercales stimulos, actusque canebat | |
| Herculis, et forti monstra subacta manu ; | 30 |
| Qui timidæ matri pressos ostenderit angues, | |
| Intrepidusque fero riserit ore puer. | |
| “ Te neque, Dictæas quatiens mugitibus urbes, | |
| Taurus, nec Stygii terruit ira canis ; | |
| Non Leo, sidereos cœli rediturus ad axes, | 35 |
| Non, Erymanthæi gloria montis, aper. | |
| Solvis Amazonios cinctus ; Stympthalidas arcu | |
| Appetis ; occiduo ducis ab orbe greges ; | |
| Tergeminique ducis numerosos dejicis artus ; | |
| Et toties uno victor ab hoste redis. | 40 |
| Non cadere Antæo, non crescere profuit hydræ : | |
| Non cervam volucres eripuère pedes. | |
| Caci flamma perit : rubuit Busiride Nilus : | |
| Prostratis rubuit nubigenis Pholoë. | |
| Te Libyci stupuère sinus : te maximus Atlas | 45 |
| Horruit, imposito cum premerere polo. | |
| Firmior Herculeâ mundus cervice pependit. | |
| Lustrârunt humeros Phœbus et astra tuos.” | |
| Thracius hæc vates : sed tu Tiryntius alter, | |
| Florentine, mihi : tu mea plectra moves : | 50 |
| Antraque Musarum, longo torpentia somno, | |
| Excutis, et placidos ducis in orbe choros. | |

RAPTUS PROSERPINÆ.

LIBER II.

IMPULIT Iōnios præmisso lumine fluctus,
Nondum pura, dies : tremulis vibravit in undis
Ardor, et errantes ludunt per cœrula flammæ.
Jamque audax animi, fidæque oblita parentis,
Fraude Dionæâ riguos Proserpina saltus 5

(Sic Parcæ voluêre) petit. Ter, cardine verso,
Præsagum cecinêre fores : ter, conscia fati,
Flebile terrificis gemuit mugitibus Henna.
Nullis illa tamen monstris, nulloque tenetur
Prodigio. Comites gressum junxêre sorores. 10

Prima, dolo gaudens, et tanti callida voti,
It Venus, et raptus metitur corde futuros,
Jam durum flexura Chaos ; jam, Dite subacto,
Ingenti famulos Manes ductura triumpho.
Illi multifidos crinis sinuatur in orbes, 15

Idaliâ divisus acu : sudata marito
Fibula purpureos gemmâ suspendit amictus.

Candida Parrhasii post hanc regina Lycei,
Et Pandionias quæ cuspide protegit arces,
Utraque virgo, ruunt : hæc tristibus aspera bellis ;
Hæc metuenda feris. Tritonia casside fulvâ 21

Cælatum Typhona gerit, qui, summa peremptus,
Imâ parte viget, moriens et parte superstes ;
Hastaque, terribili surgens per nubila gyro,
Instar habet silvæ : tantum stridentia colla 25
Gorgonos obtentu pallæ fulgentis inumbrat.

At Triviæ lenis species, et multus in ore
Frater erat ; Phœbique genas et lumina Phœbi

Esse putes; solusque dabat discrimina sexus.
 Brachia nuda nitent: levibus projecerat auris 30
 Indociles errare comas; arcuque remisso
 Otia nervus agit: pendent post terga sagittæ.
 Crispatur gemino vestis Gortynia cinctu,
 Poplite fusa tenus; motoque in stamine Delos
 Errat, et aurato trahitur circumflua ponto. 35
 Quas inter Cereris proles, nunc gloria matris,
 Mox dolor, æquali tendit per gramina passu,
 Nec membris nec honore minor; potuitque videri
 Pallas, si clypeum, si ferret spicula, Phœbe.
 Collectæ tereti nodantur iaspide vestes. 40
 Pectinis ingenio nunquam felicior arti
 Contigit eventus: nullæ sic consona telæ
 Fila, nec in tantum veri duxêre figuram.
 Hic Hyperionio Solem de semine nasci
 Fecerat, et pariter, formâ sed dispare, Lunam, 45
 Auroræ noctisque duces: cunabula Tethys
 Præbet, et infantes gremio solatur anhelos;
 Cœruleusque sinus roseis radiatur alumnis.
 Invalidum dextro portat Titana lacerto,
 Nondum luce gravem, nec pubescentibus alte 50
 Cristatum radius: primo clementior ævo
 Fingitur, et tenerum vagitu despuat ignem.
 Lævâ parte soror vitrei libamina potat
 Uberis, et parvo signatur tempora cornu.
 Tali luxuriat cultu. Comitantur euntem 55
 Naïdes, et sociâ stipant utrimque coronâ,
 Quæ fontes, Crinise, tuos, et saxa rotantem
 Pantagiam, nomenque, Gelan, qui præbuit urbi,
 Concelebrant; quas pigra vado Camarina palustri,
 Quas Arethusæi latices, quas advena nutrit 60
 Alphæus. Cyane totum supereminet agmen.
 Qualis Amazonidum peltis exsultat aduncis
 Pulchra cohors, quoties, Arcton populata, virago
 Hippolyte niveas ducit post prælia turmas;
 Seu flavos stravêre Getas, seu forte rigentem 65

Thermodontiacâ Tanaiâ fregère securi. 66
 Aut quales referunt Baccho sollennia Nymphæ
 Mæoniæ, quas Hermus alit, ripasque paternas
 Percurrunt auro madidæ; lætatur in antro
 Amnis, et undantem declinat prodigus urnam. 70

Viderat herboso sacrum de vertice vulgus
 Henna, parens florum; curvâque in valle sedentem
 Compellat Zephyrum: "Pater o gratissime veris,
 Qui mea lascivo regnas per prata meatu
 Semper, et assiduis irroras flatibus annum, 75
 Respice Nympharum cœtus, et celsa Tonantis
 Germina, per nostros dignantia ludere campos.
 Nunc adsis, faveasque, precor: nunc omnia fetu
 Pubescant virgulta, velis; ut fertilis Hybla
 Invideat, vineique suos non abnuat hortos. 80
 Quidquid thuriferis spirat Panchaia silvis,
 Quidquid odoratus longe blanditur Hydaspes,
 Quidquid ab extremis ales longæva Sabæis
 Colligit, optato repetens exordia busto,
 In venas disperse meas, et flamine largo 85
 Rura fove: merear divino pollice carpi;
 Et nostris cupiant ornari numina sertis."

Dixerat. Ille novo madidantes nectare pennas
 Concutit, et glebas fecundo rore maritat:
 Quâque volat, vernus sequitur rubor: omnis in herbas
 Turget humus, medioque patent convexa sereno: 91
 Sanguineo splendore rosas, vaccinia nigro
 Induit, et dulci violas ferrugine pingit.
 Parthica quæ tantis variantur cingula gemmis,
 Regales vinctura sinus? quæ vellera tantum 95
 Ditibus Assyrii spumis fucantur æni?
 Non tales volucer pandit Junonius alas:
 Nec sic innumeros arcu mutante colores
 Incipiens redimitur hiems, cum tramite flexo
 Semita discretis interviret humida nimbis. 100

Forma loci superat flores: curvata tumore
 Parvo planities, et mollibus edita clivis

Creverat in collem : vivo de pumice fontes
 Roscida mobilibus lambebant gramina rivis.
 Silvaeque torrentes ramorum frigore soles 105
 Temperat, et medio brumam sibi vindicat æstu.
 Apta fretis abies, bellis accommoda cornus,
 Quercus amica Jovi, tumulos tectura cupressus,
 Ilex plena favis, venturi præscia laurus:
 Fluctuat hîc denso crispata cacumine buxus; 110
 Hîc hederæ serpunt; hîc pampinus induit ulmos.
 Haud procul inde lacus (Pergum dixêre Sicani)
 Panditur, et, nemorum frondoso margine cinctus,
 Vicinis pallescit aquis: admittit in altum
 Cernentes oculos; et late pervius humor 115
 Ducit inoffensos liquido sub gurgite visus;
 Imaque perspicui prodit secreta profundî.

Huc elapsa cohors gaudent per florea rura.
 Hortatur Cytherea, legant: "Nunc ite, sorores,
 Dum matutinis præsudat solibus aër, 120
 Dum meus humectat flaventes Lucifer agros,
 Roranti prævectus equo." Sic fata, doloris
 Carpit signa sui. Varios tum cætera saltus
 Invasêre cohors. Credas examina fundi
 Hyblæum raptura thymum, cum cerea reges 125
 Castra movent, fagique cavâ demissus ab alvo
 Mellifer electis exercitus obstrepat herbis.

Pratorum spoliatur honos. Hæc lilia fuscis
 Intexit violis: hanc mollis amaracus ornat:
 Hæc graditur stellata rosis; hæc alba ligustria. 130
 Te quoque, flebilibus mœrens Hyacinthe figuris,
 Narcissumque, metunt, nunc inclyta germina veris,
 Præstantes olim pueros: tu natus Amyclis;
 Hunc Helicon genuit: te disci perculit error;
 Hunc fontis decepit amor: te fronte retusâ 135
 Delius, hunc fractâ Cephisus arundine luget.

Æstuat ante alias avido fervore legendi
 Frugiferæ spes una Dææ: nunc vimine texto
 Ridentes calathos spoliis agrestibus implet:

Nunc sociat flores, seseque ignara coronat, 140
 Augurium fatale tori. Quin ipsa tubarum
 Armorumque potens, dextram, quâ fortia turbat
 Agmina, quâ stabiles portas et mœnia vellit,
 Jam levibus laxat studiis, hastamque reponit,
 Insolitisque docet galeam mitescere sertis. 145
 Ferratus lascivit apex; horrorque recessit
 Martius, et cristæ pacato fulgure vernant.
 Nec, quæ Parthenium canibus scrutatur odorem,
 Adspersa choros; libertatemque comarum
 Injectâ tantum voluit frenare coronâ. 150
 Talia virgineo passim dum more geruntur,
 Ecce, repens mugire fragor, configere turres,
 Pronaque vibratis radicibus oppida verti.
 Causa latet. Dubios agnovit sola tumultus
 Diva Paphi, mixtoque metu perterrita gaudet. 155
 Jamque per anfractus animarum rector opacos
 Sub terris quærebat iter, gravibusque gementem
 Enceladum calcabat equis: immania findunt
 Membra rotæ; pressâque gigas cervice laborat,
 Sicaniâ cum Dite ferens; tentatque moveri 160
 Debilis, et fessis serpentibus impedit axem:
 Fumida sulfureo prælabitur orbita dorso.
 Ac, velut occultus securum prodit in hostem
 Miles, et, effossi subter fundamina campi,
 Transilit elusos arcano limite muros, 165
 Turbaque deceptas victrix erumpit in arces,
 Terrigenas imitata viros: sic tertius hæres
 Saturni latebrosa vagis rimatur habenis
 Devia, fraternum cupiens exire sub orbem.
 Janua nulla patet: prohibebant undique rupes 170
 Oppositæ, durâque Deum compage tenebant.
 Non tulit ille moras; indignatusque, trabali
 Saxa ferit sceptro. Siculæ tonuere cavernæ:
 Turbatur Lipare: stupuit, fornace relictâ,
 Mulciber, et trepidus dejecit fulmina Cyclops. 175
 Audiit, et si quem glacies Alpina cœrcet,

Et qui te, Latii nondum præcincte tropæis
Thybrî, natat, missamque Pado qui remigat alnum.

Sic, cum Thessaliam scopulis inclusa tenêret,
Peneo stagnante, palus, et mersa negarent 180
Arva coli, trifidâ Neptunus cuspide montes
Impulit adversos: tum forti saucius ictu
Dissiluit gelido vertex Ossæus Olympo.
Carceribus laxantur aquæ; fractoque meatu,
Redduntur fluviusque mari tellusque colonis. 185

Postquam, victa manu, duros Trinacria nexus
Solvit, et immenso late discessit hiatu;
Apparet subitus cœlo timor: astra viarum
Mutavêre fidem: vetito se proluit Arctos
Æquore: præcipitat pigrum formido Booten: 190
Horruit Orion: audito palluit Atlas
Hinnitu: rutilos obscurat anhelitus axes
Discolor; et longâ solitos caligine pasci
Terruit orbis equos: pressis hæsêre lupatis,
Attoniti meliore polo; rursusque verendum 195
In Chaos obliquo pugnant temone reverti.
Mox, ubi pulsato senserunt verbera tergo,
Et solem didicêre pati, torrentius amne
Hiberno, tortâque ruunt perniciosus hastâ,
Quantum non jaculum Parthi, non impetus Austri,
Non leve sollicitæ mentis discurrit acumen. 201

Sanguine frena calent; corrumpit spiritus auras
Letifer: infectæ spumis vitiantur arenæ.
Diffugiunt nymphæ: rapitur Proserpina curru,
Imploratque Deas. Jam Gorgonos ora revelat 205
Pallas, et intento festinat Delia cornu:
Nec patruo cedunt. Stimulat communis in arma
Virginitas; crimenque feri raptoris acerbat.
Ille, velut, stabuli decus armentique, juvencam
Cum leo possedit, nudataque viscera fodit 210
Unguibus, et rabiem totos exegit in armos,
Stat crassâ turpis sanie, nodosque jubarum
Excutit, et viles pastorum despicit iras.

“ Ignavi domitor vulgi, teterrime fratrum !”

Pallas ait, “ quæ te stimulis facibusque profanis
Eumenides movêre ? tuâ cur sede relictâ 216

Audes Tartareis cœlum incestare quadrigis ?

Sunt tibi deformes Diræ : sunt altera Lethes

Numina : sunt tristes Furia, te conjuge dignæ.

Fratris linque domos : alienam desere sortem : 220

Nocte tuâ contentus abi. Quid viva sepultis

Admisces ? nostrum quid proteris advena mundum ?”

Talia vociferans avidos transire minaci

Cornipedes umbone ferit, clypeique retardat

Objice, Gorgoneisque premens assibilat hydri,

Prætentâque operit cristâ. Libratur in ictum 225

Fraxinus, et nigros illuminat obvia currus.

Missaque pæne foret, ni Jupiter, æthere vulso,

Pacificas rubri torsisset fulminis alas,

Confessus socerum. Nimbis Hymenæus hiulcis

Intonat ; et testes firmant connubia flammæ. 231

Invitæ cessâre Deæ. Compescuit arcum

Cum gemitu, talesque dedit Latonia voces :

“ Sis memor, o ! longumque vale ! Reverentia pa-
tris

Obstitit auxilio : nec nos defendere contra 235

Possumus : imperio vinci majore fatemur.

In te conjurat genitor ; populoque silenti

Traderis, heu ! cupidas non adspectura sorores,

Æqualemque chorum. Quæ te Fortuna supernis

Abstulit, et tanto damnavit sidera luctu ?- 240

Jam neque Partheniis innectere retia lustris,

Nec pharetram gestare libet. Securus ubique

Spumet aper, sævumque fremant impune leones.

Te juga Tâÿgeti, posito te Mænala flebunt

Venatu ; mœstoque diu lugebere Cyntho. . 245

Delphica quinetiam fratris delubra tacebunt.”

Interea volucri fertur Proserpina curru,

Cæsariem diffusa Noto ; planctuque lacertos

Verberat, et questus ad nubila rumpit inanes :

“ Cur non torsisti manibus fabricata Cyclopum

In nos tela, pater? sic me crudelibus umbris 251
 Tradere, sic toto placuit depellere mundo?
 Nullane te flectit pietas? nihilumne paternæ
 Mentis inest? tantas quo crimine movimus iras?
 Non ego, cum rapido sæviret Phlegra tumultu, 255
 Signa Deis adversa tuli: non robore nostro
 Ossa pruinosa vexit glacialis Olympos.
 Quod conata nefas, aut cujus conscia noxæ,
 Exsul ad immanes Erebi detrudor hiatus?
 O fortunatas, alii quascumque tulerunt 260
 Raptores! saltem communi sole fruuntur.
 Sed mihi virginitas pariter cælumque negatur:
 Eripitur cum luce pudor: terrisque relictis,
 Servitum Stygio ducor captiva tyranno.
 O male dilecti flores, despectaque matris 265
 Consilia! o Veneris deprensæ serius artes!
 Mater, io! seu te Phrygiis in vallibus Idæ
 Mygdonio buxus circumsonat horrida cantu,
 Seu tu sanguineis ululantia Dindyma Gallis
 Incolis, et strictos Curetum respicis enses, 270
 Exitio succurre meo: compesce furem:
 Comprime ferales torvi prædonis habenas."
 Talibus ille ferox dictis, fletuque decoro,
 Vincitur, et primi suspiria sentit amoris.
 Tunc ferrugineo lacrymas detergit amictu, 275
 Et placidâ mœstum solatur voce dolorem:
 "Desine funestis animum, Proserpina, curis,
 Et vano vexare metu. Majora dabuntur
 Sceptra, nec indigni tædas patiêre mariti.
 Ille ego Saturni proles, cui machina rerum 280
 Servit, et immensum tendit per inane potestas.
 Amisum ne crede diem: sunt altera nobis
 Sidera, sunt orbes alii: lumenque videbis
 Purius; Elysiumque magis mirabere solem,
 Cultoresque pios. Illic pretiosior sætas, 285
 Aurea progenies, habitant: semperque tenemus,
 Quod Superi meruêre semel. Nec mollia desunt
 Præta tibi. Zephyris illic melioribus halant

Perpetui flores, quos nec tua protulit Henna.
Est etiam lucis arbor prædives opacis, 290
Fulgentes viridi ramos curvata metallo.
Hæc tibi sacra datur: fortunatumque tenebis
Auctumnum, et fulvis semper ditabere pomis.
Parva loquor. Quidquid liquidus complectitur ær,
Quidquid alit tellus, quidquid salis æquora verrunt,
Quod fluvii volvunt, quod nutrivère paludes, 296
Cuncta tuis pariter cedent animalia reguis,
Lunari subjecta globo, qui septimus auras
Ambit, et æternis mortalia separat astris.
Sub tua purpurei venient vestigia reges, 300
Deposito luxu, turbâ cum paupere mixti.
Omnia mors æquat. Tu damnatura nocentes;
Tu requiem latura piis; te iudice, soutes
Improba cogentur vitæ commissa fateri.
Accipe Lethæo famulas cum gurgite Parcas. 305
Sit fatum, quodcumque voles." Hæc fatus, ovantes
Exhortatur equos, et Tænara mitior intrat.

Conveniunt animæ, quantas truculentior Auster
Decutit arboribus frondes, aut nubibus imbres
Colligit, aut frangit fluctus, aut torquet arenas. 310
Cunctaque præcipiti stipantur sæcula cursu,
Insignem visura nurum. Mox ipse serenus
Ingreditur, facili passus mollescere risu,
Dissimilisque sui. Dominis intrantibus ingens
Assurgit Phlegethon: flagrantibus hispida rivis 315
Barba madet, totoque fluunt incendia vultu.
Occurrunt properi lectâ de plebe ministri.
Pars altos revocant currus; frenisque solutis,
Vertunt emeritos ad pascua nota jugales.
Pars aulæ tenent: alii prætexere ramis 320
Limina, et in thalamum cultas extollere vestes.

Reginam casto cinxerunt agmine matres
Elysia, teneroque levant sermone timores,
Et sparsos religant crines, et vultibus addunt
Flammea, sollicitum prævelatura pudorem. 325
Pallida lætatur regio, gentesque sepultæ

Luxuriant, epulisque vacant genialibus umbræ. 327
 Grata coronati peragunt convivia Manes.
 Rumpunt insoliti tenebrosa silentia cantus.
 Sedantur gemitus. Erebi se sponte relaxat 330
 Squalor, et æternam patitur rarescere noctem :
 Urna nec incertas versat Minoïa sortes :
 Verbera nulla sonant ; nulloque frementia luctu,
 Impia dilatis respirant Tartara pœnis.
 Non rota suspensum præceps Ixiona torquet : 335
 Non aqua Tantaleis subducitur invida labris.
 [Solvitur Ixion : invenit Tantalus undas.]
 Et Tityos tandem spatiosos erigit artus ;
 Squalentisque novem detexit jugera campi
 (Tantus erat) ; laterisque piger sulcator opaci, 340
 Invitus trahitur lasso de pectore vultur,
 Abreptasque dolet jam non sibi crescere fibras.
 Oblitæ scelerum, formidatique furoris,
 Eumenides cratera parant, et vina feroci 344
 Crine bibunt : flexisque minis, jam lene canentes,
 Extendunt socios ad pocula plena cerastas,
 Ac festas alio succendunt lumine tædas.
 Tunc et pestiferi pacatum flumen Avernī
 Innocuæ transistis, aves ; flatumque repressit
 Amsanctus : fixo tacuit torrente vorago. 350
 Tunc Acheronteos mutato gurgite fontes
 Lacte novo tumuisse ferunt, hederisque virentem.
 Coccyton dulci perhibent undâsse Lyæo.
 Stamina nec rumpit Lachesis, nec turbida sacris
 Obstrepitant lamenta choris. Mors nulla vagatur 355
 In terris, nullæque rogum planxêre parentes,
 Navita non moritur fluctu, non cuspidē miles :
 Oppida funerei pollent immunia leti.
 Impexamque senex velavit arundine frontem
 Portitor, et vacuos egit cum carmine remos. 360
 Jam suus inferno processerat Hesperus orbi.
 Ducitur in thalamum virgo. Stat pronuba juxta.
 Stellantes Nox picta sinus, tangensque cubile,
 Omina perpetuo genitalia fœdere sancit.-

Exsultant cum voce pii ; Ditisque sub aulâ 565
 Talia pervigili sumunt exordia plausu :

[“ Nostra parens] Juno, tuque, o ! germane Tonantis

Et gener, unanimis consortia discite somni,
 Mutuaque alternis innectite colla lacertis.
 Jam felix oritur proles : jam læta futuros 570
 Exspectat Natura Deos. Nova numina rebus
 Addite, et optatos Cereri proferte nepotes.”

CL. CLAUDIANI
RAPTUS PROSERPINÆ.

LIBER III.

JUPITER interea cinctam Thaumantida nimbis
Ire jubet, totoque Deos arcessere mundo.
Illa, colorato Zephyros [illapsa] volatu,
Numina conclamat pelagi; Nymphasque morantes
Increpat, et fluvios humentibus evocat antris. 5
Ancipites trepidique ruunt, quæ causa quietos
Excierit, tanto quæ res agitata tumultu.
Ut patuit stellata domus, considerare jussi.
Nec confusus honos. Cœlestibus ordine sedes
Prima datur: tractum proceres tenuêre secundum 10
Æquorei, placidus Nereus, et cœrula Phorci
Canities. Glaucum series extrema biformem
Accipit, et certo mansurum Protea vultu.
Necnon et senibus fluviis concessa sedendi
Gloria: plebeio stat cætera more juvenus, 15
Mille amnes. Liquidis incumbunt patribus udæ
Naiðes, et taciti mirantur numina Fauni.
Tum gravis ex alto genitor sic orsus Olympo:
"Abduxêre meas iterum mortalia curas,
Jampridem neglecta mihi, Saturnia postquam 20
Otia et ignavi senium cognovimus ævi,
Sopitosque diu populos torpore paterno
Sollicitæ placuit stimulis impellere vitæ,
Incultis ne sponte seges grandesceret arvis,
Undaret neu silva favis, neu vina tumerent 25

Fontibus, et totæ fremerent in pocula ripæ. 26
 Haud equidem invideo; nec enim livescere fas est,
 Vel nocuisse, Deos: sed (quod dissuasor honesti
 Luxus, et humanas oblimat copia mentes)
 Provocet ut segnes animos, rerumque remotas 30
 Ingeniosa vias paulatim exploret egestas;
 Utque artes pariat sollertia, nutriat usus.
 Nunc mihi cum magnis instat Natura querelis,
 Humanum relevare genus; durumque tyrannum,
 Immitemque, vocat; regnataque sæcula patri 35
 Commemorat; parcumque Jovem, se divite, clamat.
 Cur campos horrere situ, dumisque repleti
 Rura velim, et nullis exornem fructibus annum?
 Se jam, quæ genitrix mortalibus ante fuisset,
 In diræ subito mores transisse novercæ. 40
 Quid mentem traxisse polo, quid profuit altum
 Erexisse caput, pecudum si more pererrant
 Avia, si frangunt, communia pabula, glandes?
 Hæccine vita juvat silvestribus abdita lustris,
 Indiscreta feris? Tales cum sæpe parentis 45
 Pertulerim questus, tandem, clementior orbi,
 Chaonio statui gentes avertere victu.
 Atque adeo Cererem, quæ nunc, ignara malorum,
 Verberat Idæos torvâ cum matre leones,
 Per mare, per terras, avido discurrere luctu 50
 Decretum, natæ donec lætata repertæ
 Indicio tribuat fruges, currusque feratur
 Nubibus, ignotas populis sparsurus aristas,
 Et juga cœrulei subeant Actæa dracones.
 Quod si quis Cereri raptorem prodere Divûm 55
 Audeat; imperii molem, pacemque profundam
 Obtestor rerum, natus licet ille, sororve,
 Vel conjux fuerit, natarumve agminis una,
 Se licet ille meo conceptum vertice jactet,
 Sentiet iratum, procul ægide; sentiet ictum 60
 Fulminis; et genitum divinâ sorte pigebit,
 Optabitque mori: tunc, vulnere languidus, ipsi
 Tradetur genero, passurus prodita regna;

Et sciet an propriæ conspirent Tartara causæ.
Hoc sanctum : mansura fluant hoc ordine fata.” 65

Dixit, et horrendo concussit sidera motu.

At procul armisoni Cererem sub rupibus antri
Securam, placidamque diu, jam certa peracti
Terrebant simulacra mali; noctesque timorem
Ingeminant; omni que perit Proserpina somno. 70

Namque modo adversis invadi viscera telis,
Nunc sibi mutatas horret nigrescere vestes,
Nunc steriles mediis frondere penatibus ornos.

Stabat præterea luco dilectior omni

Laurus, virgineos quondam quæ fronde pudicâ 75

Umbrabat thalamos: hanc imâ stirpe recisam

Vidit, et incomtos fœdari pulvere ramos.

Quærentique nefas, Dryades dixere gementes,
Tartareâ Furias debellavisse bipenni.

Sed tunc ipsa, sui (jam non ambagibus ullis) 80

Nuntia, materno facies ingesta sopori.

Namque videbatur tenebroso oblecta recessu

Carceris, et sævis Proserpina vincta catenis,

Non qualem Siculis olim mandaverat arvis,

Nec qualem roseis nuper convallibus Hennæ 85

Suspexere Deæ. Squalebat pulchrior auro

Cæsaries, et nox oculorum infecerat ignes.

Exhaustusque gelu pallet rubor. Ille superbi

Flammeus oris honos, et non cessura pruinis

Membra, colorantur picei caligine regni. 90

Ergo hanc ut dubio vix tandem agnoscere visu

Evaluit; “Cujus tot poenæ criminis?” inquit.

“Unde hæc informis macies? cui tanta facultas

In me sævitæ? rigidi cur vincula ferri,

Vix aptanda feris, molles meruere lacerti? 95

Tu, mea tu proles? an vanâ fallimur umbrâ?”

Illa refert: “Heu! dura parens, natæque peremtæ

Immemor, heu! fulvas animo transgressa lænās!

Tantane te nostri tenuere oblivia? tantum

Unica despicio? Certe Proserpina nomen 100

Dulce tibi, tali quæ nunc, ut cernis, hiatu

Supplicii inclusa terror. Tu sæva choreis 102
 Indulges, Phrygiæque etiamnum interstrepis urbes!
 Quod si non omnem pepulisti pectore matrem,
 Si tu nota Ceres, et non me Caspia tigris 105
 Edidit; his, oro, miseram defende cavernis,
 Inque superna refer. Prohibent si fata reverti;
 Vel saltem visura veni." Sic fata, trementes
 Tendere conatur palmas: vis improba ferri
 Impedit, et motæ somnum excussere catenæ. 110
 Obrigit visis: gaudet non vera fuisse:
 Complexu caruisse dolet. Penetralibus amens
 Prosilit, et tali compellat voce Cybellen:
 "Jam non ulterius Phrygiâ tellure morabor,
 Sancta parens. Revocat tandem custodia cari 115
 Pignoris, et cunctis objecti fraudibus anni.
 Non mihi, Cyclopum quamvis exstructa caminis,
 Culmina fida satia. Timeo, ne Fama latebras
 Prodiderit, leviusque meum Trinacria celet
 Depositum. Terret nimium vulgata locorum 120
 Nobilitas. Aliis sedes obscurior oris
 Exquirenda mihi. Gemitu flammisque propinquis
 Enceladi nequeunt umbracula nostra taceri.
 Somnia quin etiam variis infausta figuris
 Sæpe monent; nullusque dies non triste minatur 125
 Augurium. Quoties flaventia sarta comarum
 Sponte cadunt! quoties exundat ab ubere sanguis;
 Larga vel invito prorumpunt flumina vultu,
 Injussæque manus mirantia pectora tundunt!
 Si buxos inflare velim, ferale gemiscunt: 130
 Tympana si quatiâ, planctus mihi tympana reddunt.
 Ah! vereor, ne quid portendant omina veri!
 Heu! longæ nocuere moræ!" "Procul irrita venti
 Dicta ferant," subicit Cybele: "non tanta Tonanti
 Segnities, ut non pro pignore fulmina mittat. 135
 I tamen, et nullo turbata revertere casu."

Hæc ubi, digreditur templis. Sed nulla ruenti
 Mobilitas: tardos queritur non ire jugales;
 Immeritasque movens alterno verbere [pinna],

Sicaniam quærit, cum necdum absconderit Iden. 140
 Cuncta pavet, speratque nihil. Sic æstuat ales,
 Quæ teneros humili fetus commiserit orno,
 Allatura cibos; et plurima cogitat absens;
 Ne fragilem ventus decusserit arbore nidum;
 Neu furtum pateant homini, neu præda colubris. 145

Ut domus excubiis incustodita remotis,
 Et resupinato neglecti cardine postes,
 Flebilis et tacitæ species apparuit aulæ,
 Non [expectato] respectu cladis, amictus
 Conscidit, et fractas cum crine avellit aristas. 150

Hæserunt lacrymæ: non vox, non spiritus oris,
 Redditur; atque imis vibrat tremor ossa medullis.
 Suceidui titubant gressus; foribusque reclusis,
 Dum vacuas sedes et desolata pererrat
 Atria, semirutas confuso stamine telas, 155

Atque interceptas agnoscit pectinis artes.
 Divinus perit ille labor; spatiumque relictum
 Audax sacrilego supplebat aranea textu.
 Nec deflet, plangitve malum: tamen oscula telæ
 Figit, et abruptit mutas in fila querelas. 160

Attritosque manu radios, projectaque pensa,
 Cunctaque virgineo sparsa oblectamina ludo,
 Ceu natam, pressat gremio: castumque cubile
 Desertosque toros, et, sicubi sederat olim,
 Perlegit: attonitus stabulo ceu pastor inani, 165

Cui pecus aut rabies Pœnorum inopina leonum,
 Aut populatrices infestavêre catervæ:
 Serus at ille redit, vastataque pascua lustrans,
 Non responsuros ciet imploratque juvencos.

Atque ibi secretâ tectorum in parte jacentem
 Adspicit Electram, natæ quæ sedula nutrix, 171
 Oceani priscas inter notissima nymphas.

Par Cereri pietas. Hæc, post cunabula, dulci
 Ferre sinu, summoque Jovi deducere parvam
 Sueverat, et genibus ludentem aptare paternis. 175
 Hæc comes, hæc custos, hæc proxima mater haberi.
 Tum laceras effusa comas, et pulvere canba

Sordida, sideræ raptus lugebat alumna. 178
 Hanc aggressa Ceres, postquam suspiria tandem
 Laxavit frenosque dolor, "Quod cernimus," inquit,
 "Exscidium? cui præda feror? regnatne maritus?
 An cælum Titanes habent? Quæ talia vivo 182
 Ausa Tonante manus? rupitne Typhoia cervix
 Inarimen? fractâne jugi compage Vesevi,
 Alcyoneus per stagna pedes Tyrrhena cucurrit? 185
 An vicina mihi quassatis faucibus Ætna
 Protulit Enceladum? nostros an forte penates
 Appetiit centum Briareia turba lacertis?
 Heu! ubi nunc, ubi nata mihi? quo mille ministræ?
 Quo Cyane? volucres quæ vis Sirenas abegit? 190
 Hæccine vestra fides? sic fas aliena tueri
 Pignora?" Contremuit nutrix, mœrorque pudori
 Cessit; et adspectus miseræ non ferre parentis
 Emtum morte velit: longumque immota moratur
 Auctorem dubium, certumque expromere funus. 195
 Vix tamen hæc: "Acies utinam vesana Gigantûm
 Hanc dederit cladem! levius communia tangunt.
 Sed Divæ, multoque minus quod rere, sorores,
 In nostras nimium conjuravêre ruinas.
 Insidias Superûm, cognatæ vulnera cernis 200
 Invidiæ. Phlegrâ nobis infensior æther.
 Florebat tranquilla domus: nec limina virgo
 Linquere, nec virides audebat visere saltus,
 Præceptis obstricta tuis. Telæ labor illi,
 Sirenes requies; sermonum gratia mecum, 205
 Mecum somnus erat, cautique per atria ludi.
 Cum subito (quonam, dubium, monstrante, latebras
 Rescierit) Cytherea venit; suspectaque nobis
 Ne foret, hinc Phœben, comites, hinc Pallada junxit.
 Protinus effuso lætam se fingere risu; 210
 Nec semel amplecti, nomenque iterare sororis,
 Et durâ de matre queri, quæ tale recessu
 Maluerit damnare decus, vetitoque Dearum
 Colloquio, patriis procul amandaverit astris.
 Nostra, rudis, gaudere malis, et nectare largo 215

Instaurare dapes. Nunc arma habitumque Dianæ
Induitur, digitisque attentat mollibus arcum.
Nunc, crinita jubis, galeam, laudante Minervâ,
Implet, et ingentem clypeum gestare laborat.
Prima Venus campos Hennæaque rura maligno 220
Ingerit afflatu. Vicinos callida flores
Ingeminat; meritumque loci, velut inscia, quærit.
Nec credit, quod bruma rosas innoxia servet,
Quod gelidi rubeant alieno germine menses,
Verna nec iratum timeant virgulta Booten. 225
Dum loca miratur, studio dum flagrat eundi,
Persuadet. Teneris, heu, lubrica moribus ætas!
Quos ego nequidquam planctus, quas irrita fudi
Ore preces! Ruit illa tamen, confisa sororum
Præsidio: famulæ longo post ordine nymphæ. 230
Itur in æterno vestitos gramine campos;
Et primâ sub luce legunt, cum rore serenus
Albet ager, sparsosque bibunt violaria succos.
Sed, postquam medio sol institit altior axi,
Ecce polum nox fœda rapit, tremefactaque nutat 235
Insula cornipedum pulsu, strepituque rotarum.
Nôsse nec aurigam licuit. Seu mortifer æstus,
Seu Mors ipsa fuit; lûror permanat in herbas:
Deficiunt rivi: squalent rubigine prata:
Et nihil afflatum vivit: pallere ligustra, 240
Exspirare rosas, decrescere lilia vidi.
Ut rauco reduces tractu detorsit habenas,
Nox sua prosequitur currum; lux redditur orbi.
Persephone nusquam. Voto rediêre peracto,
Nec mansêre, Deæ. Mediis invenimus arvis 245
Exanimem Cyanen: cervix redîmita jacebat,
Et caligantes marcebant fronte coronæ.
Aggredimur subitæ, et casus scitamur heriles,
(Nam propior cladi steterat) quis vultus equorum?
Quis regat? Illa nihil: tacito sed læsa veneno, 250
Solvitur in laticem: subrepit crinibus humor:
Liquitur, in roremque pedes et brachia manant;
Nostraque mox lambit vestigia perspicuus fons.

Diacedunt aliæ. Rapidis Acheloïdes alis
Sublatæ Siculi latus obsedère Pelori ; 255

Accensæque malo, jam non impune canoras
In pestem vertère lyras : vox blanda carinas
Alligat : audito frenantur carmine remi.
Sola domi, luctu senium tractura, relinquer." 259

Hæret adhuc suspensa Ceres, et singula demens,
Ceum nondum transacta, timet : mox, lumina torquens,
Ultero in cœlicolas furiato pectore ferri.

Arduus Hyrcanâ quatitur sic matre Niphates,
Cujus, Achæmenio regi ludibria, natos
Avexit tremebundus eques. Fremit illa marito 265
Mobilior Zephyro ; totamque virentibus iram
Dispergit maculis, jamjamque haustura profundo
Ore virum, vitreæ tardatur imagine formæ.
Haud aliter toto genitrix bacchatur Olympo ;
" Reddite," vociferans : " non me vagus edidit am-
nis : 270

Non Dryadum de plebe sumus : turrita Cybelle
Me quoque Saturno genuit., Quo jura Deorum,
Quo leges abiære poli ? quid vivere recte
Proderit ? En, audet noti Cytherea pudoris
Ostentare suos, post Lemnia vincula, vultus ! 275
Hos animos bonus ille sopor, castumque cubile,
Præbuit ! amplexus hoc promeruère pudici !
Nec mirum, si turpe nihil post talia ducit.
Quid vos expertes thalami ? tantumne relictus
Virginitatis honos ? tantum mutata voluntas ? 280
Jam Veneri et sociis junctæ raptoribus itis ?

O templis Scythiæ, atque hominem sitientibus aris,
Utraque digna coli ! tanti quæ causa furoris ?
Quam mea vel dicto tenui Proserpina læsit ?
Scilicet aut caris pepulit te, Delia, silvis ; 285

Aut tibi commissas rapuit, Tritonia, pugnas ?
An gravis alloquio ? vestros an forte petebat
Importuna choros ? Atqui Trinacria longe,
Esset ne vobis oneri, deserta colebat.
Quid latuisse juvat ? rabiem livoris acerbi 290

Nulla potest placare quies." His increpat omnes
 Vocibus : ast illæ (prohibet reverentia patris) 292
 Aut reticent, aut nôsse negant; responsaque matri
 Dant lacrymas. Quid agat? Rursus se victa remittit;
 Inque humiles demissa preces, " Ignoscite, si quid
 Intumuit pietas; si quid flagrantius actum, 296
 Quam decuit miseram. Supplex dejectaque vestris
 Advolvor genibus. Liceat cognoscere sortem:
 Hoc tantum: liceat certos habuisse dolores.
 Scire peto, quæ forma mali. Quamcumque dedistis
 Fortunam, si nota, feram, fatumque putabo, 301
 Non scelus. Adspectum, precor, indulgete parenti:
 Non repetam. Quæsita manu securus habeto,
 Quisquis es: affirmo prædam: desiste vereri.
 Quod si nos aliquo prævenit fœdere raptor; 305
 Tu certe, Latona, refer. Confessa Diana
 Forte tibi. Nôsti, quid sit Lucina, quis horror
 Pro genitis, et quantus amor: partusque tulisti
 Tu geminos: hæc una mihi. Sic crine fruaris
 Semper Apollineo: sic me felicior ævum 310
 Mater agas." Largis tunc imbris ora madescunt.
 [Quid tantum est dignum fieri, dignumque taceri?]
 "Hei mihi! discedunt omnes. Quid vana moraris
 Ulterius? non bella palam cœlestia sentis?
 Quin potius natam pelago terrisque requiris? 315
 Accingar lustrare diem: per devia rerum
 Indefessa ferar: nullâ cessabitur borâ.
 Non requies, non somnus erit, dum pignus ademptum
 Inveniam; gremio quamvis mergatur Iberæ
 Tethyos, et Rubro jaceat vallata profundo. 320
 Non Rheni glacies, non me Rhipæa tenebunt
 Frigora: non dubio Syrtis cunctabitur æstu.
 Stat fines penetrare Noti, Boreæque nivalem
 Vestigare domum: primo calcabitur Atlas
 Occasu; facibusque meis lucebit Hydaspes. 325
 Impius errantem videat per rura, per urbes,
 Jupiter: extinctâ satiëtur pellice Juno.
 Insultate mihi; cœlo regnate superbi.

Ducite præclarum Cereris de stirpe triumphum."

Sic fatur, notæque jugis illabitur Ætnæ, 330
Noctivago tædas inflammatura labori.

Lucus erat prope flavum Acin, (quem candida
præfert

Sæpe mæri, pulchroque secat Galatea natatu)

Densus, et innexis Ætnæa cacumina ramis,

Quâlibet usque, tegens. Illic posuisse cruentam 335

Ægida, captivamque pater post proelia prædam

Adyexisse datur. Phlegræis silva superbit

Exuviis, totumque nemus victoria vestit.

Hic patuli rictus, hîc prodigiosa Gigantûm

Tergora dependent; et adhuc crudele minantur

Affixæ truncis facies; immaniaque ossa 341

Serpentûm passim cumulis exsanguibus albert;

Et rigidæ multo suspirant fulmine pelles:

Nullaque non magni jactat se nominis arbor.

Hæc centumgemini strictos Ægæonis enses 345

Curvatâ vix fronte levat: viventibus illa

Exsultat Cœi spoliis: hæc arma Mimantis

Sustinet: hos onerat ramos exutus Ophion.

Altior at cunctis abies, umbrosa que late,

Ipsius Enceladi fumantia gestat opima, 350

Summi terrigenûm regis; caderetque gravata

Pondere, ni lassam fulciret proxima quercus.

Inde timor numenque loco: nemorisque senectæ

Parcitur, ætherisque nefas nocuisse tropæis. 355

Pascere nullus oves, nec robora lædere, Cyclops

Audet; et ipse fugit sacrâ Polyphemus ab umbrâ.

Non tamen hoc tardata Ceres: accenditur ultro

Relligione loci, vibratque incerta securim,

Ipsum etiam per itura Jovem: succidere pinus,

Et magis enodes properat prosternere cedros, 360

Exploratque habiles truncos, rectique tenorem

Stipitis, et certo percenset brachia nisu.

Sic, qui, vecturam longinqua per sequora merces,

Molitur tellure ratem, vitamque procellis

Objectare parat, fagos metitur et alnos; 365

- Et varium rudibus silvis accommodat usum. 366
 Quæ longa est, tumidis præbebit cornua velis:
 Quæ fortis, malo potior: quæ lenta, favebit
 Remigio: stagni patiens aptanda carinæ.
 Tollebant geminæ capita inviolata cupressus 370
 Cæspite vicino; quales non rupibus Idæ
 Miratur Simois; quales non divite ripâ
 Lambit Apollinei nemoris nutritor Orontes.
 Germanas adeo credas: sic frontibus æquis
 Adstant, et socio despectant vertice lucum. 375
 Hæ placuere faces: pernix invadit utramque,
 Cincta sinus, exserta manus, armata bipenni:
 Alternasque ferit, totisque obnixa trementes
 Viribus impellit: pariter traxere ruinam, 379
 Et pariter posuere comam, campoque recumbunt,
 Faunorum Dryadumque dolor. Complectitur ambas,
 Sicut erant, alteque levat; retroque solutis
 Crinibus, adscendit fastigia montis anhelî,
 Exsuperatque æstus, et nulli pervia saxa,
 Atque indignantes vestigia calcant arenas. 385
 Qualis pestiferas animare ad crimina taxos
 Torva Megæra ruit; Cadmi seu mœnia poscat;
 Sive Thyesteis properet sævire Mycenis.
 Dant tenebræ Manesque locum, plantisque resultant
 Tartara ferratis; donec Phlegethontis ad undam
 Constitit, et plenos exceperit lampade fluctus. 391
 Postquam perventum scopuli flagrantis in ora;
 Protinus arsuras adversâ fronte cupressus
 Faucibus iniecit mediis, lateque cavernas 394
 Textit, et undantem flammaram obstruxit hiatum.
 Compresso mons igne tonat; claususque laborat
 Mulciber: obducti nequeunt [exire] vapores.
 Coniferi micuere apices: crevitque favillis
 Ætna novis: stridunt admissio sulfure rami.
 Tum, ne deficerent tantis erroribus ignes, 400
 Semper innocidos insopitosque manere
 Jussit, et arcano perfudit robora succo;
 Quo Phaëthon irrorat equos, quo Luna juvencoz.

Jamque soporiferas nocturna silentia terris
Explicuere vices : laniato pectore, longas 405
Inchoat illa vias, et sic ingressa profatur :

“ Non tales gestare tibi, Proserpina, tædas
Sperabam : sed vota mihi communia matrum,
Sed thalami festæque faces, cœloque canendus
Ante oculos Hymenæus erat. Sic Numina fati 410
Volvimur, et nullo Lachesis discrimine sævit ?
Quam nuper sublimis eram, quantisque procorum
Cingebar studiis ! Quæ non mihi, pignus ob unum,
Cedebat numerosa parens ? Tu prima voluptas,
Tu postrema mihi : per te fecunda videbar. 415
O decus, o requies, o grata superbia matris !
Quâ gessi florente Deam : quâ sospite, nusquam
Inferior Junone fui : nunc squalida, vilis.
Hoc placitum patri. Cur autem adscribimus illum
His lacrymis ? Ego te, fateor, crudelis ademi, 420
Quæ te deserui, solamque instantibus ultro
Hostibus exposui. Raucis secunda fruebar
Nimirum thiasis ; et, læta sonantibus armis,
Jungebam Phrygios, cum tu raperere, leones.
Accipe, quas merui, pœnas. En, ora fatiscunt 425
Vulneribus ; grandesque rubent in pectore sulci.
Immemor, en, uterus crebro contunditur ictu.
Quâ te parte poli, quo te sub cardine quæram ?
Quis monstrator erit ? quæ me vestigia ducent ? 429
Quis currus ? ferus ipse quis est ? terræne marisne
Incola ? quæ volucrum deprendam signa rotarum ?
Ibo, ibo, quocumque pedes, quocumque jubebit
Casus. Sic Venerem quærat deserta Dione !
Efficietne labor ? rursus te, nata, licebit
Amplecti ? manet ille decor ? manet ille genarum
Fulgor ? an infelix talem fortasse videbo, 436
Qualis nocte venis ; qualem per somnia vidi ?”

Sic ait, et primâ gressus molitur ab Ætnâ ;
Exitique reos flores, ipsumque rapinæ
Detestata locum, sequitur dispersa viarum 440
Indicia, et pleno rimatur lumine campos ;

Inclinatque faces. Omnis [madet] orbita fletu :
 Omnibus admugit. Quâcumque it in [æquore, fulvis]
 Adnata; umbra fretis; extremaque lucis imago
 Italiam Libyamque ferit : clarescit Etruscum 445
 Litus, et accenso resplendent æquore Syrtes.
 Antra procul Scyllæa petit; canibusque reductis,
 Pars stupefacta silet, pars nondum exterrita latrat.

Cætera desiderantur.

CL. CLAUDIANI

GIGANTOMACHIA.

TERRA parens quondam, cœlestibus invida regnis,
Titanumque simul crebros miserata dolores,
Omnia monstriifero complebat Tartara fetu,
Invisum genitura nefas: Phlegramque retexit,
Tantâ prole tumens, et in æthera protulit hostes. 5
Fit sonus: erumpunt Erebo; nondumque creati,
Jam dextras in bella parant, Superosque lacessunt,
Stridula volventes gemino vestigia lapsu.
Palescunt subito stellæ, flectitque rubentes
Phœbus equos, docuitque timor revocare meatus. 10
Oceanum petit Arctos; inocciduique Triones
Occasum didicere pati. Tum fervida natos
Talibus hortatur genitrix in proelia dictis:
“ O pubes domitura Deos, quodcumque videtis,
Pugnando dabitur: præstat victoria mundum. 15
Sentiat ille meas tandem Saturnius iras.
Agnoscat, quid Terra potest. Sic viribus ullis
Vincor? cur Cybele nobis meliora creavit?
Cur nullus Telluris honos? cur semper acerbis
Me damnis urgere solet? quæ forma nocendi 20
Defuit? Hinc volucrem vivo sub pectore pascit
Infelix Scythicâ fixus convalle Prometheus.
Hinc Atlantis apex flammantia pondera fulcit,
Et per canitiem glacies asperrima durat.
Quid dicam Tityon, cujus sub vulture sævo 25
Viscera nascuntur gravibus certantia pœnis?

Sed vos, o tandem veniens exercitus ultor! 27
 Solvite Titanas vinclis: defendite matrem.
 Sunt freta, sunt montes: nostris ne parcite membris.
 In Jovis exitium telum non esse recuso. 30
 Ite, precor; miscete polum; rescindite turres
 Sidereas. Rapiat fulmen sceptrumque Typhœus:
 Enceladi jussis mare serviat: alter habenas
 Auroræ, pro Sole, regat: te Delphica laurus
 Stringat, Porphyryon, Cirrhæaque templa teneto."
 His ubi consiliis animos elusit inanes; 35
 Jam credunt vicisse Deos, médiisque revinctum
 Neptunum traxisse fretis. Hic sternere Martem
 Cogitat, hic Phœbi laceros divellere crines.
 Hic sibi promittit Venerem, spiratque Dianæ 40
 Conjugium, castamque cupit violare Minervam.
 Interea Superos prænuntia convocat Iris,
 Qui fluvios, qui stagna colunt: cinguntur et ipsi
 Auxilio Manes: nec te, Proserpina, longe
 Umbrosæ tenuère fores. Rex ille silentium 45
 Lethæo vehitur curru; lucemque timentes
 Insolitam mirantur equi, trepidoque volatu
 Spissas cœruleis tenebras e naribus efflant.
 Ac velut, hostilis cum machina terruit urbem,
 Undique concurrunt arcem defendere cives; 50
 Haud secus omnigenis coëuntia Numina formis
 Ad patrias venêre domos. Tum Jupiter infit:
 "O nunquam peritura cohors! o debita semper
 Cœlo progenies, nullisque obnoxia fati!
 Cernitis, ut nostrum Tellus conjuret in orbem 55
 Prole novâ, dederitque alios interrita partus?
 Ergo, quot dederit natos, tot funera matri
 Rēddamus. Longo maneat per sæcula luctu,
 Tanto pro numero, paribus damnata sepulcris."
 Jam tuba nimborum sonuit: jam signa ruendi 60
 His æther, his Terra dedit: confusaque rursus,
 Pro domino Natura timet. Discrimina rerum
 Miscet turba potens. Nunc insula deserit æquor:
 Nunc scopuli latuère mari. Quot litora restant ;

Nuda! quot antiquas mutârunt flumina ripas! 65
 Hic rotat Hæmonium præduris rupibus Ceten:
 Hic juga connexis manibus Pangæa coruscat:
 Hunc armat glacialis Athos: hoc Ossa movente
 Tollitur: hic Rhodopen Hebri cum fonte revellit,
 Et socias truncavit aquas; summâque volutus 70
 Rupe, Giganteos humeros irrorat Enipeus.

Subsidit patulis Tellus sine culmine campis,
 In natos divisa suos. Horrendus ubique
 It fragor, et pugnae spatium discriminat aër.
 Primus terrificum Mavors non segnis in agmen 75
 Odrysios impellit equos, quibus ille Gelonos,
 Sive Getas, turbare solet. Splendenter igni
 Aureus ardescit clypeus, galeamque nitentes
 Arrexere jubæ. Tunc concitus ense Pelorum
 Transigit adverso, femorum quâ sine volutus, 80
 Duplex semiferis connectitur illibus anguis;
 Atque uno ternas animas interficit ictu.
 Tum, superinsultans, avidus languentia curru
 Membra terit, multumque rotæ sparsere cruoris.

Occurrit pro fratre Mimas, Lemnumque calentem,
 Cum lare Vulcani, spumantibus eruit undis; 85
 Et prope torsisset, si non Mavortia cuspis
 Ante terebrato cerebrum fudisset ab ore.
 Ille viro toto moriens, serpentibus imis
 Vivit adhuc stridore ferox, et parte rebeli 90
 Victorem post fata petit. Tritonia virgo
 Prosilit, ostendens rutilâ cum Gorgone pectus.
 Adspectu contenta suo, non utitur hastâ:
 Nam satis est vidisse semel: primumque furentem
 Longius in faciem saxi Pallanta reformat. 95
 Ille, procul subitis fixus sine vulnere nodis,
 Ut se letifero sensit durescere visu,
 (Et steterat jam pæne lapis) "Quo vertimur?" inquit:
 "Quæ serpit per membra silex? qui torpor inertem
 Marmoreâ me peste ligat?" Vix pauca locutus, 100
 Quod timuit, jam totus erat: sævusque Damastor,

Ad depellendos jaculum dum quæreret hostes, 102
Germani rigidum misit, pro rupe, cadaver.

Hic vero interitum fratris miratus Echion,
Inscius, auctorem dum vult tentare nocendo, 105
Te, Dea, respexit, solam quam cernere nulli
Bis licuit. Meruit sublata audacia poenas,
Et didicit cum morte Deam. Sed turbidus ira
Palleneus, oculis adversa tuentibus atrox,
Ingreditur, cæcasque manus in Pallada tendit. 110
Hunc mucrone ferit Dea comminus: ac simul angues
Gorgoneo riguere gelu, corpusque per unum
Pars moritur ferro, partes periære videndo.

Ecce autem medium spiris delapsus in æquor,
Porphyryon trepidam conatur rumpere Delon, 115
Scilicet ad superos ut torqueat improbus axes:
Horruit Ægæus: stagnantibus exsilit antris
Longævo cum patre Thetis; desertaque mansit
Regia Neptuni, famulis veneranda profundis.
Exclamant placidæ Cynthi de vertice Nymphæ; 120
Nymphæ, quæ rudibus Phœbum docuere sagittis
Errantes agitare feras, primumque gementi
Latonæ struxere torum, cum, lumina cœli
Parturiens, geminis ornaret fetibus orbem.
Implorat Pæana suum conterrita Delos, 125
Auxiliumque rogat: "Si te gratissima fudit
In nostros Latona sinus, succurre precanti.
En, iterum convulsa feror." * * * * *

Cætera desiderantur.

ΚΛΑΥΔΙΑΝΟΥ

ΕΚ ΤΗΣ

ΓΙΓΑΝΤΟΜΑΧΙΑΣ.

Κυπρις δ' ουτε βελος φερειν, ουθ' όπλον· αλλ' εκομιζει
Αγλαϊην· δεμένη γαρ επ' ομμασιν αγγελον αυδην,
Πρωτα μιν απλεκιας περὶνη διεκρινατο χαιτας,
Και πλεκτας εσφυγξε πυκνῃ περιπλεγματι σειρας.
Στιλβεί δ' οφθαλμων ερατους υπεγραψατο κανθους·
[Λεπτας] ευανεμοιο ραφας χαλασασα χιτωνος,
Πορφυρεων ου κρυπτεν υπ' είμασιν ανθεια μαζων,
Ομματος εις αγρην ωπλισμενη· ειχε γαρ αυτη
Πλεγμα κορυν, δορυ μαζον, οφρυν βελος, ασπιδα καλλος,
Όπλα μελη, δελγητρον εν αλγεσιν· ει δε τις αυτη
Ομμα βαλη, δεδμητο. * * * * *

CL. CLAUDIANI

EPISTOLÆ.

*Epist. I. — Deprecatio ad Hadrianum,
Præfectum Prætorio.*

Usque adeone tuæ producitur impetus iræ?
Nullus erit finis lacrymis? subitis favorem
Permutas odiis? Quo mens ignara nocendi,
Quo sensus abiêre pii? Tantumne licebit
Invidiæ? tantum strepitus valuère maligni? 5
Me dolor incautus, me lubrica duxerit ætas;
Me tumor impulerit; me devius egerit ardor;
Te tamen haud decuit paribus concurrere telis.
Humanæ Superos nunquam tetigêre querelæ;
Nec vaga securum penetrant convicia cælum. 10
Excessit jam pœna modum. Concede jacenti.
En, adsum; et veniam, confessus crimina, posco.
Manibus Hectoreis atrox ignovit Achilles:
Ultrices Furias matris placavit Orestes:
Reddidit Alcides Priamo, quas ceperat arces: 15
Pellæum juvenem regum flexêre ruinæ:
Darium famulis manibus doluisse peremptum
Fertur, et ingenti solatus fata sepulcro:
Tradita captivo spatiosior India Poro.
Conditor hic patriæ: sic hostibus ille pepercit. 20
Hunc virtus tua digna sequi. Quemcumque Deorum
Læsimus, insultet jugulo, pascatque furorem.

Gratia defluxit : sequitur feralis egestas.

Desolata domus : caris spoliatur amicis. 24

Hunc tormenta necant : hic undique truditur exsul.

Quid superest damnis ? quæ sæva pericula restant ?

Prætereunt subjecta feræ ; mortisque facultas

Emollit rabiem prædæ ; torvique leones,

Quæ stravisse calent, eadem prostrata relinquunt.

Nec nisi bellantis gaudet eervice juvenci 30

Nobiliore fames. Secuit nascentia fata

Livor, et ingesto turbavit gaudia luctu.

Jam jam supplicis fessos, humilesque, serenus

Respice. Quid tantâ dignaris mole clientem ?

In brevibus nunquam sese probat Æolus undis : 35

Nec capit angustus Boreæ certamina collis.

Alpes ille quatit, Rhodopeia culmina lassat.

Incubuit nunquam cœlestis flamma salictis,

Nec parvi frutices iram meruere Tonantis.

Ingentes quercus, annosas fulminat ornos. 40

Hoc pro supplicibus ramis, pro fronde Minervæ,

Hoc carmen pro thure damus. Miserere tuorum.

Me, precor, heu ! me redde mihi ; gravibusque medere

Vulneribus ; vitamque jube famamque reverti.

Quæ per te cecidit, per te fortuna resurgat. 45

Sanus Achilleâ remeavit Telephus hastâ,

Cujus pertulerat vires ; et sensit in uno

Letalem placidamque manum. Medicina per hostem

Contigit ; et pepulit, quos fecerat ipse dolores.

Quod si nec precibus, fletu nec frangeris ullo, 50

Eripe calcatis non prospera cingula Musis ;

Eripe militiam : comitem me pelle sodali.

Scilicet insignes de paupere vate triumphos !

Scilicet egregiis ornabere victor opimis !

Irruat in miseros cognata potentia cives ! 55

Audiat hæc commune solum, longeque carinis

Nota Pharos ; flentemque attollens gurgite vultum,

Nostra gemat Nilus numerosis funera ripis.

EPIST. II. — *Ad Serenam.*

Orphea cum primæ sociarent lumina tædæ,
 Ruraque compleret Thracia festus Hymen;
 Certavêre feræ, picturatæque volucres,
 Dona suo vati quæ potiora darent;
 Quippe antri memores, cautes ubi sæpe sonoræ 5
 Præbuerant dulci mira theatra lyræ.
 Caucaseo crystalla ferunt de vertice lynces,
 Gryphes Hyperborei pondera fulva soli.
 Furatæ Veneris prato per inane columbæ
 Florea connexis sarta tulêre rosis: 10
 Fractaque nobilium ramis electra sororum
 Cycnus oloriferi vexit ab ainne Padi:
 Et Nilo Pygmæa grues post bella remenso
 Ore legunt Rubri germina cara maris:
 Venit et extremo Phoenix longævus ab Euro, 15
 Apportans unco cinnama rara pede.
 Nulla avium pecudumque fuit, quæ ferre negaret
 Vectigal meritæ connubiale lyræ.
 Tunc opibus, totoque Heliconis sedula regno
 Ornabat propriam Calliopea nurum. 20
 Ipsam præterea dominam stellantis Olympi
 Ad nati thalamos ausa rogare parens.
 Nec sprevit Regina Deûm, vel matris honore,
 Vel justo vatis ducta favore pii,
 Qui sibi carminibus toties lustraverat aras, 25
 Junonis blandâ numina voce canens,
 Præliaque altisoni referens Phlegræa mariti,
 Titanum fractas Enceladique minas.
 Illicet adventu noctem dignata jugalem,
 Addidit augendis munera sacra toris; 30
 Munera mortales non admittentia cultus;
 Munera, quæ solos fas habuisse Deos.
 Sed, quod Threïcio Juno placabilis Orphei,
 Hoc poteris votis esse, Serena, meis.

- Illius expectent famulantia sidera nutum : 33
 Sub pedibus regitur terra fretumque tuis.
 Non ego, cum peterem, sollenni more procorum,
 Promisi gregibus pascua plena meis;
 Nec quod mille mihi lateant sub palmite colles, 40
 Fluctuet et glaucâ pinguis oliva comâ;
 Nec quod nostra Ceres numerosâ falce laboret,
 Auratæque ferant culmina celsa trabes.
 Sufficit, mandâsse Deam : tua litera nobis
 Et pecus, et segetes, et domus ampla fuit.
 Inflexit soceros, et majestate petendi 45
 Texit pauperiem nominis umbra tui.
 Quid non perficeret scribentis voce Serenæ
 Vel Genius regni, vel pietatis amor?
 Atque utinam sub luce tui contingeret oris,
 Conjugis et castris, et solio generi, 50
 Optatum celebrare diem ! me jungeret auspex
 Purpura ; me sancto cingeret aula choro !
 Et, mihi quam scriptis desponderat ante puellam,
 Conjugis eadem pronuba dextra daret !
 Nunc medium quoniam votis majoribus æquor 55
 Invidet, et Libyæ dissidet ora plagæ ;
 Saltem absens, regina, fave, reditusque secundos
 Annue sidereo læta supercilio.
 Terrarum tu pande vias : tu mitibus Euris
 Æquora pacari prosperiora jube ; 60
 Ut tibi Pierides, doctumque fluens Aganippe,
 Debita servato vota cliente canant.

EPIST. III. — *Ad Olybrium.*

- Quid rear, affatus quod non mihi dirigis ullos,
 Nec redit alterno pollice ducta salus ?
 Scribendine labor ? sed quæ tam prona facultas,
 Carmina seu fundis, seu [Cicerone] tonas ?

Cedere divitis animi fortuna fatetur ; 5
 Et tantas oris copia vincit opes.
 An rarus, qui scripta ferat ? quin tempore nullo
 Cessant Flaminiae pulverulenta viæ.
 Cum fluat ingenium, cum sit qui dicta reportet ;
 Quæ, nisi contemnor, causa relicta tibi ? 10
 Despieis ergo tuum, si fas est credere, vatem ;
 Perfidus et spatio debilitatur amor ?
 Excidimusne tibi ? lucem jam condet Hydaspes,
 Et Tartessiaco, Sol, oriêre vado : 15
 Candescet Geticis Meroë conversa pruinis,
 Claraque se vetito proluet Ursa mari.
 Et, si jam nostros fastidit Olybrius ignes,
 Constat Oresteam nil valuisse fidem.
 Quin, age, rumpe moras, [remoraturusque] sodalem
 Absens eloquio fertilior doce. 20
 Crebraque fecundos festinet litera cursus,
 Labris atque animis insinuanda meis.
 Dignatus tenui Cæsar scripsisse Maroni :
 [Nec tibi dedecori sit mea Musa.] Vale.

ERIST. IV. — Ad Probinum, ut scribat.

Quem, precor, inter nos habitura silentia finem ?
 Quando dabit caras litera grata vices ?
 Me timidum, vel te potius dixisse superbum,
 Convenit ? alterius crimen utrumque tenet. 5
 Transfluxêre dies ; et, dum scripsisse priorem
 Pœnitet, æternas itur in usque moras.
 Sed quid agam ? cœpisse vetat reverentia vestri.
 Hinc amor hortatur scribere : vincat amor.
 Fors juvat audentes, prisci sententia vatis.
 Hac duce, non dubitem, te reticente, loqui. 10
 Audax ut, si quid vates peccâsse videbor,
 Arguar, ingrati non subiturus onus.
 Romanos bibimus primum, te consule, fontes,
 Et Latise cessit Graia Thalia togæ :

Incipiensque tuis a fascibus omina cepi : 15
Fataque debebo posteriora tibi.
Ergo, lacesitus, tandem rescribe roganti ;
Et patriâ florens sorte, Probine, vale.

ERIST. V. — Ad Gennadium ex Proconsule.

Italiæ commune decus, Rubiconis amœni
Incola, Romani fama secunda fori ;
Graiorum populis, et nostro cognite Nilo ;
Utraque gens fasces horret amatque tuos.
Carmina jejunas poscis solantia fauces ? 5
Testor amicitiam, nulla fuisse domi.
Nam mihi mox nidum, pennis confisa, relinquunt ;
Et, lare contempto, non reditura volant.

CL. CLAUDIANI

EIDYLLIA.

I. *Phœnix.*

OCEANI summo circumfluus æquore lucus
Trans Indos Eurumque viret, qui primus anhelis
Sollicitatur equis; vicinaque verbera sentit;
Humida roranti resonant cum limina curru,
Unde rubet ventura dies, longeque coruscis 5
Nox afflata rotis refugo pallescit amictu.
Hæc fortunatus nimium Titanius ales
Regna colit; Solisque plagâ defensus iniquâ,
Possidet intactas ægris animantibus oras;
Sæva nec humani patitur contagia mundi; 10
Par volucer Superis; stellas qui vividus æquat
Durando, membrisque terit redeuntibus ævum;
Non epulis saturare famem, non fontibus ullis
Assuetus prohibere sitim: sed purior illum
Solis fervor alit; ventosaque pabula libat 15
Tethyos, innocui carpens alimenta vaporis.
Arcanum radiant oculi jubar: igneus ora
Cingit honos: rutilo cognatum vertice sidus
Attollit cristatus apex, tenebrasque serenâ
Luce secat: Tyrio pinguntur crura veneno. 20
Antevolant Zephyros pennæ, quas cœrulus ambit
Flore color, sparsoque super ditiescit in auro.
Hic neque concepto fetu, nec semine surgit:
Sed pater est prolesque sibi; nulloque creanta,
Emeritos artus secundâ morte reformat, 25

Et petit alternam totidem per funera vitam. 26

Namque ubi mille vias longinqua retorserit aestas,
Tot ruerint hiemes, toties ver cursibus actum,
Quas tulit auctumnus, dederit cultoribus umbras:
Tum multis gravior tandem subjungitur annis, 30

Lustrorum numero victus: ceu lassa procellis
Ardua Caucasio nutat de culmine pinus,
Seram ponderibus pronis tractura ruinam.
Pars cadit assiduo flatu: pars imbre peresa
Rumpitur: arripuit partem vitiosa vetustas. 35

Jam breve decrescit lumen, languetque senili
Segnis stella gelu: qualis cum forte tenetur
Nubibus, et dubio vanescit Cynthia cornu.
Jam solitæ medios alæ transcurrere nimbos
Vix imâ tolluntur humo. Tunc conscius ævi 40

Defuncti, reducisque parans exordia formæ,
Arentes tepidis de collibus eligit herbas;
Et cumulum texens pretiosâ fronde Sabæum,
Componit bustamque sibi, partumque futurum.

Hic sedet, et blando Solem clangore salutat 45
Debilior; miscetque preces, ac supplice cantu
Præstatura novas vires incendia poscit.

Quem procul adductis vidit cum Phoebus habenis,
Stat subito, dictisque pium solatur alumnum:

"O senium positure rogo, falsisque sepulcris 50
Natales habiture vices! qui sæpe renasci
Exitio, proprioque soles pubescere leto;
Accipe principium rursus, corpusque coactum
Desere: mutatâ melior procede figura."

Hæc fatus, propere flavis e crinibus unum, 55
Concussâ cervice, jacit, missoque volentem
Vitali fulgore ferit. Jam sponte crematur,
Ut redeat; gaudetque mori festinus in ortum.

Fervet odoratus telis cœlestibus agger,
Consumiturque senem. Nitidos stupefacta juvencos 60
Luna premit, pigrosque polus non concitat axes.
Parturiente rogo, curis Natura laborat,
Æternam ne perdat avem; flammasque fideles

Admonet, ut rerum decus immortale remittant.

Continuo dispersa vigor per membra volutus 65

Æstuat, et venas recidivus sanguis inundat.

Victuri cineres, nullo cogente, moveri

Incipiunt, plumâque rudem vestire favillam.

Qui fuerat genitor, natus nunc prosilit idem,

Succeditque novus. Geminæ confinia vitæ 70

Exiguo medius discrimine separat ignis.

Protinus ad Nilum Manes sacrare paternos,

Auctoremque globum Phariæ telluris ad oras

Ferre juvat. Velox alienum tendit in orbem,

Portans gramineo clausum velamine funus. 75

Innumeræ comitantur aves, stipantque volantem

Alituum suspensa cohors: exercitus ingens

Obnubit vario late convexa meatu.

Nec quisquam, tantis e millibus, obvius audet

Ire duci: sed regis iter fragrantis adorant. 80

Non ferus accipiter, non armiger ipse Tonantis,

Bella movent: commune facit reverentia foedus.

Talis barbaricas flavo de Tigride turmas

Ductor Parthus agit: gemmis et divite cultu

Luxurians, sertis apicem regalibus ornat. 85

Auro frenat equum; perfusam murice vestem

Assyriâ signatur acu: tumidusque regendo,

Celsâ per famulas acies ditione superbit.

Clara per Ægyptum placidis notissima sacris

Urbs Titana colit; centumque accline columnis 90

Invehitur templum Thebæo monte revulsis.

Illic, ut perhibent, patriam de more reponit

Congeriem; vultumque Dei veneratus herilem,

Jam flammâ commendat onus: jam destinat aris

Semina reliquiasque sui. Myrrhata relucet 95

Limina: divino spirant altaria fumo:

Et, Pelusiacas productus adusque paludes,

Indus odor, penetrat nares, completque salubri

Tempestate viros; et nectare dulcior aura

Ostia nigrantis Nili septena vaporat. 100

O felix, hæresque tui! quo solvimur omnes,

Hoc tibi suppeditat vires : præbetur origo 102
 Per cinerem : moritur, te non pereunte, senectus.
 Vidisti quodcumque fuit : te sæcula teste .
 Cuncta revolvuntur. Nôsti, quo tempore pontus 105
 Fuderit elatas scopulis stagnantibus undas ;
 Quis Phaëthonteis erroribus arserit annus :
 Et clades te nulla rapit ; solusque superstes,
 Edomitâ tellure, manes : non stamina Parcæ
 In te dura legunt ; non jus habuêre nocendi. 110

II. *Hystrix.*

Audieram, memorande, tuas, Stymphale, volucres
 Spicula vulnifico quondam sparsisse volatu.
 Nec mihi credibilis ferratæ fabula pinnæ
 Visa diu. Datur, ecce, fides ; et cognitus hystrix
 Herculeas affirmat aves. Os longius illi 5
 Assimulat porcum : mentitæ cornua setæ
 Summâ fronte rigent : oculis rubet igneus ardor :
 Parva sub hirsuto catuli vestigia dorso.
 Hanc tamen exiguan miro natura tueri
 Præsidio dignata feram. Stat corpore toto 10
 Silva minax ; jaculisque rigens in prælia crescit
 Picturata seges, quorum cute fixa tenaci
 [Altera succrescit,] alternantesque colorum
 Tincta vices, spatiis internigrantibus, exit
 In solidæ speciem pinnæ, tenuataque furtim 15
 Lævis in extremum sese producit acumen.
 Sed non hæc acies, ritu silvestris echini,
 Fixa manet : crebris propugnat jactibus ultro,
 Et longe sua membra regit ; tortumque per auras
 Evolat excusso nativum missile tergo. 20
 Interdum fugiens, Parthorum more, sequentem
 Vulnerat : interdum, positus velut ordine castris,
 Terrificum densâ [mucronum] verberat undâ,
 Et consanguineis hastilibus asperat armos.
 Militat omne feræ corpus, vibrataque raucæ 25

Terga fragore sonant : stimulis accensa tubarum
 Agmina collatis credas configere signis. 27
 Tantus in angusto strepitus furit. Additur armis
 Calliditas, parcusque sui tumor, iraque nunquam
 Prodigia telorum, caute contenta minari, 30
 Nec nisi servandæ jactus impendere vitæ.
 Error abest ; certum sollertia destinat ictum,
 Nil spatio fallente modum : servatque tenorem
 Mota cutis, doctique regit conamina nisus.
 Quid labor humanus tantum ratione sagaci 35
 Proficit ? eripiunt trucibus Gortynia capris
 Cornua : subjectis eadem lentescere cogunt
 Ignibus : intendunt taurino viscere nervos :
 Instruitur pinnis, ferroque armatur arundo.
 Ecce brevis propriis munitur bellua telis ; 40
 Externam nec quærit opem : fert omnia secum :
 Se pharetrâ, sese jaculo, sese utitur arcu.
 Unum animal cunctas bellorum possidet artes.
 Quod si omnis nostræ paulatim industria vitæ 44
 Fluxit ab exemplis, quidquid procul appetit hostem,
 Hinc reor inventum : morem hinc traxisse Cydonas
 Bellandi, Parthosque retro didicisse ferire,
 Prima sagittiferæ pecudis documenta secutos.

III. *Torpedo.*

Quis non indomitam diræ Torpedinis artem
 Audiit, et merito signatas nomine vires ?
 Illa quidem mollis, segnique [obnixa natatu]
 Reptat, et attritis vix languida serpit arenis.
 Sed latus armavit gelido natura veneno ; 5
 Et frigus, quo cuncta rigent animata, medullis
 Miscuit, et proprias hiemes per viscera duxit.
 Naturam juvat ipsa dolis ; et, conscia sortis,
 Utitur ingenio ; longeque extenta per algas,
 Hac confisa, jacet : successu læta resurgit, 10
 Et vivos impune ferox depascitur artus.

Si quando vestita cibus incautior æra 12
 Hauserit, et curvis frenari senserit hamis;
 Non furit, aut vano conatur vellere morsu:
 Sed propius nigræ jungit se callida setæ, 15
 Et meminit captiva sui, longæque per undas
 Pigra venenatis effundit flamina venis.
 Per setam vis alta meat; fluctusque relinquit
 Absentem tentura virum. Metuendus ab imis
 Emicat horror aquis, et, pendula fila secutus, 20
 Transit arundineos arcæno frigore nodos,
 Victricemque ligat concreto sanguine dextram.
 Damnosum piscator onus, prædamque rebellem
 Jactat, et amissâ redit exarmatus avenâ.

IV. *Nilus.*

Felix, qui Pharias proscindit vomere terras.
 Nubila non sperat tenebris condentia cælum;
 Nec graviter flantes pluviali frigore Coros
 Invocat, aut arcum variatâ luce rubentem.
 Ægyptos sine nube ferax, imbresque serenos 5
 Sola tenet, secura poli, non indiga venti:
 Gaudet aquis, quas ipsa vehit, Niloque [redundant;]
 Qui, rapido tractu mediis elapsus ab Austris,
 Flammigeræ patiens Zonæ, Cancrique calentis,
 Fluctibus ignotis nostrum procurrit in orbem, 10
 Secreto de fonte cadens, qui semper inani
 Quærendus ratione latet; nec contigit ulli
 Hoc vidisse caput. Fertur sine teste creatus,
 Flumina profundens alieni conscia cœli.
 Inde, vago lapsu Libyam dispersus in omnem, 15
 Æthiopum per mille ruit nigrantia regna;
 Et loca continuo solis damnata vapore
 Irrorat, populisque salus sitientibus errat,
 Per Meroën, Blemyasque feros, atramque Syenen.
 Hunc bibit infrenis Garamas, domitorque ferarum 20
 Girræus, qui vasta colit sub rupibus antra.

Qui ramos ebeni, qui dentes vellit eburnos; 22
 Et gens compositis crinem vallata sagittis.
 Nec vero similes causas crescentibus undis,
 Aut tempus, meruit. Glacie non ille solutâ, 25
 Nec circumfuso scopulis exuberat imbre:
 Nam, cum tristis hiems alias produxerit undas,
 Tunc Nilum retinent ripæ: cum languida cessant
 Flumina, tunc Nilus mutato jure tumescit.
 Quippe quod ex omni fluvio spoliaverit æstas, 30
 Hoc Nilo Natura refert; totumque per orbem
 Collectæ partes unum revocantur in amnem.
 Cumque die Titana Canis flagrantior armat,
 Et rapit humores madidos, venasque calore
 Compescit, radiisque potentibus æstuat axis; 35
 Nilo bruma vehit contraria tempora mundo.
 Defectis solitum referens cultoribus æquor,
 Effluit Ægæo stagnantior, acrior alto
 Iönio, seseque patentibus explicat arvis.
 Fluctuat omnis ager: remis sonuere novales. 40
 Sæpius, æstivo jaceat cum forte sopore,
 Cernit, cum stabulis, armenta natantia pastor.
 * * * * *

V. *Magnes.*

Quisquis, sollicitâ mundum ratione secutus,
 Semina rimatur rerum, quo Luna laborat
 Defectu, quæ causa jubet pallescere solem;
 Unde rubescentes ferali crine cometæ;
 Unde fluant venti; trepidæ quis viscera terræ 5
 Concutiat motus; quis fulgura ducat hiatus;
 Unde tonent nubes; quo lumine floreat arcus:
 Hoc mihi quærenti si quid deprendere veri
 Mens valet, expediam. Lapis est cognomine *Magnes*,
 Decolor, obscurus, vilis: non ille repxam 10
 Cæsariem regum, nec candida virginis ornat
 Colla, nec insigni splendet per cingula mœvus:

Sed, nova si nigri videas miracula saxi,
Tum pulchros superet cultus, et quidquid Eois
Indi litoribus rubrâ scrutantur in algâ. 15

Nam ferro meruit vitam, ferrique rigore
Vescitur; hoc dulces epulas, hoc pabula novit.
Hinc proprias renovat vires: infusa per artus,
Aspera secretum servant alimenta vigorem.
Hoc absente, perit: tristi morientia torpent 20
Membra fame; venasque sitis consumit apertas.

Mavors, sanguineâ qui cuspidè verberat urbes,
Et Venus, humanas quæ laxat in otia curas,
Aurati delubra tenent communia templi.

Effigies non una Deis: sed ferrea Martis 25
Forma nitet: Venerem magnetica gemma figurat.
Illis connubium celebrat de more sacerdos.

Ducit flamma choros: festâ frondentia myrto
Limina cinguntur, roseisque cubilia surgunt
Floribus; et thalamum dotalis purpura velat. 30

Hîc mirum consurgit opus. Cytherea maritum
Sponte rapit, cœlique toros imitata priores,
Pectora lascivo flatu Mavortia nectit;

Et tantum suspendit onus, galeæque lacertos
Implicat, et vivis totum complexibus ambit. 35
Ille, lacessitus longo spiraminis actu,

Arcanis trahitur gemmâ de conjuge nodis.
Pronuba fit Natura Deis, ferrumque maritat
Aura tenax: subitis sociantur Numina furtis.

Quis calor infudit geminis alterna metallis 40
Fœdera? quæ duras jungit concordia mentes?
Flagrat anheles ælex, et amicam saucia sentit

Materiem; placidosque chalybs cognoscit amores.
Sic Venus horrificum bellî compescere regem,
Et vultu mollires, solet, cum sanguine præceps 45

Æstuat, et strictis mucronibus asperat iras.
Sola feris occurrit equis, solvitque tumorem
Pectoris, et blando præcordia temperat igni.

Pax animo tranquilla datur; pugnasque calentes
Deserit, et rutilas declinat in oscula cristas. 50

Quæ tibi, siève puer, non est permissa potestas?
 Tu magnum superas fulmen; coeloque relicto, 52
 Fluctibus in mediis cogis mugire Tonantem:
 Jam gelidas rupes, vivoque carentia sensu
 Membra feris: jam saxa tuis obnoxia telis; 55
 Et lapides suus ardor agit; ferrumque tenetur
 Illecebris: rigido regnant in marmore flammæ.

VI. *Aponus.*

Fons, Antenoreæ vitam qui porrigis urbi,
 Fataque vicinis noxia pellis aquis,
 Cum tua vel mutis tribuant miracula vocem,
 Cum tibi plebeius carmina dictet honos,
 Et sit nulla manus, cujus non pollice ductæ 5
 Testentur memores prospera vota notæ;
 Nonne reus Musis pariter Nymphisque tenebor,
 Si tacitus soli prætereare mihi?
 Indictum neque enim fas est a vate relinqui
 Hunc, qui tot [populis provocat] ora, locum. 10
 Alto colle minor, planis erectior arvis,
 Conspicuo clivus molliter orbe tumet.
 Ardentis fecundus aquæ, quâcumque cavernas
 Perforat, offenso truditur igne, latex.
 Spirat putre solum; conclusaque subter anhelo 15
 Pumice, rimosas perforat unda vias.
 Humida flammarum regio Vulcania: terræ
 Ubra sulfureæ fervida regna plagæ.
 Quis sterilem non credat humum? fumantia vernant
 Pascua: luxuriat gramine cocta silex. 20
 Et cum sic rigidæ cautes fervore liqueant,
 Contemtis audax ignibus herba viret.
 Præterea grandes, effosso marmore, sulci
 Saucia longinquo limite saxa secant.
 Herculei (sic fama refert) monstratur aratri 25
 Semita; vel casus vomeris egit opus.
 In medio, pelagi late flagrantis imago,
 Cœrulus immenso panditur ore laeus,

Ingenti fusus spatio : sed major in altum
 Intrat, et arcanæ rupis inane subit, 30
 Densus nube suâ, tactuque immitis et haustu,
 Sed vitreis idem lucidus usque vadis.
 Consuluit Natura sibi, ne tota lateret ;
 Admisitque oculos, quo vetat ire calor.
 Turbidus impulsu venti cum spargitur aër, 35
 Glaucaque fumiferæ terga serenat aquæ ;
 Tunc omnem liquidi vallem mirabere fundi :
 Tunc veteres hastæ, regia dona, micant :
 Quas inter, nigræ tenebris obscurus arenæ,
 Discolor abruptum flumen hiatus agit. 40
 Apparent infra latebræ, quas gurgēs opacus
 Implet, et abstrusos ducit in antra sinus.
 Tunc montis secreta patent, qui, flexus in arcum,
 Equora pendenti margine summa ligat.
 Viva coronatos adstringit scena vapores, 45
 Et levis exili cortice terra natat ;
 Calcantūmq; oneri nunquam cessura virorum,
 Sustentat trepidum fida ruina pedem.
 Facta manu credas : sic læves circuit oras
 Ambitus, et tenuis perpetuusque riget. 50
 Hærent stagna lacu plenas æquantia ripas ;
 Præscriptumque timent exsiluisse modum.
 Quod superat, fluvius, devexâ rupe volutus,
 Egerit, et campi dorsa recurva petit.
 Devehit exceptum nativo [spira] meatu : 55
 In patulas plumbi labitur inde vias,
 Nullo cum strepitu ; madidisque infecta favillis,
 Despumat niveum fistula cana salem.
 Multifidas dispergit opes ; artemque secutus,
 Quâ jussêre manus, mobile torquet iter : 60
 Et junctos rapido pontes subtermeat æstu,
 Afflatusque vago temperat igne tholos.
 Acrior interius, rauci cum murmure saxi,
 Spumeus eliso pellitur amne vapor.
 Hinc pingues repetunt fessi sudore lacunas, 65
 Frigora quâ longæ blanda dedêre moræ.

| | |
|---|-----|
| Salve, Pæoniæ largitor nobilis undæ ! | 67 |
| Dardanii, salve, gloria magna soli ! | |
| Publica morborum requies, commune medentium | |
| Auxilium, præsens numen, inemta salus ! | 70 |
| Seu ruptis inferna ruunt incendia ripis, | |
| Et nostro Phlegethon devius orbe calet ; | |
| Sulfuris in venas gelidus seu decidit amnis, | |
| Accensusque fluit, quod manifestat odor ; | |
| Sive pari flammæ undarum lanæe rependens, | 75 |
| Arbiter in fœdus mons elementa vocat, | |
| Ne cedant superata sibi ; sed legibus æquis | |
| Alterius vires possit utrumque pati ; | |
| Quidquid erit causæ, quocumque emitteris ortu, | |
| Non sine consilio currere, certa fides. | 80 |
| Quis casum meritis adscribere talibus audet ? | |
| Quis negat auctores hæc statuuisse Deos ? | |
| Ille pater rerum, qui sæcula dividit astris, | |
| Inter prima poli te quoque sacra dedit ; | |
| Et, fragilem nostri miseratus corporis usum, | 85 |
| Telluri medicas fundere jussit aquas : | |
| Parcarumque colos exoratura severas, | |
| Flumina laxatis emicuère jugis. | |
| Felices, proprium qui te meruère, coloni, | |
| Fas quibus est Aponon juris habere sui ! | 90 |
| Non illis terrena lues, corrupta nec Austri | |
| Flamina, nec sævo Sirius igne nocet. | |
| Sed, quamvis Lachesis letali stamine damnet, | |
| Inde sibi fati prosperiora petunt. | |
| Quod si forte malus membris exuberat humor, | 95 |
| Languida vel nimio viscera felle virent, | |
| Non venas reserant, nec vulnere vulnera sanant, | |
| Pocula nec tristi gramine mixta bibunt. | |
| Amiasum lymphis reparant impune vigorem ; | |
| Pacaturque, ægro luxuriante, dolor. | 100 |

VII. *De piis Fratribus, et eorum Statuis, quæ sunt
apud Catinam.*

Adspice sudantes venerando pondere fratres,
 Divino meritos semper honore coli :
 Justa quibus rapidæ cessit reverentia flammæ,
 Et, mirata, vagas reppulit Ætna faces.
 Complexi manibus fultos cervice parentes, 5
 Attollunt vultus, accelerantque gradus.
 Grandævi geminâ sublimes prole feruntur,
 Et carâ natos implicuère morâ.
 Nonne vides, ut sæva senex incendia monstret ?
 Ut trepido genitrix invocet ore Deos ? 10
 Erexit formido comam ; perque omne metallum
 Fusus in attonito palluit ære tremor.
 In juvenum membris animosus cernitur horror,
 Atque oneri metuens, impavidusque sui.
 Rejectæ vento chlamydes : dextram exserit ille, 15
 Contentus lævâ sustinuisse patrem.
 Ast illi duplices in nodum colligit ulnas,
 Cautior in sexu debiliore, labor.
 Hoc quoque præteriens oculis ne forte relinquas,
 Artificis tacitæ quod meruère manus. 20
 Nam, consanguineos eadem cum forma figuret,
 Hic propior matri fit tamen, ille patri.
 Dissimiles annos sollertia temperat artis.
 Alter in alterius redditur ore parens.
 Et nova germanis paribus discrimina præbens, 25
 Divisit vultus cum pietate faber.
 O bene Naturæ memores, documenta supernæ
 Justitiæ, juvenum numina, vota senum !
 Qui, spretis opibus, medios properâstis in ignes,
 Nil præter sanctam tollere canitiem. 30
 Haud quidem immerito, tantâ virtute repressas,
 Enceladi fauces obriguisset reor.
 Ipse redundantem frenavit Mulciber Ætnam,
 Læderet exempli ne monumenta pii.

Senserunt elementa fidem : pater affuit æther, 35
Terraque maternum sedula juvit onus.
Quod si notus amor provexit in astra Laconas,
Æneam Phrygio raptus ab igne pater ;
Si vetus Argolicos illustrat gloria fratres,
Qui sua materno colla dedêre jugo ; 40
Cur non Amphinomo, cur non tibi, fortis Anapi,
Æternum Siculus templa dicavit honos ?
Plura licet summæ dederit Trinacria laudi,
Noverit, hoc majus se genuisse nihil.
Nec doleat damnis, quæ devius intulit ardor : 45
Nec gemat exustas igne furente domos :
Non potuit pietas, flammâ cessante, probari.
Euntum est ingenti clade perenne decus.

EPIGRAMMATA.

I. *De Mulabus Gallicis.*

Adspice morigeras Rhodani torrentis alumnas,
Imperio nexas, imperioque vagas,
Dissona quam varios flectant ad murmura cursus,
Et certas adeant, voce regente, vias.
Quamvis quæque sibi longis discurrat habenis, 5
Et pateant duro libera colla iugo;
Ceu constricta, tamen servit; patiensque laborum,
Barbaricos docili concipit aure sonos.
Absentis longinqua valent præcepta magistri;
Frenorumque vicem lingua virilis agit. 10
Hæc procul angustat sparsas, spargitque coactas,
Hæc sistit rapidas; hæc properare facit.
Læva jubet? lævo deducunt limite gressum.
Mutavit strepitum? dexteriora petunt.
Nec vinclis famulæ, nec libertate feroces, 15
Exutæ laqueis, sub ditione tamen.
Consensuque pares [et] fulvis pellibus hirtæ,
Esseda concordēs multisonora trahunt.
Miraris, si voce feras pacaverit Orpheus,
Cum pronas pecudes Gallica verba regant? 20

II. *De Senæ Veronensi, qui suburbium nunquam egressus est.*

Felix, qui patriis ævum transegit in agris,
Ipsa domus puerum quem videt, ipsa senem;

Qui baculo nitens, in quâ reptavit arenâ,
 Unius numerat sæcula longa casæ.
 Illum non vario traxit Fortuna tumultu; 5
 Nec bibit ignotas mobilis hospes aquas.
 Non freta mercator tremuit, non classica riles :
 Non rauci lites pertulit ille fori.
 Indocilis rerum, vicinæ nescius urbis,
 Adspectu fruitur liberiore poli. 10
 Frugibus alternis, non consule, computat annum :
 Auctumnum pomis, ver sibi flore, notat.
 Idem condit ager soles, idemque reducit :
 Metiturque suo rusticus orbe diem :
 Ingentem meminit parvo qui germine quercum, 15
 Equævumque videt consenuisse nemus :
 Proxima cui nigris Verona remotior Indis,
 Benacumque putat litora Rubra lacum.
 Sed tamen indomitæ vires, firmisque lacertis
 Ætas robustum tertia cernit avum. 20
 Erret, et extremos alter scrutetur Iberos.
 Plus habet hic vitæ, plus habet ille viæ.

III. *De Aprò et Leone.*

Torvus aper, fulvusque leo côiêre superbis
 Viribus ; hic setâ sævior, ille jubâ.
 Hunc Mars, hunc Cybele laudat : dominatur uterque
 Montibus. Hercules sudor uterque fuit.

IV. *Descriptio Armenti. Fragmentum.*

Non tales quondam species tulit armentorum
 Tellus tærgemino subdita Geryoni :
 Non tales, Clitumne, lavas in gurgite tauros,
 Tarpeio referunt quos pia vota Jovi :
 Non talis Tyrias sparsisse juvencus arenas 5
 Dicitur, optatum quando revexit onus :

Non Cretæus ager, nec amati conscia tauri
 Gnossos, nec similes paverit Ida feras.
 Ipse et dispariles monstro commissus in artus,
 Qui crimen matris prodidit ore novo, 10
 Cres puer haud talem potuisset reddere formam,
 Præstarent totum si fera membra patrem.

V. *Concha Serenæ.*

Transferat huc liquidos fontes Heliconia Nais,
 Et patulo conchæ divitis orbe fluat.
 Namque latex, doctæ qui laverit ora Serenæ,
 Ultra Pegaseas numen habebit aquas.

VI. *De Crystallo, cui Aqua inerat.*

Possedit glacies naturæ signa prioris :
 Et fit parte lapis, frigora parte negat.
 Sollers lusit hiems ; imperfectoque rigore
 Nobilior, vivis gemma tumescit aquis.

VII. *Aliter.*

Nymphæ, quæ tegitis cognato carcere Nymphas,
 Et quæ nunc estis, quæque fuistis aquæ,
 Quod vos ingenium junxit ? quâ frigoris arte
 Torpuit, et maduit, prodigiosa silex ?
 Quis tepor inclusus securas vindicat undas ? 5
 Interior glacies quo liquefacta Noto ?
 Gemma quibus claustris arcano mobilis sestu
 Vel concreta fuit, vel resoluta gelu ?

VIII. *Aliter.*

Solibus indomitum glacies Alpina rigorem
 Sumebat, nimio jam pretiosa gelu :

Nec potuit toto mentiri corpore gemmam;
 Sed medio mansit proditor orbe latex.
 Auctas honos; liquidi crescunt miracula saxi;
 Et conservatæ plus meruistis, aquæ.

5

IX. *Aliter.*

Adspice porrectam splendenti fragmine venam,
 Quâ trahitur limes lucidiore gelu.
 Hic nullum Borean, nec brumam, sentit opacus
 Humor; sed varias itque reditque vias.
 Non illum constrinxit hiems, non Sirius ardens:
 Ætatis spatium non tenuabit edax.

6

X. *Aliter.*

Clauditur immunis convexo tegmine rivus;
 Duratisque vagus fons operitur aquis.
 Nonne vides, propriis ut spumet gemma lacunis,
 Et refluos ducant pocula viva sinus?
 Udaque pingatur radiis obstantibus Iris,
 Secretas hiemes sollicitante die?
 Mira silex, mirusque latex, qui flumina vincit;
 [Nec lapis est merito, quod fluit, et lapis est.]

5

XI. *Aliter.*

Dum crystallæ puer contingere lubrica gaudet,
 Et gelidum tenero pollice versat onus;
 Vidit perspicuo deprensas marmore Nymphas,
 Dura quibus solis parcere novit hiems:
 Et siccum relegens labris sitientibus orbem,
 Irrita quæsitis oscula figit aquis.

5

XII. *Aliter.*

Marmoreum ne sperne globum. Spectacula transit
 Regia; nec Rubro vilior iste mari.
 Informis glaciæ, saxum rude: nulla figuræ
 Gratia: sed raras inter habetur opes.

XIII. — Ετι περι αυτου.

Χιονεη κρυσταλλος, ὑπ' ανερος ασκηθεισα,
 Δειξεν ακηρασιοιο παναιολον εικονα κοσμου,
 Ουρανον αγκας εχοντα βαρυκτυπον ενδοθι ποντον.

XIV. — Ετι περι αυτου.

Ειπ' αγε μοι, κρυσταλλε, λιθω πεπυκασμενον ὕδωρ
 Τις κηξεν; Βορεης η τις ελυσε; Νοτος;

XV. — Προς Φοιβον.

Ἰλαθι μοι, φιλε Φοιβε· συ γαρ, θοα τοξα τιταινων,
 Εβληθης ὑπ' Ερωτος ἐπ' ωκυποροισιν οἰστοις.

XVI. — Εις Μιμαδα γηρασασαν.

Μαχλας εὐκροταλοισιν ανευαζουσα χορειαις,
 Διζυγα παλλομενοισι τιναγμασι χαλκον αρασσει.
 [Κτεις] μεν ὑποκλεπτων πολιν τριχα γειτονα μοιρης,
 Ηλεματοις ακτισι χαρασσεται ομματος [αυην.]
 Ψευδομενον δ' ερυθρημα κατεγραφεν αχροος αιδως,
 Αγλαῇ στεψασα τοθη κεκαλυμμενα μηλα.

XVII. — Εις Δουλον τυκτηθεντα παρ' αυτου.

Ἐδρη χαλκιοπεζαν ἐπὶ προθυροις Ἐλικωτος
 Ἐστηκει θεραπων τις ὑπερ νωτοιο μεμαρπως,
 Ουδ' εθελε μογεοντι πορειν επιβαθρου [αιοιδω.]
 Τουνεκα μεν θωρηξεν ἰοη πολυμητις ἀναγκη.

XVIII.—*In Sphæram Archimedis.*

Jupiter in parvo cum cerneret æthera vitro,
 Risit, et ad Superos talia dicta dedit :
 “ Huccine mortalis progressa potentia curæ ?
 Jam meus in fragili luditur orbe labor !
 Jura poli, rerumque fidem, legesque Deorum, 5
 Ecce, Syracosius transtulit arte senex.
 Inclusus variis famulatur spiritus astris ;
 Et vivum certis motibus urget opus.
 Percurrit proprium mentitus Signifer annum ;
 Et simulata novo Cynthia mense redit. 10
 Jamque suum volvens audax industria mundum,
 Gaudet, et humanâ sidera mente regit.
 Quid falso insontem tonitru Salmonea miror ?
 Æmula naturæ parva reperta manus.”

XIX. — *De Polycaste et Perdiccâ.*

Quid non sævus Amor flammarum numine cogat ?
 Sanguinis affectu mater amare timet.
 Pectore dum niveo puerum tenet anxia nutrix,
 Illicitos ignes jam fovet ipsa parens.
 Ultrices pharetras tandem depone, Cupido. 5
 Consule jam Venerem ; forsan et ipsa dolet.

XX.—*De Zonâ Equi regii, missâ Honorio Augusto a Serenâ.*

Accipe parva tuse, Princeps venerande, sororia
 Munera, quæ manibus textit ipsa suis.
 Dumque auro phaleræ, gemmis dum frena renident,
 Hac uterum zonâ cinge frementis equi ;
 Sive illum Armeniis aluerunt gramina campis, 5
 Turbidus Argæâ seu nive lavit Halys,

Sanguineo virides morsu vexare smaragdos,
 Et Tyrio dignum terga rubere toro.
 O! quantum formæ sibi conscius erigit armos,
 Spargit et excussis colla superba jugis! 10
 Augescit brevitæ doni pietate Serenæ,
 Quæ volucres etiam fratribus ornat equos.

XXI.—*De Zonâ, ab eâdem missâ Arcadio Augusto.*

Stamine resplendens, et mirâ textilis arte,
 Balteus alipedis regia terga liget;
 Quem, decus Eoo fratri, pignusque propinqui
 Sanguinis, Hesperio misit ab orbe soror.
 Hoc latus adstringi velox optaret Arion: 5
 Hoc proprium vellet cingere Castor equum.

XXII.—*De Chlamyde et Frenis.*

Non semper clypei metuendum gentibus orbem
 Dilecto studiosa parens fabricabat Achilli:
 Lemnia nec semper supplex ardentis adibat
 Antra Dei, nato galeam factura comantem:
 Sed placidos etiam cinctus, et mitia pacis 5
 Ornamenta dabat, bello quibus ille peracto
 Conspicuus reges inter fulgeret Achivos.
 Ipsa manu chlamydes ostro texebat et auro;
 Frenaque, quæ volucrem Xanthum Baliumque dece-
 rent,
 Æquore quæsitis onerabat sedula gemmis. 10
 At tibi diversis, Princeps altissime, certant
 Obsequiis soceri. Stilichon Mavortia confert
 Munera, barbaricas strages, Rhenique triumphos.
 Regina contenta modum servare, Serena
 In tua sollicitas urget velamina telas. 15

XXIII.—*De Freno, Phaleris, et Cingulo Equi
Honorii, a Serenâ missis.*

O felix sonipes, tanti cui frena mereri
 Numinis, et sacris licuit servire lupatis!
 Seu tua per campos vento juba lusit Iberos,
 Seu te Cappadocum gelidâ sub valle natantem
 Argææ lavère nives; seu læta solebas 5
 Thessaliæ rapido perstringere pascua cursu;
 Accipe regales cultus; et, crine superbus
 Erecto, virides spumis perfunde smaragdos.
 Luxurient tumido gemmata monilia collo.
 Nobilis auratos jam purpura vestiat armos, 10
 Et medium te zona liget, variata colorum
 Floribus, et castæ manibus sudata Serenæ,
 Persarum gentile decus. Sic quippe laborat
 Maternis studiis, nec dedignatur equestres
 Moliri phaleras, genero latura decorem. 15

XXIV.—*Deprecatio ad Alethium Quæstorem.*

Sic non Æthiopum campos æstate pererrem,
 Nec Scythico brumam sub Jove nudus agam;
 Sic non, imbriferam noctem ducentibus Hædis,
 Iönio credam turgida vela mari;
 Sic non, Tartareo Furiarum verbere pulsus, 5
 Irati lædam carmina grammatici;
 Nulla meos traxit petulans audacia sensus;
 Liberior justo nec mihi lingua fuit.
 Versiculos, fateor, non cautâ voce notavi,
 Heu! miser, ignorans quam grave crimen erat!
 Orpheos alii libros impune laccessunt: 11
 Nec tua securum te, Maro, fama vehit.
 Ipse parens vatum, princeps Heliconis, Homerus,
 Judicis exceptit tela severa notæ.

Sed non Virgilius, sed non accusat Homerus : 15
 Neuter enim quæstor, pauper uterque fuit.
 En, moveo plausus, en pallidus omnia laudo :
 Et clarum repeto terque quaterque "*Sophôs!*"
 Ignoscat placidus tandem, flatusque remittat;
 Et toto recitet quidlibet ore : placet. 20

XXV.—*In Curetium.*

Fallaces vitreo stellas componere mundo,
 Et vaga Saturni sidera sæpe queri,
 Venturumque Jovem paucis promittere nummis,
 Cureti genitor noverat Uranius.
 In prolem dilata ruunt perjuria patris ; 5
 Et pœnam merito filius ore luit :
 Nam spurcos avidæ lambit meretricis hiatus,
 Consumens luxu flagitiisque domum.
 Et, quas fallacis collegit lingua parentis,
 Has [etiam] nati lingua refundit opea. 10

XXVI.—*In eundem.*

Si tua, Cureti, penitus cognoscere quæris
 Sidera, patre tuo certius ipse loquar.
 Quod furis, adversi dedit inclementia Martis :
 Quod procul a Musis, debilis Arcas erat : 5
 Quod turpem pateris jam cano podice morbum,
 Feminæ signis Luna Venusque fuit.
 Attrivit Saturnus opea. Hoc prorsus in uno
 Hæreo, quæ cunnum lambere causa facit.

XXVII.—*In Jacobum, Magistrum Equitum.*

Per cineres Pauli, per cani limina Petri,
 Ne laceres versus, dux Iacobe, meos.
 Sic tua, pro clypeo, sustentet pectora Thomas,
 Et comes ad bellum Bartholomæus eat ;

Sic, ope Sanctorum, non barbarus irruat Alpes; 5
 Sic tibi det vires sancta Susanna suas;
 Sic, quicumque ferox gelidum tranaverit Istrum,
 Mergatur, volucres ceu Pharaonis equi;
 Sic Geticas ultrix feriat rhomphæa catervas,
 Romanasque tegat prospera Thecla manus; 10
 Sic tibi det magnum moriens conviva triumphum,
 Atque tuam vincant dolia fusa sitim;
 Sic nunquam hostili maculetur sanguine dextra;
 Ne laceres versus, dux Iacobe, meos.

XXVIII. — *De Theodoro et Hadriano.*

Mallius indulget somno noctesque diesque :
 Insomnis Pharius sacra, profana rapit.
 Omnibus hoc, Italæ gentes, exposcite votis,
 Mallius ut vigilet, dormiat ut Pharius.



*Quæ deinceps sequuntur poëmatia, licet olim
Claudio adscripta, jampridem ei, ad eruditiss
et limatioris judicii viris, prorsus abjudicata sunt.*

XXIX. — “*Rimanti telum ira facit.*”

In jaculum, quodcumque gerit, dementia mutat.
Omnibus armatur rabies, pro cuspidē ferri.
Cuncta volant, dum dextra ferox in vulnera sævit.
Pro telo ingeritur, quidquid suggesserit ira.

XXX. — *In Podagrum, qui Carmina culpabat.*

Quæ tibi cum pedibus ratio? quid carmina culpas,
Scandere [quos] nescis, versiculos lacerans?
“Claudicat hic versus:” “Hæc,” inquis, “syllaba
nutat:”
Atque nihil prorsus stare putas podager.

XXXI. — *Ad Æternalem.*

Quidquid Castalio de gurgite Phœbus anhelat,
Quidquid fatidico mugit cortina recessu,
Carmina sunt: sed verba negant communia Musæ.
Carmina sola loquor: sic me meus implet Apollo.

XXXII.— *Ad Maximum, qui Mel misit.*

Dulcia dona mihi tu mittis, Maxime, semper :
Et, quidquid mittis, mella putare decet.

XXXIII.— *De Locustâ. Fragmentum.*

Horret apex capitis : medio fera lumina surgunt
Vertice : cognatus dorso durescit amictus :
Armavit natura cutem ; dumque rubentes
Cuspidibus parvis multos acuere rubores.

XXXIV.— *De Balneis Quintianis.*

Fontibus in liquidis paulum requiesce, viator ;
Atque tuum rursus carpe refectus iter,
Lympharum dominum nimium miraberis, hospes,
Inter dura viæ, balnea qui posuit.

XXXV.— *Descriptio Portûs Smyrnensis.*

Urbis conspectum montana cacumina velant,
Tranquillo prætenta mari : ducentia portum
Cornua pacatas removeant Aquilonibus undas.
Hic exarmatum terris cingentibus æquor
Clauditur, et placidam discit servare quietem.

XXXVI.— “ *Est in recessu longo locus.* ”

Est procul ingenti regio submota recessu,
Insula quâ resides fluctus mitescere cogit,
In longum producta latus ; fractasque per undas
Ardua tranquillo curvantur brachia portu.

XXXVII.—*De Quadrigâ marmoreâ.*

Quis dedit innumeros uno de marmore vultus ?
Surgit in aurigam currus ; paribusque lupatis
Unanimes frenantur equi. Quos forma diremit,
Materies cognata tenet : discrimine nullo,
Vir redit in currum : ducuntur ab axe jugales :
Ex alio se quisque facit. Quæ tanta potestas ?
Una silex tot membra ligat ; ductusque per artem,
Mons, patiens ferri, varios mutatur in artus.

XXXVIII.—*Fragmentum.*

Sordidus ex humeris nodo dependet amictus.
Exercentur equis, et colla comantia pectunt.

XXXIX.—*De Paupere amante.*

Paupertas me sæva domat, dirusque Cupido :
Sed toleranda famēs, non tolerandus amor.

XL.—*De eodem.*

Esuriens pauper telis incendor Amoris.
Inter utrumque malum, diligo pauperiem.

XLI.—*In Sepulcrum speciosæ.*

Pulchris stare diu Parcarum lege negatur.
Magna repente ruunt : summa cadunt subito.
Hic formosa jacet, Veneris sortita figuram ;
Egregiumque decus invidiamque tulit.

XLII.—*De Birro castoreo.*

Nominis umbra manet veteris : nam dicere birrum,
 Ni castor niteat, castoreum nequeo.
 Sex emtus solidis, quid sit, jam scire potestis.
 Si mihi nulla fides, credite vel pretio.

XLIIL.—*De Hippopotamo.*

Utraque fecundo nutritur bellua Nilo,
 Quæque vorat morsu, quæque sub ore fremit.

XLIV.—*Quæ in Mensâ de Sardonyche Lapide.*

Mensa coloratis aquilæ sinuatur in alia,
 Quam floris distinguit honos : similisque figura
 Texitur : implumem mentitur gemma volatum.

XLV.—*Carmen Paschale.*

Christe potens rerum, redeuntis conditor ævi,
 Vox summi sensusque Dei ; quem fudit ab altâ
 Mente Pater, tantique dedit consortia regni.
 Impia qui nostræ domuisti crimina vitæ,
 Passus corporeâ mundi vestire figurâ, 5
 Affarique palam populos, hominemque fateri :
 [Quemque utero inclusum Mariæ, mox numine viso]
 Virginei tumuere sinus ; innuptaque mater,
 Arcano stupuit compleri viscera partu,
 Auctorem paritura suum. Mortalia corda 10
 Artificem texere poli ; mundique repertor
 Pars fuit humani generis ; latuitque sub uno
 Pectore, qui totum late complectitur orbem ;
 Et, qui non spatiis terræ, non æquoris undâ,

Non capitur cælo, parvos confluit in artus. 15
 Quin et mancipiî nomen, nexusque subisti,
 Ut nos surripere leto, mortemque fugares
 Morte tuâ: mox ætherias evectus in auras,
 Purgatâ repetis lætum tellure parentem.
 Augustum foveas, festis ut sæpe diebus 20
 Annua sinceri celebret jejunia sacri.

XLVI. — Εἰς τὸν Σωτῆρα.

ὦ πυρὸς αἰναοιο σοφὴν ὠδὴν θυλασσῶν,
 Ἐμβιβῶς κοσμοιο παλινδιητὸν ἀναγκήν,
 Χρίστε, θεορρήτοιο βίου φυσίζου πηγῇ,
 Πατρὸς ἀσημαντοιο Θεοῦ πρωτοσκορὸς φωνῇ,
 Ὅς μεγά μῆτρῳ τὸ κεῖται ἐγκυμονα φορτὸν, 5
 Καὶ γόνον αὐτοτελεστὸν ἀνυμφευτῶν ὑμεναίων
 Στήσας, Ἀσσυρίης γενεῆς ἑτεροφρονα λυσσάν,
 Ὀργία δ' εἰδῶλων κενεῶν ψευδωνυμα λυσσας,
 Αἰθερὸς ἀμφιβεβηκας ἐφ' ἑκταζῶντος ὀχηα,
 Ἀγγελικαῖς πτερυγεσσιν ἐν ἀρρήτοισι θάσσων. 10
 Ἰλαθί, παγγενεταὸ Θεοῦ πρεσβῆϊον ὄμμα,
 Φρουρὸς βίου, σωτὴρ μεροπῶν, αἰῶνος ἀσπασῶν.

XLVII. — Εἰς τὸν Λεσποτὴν Χριστὸν.

Ἀρτιφάνες, πολιοῦχε, παλαιγενες, υἱὲ νεοττε,
 Λιεν ἰων, προεῶντε, ὑπερτάτε, ὑστάτε, Χρίστι,
 Ἀθανάτοιο Πατρὸς καὶ ὁμοχρόνε, παμπαν ὅμοιε.

XLVIII. — *Laus Christi.*

Proles vera Dei, cunctisque antiquior annis,
 Nunc genitus, qui semper eras, lucisque repertor
 Ante tuse, matrisque parens; quem misit ab astris
 Æquævus Genitor, verbique in semina fustum

| | |
|--|----|
| Virgineos habitare sinus, et corporis arcti | 5 |
| Jussit inire vias, parvâque in sede morari, | |
| Quem sedes non ulla capit : qui lumine primo | |
| Vidisti quidquid mundo nascente creâras. | |
| Ipse opifex, opus ipse tui, dignatus iniquas | |
| Ætatis sentire vices, et corporis hujus | 10 |
| Dissimiles perferre modos, hominemque subire, | |
| Ut possis monstrare Deum, ne lubricus error, | |
| Et decepta diu varii sollertia mundi, | |
| Pectora tam multis sineret mortalia sæclis | |
| Auctorem nescire suum. Te conscia partûs | 15 |
| Mater, et attoniti pecudum sensêre timores. | |
| Te, nova sollicito lustrantes sidera visu, | |
| In cœlo vidêre prius, lumenque secuti, | |
| Invenêre Magi. Tu noxia pectora solvis, | |
| Elapsasque animas in corpora funeta reducis, | 20 |
| Et vitam remeare jubes. Tu, lege recepti | |
| Muneris, ad Manes penetras ; mortisque latebras | |
| Immortalis adias. Nasci tibi non fuit uni | |
| Principium, finisque mori : sed, nocte refusâ, | |
| In cœlum Patremque redis ; rursusque perenni | 25 |
| Ordine purgatis adimis contagia terris. | |
| Tu solus, Patrisque comes : tu Spiritus insons, | |
| Et toties unus, triplicique in nomine simplex : | |
| Quid, nisi pro cunctis, aliud ? quis credere possit, | |
| Te potuisse mori, poteras qui reddere vitam ? | 30 |

XLIX.—*Miracula Christi.*

Angelus alloquitur Mariam ; quo præscia verbo
Concipiat, salvâ virginitate, Deum.

Dant tibi Chaldæi prænuntia munera reges.
Myrrham homo, rex aurum, suscipe thura Dea.

Permutat lymphas in vina liquentia Christus ; 5
Quo primum facto se probat esse Deum.

Quinque explent panes, pisces duo, millia quinque ;
Et Deus ex parvo plus superesse jubet.

Editus ex utero cæcus nova lumina sensit ;
Et stupet ignotum se meruisse diem. . 10

Lazarus e tumulo, Christo inclamante, resurgit ;
Et duræ mortis lex resoluta perit.

Nutantem quatit unda Petrum ; cui Christus in alto
Et dextrâ gressus firmat, et ore fidem.

Exsanguis Christi contingit femina vestem. 15
Stat cruor in venis : fit medicina fides.

Jussus post multos graditur paralyticus annos,
(Mirandum !) lecti portitor ipse sul.

L. — *In Sirenas.*

Dulce malum pelago Siren, volucresque puellæ ;
Scyllæos inter fremitus, avidamque Charybdin,
Musica saxa fretis habitabant dulcia monstra,
Blanda pericla maris ; terror quoque gratus in undis.
Delatis licet huc incumberet aura carinis, 5
Implèssentque sinus venti de puppe ferentes,
Figebat vox una ratem ; nec tendere certum
Delectabat iter reditûs ; odiumque juvabat :
Nec dolor ullus erat : mortem dabat ipsa voluptas.

Anonymi Poëtæ Laudes Herculis.

PIRRIDUM columen, cujus Parnassia magno
 Numine templa sonant, læto, precor, huc age, Phoebe,
 Te conjunge choro : penetralia sancta sororum,
 Et nova Castalios latices per rura petentem,
 Hippocrenæum victorem insistere fontem 5
 Me fac : namque tuam non nunc novus advena turbam
 Ingredior, laurosque gerens, et florea sertis
 Tempora vincta tuis, doctorum munera vatum.
 Testor adhuc veteres, quamvis desuetus, honores.

Alcides mihi carmen erit, germana Tonantis 10
 Progenies, dignus credi post viscera numen
 Semper ob immensos invicti roboris æstus.
 Nec nasci potuisse vacat : nam lucis in ipsis,
 Inclyte, principiis, tardo vix editus ortu,
 Fecisti de patre fidem. Sed cur mihi lentis 15
 Ludis adhuc, Cirrhæe, modis, tenerumque resultans
 Luxuriante leves impellis pollice chordas ?
 Pone habitum, quo mollis amas ; et frondis amatæ
 Linque nemus ; [mollique] exutus tempora lauro,
 Populeâ mecum carmen luctare sub umbrâ. 20

Jam grave plus etiam, quam ventris tempora vellent,
 Alcmenam tendebat onus : sed regia Juno
 Impedit, et partus prohibet, nascique vetabat,
 Ut metus ipse Deum monstret. Nec vivida cœli
 Semina mortales nôrunt sentire latebras, 25
 Nec possunt sufferre moras. Datur inde novercæ
 Materies ; gravibusque odiis augmenta ministrat,
 Quod vinci cœpisse pudet. Mox improba binos
 In tua membra jubet, dum nasceris, ire dracones.

Incumbunt celeres illi, squamosaque jussus 30
 Armata colla furor: nec quamvis maxima tractu
 Tardantur spiris: sequitur pars cætera pectus.
 Tristis Tartareâ vibratur sibilus aurâ.
 Morte rubent oculi; trifidisque horrentia linguis
 Ora sonant; nigrumque fremens levat ira venenum.

Quid nunc invictis fraudes innectere fatis, 36
 Cœlicolûm regina, juvat? cur objicis angues?
 Cur parvo geminos? anne unum posse necari,
 Jam strato Pythone, times? Licet omnia mundi
 Monstra voces, ipsamque arces serpentibus Hydram,
 Defendet Natura Deum; patremque probabit, 41
 Quod non vis constare, Jovem. Jamque irrita tetri
 Jussa parant implere angues; miseroque furore
 In sua fata tument. Cernit tua membra petentes,
 Horrescitque, parens; numenque ignara creâsse, 45
 Mortali pietate timet. Nil, sancta, superbæ
 Pellicis insidias, cœlo modo freta, tremiscas;
 Neve hæc monstra tibi faciant, Alcmena, pavorem.
 Sic mater potes esse Dei. Jam tolle serenum
 Læta animum; tantoque libens hæc adspice vultu, 50
 Ut deceat genuisse Jovem. Depone timorem
 Indignum partu, [natumque exemplar habeto.]
 Cui metuis, nil ipse timet. Nam lumine recto
 Ridebas tu, Dive, truces; animosque superbos
 De genitore tenens, votisque aptissimus orbis, 55
 Gaudebas tantam jam tum meruisse novercam.
 Corripis exiguis mox grandia guttura palmis,
 Et, quamvis teneris, cogens in brachia pondus,
 Corripis, illidens prensos tellure dracones.
 Efferat ætherium, quantum volet, orbis in axem 60
 Latoidas, verosque probet sua fabula Divos,
 Quod Delo jam stare licet: non æqua laborum
 Gloria, nec parili serpentes sorte necârunt:
 Illi unum ferro; geminos hic inermis, et unus.

His cœptis non ulla parat cunabula partûs 65
 Diva tibi. Sed, cum totis jam bruma rigeret
 Imbribus, et solidis hærerent flumina lymphis,

Nudum prægelidis durando firmat in undis.
 Utque rudis primo tentâsti robore gressus,
 Frondosæ deserta vagus penetralia silvæ, 70
 Securâ jam matre, petis; telisque tremendis
 Ludis; et ætherias adducto dejicis arcu
 Aut fundâ violenter aves; noctemque sub astris
 Exigis, et puram fractis bibis amnibus undam.

Immanem interea Nemeæ per lustra leonem 75
 Ipsa Chimæraâ cretum de gente noverca
 In tua depastis armabat vota juvencis;
 Augebatque fero vires, rabiemque juvabat,
 Naturam minus esse putans. Heu! quanta virorum
 Funera! quam multos stravit cum dentibus apros! 80
 Non illum magnæ, viduatæ [montibus,] urbes
 Armorum fregère minis, Martique domando
 Assuetas morsu fudit graviore catervas.

Hunc gravis Eurystheus (nam, te quocumque levares,
 Imperium duri voluit sufferre tyranni, 85
 Sic mundo Fortuna favens) hunc sternere leto
 Imperat. At nullum virtus reticenda per ævum,
 Dignaque sidereos post membra intrare recessus,
 Posse mori quam vile putat! Namque impiger ultro
 Vadis, et immensæ scrutatus devia silvæ, 90
 In nova sanguineos animâsti vulnera rictus.

Admonitâ feritate, jubâ, visuque cruentus,
 Excussis movet arma toris, dubiumque residens
 Infremit. Invadis trepidum, solisque lacertis
 Grandia corripiciens eliso guttura morsu, 95
 Imbellem fractis prosternis faucibus hostem.
 Tunc et flavicomis radiantia tergora villis,
 Ceu spolium, fuso victor rapis. Emicat omnis
 In laudes mox turba tuas; longoque relictâ
 Currit in arva metu. Juvat ire, et libera rura, 100
 Defensosque videre locos, silvamque juvencis
 Jam facilem, et nullis resonantes fletibus agros.

Mænialium petis inde nemus, fletamque colonis
 Arcadium, et steriles raro jam robore silvas.
 Namque hîc immensâ membrorum mole cruentus 105

Indomitus regnabat aper ; soloque tremendus 106
 Corpore, lunatis fundebat dentibus ornos,
 Sternebatque suos lugentia rura colonos.
 Horrebat [trifidis] nigrantia corpora setis,
 Duratosque armos scopulis, totosque per artus 110
 Difficilis potuisse mori : non spicula in illum,
 Nodosumve rapis clavato pondere robur.
 Armati viduatur honos : nec vulnera virtus
 Extemplo tibi facta timet : jamque arripis ultro
 Spumantem, cogisque diem sufferre tuendo, 115
 Atque supinato mirantem lumine vinci
 Argolici victor portas sub tecta tyranni.
 Fama celer toto victorem sparserat orbe,
 Auxiliumque Dei poscebat Creta, cruento
 Victa malo. Taurus, medio nam sidere Lunæ 120
 Progenitus, Dictæa Jovis possederat arva.
 Fulmen ab ore venit, flammisque furentibus ardet
 Spiritus, et terram non coeli flamma perurit,
 Sed flatus monstri. * Dextro jam Siria cessent
 Sidera ; Solque, licet, glaciale frigore victus, 125
 Abstrusum mundo claudat juber, aurea condens
 Lumina, et ignifluo stupefactus in orbe tepescat ;
 Æstus habet Cretam : pereunt silvæque lacusque,
 Graminaque, et fontes sacri : montesque perurit
 Flamma ferox. Idam, Superis spectantibus, ignis 130
 Dissipat ; et magno cunabula grata Tonanti
 Igne suo monstrum, si fas est dicere, vincit.
 Tandem fama celer Dictæa ad litora magnum
 Duxerat Alciden, cum taurum dira minantem
 Excipit, et sævum cornu, flammisque vomentem, 135
 Corripit ; atque artus constringens fortibus ulnis,
 Ignifluos flatus, animamque in pectore clausit.

• • • • •

Desunt multa.

ELEGIA DE PHOENICE,

*Claudiano plerumque, a nonnullis autem
Lactantio, adscripta.*

Est locus in primo felix Oriente remotus,
Quâ patet æterni maxima porta poli ;
Nec tamen æstivos hiemisve propinquus ad ortus ;
Sed quâ Sol verno fundit ab axe diem. 5
Illic planities tractus diffundit apertos ;
Nec tumulus crescit, nec cava vallis hiat.
Sed nostros montes, quorum iuga celsa putantur,
Per bis sex ulnas eminet ille locus.
Hic Solis nemus est, et consitus arbore multâ
Lucus, perpetuæ frondis honore virens. 10
Cum Phaëthonteis flagrâset ab ignibus axis ;
Ille locus flammis inviolatus erat.
Et, cum diluvium mersisset fluctibus orbem,
Deucalionæas exsuperavit aquas.
Non huc exsanguis morbi, non ægra senectus, 15
Nec mors crudelis, nec metus asper, adit,
Nec scelus infandum, nec opum vesana cupido,
Aut Mars, aut ardens cædis amore furor.
Luctus acerbus abest, et egestas obsita pannis,
Et curæ insomnes, et violenta fames. 20
Non ibi tempestas, nec vis furit horrida venti ;
Nec gelido terram rore pruina tegit.
Nulla super campos tendit sua vellera nubes ;
Nec cadit ex alto turbidus humor aquæ.
Sed fons in medio est (quem Vivum nomine dicunt) 25
Perspicuus, lenis, dulcibus uber aquis ;

Qui, semel erumpens per singula tempora mensûm,
Duodecies undis irrigat omne nemus.
Hic genus arboreum, procero stipite surgens,
Non lapsura solo mitia poma gerit. 30
Hoc nemus, hos lucos avis incolit unica Phœnix,
Unica; sed vivit morte refecta suâ.
Paret et obsequitur Phœbo memoranda satellites:
Hoc Natura parens munus habere dedit.
Lutea cum primum surgens Aurora rubescit, 35
Cum primum roseâ sidera luce fugat;
Ter quater illa pias immergit corpus in undas;
Ter quater e vivo gurgite libat aquam.
Tollitur, ac summo considit in arboris altæ
Vertice, quæ totum despicit una nemus; 40
Et, conversa novos Phœbi nascentis ad ortus,
Exspectat radios, et jubar exoriens.
Atque, ubi Sol pepulit fulgentis limina portæ,
Et primi emicuit luminis aura levis;
Incipit illa sacri modulamina fundere cantûs, 45
Et mirâ lucem voce ciere novam;
Quam nec ædoniæ voces, nec tibia possit
Musica Cirrhæis assimilare modis;
Sed neque olor moriens imitari posse putetur,
Nec Cyllensæe fila canora lyræ. 50
Postquam Phœbus equos in aperta refudit Olympi,
Atque orbem totum protulit [usque means;]
Illa ter alarum repetito verbere plaudit,
Innarrabilibus nocte dieque sonis.
Atque eadem celeres etiam discriminat horas; 55
Igniferumque caput ter venerata, silet;
Antistes nemorum, luci veneranda sacerdos,
Et sola arcanis conscia, Phœbe, tuis.
Quæ postquam vitæ jam mille peregerit annos,
Ac se reddiderint tempora longa gravem, 60
Ut repararet lapsum fati vergentibus ævum,
Assueti nemoris dulce cubile fugit.
Cumque, renascendi studio, loca sancta reliquit,
Tunc petit hunc orbem, Mors ubi regna tenet.

- Dirigit in Syriam celeres longæva volatus, 65
 Phœnices nomen cui dedit ipsa Venus.
 Secretosque petit deserta per avia lucos,
 Hic, ubi per saltus silva remota latet.
 Tum legit ærio sublimem vertice palmam, 69
 Quæ Graium "Phœnix" ex ave nomen habet:
 In quam nulla nocens animans perrumpere possit,
 Lubricus aut serpens, aut avis ulla rapax.
 Tum ventos claudit pendentibus Æolus antris,
 Ne violent flabris æra purpureum;
 Neu, concreta Noto, nubes per inania cœli 75
 Submoveat radios Solis, et obsit avi.
 Construit inde sibi seu nidum, sive sepulcrum:
 Nam perit, ut vivat; se tamen ipsa creat.
 Colligit hinc succos et odores, divite silvâ
 Quos legit Assyrius, quos opulentus Arabs; 80
 Quos aut Pygmæse gentes, aut India carpit,
 Aut molli generat terra Sabæa sinu.
 Cinnamon hinc, auramque procul spirantis amomi,
 Congerit, et mixto balsama cum folio.
 Non casia mitis, nec olentis vimen acanthi, 85
 Nec thuris lacrymæ, guttaque pinguis abest.
 His addit teneras nardi pubentis aristas;
 Et sociat myrrhæ vim, panacea, tuam.
 Protinus instrato corpus mutabile nido,
 Vitalique toro membra quieta, locat. 90
 Ore dehinc succos membris circumque supraque
 Injicit, exsequiis immoritura suis.
 Tunc inter varios animam commendat odores:
 Depositi tanti nec timet illa fidem.
 Interea corpus, genitali morte peremtum, 95
 Æstuat, et flammam parturit ipse calor;
 Ætherioque procul de lumine concipit ignem.
 Flagrat, et ambustum solvitur in cinerem:
 Quos velut in massam cineres in morte coactos
 Conflat; et effectum seminis instar habent. 100
 Hinc animal primum sine membris fertur oriri;
 Sed fertur vermi lacteus esse color.

- [Creverit immensum subito cum tempore certo,]
 Sese ovi teretis colligit in speciem.
 Inde reformatur, qualis fuit ante, figura ; 105
 Et Phoenix ruptis pullulat exuviis ;
 Ac velut agrestes, cum filo [ad saxa] tenentur,
 Mutari tineæ papillione solent.
 Non illi cibus est nostro concessus in orbe ;
 Nec cuiquam implumem pascere cura subest. 110
 Ambrosios libat coelesti nectare rores,
 Stellifero teneri qui cecidère polo.
 Hos legit, his alitur mediis in odoribus ales,
 Donec maturam proferat effigiem.
 Ast, ubi primævâ coepit florere juventâ, 115
 Evolat, ad patrias jam reditura domos.
 Ante tamen, proprio quidquid de corpore restat,
 Ossaque, vel cineres, exuviasque suas,
 Unguine balsameo, myrrhâque et thure soluto,
 Condit, et in formam conglobat ore pio : 120
 Quam pedibus gestans, contendit Solis ad urbem,
 Inque arâ residens, ponit in æde sacrâ.
 Mirandam sese præstat, præbetque videnti :
 Tantus avi decor est, tantus abundat honor.
 Principio color est, qualis sub sidere coeli, 125
 [Mitia quem croceo Punica grana legunt ;]
 Qualis inest foliis, quæ fert agreste papaver,
 Cum pandit vestes Flora rubente solo.
 Hoc humeri pectusque decens velamine fulgent :
 Hoc caput, hoc cervix, summaque terga nitent. 130
 Caudaque porrigitur fulvo distenta metallo,
 In cujus maculis purpura mixta rubet.
 [Clarum inter pennas insigne est desuper, Iris
 Pingere ceu nubem desuper alta solet.]
 Albicat insignis mixto viridante smaragdo ; 135
 Et puro cornu gemmea cuspis hiat.
 Ingentes oculi ; credas geminos hyacinthos,
 Quorum de medio lucida flamma micat.
 Æquatur toto capiti radiata corona,
 Phœbei referens verticis alta decus. 140

Crura tegunt squamæ fulvo distincta metallo; 141

Ast ungues roseo pingit honore color.

Effigies inter pavonis mixta figuram

Cernitur, et pictam Phasidis inter avem.

Magna etiam, terris Arabum quæ gignitur ales, 145

Vix æquare potest, seu fera, seu sit avis.

Non tamen est tarda, ut volucres, quæ corpore magno

Incessus pigros per grave pondus habent;

Sed levis et velox, regali plena decore.

Talis in adpectu se tenet usque hominum. 150

Convenit Ægyptus tanti ad miracula visus;

Et raram volucrem turba salutat ovans.

Protinus exculpunt sacrato in marmore formam;

Et signant titulo remque diemque novo.

Contrahit in cœtum sese genus omne volantûm; 155

Nec prædæ memor est ulla, nec ulla metûs.

Alituum stipata choro, volat illa per altum;

Turbaque prosequitur munere læta pio.

Sed, postquam puri pervenit ad ætheris auras,

Mox redit ista; suis conditur ille locia. 160

At fortunatæ sortis filique volucrem!

Cui de se nasci præstitit ipse Deus.

Femina vel mas hæc, seu neutrum, seu sit utrumque,

Felix, quæ Veneris fœdera nulla colit.

Mors illi Venus est: sola est in morte voluptas: 165

Ut possit nasci, appetit ante mori.

Ipsa sibi proles, suus est pater, et suus hæres;

Nutrix ipsa sui, semper alumna sibi;

Ipsa quidem, sed non eadem, quia et ipsa, nec ipsa
est;

Æternam vitam mortis adepta bono.

FINIS.

3

